


6/3.30

R40442



Digitized by the Internet Archive
in 2015

https://archive.org/details/b21964063_0002

ANTONII DE HAEN,

QUONDAM

S. C. R. APOSTOL. MAJESTATI A CONSILIIS ET ARCHIA-
TRI, MEDICINÆ IN ALMA ET ANTIQUISSIMA UNIVERSI-
TATE VINDOBONENSI PROFESSORIS PRIMARIJ &C.

PRAELECTIONES

IN


HERMANNI BOERHAAVE

INSTITUTIONES PATHOLOGICAS.

COLLEGIT, RECENSUIT, ADDITAMENTIS AUXIT, EDIDIT

F. DE WASSERBERG.

TOMUS II.




V I E N N Æ,

APUD RUDOLPHUM GRÆFFER. 1780.

Ὁ Βίος βραχύς, ἡ δὲ τέχνη μακρά.

ΗΙΕΡ. Αῤῥ. Ι—Ι.



HUMORUM MORBI.

Pathologia incipiebat a generali quadam consideratione *de natura morbi*, docebatque nos, morbos quoscunque esse functiones læsas.

Functiones has divisimus in classem quintuplicem, quarum 1^ama vitales comprehendebat, 2^ada animales, 3^atia naturales, 4^{ta} privatas, publicas, 5^{ta} eas, quæ ad sexum proprie pertinebant.

Considerabat Pathologia morbum, i. e. functionem læsam, majorem minoremve esse, prout plus minusve esset illa functio læsa. Hinc a perfectissima sanitate usque ad ipsam vitam minimam enumerabat omnes varios gradus læsæ functionis, cujusque classis : declarabat

rabat etiam morbum eo esse graviores periculosioresque, quo functio esset magis ad vitam necessaria; adeoque læsam functionem vitalem esse gravissimam omnium aliarum læsarum functionum: esse quoque discrimen majus, quo eadem functio pluribus gradibus a sana descivisset: idem in omnibus aliis functionibus læsis esse considerandum: tandem morbum eo graviores exinde esse, quo plurium functionum vitiata exercitia essent.

Hinc Pathologiæ doctrina iustissime concludebat, 1) sanitatem esse facultatem corporis, aptam omnibus actionibus exercendis.

2) Omnes effectus actionum illarum revocari posse ad motus determinatos, & ad inmutationem adsumtorum.

3) Statum corporis viventis, qui exercendæ actionis cujuscunque facultatem tolleret, morbum vocari.

4) Morbi idæam esse absentiam ejus, quod ad exercitium possibile cujuslibet actionis requireretur: vel præsentiam talis rei, quæ actionis exercitio repugnaret.

Hinc latus patebat campus multa dicendi; sed in quo simul objectorum sive functionum ingens diversitas, partiumque, quæ eas efficerent, numerosa varietas pareret confusionem; nisi justus inveniretur ordo, singula seorsim ita tractandi, ut cognitio vera simplicium ad cognitionem compositorum sponte duceret.

Hinc apta divisione Pathologia considerare jubet 1) morbos solidorum, 2) fluidorum, 3) ex his binis compositos, tam communes, quam viriles fœmineosque.

Verum primam examinando ostendebamus mox, solidas illas partes maxime compositas esse; adeoque vago tantum & incondito sermone de his agi posse, nisi

nisi primo solida evolverentur in suam simplicissimam originem.

Morbos proin considerabamus 1) simplicissimos, *similares* dictos, in fibra ultima, ex meris elementis, & interposito glutine composita. A fibra progrediebamur 2) ad membranam minimam, ex fibris hujusmodi junctis vel intertextis factam; 3) contemplabamur ex tali membrana in se convoluta vas minimum; 4) intuebamur membranam contextam ex talibus canaliculis, qui fungerentur usu fibrarum; 5) progrediebamur ad canales majores corporis nostri fabricatos ex tali n. 4. descripta membrana vasculosa; 6) tandem examinavimus morbos solidos simplicissimos in iis partibus solidis, quæ ex canalibus, distendente humore orbis, compressis ac concretis constant, atque una cum proprio vase coercente concreto in unam quasi partem crassiores abeunt; ut, quando inflammatio magna est in vasis; ut, quando post peripneumoniam, vel vulnera thoracis pulmo cum latere adfecto coalescit.

His consideratis videbamur jam via regia, tuto gradu ad intimam morborum quorumcunque naturam penetraturi: sed, en nova mox offendicula! Considerantes modo exposito rem, fluida simul atque solida nobis ob oculos obversabantur. Delectus igitur fieri debebat, ne oriretur confusio.

Ducti hinc eousque morbi, a simplicissimis sumto initio dividebantur in morbos organicos, & in morbos fluidorum.

Morbus organicus dicebatur morbus partis compositæ ex simplicissimis, quæ pars valeretur actionem, motu humorum perficiendam, munere instrumenti peragere, aut aliud quoddam munus vi suæ conformationis efficere; nulla peculiari ratione habita ad humorem ea contentum.

Tractatus ille multum nos occupavit, & deprehendimus tot tantosque morbos organicos, sive solidarum partium huc esse referendos, ut multitudo nos fere confunderet.

Tandem secundum rerum seriem cunctos absolvimus; unde nunc ordine haud turbato læti ad morbos transeamus fluidorum.

§. 714. *Ut rite intelligantur deinde morbi humorum, atque adcurato digerantur ordine, scire est, doses in iis requisitas esse vel universales, cuicunque liquori necessarias; vel singulares, quibus donantur humani; denique privati hujus illiusve singularis hominis indolem in humore constituentes. Universales quidem sunt, ea parvitas partium, quæ omnem fugit sensum, nudum; tam parvus nixus in contactum mutuum, ut minima vi sensibili superari queat, ea superficierum lubricitate, ut se invicem vix implicent &c.*

Liquida omnia habent quasdam proprietates, quibus inter se similia sunt: hæc jam hic enumerantur. At, si quis his cognitis autumet, se jam naturam omnium liquidorum ad amussim capere; næ ille infinitis abest a vero parasangis; etiamsi ARCHIMEDIS instar queat liquidorum proprietates communes enumerare? Explicet ille modo ex hac cognitione, cur guttula olei ex alto in aquæ superficiem cadens dispergatur in millenas guttulas, tandem iterum coeuntes. Lex ARCHIMEDIS hic nil docet. Est dos quædam oleo propria, non ita aliis liquoribus. Alcohol vini purissimum est oleo miscibile, miscibile aquæ. Sed misce alcohol primo cum aqua; nunquam miscebis bene dein cum eodem oleum. Quid ni? Est alkoholi quid proprium.

In solidis eadem res est. Frigidum succini frustulum, dum propius adduco ad minima segmentula charutulæ, nihilo plus efficiet, quam frustulum ligni: idem succinum, frictu calens, segmentulis admoveo, mox
illa

illa adhærescent succino. Utique ex legibus cuique solido communibus hoc phænomenon haud explicabo: moles enim, durities, figura, motus, gravitas, hic nil explicant. Si dicas: succinum non faciebat hoc frigens adhuc, sed tritu calens, ergo calor facit, ut adtrahat segmentula; velis modo frustulum ligni tritu vel frictu calefacere, ac experiri an quid adtrahat: deceptum te videbis.

Præter hæc omnia, ipsi canales, quos humores nostri permeant, peculiari proprietate donati sunt. Ita habent ex innata sibi vi canales potestatem, faciendi ad testes semen, ad mammas lac, ad cerebrum liquidum nervosum &c.; adeo, ut liquidorum natura varia sit, pro varietate vasorum, quibus secernuntur.

Ergo liquida corporis humani non pure & exquisite sequuntur leges explicatas hydraulicas & hydrostaticas; verum tantummodo cum quadam recessione, quæ est in ratione diversitatis aquam inter aliosve liquores, & nostros humores. Non ergo reguntur liquida nostra legibus (solis illis), quas tulit ARCHIMEDES, vel HERO, qui egit de liquidis compressionem infinite renuentibus, per tubos, infinite resistentes, motis: id enim credentes crasse erraremus.

Recordor Viri, Practici annosi, Professoris Medicinæ practicæ publici, famosi; qui, calorem in nostro corpore neutiquam ab adtritu oriundum demonstraturus, sumsit ex cupro fabrefactam arteriam pulmonalem, innumeris ramificationibus & tubis tandem minimis, fere capillaribus terminatam. Sumsit dein lac, ceu liquorem sanguini proximum, fortiter id per machinam illam cupreum adegit, dumque ex minimis tubulis ejectum foret, exsultabundus nobis illud examinandum dabat, æque frigidum, ac dum injiceretur. Certe mirabamur omnes bonum Virum, qui in usum Mechanices, Hydraulices, & Hydraulices in Medi-

cinam inductum perpetuo invehebatur jam, ut negaret, calorem adtritui deberi, principiis utens, quæ quidem liquido actuali, sed móto per vasa cuprea infinite resistentia, parum adeo elástica, convenirent. Errore utique vix condonando, ex præjudicatis opinionibus tantum oriundo!

Hinc textus dicit: *scire est dotes &c.*

Sed neque hoc sufficit, quod præter universales omnium liquidorum dotes cognoscamus etiam liquidorum humanorum particulares: nam liquida corporis humani non sunt in omnibus hominibus eadem; unde textus prosequitur: *Denique privati — — — constituentes.* Est enim in Cajo alius quam in Titio sanguis, alia bilis, alius liquor salivialis, alia sæpe urina &c. Ita quidem, ut ille homo cum suo proprio sanguine & reliquis humoribus rite valeat, alterque cum suo; quorum alteruter alterutrius humoribus ægrotaret. Unde ridendus ille prioris labentis sæculi error *transfusionis*, qua vellent Medici ex animali sano sanguinem infundere homini ægroto, immo & hominis sani ad mortem damnati sanguinem infundere ægro, illiusque ipsius ægri sanguinem homini illi sano. Galli, Angli, Germani, Itali in hanc opinionem prolapsi sua per transfusionem facta miracula passim propalabant, acriterque inter sese decertabant, ut quisque suæ nationi inventi adfereret palmam, immortalitatem fere hominibus per artem illam conciliari posse autumantes. Sed, ut famâ rem in altum evexerat, sic & eandem mox turpis in abyssum depressit denuo infamia, ob truculentas passim inde observatas historias: ita, ut ob audaciam Medicorum, Regis Galliæ necessarium fuerit edictum, quo a facinore hoc desistere jubebantur. Obliti sane illi omnes fuerunt mandati Hippocratici a Celso relati. „Mederi oportere, communia & propria intuentem.“

Si

Si quis velit videre, quæ pro infusione & contra eam scripta fuerint, legat in compendium redactam historiam, collectam ex omnium nationum Scriptoribus apud SCULTETUM in *Armament. chirurg. adpend. ad T. II. & 12.*

§. 715. *Qui omnes morbi tamen revocari facile possunt ad copiam vel qualitatem læsam, si fluida quidem in se spectentur.*

§. 716. *Si autem considerentur, quatenus coërcentur in solidis definitis, tunc loco inprimis, aut proportionem peccare deprehenduntur. Utraque hac ratione venerandus Auctor consideraturus humores pergit:*

§. 717. *Humoris boni ea abundantia, quæ lædit functiones, vocatur plethora.*

BOERHAAVIUS a §. 715—734. id est, per totos 20 §phos conatus est ideam dare distinctissimam humorum nostrorum, considerando eosdem omni prorsus possibili sub adpectu. Copiam primo in universum peccantem considerat: tum sanguinis non copia, sed qualitate peccantis naturam. In ea qualitate examinat ipsam intimam naturam ex globulis variarum serierum constantem, consideratque ipsos, varios admodum, globulos morbosos: & quia interstitia globulorum angulosi implentur, indagat etiam angulosarum sive acrium partium naturam; quæ copia debita requiruntur in sanguine; aucta copia peccant. Immo angulosa considerat tanquam nata ex globulis, suam sphæricam figuram mutantibus in acutam.

Consideratis separatim his, adgreditur morbos ex tota massa vitiosa oriundos. Denique morbos notabiles eos, qui oriuntur ex humoribus vasa obstruentibus, vel vase perrupto effluentibus in varia vel naturalia, vel præternaturaliter facta vacua. His factis tota de humoribus morbofis absoluta doctrina est. Prosequamur ordine singula.

Incipit B. ab abundantia sola humoris cætera boni.

Humoris boni ea abundantia, quæ lædit functiones, vocatur plethora. Πλήγω, inpleo; inde πληθωρα, inpletio. Voce hac post GALENUM intellexere Medici humores quidem bonos, sed copia auctiores, ita quidem, ut si vel minima de causa aut augerentur, aut rarefierent, morbos producerent.

HELMONTIUS, Vir acutissimi ingenii, at vero præjudicatarum opinionum tenax, quum in scholis medicis multa inepta cernebat, omnes fere Antiquorum definitiones ineptiæ infimulabat, ipsamque propterea vocem plethoræ irridebat, atque e Medicina expunctam volebat. Maxime, quum in v. s. invecus, acriter plethoram ad entia rationis dicta, i. e. ad non existentia, relegabat. Humores, inquit, supponuntur boni, ergo morbus necdum adest. Sed supponitis hos humores facere morbum: ergo, si morbum faciunt, degeneraverunt a bonitate sua, & nequeunt ultra boni adpellari. — Nimia certe HELMONTII subtilitas, haud satis adtendentis ad veram vocis plethoræ definitionem. Non legit, nisi animo præoccupato HIPPOCRATIS aph. I—3. „In hominibus se exercentibus labore valido, in athletic, boni habitus, (vel pro bona habita valetudo) si ad summum progressi sunt, periculosi sunt. Non enim possunt in eodem manere, consistereque, sive quiescere, statu. Quum vero in eodem statu hi abundantes humores boni inmoti perstare nequeant, aut ultra in melius mutari, quum sint boni; & tamen quamdam mutationem subire debeant, necesse est, ut, si mutantur, mutantur in deterius.“

Certe mutatio his bonis humoribus contingat necesse est; quum consuevit ab aliquo retro tempore sanguis copia augeri: jam aucta copia est adeo, ut, si plus augeatur, vasa nimium infarciat, & lassitudinem, obstructions, i. e. morbos producat; & tamen augebitur,

bitur, quia viscera chylopoëtica, hucusque bona, pergunt bonum chylum subpeditare.

Quin si copia non augeatur, si homo idem bonis adeo plenus humoribus sese movere cogatur aliquanto magis; vel aër fiat calidior, tunc a calore rarefacti humores idem efficient ac si copia essent aucti.

Quæ quum ita sint, addit HIPPOCRATES l. c., Horum igitur causa bonum habitum solvere confert, haud cunctanter, quo rursus renutritionis principium accipiat corpus. “ Si pergat nutriri, dein ab evacuatis vasis nil est timendum, quia spatium jam conceditur locando novo chylo.

Igitur videtur vox *plethora* servanda in Medicina, & usum magnum habere. — Bonos diximus in *plethora* humores esse, ne eam confundamus cum plenitudine alia morboſa a pravis humoribus oriunda, quæ vocatur *κακοχυμία*, mala humorum commixtio, de qua poslea.

Plethoram VV. ingeniose dixerunt esse *πρὸς ἀγγεία*, & *πρὸς τὴν δύναμιν*: *plethoram ad vasa*, & *plethoram ad vires*. *Plethoram ad vasa* vocabant eam, ubi vasa humoribus, bonis quidem, sed adeo copiosis scatent, ut fere disrumpantur, vel saltem, ut nimia eorum distensione functiones utcunque lædantur. *Plethoram ad vires* adpellabant, quando vasa tantam humorum bonorum copiam continebant, ut cor, sive vis vitalis, eosdem movere ægrius, propellereque posset. Ita, ut momentum movendum esset majus potentia movente.

Sed si bene hoc capitis, intelligitis simul, quod aliam ob causam, quam ob nimios bonos humores, queat *plethora ad vires* oriri. Ponamus enim, corpus habere bonos humores, sed nondum nimios: ponamus jam, in eo corpore fieri cor languidius. Nascetur illico *plethora ad vires*, quia moles movendo-

rum plus resistet, quam potentia movens propellere queat.

Ergo videtis, quod plethora ad vasa absolute dicatur plethorâ, plenitudo nimia; plethora ad vires, tantum relative ad molem movendorum, & moventem potentiam. Unde GALENUS c. 3. de plethora scribit, duas esse plenitudinis species; vel ad virium robur & facultates corporis illam sustentantes, vel ad fuscipientium capacitatem.

Quæ intelligitur concepta bona chylosi, hæmato-poësi concurrentibus; una cum pauciori exhalantium dispendio. Solida inevitabili necessitate per ipsius sanitatis actiones continuo deteruntur, fluidaque diffantur. Corpus autem nostrum ita a Creatore fabricatum est, ut per ingesta tantum & tale restituatur, quantum & quale perditum sit. Si quotidie nec plus, nec minus, nec aliud restituatur, quam quod perditum erat, sanitas adest quam maxime inlibata. Evincunt id SANCTORII observata, de quibus, suo loco.

Sed si plus adponatur, quam deperditum est, fiet sensim superflui accumulatio. Causæ porro, quæ id faciant, pulchre a B. in *Aph.* 106. enumerantur, ubi sic ait: *quo spectat vis contractilis viscerum chylopoëorum magna, ut & in corde & arteriis, simulque laxior venarum & cæterorum vasculorum compages.* Si enim viscera, quæ chylo parando inserviunt, ut os, œsophagus, ventriculus, intestina, maxime tenuia, pancreas, vasa succum gastricum & entericum parantia, lien forte quoque, & hepar, & omentum, quatenus hæc tria viscera bili, cœu necessario chylopoëseos instrumento, conficiundæ adlaborant; dein inprimis pulmones; si, inquam hæc omnes partes & viscera vim habeant contractilem magnam, i. e. si sint fortia & robusta, si fibrarum fortium compage donata; si præterea cordi & arteriis idem adsit robur vigorque: deinde,

de, si ab altera parte venosum systema adeo laxum sit, ut venæ, quæ naturaliter arteriis laxiores, jam distendenti liquido facilius cedant, illudque superfluum intra sua cava locent: utique talis plethoræ signa & effectus tunc adsunt.

(Sed nonnunquam sanguis est nimius inter cor & extremitates arteriarum capillares in venis. Tunc debilitas adest, sanguine in arteriis compresso, & vix notabilis diastole aut systole arteriæ: venæ tunc ab arteriis compressæ, ut vix sanguinem transmittant. Venæ sectione magna aufertur resistentia ad fines capillares; sanguis arteriosus cogitur vacuum, quod in vena fieret, implere; evacuantur arteriæ, & pulsus viresque insurgunt.)

Huc faciunt cibi blandi, facile in chylum resolvendi; ex cerealibus bene maturis, rite subactis fermentatisque; jure carniū, carnibus juniorum animalium, oleribus mollibus, aliaque; quæ omnia, quum vasa minus stimulent, ea in motum non ita adigunt, quam quidem paullo acriora alimenta, quæ stimulando plus & movent & dissipant.

Somnus multus. Somnus moderatior auget motum cordis & arteriarum, viscerumque; nec destruitur ille motus actione sensuum, & motuum voluntariorum, qui tunc plane quiescunt. Hinc 1) humorum vitalium circuitus validior, æquabilior, per canales tunc temporis laxiores, liberiores, apertiores, varia musculorum actione jam non impeditos. Hinc impulsus in vasa lateralia minor quidem, at æquabilior: fistulæ laterales sensim replentur, minus adluuntur earum interiora liquidis; tandem fere quiescunt una cum collectis liquidis suis. Chyli porro materies in sanguinem, serum, humores tenuiores, in nutrimentum optime commutatur; fit minor adtritio solidorum, augetur perspiratio, reliquis secretionibus inminutis: optima refe-

ctio perdit, & nova productio & ad accumulatio spirituum animalium in omnibus humoribus, quoad materiem; in vasis minimis quoad repletionem. v. BOERH, *Instit. Med. cap. de somno & vigil.* §. 596—600.

Videtis quidem, somnum bonum, nec prolixior omnia generandæ plethoræ certo quodam sensu subpeditare; sin vero is sit protractior, perspiratio, demonstrante SANCTORIO imminuitur. Hinc fit corpus grave, repletum, & ab accumulatis humoribus molestum, plethora demum noxia nascitur.

Animus sedatus. Iterum apud SANCTORIUM videre potestis, quam mire mutetur perspiratio, & quæcunque excretio ab animi pathematibus & motu. Unde homo molliter vivens, ad quævis ἀδίαφορος, otiosus, longe magis est ad plethoram dispositus, quam alius, qui validos animi adfectus semper habet, & curas rodentes. Adtenuant, ait OVID. *Metam. l. 3.* vigiles corpus miserabile curæ. — Motus ac velociorem humorum circulationem faciunt, adeoque augment perspirationem. Curæ autem mordaces & anxie aciores reddunt humores, adeoque stimulos augment, & curæ vehementer auctæ efficiunt, ut corpus marcescat. Unde SALOMON *Prov. 5.*: Cura rodit, sicut tineæ vestem. — Hinc bene GALENUS in *aph. I—3.* qui absolute bonus habitus nominatur, quem multi agricolæ, terris fodiendis, segetibus metendis, & cæteris ad vitam elaborandis, sortiuntur, ad inmoderatam repletionem non provehitur.

Quies musculosa. Quod jam partim explicuimus de somno agentes. Dixit pater HIPPOCRATES: „ Ut nutrimentum est, ita & labor sit. “ Pluribus in locis idem repetit: *l. I. de vict. rat. sanor.* „ Homo comedens sanus esse non potest, nisi etiam exerceatur laboribus; “ & *l. 3.*: „ considerandum est, utrum cibi labores, an vero cibos superent labores? An moderate

rate inter se habeant: quodcunque enim superatur, ex eo morbi contingunt, Ex mutua vero inter se æqualitate sanitas adest.“ — Ratio horum jam data est. Motu exercens se homo longe magis eo, qui quiescit, perspirat, & alia præterea dissipat; tum humores crassiores tum spiritus. Laboribus intensioribus exantlatis homo multo invenitur ad stateram levior. Animalia quæ diu in pratis vel stabulis hæserunt, plethorica fiunt, plena humoribus, plena oleo: ast ad urbes remotiores missa mactanda, deprehenduntur, teste LISTERO & DOUVERNEYO, de plethora haud parum amisisse; jacturam etiam passa fuisse medullæ & pinguedinis.

Quæ porro de quiete musculosa dixi, haud ita velim accipienda esse, ac si statuerem, musculos illos in quiete nihil prorsum agere. Minime. Nam duplex est consideranda tensio musculorum: 1) quæ fit ab imaginatione actuosa; 2) quæ oritur ab æquilibrio. In quiete musculosa hominis, sive vigilantis, sive dormientis, musculos non plane arbitror inertes, non plane paralyticos. Quiescunt musculi v. g. splenii, complexi, recti majores, recti minores, obliqui majores, obliqui minores, interspinati &c.; quiescunt, inquam, respectu humanitatis, quatenus ab *ενοχου* haud agitantur; sed non quiescunt quatenus servant æquilibrium in partibus; quatenus v. c. caput ita tendunt, ut non collabascant. Hinc HIPPOCRATES & omnes boni Practici ita horrent illos collapsos musculos in acutis, ubi caput a trunco vix sustinetur; ubi totum corpus quasi concidit, & in se devolvitur. Sic, opinor, intelligimus, quo sensu dicantur musculi inertes esse.

Consuetudo mittendi sanguinis naturalis, artificialis. Paradoxon multis hoc videri potest, tamen res verissima est. Egregius LISTERUS in excursu Londino Parisios facto inquirens in carnes alimentares Gallorum

& Anglorum, narrat, Londini vitulos faginandos sanguine multum orbari, tum lacte inpleri, iterum cruore spoliari, eoque facto lacte faginari, (exhibita etiam multa creta) hac lege eosdem fieri plethoricotatos.

Corpora foeminea, quibus singulo mense periodicus fit sanguinis fluor, corpora virilia, quibus statis temporibus largæ fiunt ex naribus vel hæmorrhoidalibus vasis hæmorrhagiæ, si interim bene lauteque nutriantur, plethorica quam maxime fieri observantur. Eadem se habent ratione homines illi, qui consuetudine quadam ducti sæpius in anno venam sibi tundi curant.

Inl. VAN SWIETEN in Comment. ad cap. de plethora testatur, novisse se foeminam, quæ anni spatio ultra 6000 libras venæ sectionem passa, tamen paucorum mensium spatio 150 libr. pondere aucta inveniretur; quumque tamen renato sanguine continuo eadem ejus mittendi urgeret necessitas, ita demum solutum fuit corporis robur & vigor, ut hydropica demum fieret.

(Monstravit DODART in *Mem. de l'Acad. R. des Sc. de Paris* 1707., intra quinquiduum hominem recuperare uncias 14 sanguinis amissi. Instantiam repetitæ sæpissime phlebotomes singularem magis nondum vidi, quam in defuncta ante aliquot annos *Comitissa de K***N*, cui quavis hebdomada bis, subin ter vena secanda, quovis die bina clysmata injicienda erant. Decubuit per multos annos post prægressum infeliciorem partum adfixa lecto: stragulis multum tecta, æstivis summis caloribus fenestram aperiri vetuit, fornacem calefieri curavit. Præter summam debilitatem, ut pedibus erecta insistere omnino nequiret, perpetuumque frigoris sensum, (quæ sane phænomena a toties repetitis venæsectionibus, continua quiete muscutorum in mollissimo lecto &c. facile repetieris) bene valuit, comedit &c.)

Ho-

Homines non plethorici, blandos quum habeant humores, olei multum in suis vasis gerunt ac fecerunt. Pingue ubique adfutum comprimit arterias. Arteriæ plenæ sanguine reprimunt contra pressionem pinguitudinis. Arteriis sæpe depletis, vis pinguedinis prævalet arteriarum distensionem, & arctat arterias: membrana adiposa lucratur majus spatium; & quo sæpius hoc repetitur, eo plus. Unde tandem non amplius plethorici toto corpore dicendi sunt, quum vasa parum sanguinis contineant, & vere dici possint sua pinguedine suffocari.

Causa ergo, quod ita pinguescerent, plethora quidem fuit, sed ea plethora eandem ob causam tandem deficit, & fit sanguinis penuria in partibus a corde remotis: sanguis hic præ pinguedine pressus interiora vasa, ubi tanta pinguedo non adest, magis inplet, & diros in illis efficit plethoræ effectus.

Tandem plethoram facit *membri majoris truncatio*: v. g. brachii, cruris, &c. Nam viscera chylopoëtica manent eadem, dum interea magna pars ablata non amplius nutritur. Ergo id totum, quod viscera conficiunt, impenditur in partes reliquas.

Plethora sic cognita sequitur, quoties errent Medici in ea statuenda.

An plethoram designat magnus fluor, sæpeque repetens hæmorrhoidum, aut menstruorum?

Resp. Non; potest enim oriri a nimia tenuitate vasorum ibi loci positorum, aut ab universali tenuitate humorum, aut acrimonia rodente, ac diabrosin faciente. Tamen Medici solent certo certius hinc concludere hominem esse plethoricum.

An homo macilentus v. s. bene sustinens ideo magis sanguine plenus, quam torosior a v. s. in animi deliquium lapsus?

Resp. Non; idiosyncrasia id facit.

An venæ magnæ plethoram denuntiant ?

Resp. Nunquam, nisi adsint signa arteriarum simul plenarum. Alioqui omnes Hydropici essent Plethorici.

An homo colorem roseum habens ideo plethoricus ?

Resp. Non semper : in Phthificis idem observatur.

Diagnosis jam plethoræ hac lege formatur. Ubi novit Medicus causarum antea recensitarum aliquas prægressas esse ; ubi in toto corpore magna rubedo adest, iis potissimum in locis, ubi vasa mero tecta sunt epithelio ; ut in angulis oculorum, interna parte palpebræ, tunica adnata, narium interioribus, faucibus, ore, labiis &c. : si magnus ad extrema usque calor obtineat : si venæ inflatæ sint, pulsusque fortis ac plenus : si idem homo a majori motu, vel aucto calore tempestatis, crapula, epulis magis opiparis, sentiat in omnibus partibus corporis musculosis mollem, plenum, distendentemque eundem tumorem ; simul nonnullam paresin, sive movendi difficultatem, torporem : si incipiat segnior solito esse, soporosior ; lacrymabundis fere præ humiditate oculis : tunc ille plethoricus dici potest, jam incipiens ægrotare ; estque tunc in illo statu, ut possit ab ipsa vertigine ad lethalem apoplexiam *ἰχθύν* perducī, vel sputo sanguinis teterrimo affici, aut in febrim ardentissimam incidere, phrenitidem &c. nisi vel arte juvemus illum ; vel forte spontanea superveniat narium hæmorrhagia ; aut hæmorrhoidum, eaque diutissime durante corripiatur. Hic certe, si quis unquam, casus est, in quo ars medica possit debeatque præsentem solvere morbum, graviores præcavere futuros. Hinc Hipp. *Aph. cit.* „ Horum igitur causa bonum habitum solvere confert haud cunctanter.“ Venæsectione scilicet, purgatione, ut & derivantibus, ut pediluviiis, a capite avertentibus.

In

In omnibus morbis a plethora ortis venæ sectio juvat. Ita & HIPPOCR. *Aph.* I—3. jubet: sed hæc non curat dispositionem ad regenerandam eam. Unice quod curat, est ὡς τροφή καὶ πρὸς. Sed Medici non Hippocratici jubent, si quis a morbo per plethoram orto reconvalescat, ut sibi ter, quater, sexies in anno curet venam secari, & non exerceat motum. Hinc vero fit, ut primo plethora adcreseat, quia alimenta superant motum: defectu motus opipara mensa plethoram reducit. Verum præterea sensim a blandis humoribus fit maior olei secretio: inpinguescunt tales homines, & sentiunt frigus externum a vasis oleo pressis, & veram plethoram in liberis vasis internis. Videmus tamen in HOFFMANNO, WEPFERO, GALLIS plerisque, id consilii dari, ut venæsectio ter, quater, sexies in anno celebretur, datis simul purgantibus.

HIPPOCRATES, ARETÆUS, tota *schola* GALENI, BENNETUS &c. de sputo sanguinis loquuntur ab hepate, a liene, ab hæmorrhagia quacunque subpressa, a mensibus, hæmorrhoidibus: hoc possumus referre ad plethoram, quæ nascitur, dum sanguis in quadam insigniori parte hæret; non secernitur ibi, non deperditur: est, quasi pars ad circulationem non pertineret. Hinc, ut in Mutilatis, sanguis licet forsan minus bene paratus, adcreseat, & potest per alias vias vim faciendo exire. Sic fit plethora eo, quod viscus non admittat sanguinem. Si desint evacuationes, consueta est plethora per se. Sed HIPPOCR. *Coac.* 408. „Qui spumofum sanguinem spuunt, dextrum hypochondrium dolentes, de hepate ipuunt, & multi pereunt.“ Et IDEM n. 450. „quin & a sputo sanguinis dolor in regione hepatis minuitur, aut silet omnino.“ Idem maxime post vomitum sanguinis; sed si id a vomitu aut a sputo sanguinis copiosi fit; an non fit repulsione, ut solet dolor a v. s. minui? Certe etiam sic intelli-

gi potest, quod sanguis retrogrado motu per vasa breviora aut gastro-epiploica actus transudet in ventriculorum anastomosi vasorum exhalantium, ut sit sputum sanguinis ex anastomosi vasorum exhalantium in cavo aëreo pulmonum.

Quam prudenter ergo, quamque necessario VV. hanc plethoram descripserint, ejusque notitiæ necessitatem demonstraverint, ex dictis per Vos videtis: ita, ut mecum indignemini HELMONTIO, ejusque Adfeclis, quod in hanc saluberrimam doctrinam tam acriter tamque insulse invecti fuerint.

§. 718. *Humoris boni ea inopia, quæ lædit functiones, raro adest; nisi subito vis externa eam effecerit; quum cæterum mala adsit in humoribus temperies.* In Vulneratis enim, in nimia hæmorrhagia narium, aut hæmorrhoidum, aut mensium, aut in abortu, vel partu, vel puerperio, revera fiunt functionis læsiones, graves, lethales, præ defectu adpulsionis sanguinis ad corticem cerebri & cerebelli. Visuri sumus in doctrina de apoplexia, ad apoplexiam frigidam esse revera hos morbos referendos, curamque eorum pendere a cognitione apoplexiæ.

Quum cæterum; id est: ad inopiam boni humoris male referuntur, hoc sensu, defectus humorum in Emaciatis, in fame fere Enectis & similibus. Nam inedia, vel emaciatio supponunt quidem inopiam humorum, sed non id, quod superest, bonum; quum humores in his a bonitate plurimum degeneraverint.

§. 719. *Humoris qualitas illa, quæ lædit functiones, κακοχymία adpellatur. Ea est vel hærens in fluidis, quatenus spectantur seorsim partes, componentes simul massam fluidi; vel in tota mole fluidi simul considerata, ut parte, ad constituendum corpus humanum concurrente.* Est enim, ut supra jam innui, ca-
cochymia mala mixtio humorum: est conditio, in qua
hu-

humores a flatu naturali ita degenerant, ut fiant ad functiones exercendas prorsum inepti. Jam est caco-chymia repetenda ab ipsis iis, quæ nostros humores componunt. Hinc pergit Auctor:

§. 720—721. *Doctrinam humorum jam particulatim adgredimur demonstrandam: in qua Auctores graves pulchra multa nobis descripserunt.*

Antonius à LEEUWENHOEK de figura particularum pulcre differuit: *Robertus BOYLE* de gravitate: *GUIELMINI* libro de sanguinis natura & constitutione de multis aliis nostrorum humorum egregie egit: *HALLESIUS* animalium hæmasticam persequutus est: verum nondum res eo, quo oportebat, deducta fuit: non enim est in rerum natura liquor similis sanguini humano.

Res anatomica expositura naturam humanam unice versabatur antea circa examen solum partium solidarum; quæ vero pertinerent ad fluida, adsumebantur ex VV. conjecturis. Ita ignoravimus per tot sæcula fluidorum tolerabilem cognitionem; donec elapso sæculo dicti tres Viri sua conamina & experimenta cum orbe erudito communicaverint.

LEEUWENHOEKIUS natus & semper conmoratus Delphis, urbe Hollandiæ milliari distante Haga-Bavorum, minime Medicus, immo rerum anatomicarum ac medicarum, & illo ipso fatente, & experimentis idem loquentibus, minime gnarus, ad res physicas perscrutandas natus videbatur; præcipue quum miram artem calleret, microscopia omnia suos in usus fabricandi. Opera ejus omnia inpressa sunt 1722 *Lugd. Bat. in 4to* in quatuor tomis, Auctore adhuc vivente, nonagesimum ætatis annum agente.

Notandum in *Leeuwenhoekianis* experimentis, ipsum solum hæc non vidisse, sed passim omnes Europæ Viros. Nam ex tota Europa Viri eruditi con-

venerunt, visuri ea, testatique sunt, rem sic se habere. Vidimus, tres Professores Lovanienses simul accessisse, & carmine publico cecinisse egregia *Leeuwenhoekiana* inventa. Immo legimus in historia illorum temporum, multos irrisores tandem eo adductos esse, ut veritatis se convictos faterentur.

Indefesso sane labore Virille incubuit in naturæ arcana detegenda, ac si legamus ejus epistolas ad omnes totius Europæ eruditissimos Viros, maximeque ad Societatem Regiam Anglicanam, cujus dignissimum membrum fuit; stupebimus Viri conatus. Humorū humanorum, omniumque animalium compositionem contemplans invenit in humano sanguine globulos rubros ex sex minoribus conflatos; qui sex a mutua cohæsiōe recedentes flavi colore erant, iterum ex sex minoribus conflati. Sæpiissime humorum circuitum contemplans vidit vasa arteriosa, quæ amplitudine, sua unum modo globulum rubrum admitterent: circuire sanguinem ita per illa, ut globuli rubri sibi continuo filo non succederent, sed interposito corpore flavo. Incredibilis est tenuitas vasorum minimorum, eorumque adhuc visibilia. Toties in operibus suis hæc dixerat, & repetit in epistola ad TSCHIRNHAUSEN: si enim ponamus, inquit, sanguinem nostrum plerumque circumagi in vasculis adeo tenuibus, ut singulis tantum globulis sanguineis sint pervia; atque decies centena millia eorum globulorum, qui sanguini suam conciliant rubedinem, spatium crassa arena majus non occupare; quod antehac sæpius a me ob oculos positum fuit &c. &c. Cogitate nunc, quam exilia vasa esse debeant, per quæ talis humor fluit.

Epist. 138. ad Societat. Londinensem demonstrat inter globulos particulas salinas, ramorum, ut vocat, figuras exhibentes.

In *Epist. ad HEINSIUM Reipubl. Holland. Syndicum* figura exhibet mirum globulorum decursum.

In *Epist. ad Joh. SLOANE* ait, vidisse se a vasis se contrahentibus, abs dissilitione sex globulorum unum globum constituentium, complanari eos ac fieri ovales. Itidem uno momento vas admittere tres simul globulos, alio momento vix unum, eumque tardius moveri. Vidit & sanguinem rutilum esse in arteriis, ob copiam humorum rubro subtiliorum: eum secerni in lateralia; hinc venosum magis esse purpureum, orbem eo fluido, junctisque magis globulis rubris.

Epist. 119. ad Societ. Anglic. scripta, exhibet figuram, quomodo viderit arteria obstructa ad singulos cordis ictus propulsum sanguinem retropelli a vase prope locum obstructum, ramos interea laterales mirum dilatari, ac denique obstructionem solvi coagulatorum globulorum dissolutione. Frigore sæpe vidit natas obstructiones, ac repelli versus cor ab eo loco sanguinem a corde pulsum.

Epist. 67. ad Soc. Anglic. examinat vespertilionem, animal, quod habet membranam in formam alarum extendendam, tenuissimam; ita, ut innumera vasa decurrant minima rubra, ac præterea innumera alia, quæ sanguinem rubrum excipiant. Teneritudo hujus membranæ tanta est, ut si animal de die volaret, æstivo tempore, siccaretur a calore tota membrana, & caderet vespertilio: unde credit deducendam rationem, cur vespertilio tantum occiduo sole ad volatum se accingat; & non, quod noctuarum instar de nocte solum videre queat; nam clare detexit, dum vespertiliones suos in usus servaret & aleret, eas æque de die videre posse, ac alia animalia. — Primo parum observavit in vespertilione quadam; quod frigore ac inedia fere mortuum animal esset. Refecto eo, vidit circulationem in membrana illa quam evidentissime. Vidit tunc

particulas coagulatas moveri, inPELLI in vasa angustiora, repellI a contrahente sese vase; inPELLI repellI denuo, & hac repetita actione tandem molem minui, eamque fieri permeabilem. Verum, id non ubique. Utut enim foveret grato alimento & calore vespertilionem, & de die in diem iteraret experimenta; tamen fateatur, se massam coagulata in multis vasis detexisse, imme vidisse per mediam coagulata massam strias globulorum rubrorum, sed tantum unum globulum latas, circuitum sanguinis sequi. Augebatur illa, ut vocat, coagulatio quotidie, licet omnia faceret LEEUWENHOEKIUS ad refocillandum animal, quod tandem periit. Videtur vespertilio habuisse a frigore prægresso illud spissum, tenax, phlogisticum in suis vasis, & hinc periisse. Ex *Leeuwenhoekianis* hisce tentaminibus doctrina sequens multum lucis adquiret, ut mox visuri estis.

Sed post omnia sua egregia experimenta Vir candidus fatetur, se intimam rerum ignorare structuram, quæ in suis elementis infinito subtilior, microscopia ipsa luderet.

Advertendum circa hæc tantum, quod bonus LEEUWENHOEKIUS, quum rerum medicarum & anatomicarum ignarissimus esset, sæpe venam vocet arteriam; rerum tamen peritus hunc errorem facile corrigit.

Egregius Anglus *Robertus BOYLE*, genere nobilis, minime Medicus, sed ad arcana naturæ revelanda natus, membrum inlustre Academiae Londinensis, sæculo priori, inter innumera omnis generis experimenta, sanguinem quoque humanum examinavit. — Primo specificam gravitatem sanguinis invenit se habere ad aquam, ut eam superaret $\frac{1}{2}\frac{1}{7}$. Verum est defectus forte in experimentis *Boyleanis* omnibus, quod videatur sanguinem tantum ponderasse, ubi refriguit; nec
eum

eum antea tegisse. Porro avolat sæpe eo tempore pars $\frac{1}{16}$. $\frac{1}{14}$. $\frac{1}{12}$. Nescimus proin, quantum hanc sanguinis ponderationem mutasset illud tenue avolans. Præterea, eo ipso momento sanguis variat pro ratione temperamenti, ætatis; inmo una hora alius pondereprehenditur, quam altera; prout plus minusve ciborum adsumsit, (tum & pro natura varia ciborum adsumtorum,) aut est a pastu remotior, vel motu dissipavit tenuiora. Ex pluribus tamen adunatis deduxit experimentum.

Multa alia BOYLEUS adtulit experimenta, sed chemica. Quum jam hæc adeo mutant humores, & ea forte producant, quæ antea non existissent in illis, non poterimus, pro casu præsentis, ad veram sanguinis naturam indagandam illis uti.

Ponderabat serum, ac insulam. differebant in multis: sed semper rubræ partis plus erat, quam serosæ. Monet hic nos Vir magnus, ut caveamus, ne illico concludamus, serum grave minus, quam partem rubram, quia rubra excedere videtur. Nam effuso sero iterum feri partem ex rubra massa prodire, & quando calore examinaverat, feri partes inventas esse plus quam triplo & dimidio ponderare plus rubra parte remanente.

Secundum BOYLEUM rubra pars sanguinis gravior serosa est: tamen sero innatat, nec petit fundum. Id oritur, quia copiosum serum cum rubra parte mistum manet.

Pondus specificum feri cum aqua examinans, invenit serum aqua communi levius. Sed in alio experimento vix differebat.

(Proportio hæc ab Auctoribus assignata varia: secundum JURIN est ad aquam uti 1030 ad 1000; secundum MARTINE uti 1032 ad 1000, dum friget; calidum vero uti 1021 $\frac{2}{3}$ ad 1000; secun-

dum TABOR uti 1032 $\pm \frac{3}{5} \frac{2}{5} \frac{8}{1}$; secundum HAMBERGERUM uti 1036 ad 1000; secundum MUSCHENBROEKIUM uti 1027 ad 1000; & sic porro; variat vero ratio in diversis morbis; & variare ipse vidi pro diversa anni tempestate; nam ciborum varietatem, potusque majorem minorem copiam, tenuitatem, aquositatem hic adferre posse discrimen, sponte patet. (*Vid. magni HALLERI Elem. Physiolog. lib. V. sect. 3. §. I.*)

Serum, quod effusum nonnihil sanguinis rubri immistum gerebat, filtratione per chartam emporeticam purum reddere voluit BOYLE: vidit tamen liquorem flavum per filtrum transivisse.

Serum sanguinis humani in phiala, quæ $\frac{1}{4}$ tantum parte inde replebatur, hermetice clausum per annum integrum servavit, nullamque aut putridæ dissolutionis, aut coagulationis, aut separationis, aut subsidentiae notam invenit.

Dein omnibus fere notis liquoribus examinavit sanguinem integrum; ejus serum &c. ut videret, quid ex miscela hac exsurgeret. Tum per multa experimenta olei, spiritus, salis, sanguinis humani dotes inquisivit.

Domenico GUILLIELMINI natus 1656 Bononiæ, discipulus magni Malpighii, &c. mortuus 1710, multa scripsit de hydrostatica, de natura fluminum, de salibus, & etiam de sanguinis natura & constitutione; ubi multa habentur convenientia cum prioribus pulcra experimenta; verum quæ nil majoris lucis adferre videntur quæstioni, quam tractamus: unde & recensioi superfedebimus.

(Addam his *Haenianis* adhuc sequentia, quæ scire Tyrones Medicinæ omnino juvat. — Egregius Stephanus HALES, qui primum eminuit inter Eruditos eleganti tractatu de *Statica Vegetabilium*, ab *Inl. Comite de BUFFON* in gallicum verso; tum

& altero de *Hæmostatica*, seu *statica sanguinis*, cui additiones junxit *Cel. de SAUVAGES*, in posteriori hocce opere plurimas novas circa sanguinis indolem protulit observationes, ac tentamina. Adferam exin quædam huc facientia momenta.

1) Examinauit HALEs vim sanguinis profilientis ex variorum animalium arteriis in tubum perpendicularem: fecit experimentum in 3 equis, 1 bove, 1 ove, 1 dama, & 20 canibus; pulsuum in his omnibus animalibus examinauit, adnotavit rationes.

2) Evicit HALEs experimentis certissimis, circulationem esse tardiozem multo in vasis a corde remotioribus, quam quidem in cordi propinquis.

3) Evicit, circulationem eo esse tardiozem, quo minor numerus globulorum rubrorum copiosiori sero, aut lymphæ innataret.

4) Minorem tardiozemque esse docuit circulationem in arteriis, quæ in ramos ad angulum obtusum rectumve abirent, quam in iis, quæ ad angulos flecterentur acutos. Inde esse in tenuissimis pulmonum vasculis celerrimam circulationem, quia in acutos angulos pulmonalis arteriæ rami abeunt.

5) Gravitas specif. sanguinis esse ad aquam uti 25 ad 24; aëris ad sanguinem uti 1 ad 841.

6) Multus est, ut & *Commentator de SAUVAGES*, in geometrica demonstratione causæ caloris nostri sanguinis; caloris scilicet tum naturalis, tum nimii, ac in subjecti destructionem tendentis.

7) *Commentator de SAUVAGES* circa crustam phlogisticam sanguinis observavit:

α) eam in sanguine humano formari æque ac ex ovi albumine, dum igni hoc admovetur.

β) In febribus rheumaticis, ubi calor haud excedit gr. 30 therm. Reaumuriani, i. e. 100 hterm.

therm. Fahrenheitiani, crustam hanc quidem densiorem; sed minus compactam, deprehendit.

γ) Similem substantiam detexit in cadaveribus eorum, quos ingens calor prope mortem comitatus erat; idque in corde ac arteriis ad cruralem usque; nec invenit id impediri valvulis.

δ) Anglum Medicum in Virginia eadem ratione refert in massam albam concretum invenisse sanguinem in cadaveribus eorum, quos *Boicininga* serpens vulnerando occidisset: eundem detexisse contra morsus hosce præstantissimum antidoton infusum polygalæ virginianæ. Quin ex analogia datum hoc infusum in inflammatoria diathesi in morbis, ubi sanguis in arteriis hoc modo constitutus per venæsectionem demonstrabatur; curas felices edidisse: polygalæ indigenæ gallicæ species omnes idem effecerunt. — Observavi ego easdem vires a polygala nostrate; nec video, cur non sæpius hoc scopo adhibeatur.

Multus est in expositione coloris sanguinis ex principiis *Newtonianis*.

Experimenta chemica, quæ *HALES* cum sanguine instituit, conveniunt cum prioribus: ratus autem fuit, in morbis acutis, calore inminuto, phlogisticam diathesin solvi, & critice solutos humores eliminari; quasi, ut & *Vir* summus *PRINGLE* dixit, gradu solutionis in putrefactionem.

Accedunt fere ad hæc *Halesiana* ea, quæ *BOERHAAVIUS* dixit *Elem. Chem. proc.* 115. Patet igitur, serum sensibus exploratum, quiete & calore definito sponte tenuius fieri. Itaque in ægrotante corpore stagnans, in vasis obstructis, leni tepore, & tempore, sponte deliquescent, sæpe aperit, quæ obstruxerat: unde in inflammatoriis acutis, corporis calore ad mediocrem reducto, spatio definito die-

dierum inaeabilitas redit obstruenti. Quod in Medicina clinica quotidie experiri contingit. Hæc BÖERHAAVE.

Quod HALES (n. 3) dixit, id in lentissimis morbis, ubi per septimanas multas homines perpetuo frigent, sæpe deprehenditur.

Addi, hætenus adlatis circa sanguinis historiam, inter alia plurima, debent & ea, quæ CL. SCHWENCKE in *historia sanguinis*, & FREIND in *Emmenologia*, & INULTRIS GAUBIUS in *Inst. Patholog.* §. 332—369 adtulerunt &c. Jungenda his observata CELEB. LANGRISH, cum sanguine ex vena hominum febri acuta & continua laborantium instituta, pulchra & accuratissima: jungenda, quæ nuperrime adtulit CL. THOUVENEL in *Mem. chym. & medic. sur le méchanisme & les produits de la sanguification* &c. Petersburg 1777.

Ipse etiam CEL. de HAEN, aliorum clarissimorum Virorum instructus lumine, propriis experimentis sanguinem subjecit; non mutando eum per operationes chemicas, sed examinando & calentem, & e corpore nunc exsurgentem, & tepentem, & sponte frigefactum, & sejunctum in serum ac insulam. Eluit insulam adfusa quotidie aqua, tam frigida, quam calida, visurus, quid demum superesset. Crustam sanguinis inflammatoriam variis tentaminibus exploravit; observavit adtentus, quid sanguini contingeret in aquam frigidam ex vena excepto; quid excepto in calidam; quid in arcto vase; quid in amplo latoque: examinavit præterea indolem membranæ *Russchianæ*. Conclussit demum ex tentaminibus illis omnibus, nos circa sanguinem plurima adhucdum ignorare. Vid. *Rat. Medendi* T. I. & hinc inde in aliis tomis.

Piaculum demum foret, si hic loci non adducerem pulcerrimam historiam sanguinis infinita doctrina nitidam, quæ habetur in summi HALLERI *Element. Physiolog. Tomo III.*

De crusta inflammatoria, ut hoc per transennam moneam, legi meretur *Diff. de natura crustæ inflammatoriæ, Pragæ 1773; opus inprimis Cl. KLINKOSCH.)*

Redeamus jam in viam pathologicam. — §. 720. *Si consideratur, &c. & §. 721. Molis auctæ &c.* Hic iterum occurrunt illa nomina explicata ad §. 709. 711. Si homini recte valenti augeantur mole illæ sanguinem componentes moleculæ, ita, ut certa mensurata superficies evadat major; nascitur id, quod B. vocat *inmeabilitatem*. Cogitate enim, extremitates vasorum capillarium debere admittere corpuscula tam parva, ut per orificia sua queant transire. Quando nunc una molecula adeo crassa fit, ut per solitam vasis aperturam transire nequeat, oritur morbus; qui propter hanc ipsam inmeabilitatem, facit obstructionem, sive *ἔμφραξιν*. Quid jam efficit illa *ἔμφραξις*? Efficit, ut ille ipse canalis, & canales laterales, qui supra locum obstructionis sunt, nil amplius excipiant, non amplius nutriri queant, i. e. *ἀτροφίαν*, *innutritionem*. Quid tum? De natura vasorum inanum, & proinde collapsorum est, ut ad se invicem adcrecant, atque sic desinant esse vasa, idque demum est, quod *textus* vocat *συνφύσιν*, *concretionem*, & *συνζήσιν*: ultimum proprie intelligitur de vasis humore primum nimis distentis, & jam subita *κνεαγγεία* evacuatis. Unico exemplo rem dilucidabo. Sint v. c. auctæ dicta ratione moleculæ rubræ sanguinis in arteria pulmonali. Intelligimus ad arteriarum sanguiferarum minutissimas extremitates illas auctas hærecere moleculas. Interea infarciuntur arteriæ, venæque jacent inanes. Hæ ergo venæ cor-
respon-

respondentes non nutriuntur: unde, nil accipientes, non nutritæ, facile comprimuntur; tum a turgentibus arteriis, tum ab aëre plus extendente ramulos bronchiorum. Si ergo vita sic aliquamdiu possit durare, sponte cernimus, collapsa hæc vasa uniri suis parietibus, & concreescere debere; sed tempus ad hanc concretionem non subpetit, nisi in parva plaga.

§. 722. *Molis minutæ, &c.* Sententia hæc in praxi maximæ utilitatis est. Hic loci oportet, me Vobis enumerare doctrinam medicam superiori sæculo celebrem, sed hominibus perniciosam, quæ statuit: humores humani corporis nunquam fieri posse tenues nimium, aut subtiles. Ex *Cartesiana* schola ortus famosus SYLVIVS DE LE BOE, Professor Lugdunobatus; *Cornelius DECKER*, Medicus Alckmariensis, (ab ipsa infantia vocari amans *Cornelius BONTÉKOE*, eo quod parens, pistor Alckmariensis, *vaccam variegatam* pro insigni haberet; unde & hoc tantum sub nomine notus) *Theodorus CRAANEN*, Professor Lugdunobatus, hanc sententiam promulgaverunt, propugnaverunt, & plurimos, cætera eruditos, Viros fœde sua doctrina inquinaverunt. Effectum inde, ut in multis regionibus, saltem in Belgio, maxime in *Hollandia*, aquosorum potuum abusus invaluerit eum in modum, ut Medici deinceps longe alios natura morbos debellandos habuerint, quam Medici priorum ævorum. Quippe omnes illi supra adducti Viri ex *PARACELSO* & *HELMONTIO* hauserunt implacabile odium in *Galenicam*, immo etiam in *Hippocraticam scholam*. *CARTESII* deinde inbuti Philosophia ex ejus principiis rem medicam explicare conati sunt. Videntes vero plura esse, quæ ex *Helmontianis* aut *Cartesianis* principiis exponere non possent, ipsi nova fingenda autumarunt systemata, ut eorundem opera nullibi hæreret aqua. Hac ratione magis magisque a recto deviantes tramite,

in absonas atque absurdas quasque sententias ruerunt præcipites. Utinam BONTKOE adtenuandi sanguinis gratia potus asiaticos, & maxime theatum Belgis haud ita commendasset, laudasset: utique dies noctesque nunc batavi Medici haud fatigarentur morbis tum diuturnis, tum frequentissimis, quos creber ille aquosorum usus genuit. Batavam gentem superiorum ævorum historiæ tradiderunt fortem esse, robustam, bellicosam; morbos, quibuscum conflictarentur Hollandi, ut apud FORESTRUM aliosque patrios Medicos videre est, vel acutos fuisse, vel fibræ nimis rigidæ debitos. Ex quo vero aquosi potus invaluerunt, ex quo BONTKOE pro edito tractatu *de præstantia potus Thee & Coffeæ* magnifico præmio a *Societatis indicæ orientalis* Moderatoribus donatus fuit; contigere morbi infiniti a sanguinis debilitata crassi, a nimia solidorum flacciditate oriundi. Nunquam ibi in sequiori sexu observata fuerat tanta abortuum frequentia; nunquam tanta correptarum fluore albo multitudo; nunquam excreverant in tantum exercitum homines cum debilitatis nervis; nunquam animadversum densum adeo agmen Hypochondriacorum & Hystericarum ex debilitatis solidis, adtenuatis fluidis. Juvabat illos, quod ingeniosissimus LEEUWENHOEKIUS ex pulcris suis inventis, & maxime quod a moleculis sanguinis auctis obstructions nasci, microscopio viderat; hanc adtenuationem humorum & aquosorum potuum abusum ultro propagaret. Unicum forte lucrum, quod in *fœderato Belgio* inde tulerunt, est scorbuti, olim ibi loci sævioris, nunc paullo mitior natura & genius.

Ut ergo demonstramus, quam male hi Medici argumentati sint, considerate, quæso, quomodo ex vasis primi generis, quæ a corde sanguinem excipiunt, nempe ex arteriis rubris; humores derivari oporteat, in reliqua genera vasorum minora, atque iterum ex
hisce

hisce in vasa majora redire. Id nunc genus vasorum primum, cor scilicet cum arteriis venisque rubris, eo robustius secundi generis vasis est, quo plus intra se liquidi locat. Secundum genus serosorum eo robustius, quo plus gerit humorum; & sic porro. Quodsi igitur contingat, ut globuli rubri primi generis ita adtenuentur, ut, in serum mutati, per secundum vasorum genus queant transmitti, tunc per hoc genus secundum, quod in ea ratione dilatabilius est, qua tenuioribus humoribus dicatum; id consequi necesse est, ut, ubi genus primum sese contrahit, omnis liquor ex arteriis primi generis in arterias secundi generis transeat, paucissimaque humorum copia in venas primi generis abeat. Si eadem res fiat in vasis serosis, soluti globuli serosi intrabunt lymphatica vasa; & sic porro.

Hinc nobis nascitur vera beatas cæteroqui Britannorum insulas adeo infestantis consumptionis hecticae idæa; qua, sine ullis aliis morbi signis, qui pancreaticæ valuerat homo, penitus videtur flaccescere, tabescere, & matutinis sudoribus ita diffuere, ut exsiccatus pereat. Sanguis tali homini est tenuissimus. Fac hinc sanguis ruber debite crassus maneat in vasis primi generis: jube scilicet, ut quovis mane & vespere per $\frac{1}{2}$ horam corpus pannis siccis, fumo aromatico inbutis, fricet; ut alimentis nutriatur siccissimis, solidissimis; ut motu frequentiori, curru, maximeque equitatione exerceat sese; hominem forte adhuc servabis. Optimus SYDENHAMUS pluribus operum suorum locis commendavit hanc curationem, ceu unicam ad profligandos morbos, a nimia fluidorum tenuitate oriundos.

Majores sane Medici sumus in densiori adtenuando per v. s., purgantia, vesicantia, adtenuantia, diluentia, nitrosa; quam eodem sanguine, quem con-

sumtio Anglicana, phthisis, hydrops adtenuaverint, inspissando.

§. 723. *Soliditas aucla &c.* Si globulos magnitudine perfecte æquales, aureos, argenteos, plumbeos, stanneos, cupreos, ligneos, subereos, ex eodem sclopeto, eodem ictu temporis, eadem vi ejusdem quantitatis, secundum pondus, pulveris pyrii incitatos projeceris in planum album, dixit hunc §phum explicans BOERHAAVIUS, invenies, quo corpora fuerint ponderosiora, eo & a sclopeto fore projecta remotius: quo enim corpus est gravius, eo magis acceptum continuat motum, in linea recta progrediendo, eoque majori vi in alia corpora inpinget. Hoc sclopetum cor nostrum esse statuas. Particulæ projectorum ponderosiores in nostris humoribus rectum iter adfectant, longiusque procedunt, ac majori momento alia, tum fluida, tum solida, percutiunt. Ponite ergo, vel mercurii globulos intra sanguinem esse, vel ipsos sanguinis globulos solito longe solidiores; utique illi solidiores globuli vim solito majorem exercent in solida, simulque alias sanguinis sphærulas contrudunt. Unde *anastomosis* fiet, quia dilatata arteriosa ora dimittunt in anastomosi ea, quæ retinere debebant. Fit *diapedesis*, quia solidiores globuli tam vehementer inpingunt in latera vasis, ut membranaceæ partes divellantur, sicque interstitia hiantia creent, dimittentia ea, quæ continere debebant. Fit denique *diæresis*, sive *rhæxis*, ubi veram facit, veluti a vulnere fit, separationem vasis inpetuosior illa solidiorum globulorum projectio. Hæc vero nunc tantum leviter tango, quia explicui omnes hos morbos antea.

In fluidis vero nimia adtenuatio & adritus. Si argentum vivum in humores nostros ingressum est, totus sanguis a sua crasi dejicitur, fitque aquosus; ita, ut homo aliquando a salivatione redeat 100 libris ad
sta-

Humores Jovior. Si eadem ratione sumantur in robros
humores plumbum, stannum, &c. &c. Jovior ratione re-
peritur. Ita solentur mercurio eisdem atque mensuris,
sed eo leviores, quo in illis non minus gravior.

(Attendantur namque tumuli, ut tumuli abelle,
quoniam effectus, quos in corpus humano exoritur. Iste
flamma, intellectus ac tantum intellectus, & solo major
innocentie illam deducti ac exporti debentur ponder-
re: plumbum colicam facit non exeat, immolue-
bitque deum paralyticis cupimus fovea cardid-
plas, non domandis enures, immoluebit & utinam ac-
di, solentur ac populus hypertensioles, hyperten-
sioles, antecum lusi solentur, leviores conuulsi-
onibus. Ipsi sunt mercurio, tumuli legimus vel que ad-
ministrantur in medicina. Tumuli est solentur, c. f.
p. Quae inquam dixerit, tumuli abelle ab antecum di-
versis vices tumuli & plumbum progressionem tumuli re-
peritunda. — Attendantur tumuli tumuli tumuli est mer-
curio; tumuli quoniam effectus, tumuli deleteriorum
violentia tumuli tumuli.)

§. 724. Si intellectus solentur tumuli &c. Exem-
plo sunt homines debiles, pauci faciles, pauci
chlorotici. Sunt quidem tumuli chlorotici in ve-
lis. Sed quoniam tumuli in quoniam solentur, tumuli
idem globuli tumuli in solentur tumuli. Solentur,
quia per tumuli tumuli, tumuli tumuli in tumuli
longe debiliorem exoritur. Tumuli tumuli in tumuli
quibusdam tumuli tumuli, tumuli tumuli, tumuli tumuli
creto, a concretionem quoniam tumuli tumuli tumuli
inter tumuli, quoniam tumuli tumuli. Tumuli tumuli
puella &c. ex alimentis tumuli tumuli tumuli tumuli
tumuli vel leviter tumuli, quoniam tumuli, & tumuli tumuli
tumuli, tumuli tumuli. Tumuli tumuli in tumuli
tumuli est, & tumuli tumuli tumuli tumuli.

§. 725. *Peccat particula humoris &c.* Rem hic adgredior, quæ in tota Medicina pateat quam latissime, quam & in nosocomio præcedenti æstate amplissime Vobis exposui: quum tamen tanti momenti sit, eam hic loci recensebimus; semel enim illa bene intellecta doctrina Vos labore sublevabit, legendi centum forte volumina, quæ inani labore confecta a vero sæpe aliena, Auctores binorum proxime elapsorum sæculorum protulerunt.

Nostis ex *Leeuwenhoekianis* observatis, humores nostros constare, quatenus optimis cernere licuit microscopiis, congerie globulorum, tum & quibusdam angulosis partibus, inter globulos locatis, quas salinas vocant.

(Ex *Hewsonianis* tamen experimentis fluit, figuram massularum sanguinearum non tam ad sphaeroidem, quam ad lenticularem accedere; excerptum ex epistola *Cl. Viri* jam ante aliquot annos publici juris feci in *volum. 2. Bibliothecæ meæ physico-medicæ*: agens etiam de sero sanguinis *Cl. HEWSON* in *an experimental Inquiry into the properties of the Blood &c. T. I. p. 141.* manifestis verbis globulos seri hujus sphaericos distinguit a massulis, inproprie, ut monet, *globulis* dictis, sanguinis rubris, complanatis. En ejus verba: *These globules differ from the red particles (improperly called globules) in their size, which is much smaller; and likewise in their shape, which is spherical, whilst the red particles are flat.*)

Miremur hic Creatoris sapientiam, quum 1) a sphaerica figura læsio minima fiat: 2) minima quoque producat cohæsiō; (3) motus nascatur facillimus.) Quæ adsumimus alimenta circumductione brevi in globulos mutantur. Si sanguinis ex vena emissi guttulam *LEEUVENHOEK* bono lustrabat microscopio, maximam

par-

partem videbat sphæulis constare, prætereaque spiculis oblongis. Plurima medicamenta videntur acuta, sive salina esse, ita, ut haud tam cito de sua acredine recedant, tamen utcunque mitigantur, ut dein minus lædant, & expellantur. Venena vero plurima videntur servare sua spicula, eaque adeo esse acuta, ac rigida, & per circumductionem in corpore inmutabilia, ut tandem corpus destruant.

Jam globosæ, sive sphæricæ humorum particulæ fieri possunt angulosæ, adeoque acutæ. *Hinc motum suum integrum parvæ parti adplicans acris fit.* — Si ex chalybe conficio globulum, eumque manu volvo ac revolvo, minime inde lædor. Dum vero ex globo hoc chalybeo lanceolam chirurgicam efformavero, volvendo illam agitandoque manu, vulnerabor: tamen est idem chalybs. — Parvum globulum chalybeum innocue tracto; inpune deglutio: dum efformavi autem eum in aciculam, eamque deglutio, quantas sæpe non ludet acicula tragædias! Nec tamen chalybs in venenum versus est; sed mutata nocet chalybis figura. Illud ergo est, quod textus vult, dicendo: *acris fit, motum suum parvæ parti adplicans.* Quo enim minores sunt inclinationum anguli, eo major est in cuneo penetrabilitas. Si lato planoque ligno vel libro quodam, me quis plana ejus corporis superficie percusserit, vix dolebo: percusserit vero me angulo uno ligni aut libri, vi eadem, qua antea; jam potero summe dolere. Cur? Quia 1000 punctula mei corporis tangebantur mille punctis libri; igitur millesima pars mei corporis tangebatur millesima libri parte; verum ubi me angulo libri percusserit, tunc vis feriens olim 1000 partes 1000 partibus jam eadem feriet unam partem: ergo illa pars mea nunc millesies plus patitur, quam mox antea: & quum corpora cedant ictui in ratione actionum inpressarum (& compagis propriæ, nam aliter

globus laneus cedit, aliter sphaera vitrea); vascula mininia valide mutabuntur ab libri angulum præferentis ictu, ita, ut ipsa partis solutio, & destructio inde oriri queat.

Corpus igitur acre est corpus, cuius moles in unum angulum acutum terminata se adplicare potest in cujusvis resistentis corporis punctum unicum. Quo autem illud acre densius ponderosiusque est, eo magis lædit. Lanistæ norunt hac arte vim percussione mirifice augere. Minus lædam hominem, percutiendo eum instrumento ferreo excavato, quam eodem auro, aut mercurio (aut plumbo) repleto: quo enim corpus ponderosius, eo ictus percussione gravior. Sed acre, de quo nunc agimus, oportet quoque rigidum esse, alioqui non nocebit. Acutam porro figuram, pondus, & rigiditatem salium detegit microscopium, & libra.

(Ait sæpenumero horum criteriorum neutrum: demonstras mihi, amabo, microscopio acrimoniam, aut si mavis discrasiam veneream, variolosam, morbillosam &c.; determines linearum ductibus peccantis, fors incassum adsumptæ, acredinis tela; hypotheseos fors pinges ludibria, non inhærentes re vera corporis figuris massulas hamatas, aut aciculares, aut lanceolares. Interim tamen non negarim, errare posse per vascula corporis fodientes machinulas: rarius tamen id multo accidet, quam olim crediderunt scholæ: tum alia longe ratio humorum adhuc circulantium, & extra circulationis torrentem positorum: concreascent sane multa in postremis, quorum elementa in prioribus vix adhuc erant contigua.)

Recessus hi varii sunt: sed commodissime revocantur I) ad acrimoniam mere mechanicam dictam, ubi omnibus iisdem manentibus, sola figura in angulos solidos

tidos acutos componitur. Dixerat nempe Auctor paulo antea, quomodo particula humoris sua figura tum inprimis peccet, quando a natura sphærica recedens, angulosam acutam induit. Hanc ob causam nunc recessus, inquit, varii sunt &c. Particulæ scilicet humoris a natura sphærica in angulosam. Atque hoc porro jam explicuimus, ubi mox ante de hoc recessu agebatur.

Opus aliquando est, ut hanc in genere acrimoniam in mente habeamus præsentem; quando contingit, ut ex signis certis sciamus adesse acrimoniam, nec tandem eandem queamus ad certam speciem determinare. — Video hominem conquestum dolores, in quo motus aucti principio signa nulla, nulla notabilis obstructionis indicia. Percipio in eodem homine partium erosionem, v. g. in doloribus dentium, articularum, manus, pedis &c. quum interea nullus tumor adpareat, cui ille dolor adscribatur. Tamen sæpe fit, ut omnia inquirentes de determinanda specie nihilosecius subdubitemus, utut causas effectusque cujuscunque acrimoniam speciei perscrutemur.

Hinc, ut animadvertitis, adduntur signa, quibus speciem determinare non valentes, tamen aliquam acrimoniam adesse concludatis. Tum præterea, ut deficientibus signis omnibus, tam quæ acrimoniam specificam, quam quæ talem in genere denotent; ut, inquam, his deficientibus, non illico, ut moris olim fuit, in acrimoniam toti furibundi invehamini, ceu in solam, ceu in unicum morborum omnium genitricem.

Homo sanus adeo, ut quæ sanissimus, in hoc usque momentum, pedem subito a calcitrante contunditur equo. Dolor magnus adeo, ut fere agatur in furores. Quis unico illo momento tam rodentem arbitrabitur in humoribus ortam acrimoniam, quæ mox tantos dolores cieat, tantamque febrim creet? Cau-

fam mechanicam hoc momento prægressam nosco, prætereaque nihil.

Homo pancratice valens, hoc nunc momento inpetuosius currens pedem adlidit in eminentem angulosum lapidem, talumque luxat. Fit mox vertiginosus, nauseabundus, vomituriens, febricitans. Forte præsto est dexterrimus Chirurgus, luxatam partem ex templo qui restituat. Homo noster mox bene se sentit, febris caret, caret nausea, iterumque adpetit. Ipsissimum hunc casum sibi hac ratione contigisse memorat HELMONTIUS.

Qua jam, quæso, ratione concipietis subito per universas corporis partes acrimoniam talem esse natam, quo ipso momento homo pedem luxaverat? Immo qua veri specie adfirmabit quis, ortam hoc momento luxationis acrimoniam, & totum corpus perturbantem, & tantos dolores excitantem; etiam unico temporis ictu, quo luxatio restituitur, ita exfulare de corpore, ut præsentiae suæ nulla omnino relinquat vestigia, ut nulli ejus advertantur effectus: idque AA. sine ulla acris materiae per sudores, alvum, urinas, sputa, excretionem.

Itidem homo sanus, præditus, nobis omnibus id adfirmantibus, humoribus blandis, hoc momento, errore quopiam commisso, incidit in sævissimam colicam, aut pleuritidem. Num judicatis me recte acturum, si ad acrimoniam, eamque tantam confugerem, ut Vobis explicarem tantarum anxietatum, tantorum dolorum originem? Jure me, scio, condemnaretis. Non quod negem, in tali inflammatorio morbo acrimoniam fieri; sed illa acrimonia fit a morbo, non vero morbum facit.

Monere hæc Vos debeo omni ratione. Legite enim, amabo Vos! tot vasta volumina tum Auctorum (genuinorum), qui in omnibus scientiis semper pauci sunt,

sunt, & fuerunt; tum scriptorum, qui numerosi aliorum dicta & observata mutato ornata pallio venditarunt pro suis; inspicite, inquam, omnes; nil videbitis, nil legetis, morborum expiscantes apud illos causas, quam acrimoniam, acria, acerrima, rodentia; etiam si, Hercle! ne ulla quidem acrimoniæ signa vel linceis oculis queant detegi. Virum sapientem haud oportet, rem dicere in physicis præsentem, si, quæ illius præsentiam arguant, desint testimonia.

Sunt jam dolores cum tumore, cum aucto humorum motu, scilicet cum feбри. In his plerumque agnosco humores pulsos in vasa non transmittentia, quo fit, ut tumor oriatur. Hic intelligo dolorem ex vasis obpletis, distensis a causis, quæ omni momento augentur. Hic subsisto; nec ulla acrimonia hic, ut doloris hujus incipientis causam explicem, opus habeo.

At vero sunt dolores, quos tumor nullus comitatur, nulla signa notabiliora obstructionis, nullus febrilis motus, aut saltem non memorandus. Tunc intelligo, oportere acrem esse illum humorem, qui vasa illa perfluit, illumque ibidem sua acrimonia dolorem creare, dum in diastole inpingit in fibras nervosas exilissimas vasorum, dumque ipsæ fibræ in systole renituntur in impulsu liquidum. Ita sæpe podagra est sine ullo tumore, & vix cum notabili feбри, effetrix tamen atrocium dolorum in vasis tenerrimis, tensis, tendinosi; recedere non valentibus: non dico ideo, omnem podagram feбри magna carere, tumoreque, sed sufficit talem dari, quæ hisce careat.

(Manifestior adhuc hujus rei instantia in specie illa arthritidis vagæ, quam sæpè observavi, ubi sine omni tumore aut rubore ægri queruntur hodie v. c. latam plagam in brachio dolere, ac si bullientis aquæ vapore combusta fuisset; durat dolor per unum alterumve diem; tum aut evanescit, aut

aliorum migrat; occupaturus ocyus aut serius eundem locum. Accedunt hunc in censum & dolores rheumatici, a vulgo inepte *bili* adscripti.)

Sed tertio, sunt dolores sine tumore, sine febris, ubi video, quas illi occupant partes, easdem erodi. Hic certe manifesta est acrimonia; talismodi dolor in scorbuto, ictero, &c. observatur.

Hiscæ in genere visis, acrimonia in genere detecta suas dividenda est in species; ut, quæ revera apud illum ægrum, ubi acrimonia scitur adesse, obtineat, dignoscamus, curemus dignotam. — *Mechanicam* vidimus.

2) *Ad acrimoniam salinam dictam, quæ hic inprimis est I) muriatica.* Notum ex chemicis habetis, quid sal sit. — Porro omnia salia acria sunt, nativane fuerint, an factitia. Nullum enim sal oculo admoveritis, quin dolorem, manifestum acrimoniæ indicium, percipiatis.

(Hoc denuo non satis determinatum videtur: dantur enim salia, quæ nullam plane exferunt acrimoniam, v. c. selenites; dum alia sunt acerrima v. c. oleum vitrioli, aut butyrum sic dictum antimonii. Fateor quidem a molecula selenitis sensum oriturum in oculo sensilissimo ingratum; ast idem prodibit a fragmento vitri, aut ossis, aut chalybis: an ideo vitrum, aut os, aut chalybs salibus foret adnumerandus: diversitas omnino intercedit inter stimulum illum excitatum a sola scabritie superficiiei indomabili nervis inlatum; v. c. fragminis vitri, aut ferri; & stimulum salis rodentis, deliquescentis, v. c. butyri antimonii, oleive glacialis vitrioli.)

Salia autem differunt pro diverso suo genio (de *salium divisione* legi meretur dissertatio *Celeb. Pragensium Professoris MICHELITZ*; inprimis ea, quæ

In-

Inlusiris MACQUERUS in *Diff. de Chymie* exposuit); hinc primo loco recensetur *acrimonia muriatica*.

Vocatur sic acrimonia nata a sale marino, sale fontium (muriaticorum), sale fodinarum, gemmæ dicto: de quo omni latius agitur in Chemicis.

Sali huic, vel ammoniaco, quod inde non multum abludit, (basi vero alkalina volatili, si genuine chemice loqui velis, omnino diversissimum) sal nativum animalium simileprehenditur: unde VIRGILIUS de ovibus & capris in *Georgicis*: *Et salis occultum referunt in lacte saporem*.

(Sal nativum animantium pariter, uti sanior Chemia docet, a sale muriatico multum diversum.)

His salibus (excepto Sylviano, & ammoniaco, & ammoniacali animantium) condimus pleraque alimenta nostra, habeturque Mortalibus ejus usus saluberrimus (si moderatus.)

(Inseruit hic loci *Cel. de HAEN* ampliorem non-nihil disquisitionem tentaminum *Pringlianorum*. Quum vero *Inl. PRINGLE* in nova editione operis pulcherrimi *de morbis castrensibus*, HAENIO dudum responderit; hinc objectiones *Haenianas* hic tuto omitti posse censui.)

Sal muriaticum itaque pro egregio valet antiseptico, & salis penuria putredinem generat. Verum, ut bonus usus, ita & malus ejusdem abusus est. Requiritur enim inter humores blandos nostros proportionata salis quantitas, ultra quam proportionem *acrimonia* nascitur *muriatica*. Nunquid enim spicula insensibilia (quidem), & invisibilia, infixæ globulis non mutant eorum figuram? Nunquid eos inter sese, ac in sua vasa armabunt? Videtur. Nimio siquidem sale muriatico utentes homines rigescunt; ut puellæ exemplum prostat in *Transact. anglicanis*, & ut videre licet in

po-

populis septentrionalibus, qui nil nisi carnes salitas, pisces salitos, caseum salitum pro nutrimentis consueverunt adhibere, (& aërem quoque, quem respirant, moleculis salinis gravidum in corpus recipiunt.)

Ammoniaca. Nostis ex chemicis naturam salis ammoniaci. Motum auget nostris humoribus mistum, suo stimulo. Cætera de eo fere, uti de muriatico valent (a quo tamen basi alkalina volatili nunquam non satis diversum manet, hinc & dotes varias diversas exferens.) Dividit glutinosa, unde dictum antifebrile. Hinc expertissimus MUYRS illud ceu antifebrile egregium deprædicavit. — Feci experimenta: dedi aliquot horis ante paroxysmum ad drachm. ij., multa aqua dilutum. Verum non profuit; nisi ubi gluten multum peccabat, cæterum nihil.

(Laudes ammoniaci salis antipyreticas præter MUYRS decantarunt & WERLHOF, & HIRSCHEL, & TILINGIUS, & LÖSECKE, & LAUTTER Auctoresque, qui de febribus aut de *Materie medica* scripserunt, plures alii. Ait LÖSECKE, plures intermittentes febres sale ammoniaco, quam quidem ipso cinchonæ officinalis cortice fuisse fugatas: quartanam etiam, integro jam anno durantem, unica salis hujus drachma abegit. LAUTTER in quartanis minus quam quotidianis ac tertianis proficuum vidit &c. „Notatu tamen dignum juxta ac necessarium est, optime monet *Celeb. TRNKA, Hist. febr. intermit. Vol. I. p. 434.*, omnia hæc salina, præsertim quæ paullo sunt acriora, in sensibilibus ægris plus molestiæ quandoque, quam commodi adferre, ut observarunt HOFFMANNUS ac TISSOT: quare pertinaciter tunc eorum usui insistendum non erit, sed mitiora iis exhibere oportebit.“ — Optimos ego ipse in tertianis febribus vires ammoniaci salis vidi, dum simul cum floribus chamomillæ exhibe-

hibebatur refracta quidem dosi, sed protractiori non-nihil tempore: glutinosum illud lentumque ventriculo sub nomine *placentæ febrilis* inhærens, febris recludens fomitem, salis hujus, cum lenissimo aromate juncti, actione pulchre sæpenumero adtenuatur, dividitur; alia dein methodo extra corpus eliminandum.)

Acrimonia jam talis, muriatica scilicet, aut ammoniacæ noscitur, ut ait B. §. 914. *a sapore falso*, dum scilicet prædominatur in humoribus, *erosione lenta, pruriente, ruborem inducente, siti assidua, ingenti, vix sedanda*; quia inbibit falsal tale humores: (an genuina hæc ratio?) dein & innata vis nobis, ut stimulo alicubi obtinente multum bibamus ad diluendum stimulum: *siccitate, rigiditate*, ut dixi mox, corpora inde obrigescere: *urina falsa*, ob copiam admisti salis: *tarde putrescente*; ob eandem rationem, quum sal præservet corpora a putredine: *secum sedimento spisso*, quia abradere videtur solida, si nimia copia adsit sal, eaque ramenta secum gerere; & *pellicula tenui, pinguiuscula, innatante*: ita, ut si vas commoveatis, telam videatis quasi aranæ pinguem obambulare, & supernatare, ac ad latera discedere, adfigereque se vasis lateribus. Videtur nimium præfens sal solvere sanguinis pinguitudinem. Dixit & B. §. 1010. „Pinguis adparens urina plerumque gerit arenulas minimas, viscido quodam nexus, & sic effingentes speciem membranulæ oleosæ: tum notat abundantiam terræ & salis hebetioris in sanguine; præfagit hinc scorbutum, calculos, & similia.“ *Juvamen ab aquosis*, unde potu multo salia hæc nimia abluuntur.

(Addidit *Cel. de HAEN* in margine: „& ab aqua calcis.“ Respexisse videtur hic ad decompositionem ammoniaci salis per calcaream terram: tum vero liberatum per vasa oberrabit alkali volatile sal; symptomata denovo nova producturum.)

Acida: Acrimonia hæc ex usu acidorum, acefcantiumque copiofo oritur; maxime, ubi favet fimul ipfa corporis diathefis. Causæ hæ binæ proinde concurrere folent. Si homines folis vegetabilibus vel fimplici-
bus, vel arte in aceta, vina, cerevifias paratis utuntur, videntur hi in acidam acrimoniam fibi comparandam proniores, quam, qui alimentis utuntur acido obpofitis, & quorum diathefis acido generando minus famulatur.

Etenim corpora debilia, flaccida, quiefcentia Pue-
rorum, Virginum, Fœminarum, Virorum debili-
um, Otioforum, obfervantur cæteris magis acido obnoxii. In hominibus robuftis pleraque alimenta mutantur in illorum, a quibus adfumuntur, naturam; natura ali-
menti prorfum depofita, relicta, mutata. Vis enim vifcerum, vasorumque fubigit illam acidorum & acefcentium proprietatem, & cum humoribus inquilinis cito vertit in naturam illius corporis: ita, ut videatis plures homines, qui acido aceti, qui acidis vinis adfatim utuntur; qui fucco citri, limonii mali, curaffavici, granati pleraque alimenta fua condiunt; tamen nunquam acidi qualitates in corpore manifestantes. Quin ex obpofito, reperiatis alios, qui per totam fere vitam acidi lamentantur moleftias, morbisque adficiuntur, qui acido fuam debeant originem.

Semper inquitum eft, num illud in corpore humano tantum adelfet in primis viis; an vero etiam ultra progreffum per venas lacteas, ductum thoracicum, venam fubclaviam ad cor veniat, totamque coinquinet humorum maffam?

Refponfio magna haud caret difficultate.

Sane in iuteftinis mira Conditoris opera cautum eft, ne acria fubeant venas lacteas. Bene hoc animadvertit BOERHAAVE *Inf. f.* 113. 114. *Quum obliqua &c. &c.*

Ob-

Obliquam profecto viam esse ex eo liquet, quod intestinis humanis, (humanis dico, quia aliquando aliter visum in brutis) aqua inmissa, inmissus flatus, nunquam visa sunt in vasa lactea transivisse, quodque neque tubuli lacteorum, neque pori, unquam conspicui facti sint. Intrabit continuo sola pars fluidior, solidior, alba, chyli. Nam LEEUWENHOEKIUS observavit, chylum ex quibusvis rebus, quibus alimur, v. c. vino, cerevisia, frumento &c. paratum, constare globosis particulis; sed illis, ex quibus sanguis noster componitur, minoribus. Id, quod sphaericum est, potest subire oscula cylindrica vasorum lacteorum, eoque facilius, quo globuli chylosi minores sint. Pars autem crassior, ramosior, magisque cinerea, aut flava, non intrabit.

Quippe est manifestum, plumam, lanam fluitantem, flocculos, immo fibram longam, quamvis cylindrica esset, nunquam posse per angustum cylindricum foramen transire. Ratio est, quod infiniti propemodum casus sint, in quibus fibra osculo tali directe non respondeat, & in quibus omnibus proinde non resorbeatur. Id autem unice intrabit, quod habeat superficiem minorem, densitateque debita præditum nitetur in clausi orificii aperturam.

Jubet etiam B., ut attendamus ad angustias osculorum lacteorum, respectu intestinorum, unde oriuntur, amplitudinis; quibus sit, ut transmittant id solum, quod vi vitæ, id est, actione ventriculi & intestinorum, admistuque salivæ, succi gastrici, enterici, bilis, succi pancreatici in globulos determinatæ magnitudinis sit elaboratum. Omnis quippe alia figura, si vasis lacteis oblique observatur, excludit se ipsam; &, si acris sit, tunc ad contrahendas sese lacteorum membranulas exstimulat.

Denique B. problematice considerat lacteorum initia obsidentes sphincterulos ; quæ, contrahendo sese, excludant acria.

Et sane, A.A., oportet tale quidquam hic adesse, si consideremus experimenta anatomica a C. DRELINCURTIO, & R. LOWERO facta ; quæ demonstraverunt, sanguinem animalium, injecto spiritu vini, actum coagulari ; qui tamen spiritus a multis per annos adfatim usurpatur, antequam noxam inde patiantur.

Constitit 2do ex iisdem, adipem fusum, venis injectum, cito necare ; quum tamen quotidie tantam copiam pinguedinis absumamus, ingeramus.

3tio. Videte *Francisci* REDII experimenta, quibus constitit, guttulam veneni viperarum vulneri infusam præsentissimum venenum esse ; quod tamen ipsum venenum *Venator* JACOBO ad drachmas integras innocue deglutiebat.

4to. HIPPOCRATES toties dedit helleborum album, multosque Insanientes hac methodo curavit ; ipsum & ego dedi Cerdoni maniaco citra noxam. Et nihilominus constitit, tela, vel sagittas, inbutas succo hellebori albi, mortem præsentaneam conciliari feris.

(Idem & de oleo empyreumatico nicotianæ verum, cujus tantilla dosis vastissimi animalis producere valet lethum ; dummodo vulnuscule minimo immittatur : v. quæ circa hanc rem adnotavi tentamina in *versione germanica*, quæ ante paucos annos jussu AUGUSTISSIMÆ publici juris facta fuit, *Dissertationis Cel. DE HAËN de variolis.*)

Ergo capimus facile, quam insignis mutatio debeat fieri particularum constituentium hæc venena, hos spiritus, hunc adipem ; quamque lædens eorundem figura debeat esse omnino mutata, ut possint intrare, non ut ramentosa, non ut acria, sed ut globosa, saltem sphaeroidea, in venarum lactearum oscula.—

Di-

Lactata sane possunt verire, & involuta in sanguinem, ut non nocent, si per lactea transcant: forte bilis, & succi corporis in viis primis lac jam maturum; quod vero non lactum, si sanguini immediate contul-
leantur.

Hinc deventum eo, ut fere negentur acida, ut acida, sanguinem posse mirro præ acida hæc custodie. Immo in Romanis, cerus certus acido laborantibus, forte nunquam ipsum lac vere ad eum emulgentem ex manibus, licet lac illud postea aut chylus crudus erat, necdum cum iniquis subactis humoribus.

Quomodo ergo ad thema nostrum, quo acrimo-
niam acidam in humoribus præsentem statuimus, re-
spondendum

Int. van Swieten Comment. ad §. 62. ita respon-
det: „Sanguinem acido tamen infici posse, licet
quædam in morbis observata “

„ 1mo: In morbis languidis aliquando sudor aci-
dum spirans observatur; immo & aliquando in fine mor-
torum “ (Sympium, chartamque caruleam rubro co-
lore tingens)

„ 2do: Acidulorum vinorum abusus podagram fo-
cit, alkalinorum parco & sapius repetito usu sanatur. “

„ 3to: Atta læx sanguinis, hypochondria occu-
pans, soluta, nota, vomitu excreta, aliquando aci-
dissima inventa sunt: sic ut lapides adroderet, & cum
terrestribus corporibus efferveret fortissime. “

„ 4to: Ossa acidis humida mollescent, flexilia
sunt. Pleraque alimenta sunt aciescentia, quorum in-
doles imitatur in sano corpore. Quando vero hæc vis
immutans nimis debilis est, non superatur illa aciescen-
tia ingessorum, tunc aliquando ossa, cartilaginee &c
flexilia redduntur, ut in Rachiticis. “ (Exemplum
omnium celeberrimum in Gallis præbuit forma Su-

PIOT, cui omnia vix non carnis instar emollita fuerunt ossa.)

Ergo, quum hæc itaprehendantur se habere, videmus casus dari nonnullos, in quibus acida sanguinem intrent, argumentis ex repetita observatione desumptis.

Sudor certe acidus in Infantibus sæpe observatur (inguina, & regionem subauricularem adrodens, exco-rians); observatur haud raro & in fine morborum acutorum. Practici advertunt hoc, ut rem boni præ sagii: & cur hoc? Quia tempore morbi acida & acescentia adeo copiosa sanguinem intrarunt; ubi itaque ab eo ipso sanguine, a quo in morbi *παράβασι* & *ἀκμή* sudor foetidus, alkalescens observabatur, jam idem observatur acidus; fidus habetur nuncius destructæ humorum alkalescentiæ. Nonne & hinc explicandum, cur insulsa tantum adsumentes ex acutis reconvalescentes toties falsedinem alimentorum conquerantur? Quippe paullo ante lamentabantur, sibi omnia sapere foetide. Ita scilicet illud in alkali vergens dominabatur in eorum saliva, ut nihil aliud sibi sapere viderentur. Declinante autem morbo omnia sibi falsa esse queruntur; quum acida, durante morbo adeo copiose sumta, nunc cum illa alkalescente volatili sanguinis parte commista sunt, ut natum inde sal fuerit ammoniacum factitium (species salis ammoniacalis, acido specificante a sale ammoniaco genuino diversa)

Nonne hinc, quod in transitu dicam, intelligimus, quid sibi velit HIPPOCRATES *Aph.* 6—33. „ Ο'ξύγεγμύωδες, acidum ructantes non admodum (vel raro) Pleuritici “? Pueri, Virgines, debiles homines, Fœminæ, flaccidæ, mollesque, centies conqueruntur acido se consumi, dum vix conquerentes audiat de acido Viros robustos, & Viragines. Ratio postea patebit. Verum, quia idem HIPPOCRATES docet, pleuritidem frequen-

tissi-

tissime cadere in vigorosam ætatem *Aph.* 3—30.; hinc bene advertit, eos rarius pleuriticos fieri, qui acido laborant, quum soleant esse laxioris texturæ, laxioris cruoris: quippe ad pleuritidem vasa stricta, & humor densus præsens requiritur.

Acidum vero eructant aliquando homines ad alkali dispositi, ubi acidis abutuntur; nam quod quis acidum eructet, id non est signum, quod acidi sit temperamenti; sed qui debili temperamento præditi acidum eructant, hi in pleuritidem non tam facile proni.

Igitur videmur ex ante dictis posse concludere, etiam in statu naturali acida intra lacteorum angustias utcunque recipi, & cum sanguine communicari, continuoque advectu componere cum illa humorum parte, quæ alkalina fere volatilis erat, neutrum illud sal, ammoniaco proximum.

Certe ad omnia dicta debemus quoque adjungere adtractionem lacteorum, ut tubulorum capillarium; unde aliquid potest introsuscipi, quod forte acre tenuissimum sit.

Deinde acescentia sua natura suscepta possunt acida fieri, ubi ad acidum in humoribus est dispositio.

Tandem a posteriori patet, acidum esse in hominibus; ergo illud vel ut acidum, vel saltem ut acescens intravit; ut ipse B. testatur, *Aph.* 62 & 64.; ita, ut ab acido in sanguine morbos plurimos & mortem deducat.

Verum enim vero perparva hæc acidi copia est in humanis corporibus, dum vigent vegetaque. Nam, quæ in *Artis Soc. Reg. Scient. Paris.* de Chemicis bene adeo meritis HOMBERGIUS habet, ea nihil hic probant: produxit quippe spiritum salis marini ex humoribus humanis. Verum haud agitur de ejusmodi acido, quod ex animalium, multo sale marino utentium humoribus per ignem vi ignis extorquetur. Neque

enim datur in corpore humano, qui acidum illud salis marini extricet, calor.

Jam, ut examinemus morbos, quos *Ill. van Swieten* dixerat acidi in humoribus præsentiam testari, consideremus Imo. *acidum Infantum sudorem, hominumque illorum, qui jam morbi acuti adtigerunt finem.* In Infantibus acidum admodum familiare est; ita, ut sudor id testetur. Verum sæpe eorum morbi tunc non vacant periculo. Videamus porro, quomodo acidum in iis generetur. Dicitur quidem calor in Infantibus ut-cunque major; verum in *Rat. Medendi Part. IV.* contrarium demonstravi. Ratio autem vera hæc est: corpus eorum fere solis vasis componitur, & vasis quidem admodum laxis, parum in contentos agentibus humores. Ergo humores in illis non admodum subiguntur. Humores jam non subacti suam sequuntur naturam. Igitur lac quam proxime acescens omnium animalium humorum, sibi demissum, vasorum actione non multum subactum, acescet, immo acidum fiet; adeoque & sudor acidus erit. Sudorem acidum Adultorum in fine acutorum explicui: adde, quod Reconvalescentes sint debiles, flaccidi; adeoque in acidum generandum proni.

Acidi intra sanguinem argumentum forte subpeditat sudor vappide acidus in miliaribus; immo die uno alterove ante miliarium eruptionem subin jam præsens; (qualem & in variolis, & in Puellis chloroticis haud raro observavi.) Si miliaria semper post finem acutorum orirentur, sane explicatio ex præcedentibus præsto esset. Verum miliaria oriuntur sæpe 4. 5. 6. 7. die ab inchoante febris acuta; quando morbus adhuc crescens minime potest in sui declinatione dici: quodque magis mirandum, morbus cum acido, vappido sudore, acidis & acescentibus feliciter curatur. Sed de his alio loco

loco latius; sufficit acidi sudoris adtulisse argumenta, ut acidi in sanguine præsentia patefcat.

2do: Patet idem in *podagra*; quæ, ut ex diversis oriunda caussis, ita aliquoties etiam acido suam debet originem; anteaçta vita, symptomatibusque id docentibus. Unde ex anamnesi & diagnosi bona facta indicatione Medici dedere sal viperarum, aliudve alkalinum; quo facto ex unione alkalini salis cum acido peccante corporis neutrum sal exurgebat. Plura horum prostant exempla apud Auctores curatæ hac methodo *podagræ*.

3tio: Quod *Inl. van SWIETEN* adfert de *fæce* illa, quæ *vasa hypochondriaca infarcit*, & quæ nonnunquam vel bonitate naturæ, quod raro; vel aptis remediis soluta, mota, vomitu excreta fuerit, inventaque tam acida, ut cum alkalinis effervesceret, ipsosque lapides & metalla roderet; praxis medica multis confirmat exemplis. *Petrus BORELLUS Cent. 2. Obs. I.* testatur, se vidisse rejectam vomitu materiem, quæ instar aquæ fortis ebulliret. *Magnus BOERHAAVIUS Aph. 1105.* „ *Materies*, ait, sic reddita, una cum tenacitate summa, & fere picea, simul habet acrimoniam acerrimam, acidam, quæ metalla rodat, terram fermentet, aut alkalinam salinam &c. “ *Audivi magnum Virum adferentem*, quod bis id viderit, sed præcipue in nobilissima fœmina Hagæ - Batavorum.

(In febribus etiam intermittentibus acida talis saburra haud raro, insigni cum levamine ægri, rejicitur aut sponte, naturæ præstantia; aut artis demum exturbatur præsidio: „ Tempore vernali, *Inl. L. B. de STÖRCK* ait, *Ann. Med. II. p. 164.* omnes fere, qui intermittente laborarunt, vomitorio opus habuerunt. Dedi in principio remedia digerentia, diluentia, purgantia &c. nullum tamen inde effectum expertus sum; nam manserunt continuæ præcordiorum

obpressiones, nausæ & vomitus, & oris amaror, sordities, & *ruſtus* amari, foetidi, ovum putridum redolentes, *quandoque spirantes acidum*. Sæpiſſime unicum vomitorium febrim ſat violentam ſuſtulit; quandoque tamen id debuit aliquoties repeti. “ Materies hæc ſæpe acida adeo eſt, ut dentes ſtupeant, aſci acido vitriolico forent tacti, & fauces adrodantur. “)

Nequeo, quin hac occaſione referam Vobis magni HIPPOCRATIS verba, *lib. 2. de morbis, ſub finem*. Μελάινα νῆσος (*morbus niger*); „ bilem atram, tanquam ſæcem vomit; interdum quidem velut ſanguinem; interdum vero velut vinum ſecundarium ὄνον τὸν δεύτερον; quandoque etiam veluti polypi atramentum, quandoque acidum, tanquam acetum. Nonnunquam vero ſalivam, & pituitam tenuem, nonnunquam bilem ex viridi pallidam. Et quum nigrum quidem cruentum vomuerit, cædem olere videtur. Fauces & os vomitu incenduntur; dentes obſtupeſcunt, & quod vomitu rejeſtum eſt, terram adtollit, quumque vomuerit, paullo melius habere videtur; neque ſine cibo eſſe, neque copioſiorem cibum ingeſtum perferre poteſt. Verum, quum jejunos fuerit, viſcera ſtrepitum edunt, & ſaliva acida eſt. “

Libro I. de mulierum morbis, c. 12. edit. CHARACTER. deſcribit morbos Fœminæ pituitosæ, ergo in acidum inclinantis; quo in morbo menſes in utero plurimo tempore retardati, demum prodeunt penitus corrupti; „ quandoque, ait, velut a carnibus aqua prodit; quandoque velut ſanies, in eoque multi ſanguinis grumi inſunt; & tanquam acetum, ita terram abradit, & quacumque Mulierem contigerit, mordet, uterosque exulcerat. “ Paullo poſt ait, ulcera hic loci tam turpia ac graveolentia non eſſe, quam ſi a cauſa calida, bilioſa.

Tandem 4to *mollitudo ossium cartilaginumque in Rachiticis* observanda acidi in humoribus testatur præsentiam. Hanc adeo enormem videre est quandoque, ut ipsa ossa majorum artuum inflecti obstupescamus haud aliter, ac si corpora illa in se ipsa convolverentur.

— Bonus *Fred. RUYSCHIVS Anim. anat. Dec. 2. n. 6* idem eadem de causa animadvertit: immo hanc ossium mollitudinem uni deberi acido tam firmiter persuasum habuit, ut curam Rachiticorum infantum inde deduxerit, adgressusque feliciter fuerit. Sane antacidis artem nihil in hoc morbo præstantius possidere, multus me usus docuit. — Aderat Hagæ-Batavorum Vir ex summis Reipublicæ Moderatoribus, arcanum familiæ suæ possidens, quod gratis concederet Parentibus, qui suos Infantes rachiticos dolerent. Initio praxeos meæ communi methodo frustra Infanti cuidam curando insudaveram, quumque brevi interiturus videretur, Parentes, metuentes a sumtibus, voluere rem sibi dimitti. Inaudierant interim arcani mox dicti laudes: adplicuere & ipsi, ostenderuntque mihi posthac eundem Infantem sanum, vegetum. Casu contigit, ut Collega mihi referret, se ex domestico amplissimi illius Moderatoris rescivisse, totum arcanum nil nisi ostracodermata usta continere. Experimur: curas posthac inde fortunatas fecimus.

Quomodo hoc phænomenon exponemus emollitionis ossium? Acidum ita prædominatur, ut ossa mollescant, ac si RUYSCHIVS ea in acido liquore mollia reddidisset: tamen non dolent Rachitici multi: quantumne vero deberent dolere! Acidum interim certo prædominari novimus, & morbum antaeidis, & calcareis curari. An ossa interna non dolent?

(Corollarium simul hac occasione practicum adposuisse non oberit: acidorum usu abstinendum esse,

dum calli requiritur genesis: patet simul hinc, cur in quibusdam adeo lente formetur callus: quin & ipsius unguis deperditi restitutionem eandem in diæta observationem exigere, usus rerum me docuit.)

Effecta acidi in sanguine nostro B. recenset §.

760. *Altera acrimonia, quæ vel acida simplex; illis contingens, qui acidum sincerum succorum limonii mali &c. vinave acida multum, simpliciterque adhibent; aut plerumque acerba simul, adstringit, incrassat, coagulat: scilicet, ubi talia acida austera sanguinem intraverint: ut hic loci subponit.*

2) *Acidam acrimoniam*, eandem ob causam.

3) *Dolores lancinantes*, quasi partes discinderentur. Ratio patet. Acuta illa corpuscula continuo in tenerrimorum vasculorum parietes arietant, ab iisdemque post irritationem se contrahentibus, repelluntur; hinc tales dolores.

4) *Dolores argentes*, ita, ut hi homines in mediis doloribus conquerantur frigus, acsi gelida perfunderentur. Fortè causa est, quod in frigidis illis inertibus corporibus acida illa coagulantia austera vascula per momentum ita obstruant (constringant), ut fiat idem, quod in stagnatione humorum in capillaribus, in febris intermittente fit: statim enim tunc frigus percipitur.

5) *Cardialgiam*; hæc Imo ab ingurgitatione nimia; 2do a bile putrida; 3tio ab acrimoniis aliis; 4to hic a rosione materiæ acris acidæ in ventriculo, nervosam ventriculi texturam maxime circa orificium superius rodentis.

6) *Pallorem*; quia in corpore flaccidiori deficit illa vis chylum compingens in solidos globulos rubros. Tum, quia acidum austerum vasa multa minima constringit, ut rubrum ultra admittere nequeant.

LEEUWENHOECKIUS videbat vasa, rubros globulos vehentia, aliquando vel a frigore, vel a convulsione, ita arctari, ut ultra rubros admittere non possent. Videmus hoc in acida hacce temperie. Manifesto patet in iis, qui ex vinis & cerevisiis parant acetum: pallent os, labia, carunculæ in oculis &c.

(Unde & subitaneus pallor a vaporibus ardentis sulphuris objecta facie; constrictis illico vasculis minimis cutaneis.)

7) *Scabiem inprimis creat.* Scabiem proinde non proprie illam, quæ contagio contrahitur, sed ex hac causa sponte natam. Porro scabies illa potest fieri acido adsumto intra nostros humores; vel etiam, quando acidum primarum viarum causa est, quo minus prima digestionis officina crudos humores apte præparet; vel quando crudior chylus a sanguine pallido, inertique, haud subigitur, sed acescens manet, eamque ob causam stimulat; ubi etiam per cutanea vasa dissipari deberet, stagnat, inhæretque illis acuto angulo infixus: quo posito pruritus fit, & scabies. Hanc scabiei speciem Rusticorum Pueri experiuntur, qui pyra, poma, aliosve immaturos fructus vento dejectos adfatim comedere solent. Multis horum cutis crassa veluti crusta obducta cernitur. Eadem de causa oves & porci scabiosi redduntur; ab esu scilicet immaturorum fructuum, vento dejectorum: eorum in pinguedine tunc sæpe corpuscula illa dura invenimus, quæ grandines vocamus. (Tenendum tamen, non ex solo immaturorum fructuum esu grandines illos, Germanis *Sinnen* dictos, oriri; uti ex doctrina Veterinaria patet.)

Tertia denique in vinis acidis, aut acëtis, consistens, fere similia facit, at leviora. In his enim acidum paratum est fermentatione; sed in ambobus non eodem modo: nam vinum quidem paratur prima fermentatione ex vegetantibus; acetum vero conficitur secunda fer-

mentatione ex vino jam facto. Vini pars prima volatilis, destillando prodiens, inflammabilis est, ut luculentam flammam concipiat: aceti pars prima volatilis destillando prodiens, instar aquæ flammam exstinguit. Est igitur hic facta singularis unius ex alio productio. Hic porro loci non consideramus id in vino spirituosum, quod reddit homines temulentos, sed tantum illud acidum penetrans.

Id porro vini acetique acidum effectibus in eo differt ab acido austero, quod sanguini adfusus, cum eodemque mistum, eum diluat potius adtenuetque; quam, quemadmodum austera, illum incrasset; inprimis dum aqua sumitur dilutum. Unde HIPPOCRATES, ARETÆUS, DIOSCORIDES, aliique plurimi Veterum suum *Oxycraton*, melle mistum, adeo valere ad calidos putridosque morbos debellandos censuerunt, ut nihil haberent commendatius.

(Accedit huc & Romanorum *Posca*, unum ex præcipuis remediis, pro tuenda Militum sanitate olim adhibitis, tum & *oxysaccharum*, aliaque acida vegetabilia: v. c. *succus citri*, aut *acetosellæ*, quibus morbi febriles putridique pulchre adeo sæpe numero domantur. Adduxisse ex mille instantiis sufficiat unicam. Erat Quidam, Cl. SENAC ait, de *recondit. febr. interm. & remittent. nat. l. 3. c. 9. §. II.*, qui a quatuor aut quinque annis febrem laborabat quartana. Nocere potius, quam levamen adferre videbantur quæcunque febrifuga. Quum autem desperata videretur ægri restitutio, ecce arcanum, quod a quodam, Medicinæ prorsus ignaro, obtruditur! argenti scilicet Ægro exhibetur acetosæ succus ad unc. viij.; atque hoc remedio, bis adsumto, deleta sunt contumacis febris omnia vestigia.“)

Hæcque acida similia quidem abusu efficiunt, ac acida austera, v. c. cardialgiam, scabiem &c.; sed
gradu

gradu leviori; nec cum humorum coagulo: hinc pergit textus:

Deinde præ cæteris nimio usu adsumta acre, acidum serum facit. Non proprie, aut passim, illud serum flavum coctum sanguinis, ad ignem concrefcens; quod spontanea corruptione potius in alkali verteretur; sed chylosum illud, cum sanguine quidem fluens, sed corporis haud subactum viribus. Hoc chylosum serum retinet illam in acidum inclinationem, lactisque naturam, diutius; & forte in Debilioribus retinet semper: ita, ut hinc oriatur illa lactis perpetua acescencia Nutricum, crux Medicorum perennis in morbis curandis Infantum: quos Infantes nunquam curamus, nisi quando sapone veneto multo illam Nutricum diathesin mutaverimus. Intelligimus etiam hinc, quomodo acidum possit esse præsens in hominum debiliorum omnium humoribus.

Habent quippe vina omnia acida fermentata, quæ suum tartarum necdum deposuere, tale acidum, quo serum chylosum acre & mordax fit; quod dein in vasis minutis, maxime articulorum, dolores excitat. Est autem vini, acetique acidum, uti ex Chemicis patet, miræ cum totis suis viribus penetrabilitatis: hinc

Facit ergo facile rheuma, podagram, & similia. Tale rheuma, quod corporis varia loca infestat, quodque ad pedem se figens podagram, ad articulum genu gonagram, ad articulos manus cheiragram, ad articulum coxæ ischiadem adpellitant. Invadunt hæc mala eos, qui natura debiliores sunt, quam ut acidum hoc domare queant.

Velim tamen, AA., non cogitetis, omnem omnino podagram acido, ceu origini, adscribendam esse; neque omnem hominem podagricum fieri, qui his acidis abusus sit; neque etiam omnem illum, quem podagra

podagra affligerit, acidis his nimis fuisse usum. Est enim, quam hic refero, una modo podagræ species, ab una ex tot podagræ causis nata.

Est enim podagra (quædam) nullis remediis aptius mitiganda, quam acidis saponaceis copiosis.

Est alia podagra, quam vita laboriosa homini conciliaverat, qui frigore alserit, qui calore excoctus fuerit, qui humiditate tabuerit, qui siccitate exaruerit & emarcuerit, citra ullum vinorum acidorumve abusum: unde ergo? Vera ADAMI profapia panem in sudore vultus sui lucrans, cum doloribus illum comedens, & multis ærumnis, similibus multatur pœnis.

Est podagra hæreditaria, quæ citra propria merita aut errores, hominem, ubi certam vitæ ætatem adtigerit, adoritur.

Est podagra, qua vexantur homines, qui ne vinum quidem, aut cerevisiam bibunt, vel bibere possunt; qui diætam blandam observant: qui tamen vel ex hæreditate, vel debilitate solidorum in acidum ex acescentibus generandum proni, serum suum acre habent.

Est a nimio Veneris usu orta podagra. Hoc jam olim animadverterat HIPPOCRATES. Hinc dixit *Aphor.* 6—28. „Eunuchi non laborant podagra, neque calvi fiunt.“ Patet ex HIPPOCRATE, podagram Asiaticorum minus a diætâ, aut aliis erroribus nasci observatam, quam ab inmodica Venere. Unde corpora minus exsiccabantur; atque, quum calvitie oriri observetur ab exsiccatione membranæ adiposæ & cutis capitis (bulborumque capillorum); mirum non fuit, illos strenuos Veneris Pugiles simul calvitie notatos fuisse. Porro Eunuchi, quum in Veneris campis ultra militari non poterant, caruere & podagra, & calvitie.

Unde

Unde posthac ad confirmationem addit 6—30. „Puer non laborat podagra ante Veneris usum“; quia nempe non potest hanc causam adhuc ponere. Videmus certe morborum causas variare pro variis regionibus, & sæculorum decursu. Dixi alia occasione, de epilepsia agens (ad lectos Ægrorum), quomodo tempore HIPPOCRATIS epilepsiæ causa passim hæreret in mucositate nimia cerebri, & humorum; nos vero in Europa vidimus ortam eandem ex causis numerosis aliis. — Ita maxime notat abusum Veneris pro communi causa podagræ HIPP., ut adducti bini docent aphorismi; tum & pro causa adsignat mensium defectum, ut docet *aph.* 6—29. „Mulier non laborat podagra, nisi ipsi defecerint catamenia.“

Qui hanc diversitatem variarum mundi plagarum & ætatum non considerarunt, vel HIPPOCRATEM irriserunt, falsive insinularunt; vel hos aphorismos non esse *Hippocraticos*, sed ab aliis hic interpolatos crediderunt.

Verum hi omnes demonstrarunt palam, se totum HIPPOCRATEM non legisse: quodsi enim totum adtente legissent, utique animadvertere debuissent, hunc Medicinæ Parentem multoties hæc tria de causis & subjectis podagræ repetiisse. Patet, alias illi notas causas non fuisse. An potuit aliter scribere, quam in sua Græcia, Lybia, Hellespontide, Illyria, Scythia animadverterat? Sane æquius, crediderim, nos Europæos exciperet HIPPOCRATES, si viveret, percipiens a nobis tot causas epilepsiæ & podagræ, a nobis in Europa observatas. Agnosceret in nostris recitationibus idem, quod in aliis morbis tam sollicitè notat de varietate causarum pro varietate nationum & morum; minime vero irrideret nos, quasi hallucinatos, uti non pudet nunc multos facere erga HIPPOCRATEM.

An eodem modo lubebit illis, adcurare **CELSUM**, qui *Augustæo* sæculo vixit Romæ, ac de podagræ causis suo tempore haud alia novit, quam sex sæculis antea in Græcia **HIPPOCRATES**? *Libro* siquidem 4. c. 25. ait: „In manibus pedibusque articulorum vitia frequentiora longioraque sunt. Quæ in Podagricis Chiragricisve esse consueverunt, ea raro vel Castratos, vel Pueros ante Fœminæ coitum, vel Mulieres, nisi quibus menses subpressi sunt, tentant.“

ARETÆUS CAPPADOX, qui probabiliter vixit, vel floruit, antè finem regni Imperatoris **HADRIANI**, adeoque initio sæculi secundi æræ christianæ scripsit, videtur easdem causas observasse, quas **CELSUS**, quas **HIPPOCRATES** observant; verum simul animadvertisse, quod suo tempore malum hoc hinc inde Fœminas inciperet paullo frequentius adfligere. *Libro de morb. chron. cap. 12.* „Viri, inquit, facilius in hunc morbum incidunt, & ex Mulieribus agiliores. Mulieres autem; licet rarius, quam Viri, difficilius tamen hoc vitio laborant; quod neque usitatum, neque familiare est, id, si aliqua urgente causâ potentius evaserit, violentum quum sit, majorem calamitatem infert: ætas autem huic morbo subiecta est a 35 annis.“

ARETÆUS ergo ætate sua, i. e. sæculo secundo æræ christianæ; ubinam locorum nescio, quum non constet de loco, quo habitaverit; Græcus tamen, uti **HIPPOCRATES**, Ionicus, hinc in Græcia probabiliter vivens; **ARETÆUS** inquam, saltem sæculo secundo ineunte notavit, non circa Eunuchos, non circa Pueros, sed circa Fœminas rem parumper mutata videri.

CL. GALENUS, qui medio sæculo secundo vixit, vel floruit, rem eandem detexit esse circa Pueros, parumper tamen mutatam circa Eunuchos.

Ergo

Ergo observata HIPPOCRATIS in Græcia facta ante 23 sæcula, coeperunt sæculis circiter sex postea elapsis mutari in Eunuchis & Fœminis. Nostri ætas idem observat; ut olim, ita & nunc, Pueros vera podagra non laborare.

Prosequitur B. signa acidi §. 913. Quum enim quatuor diversis locis de acrimonia humorum agat; nempe §. 725., tum §. 760., dein §. 780., demum §. 911—915. ubi signa varia acrimoniæ exponuntur; hæc autem sint omnia inter sese connexa, & se invicem explicantia, hinc utile duxi, omnia simul explicare: ita, ut quando sermo iterum deveniet ad hæc in pathologicis, transeamus ea, revocanda tantum in memoriam, quæ semel nunc dicta.

Prosequitur, inquam B. signa acidi in humoribus præsentis §. 913. *fitis non magna*; quia omnia humida, mollia, flaccida sunt, & perspiratio non multa; unde sanguis non exsiccat; & liceat præ debilitate aliquando sudent, omnia mollia manent.

Adpetitus sæpe ingens, digestio celerrima: ita Infantes sæpe voracissimi: quia acidum adeo in ventriculo copiosum, ut nauseas faciat, vel crampos, stimulat valide ventriculum; tum ut adpetat, tum ut digerat: quum & in acido partes solidæ mollescant, hinc partes carniū & piscium duriores avide deglutitæ cito macerantur, & mollescunt in illo acido.

Tamen mutatur sæpe rerum facies: vel enim voracitate nimia plus devorare, quam digerere possunt; unde cruditates, & adpetitus minor: vel Infantes voraces demum habent ventriculum plenum colostro lactis, unde ille renuit omnia: vel est acidi copia tanta, ut erodatur quasi tunica villosa, & ut metuant hinc ab ingestis, renovato inde dolore: veræ tum ab acido cardialgiæ.

Validus appetitus rerum terrestrium & absorbentium: instinctu naturæ vidimus bruta animalia æque ac homines ad res sibi salutares decurrere; sed abusu se pessumdant: cretam, arenam, carbones, calcem videmus puellas adfatim haurire, quæ moderata dosi absorberent, (si calcareæ sint indolis arenæ), copiosius autem ingesta cum muco ventriculi, quo abundant tales, in pastam abeunt, vel deficiente muco abradunt, nimis intestina.

(Puellæ chloroticæ, pica laborantes sæpenu-
mero. & alia longe ingerunt, quæ nunquam a viribus
ventriculi domanda certum demum adferre debent in-
teritum. Ex binarum Puellarum, Sororum, 20 cir-
citer annos natarum, chloroticarum ventriculo glo-
bos post mortem exemptos fuisse probe novi, exter-
ne crusta calcarea firma inductos, interne carbones
exiguos, pulverem coffeæ tostæ, inprimis vero fila
& ligulas recludentes — Aliam novi, quæ dum in-
flarent menstrua, adeo adpetebat atramentum scripto-
rium, ut caveri debuerit, ne haurire illud posset.
— Sylvam exemplorum vide apud Observatores.

Tormina alvi cum pallore & frigore; nata vel
ab exposita mucæ abrasione per vim magnam deglutitam
arenæ, cretæ, sed omnia citra inflammationem; vel ab
acidi copiosi ibidem stimulis.

Fæces alvi torminales, acidum spirantes, virides;
torminales & acidum spirantes, ob copiam acidi in-
telligimus; sed minus capimus earum *viridescentiam*.

Virides sunt fæces, maxime Infantum acido labo-
rantium 1) egredientes ita de corpore; 2) vel flavo-
albescentes, aut flavæ omnino exeunt ex corpore, &
sic per 1, 2 horas manent: sed servatæ in linteis &
exhibitæ Medicis; vel integre viridescunt obscure,
seu instar æruginis; vel variegatæ sunt ex æruginoso
colo-

colore cum flavo-albo. Rem narrant omnes, non explicant; neque, quod sciam, B. ullibi explicuit.

Inquirendi in hujus phænomeni causam faciamus pei culum.

Color viridis non potest oriri a lacte; lac enim extra corpus humanum accescens & acidum factum. tali non donatur colore.

Ergo lacti aliquid accedat necesse est intra corpus, quod vel a relicta meconii portione, vel ab Infantis oriatur humoribus.

A meconio non videtur; quum Infans sæpe per anni dimidium a nativitate sanissimus, adeoque nil corrupti meconii ultra in se gerens, demum incipiat fæces virides reddere, a primis dentibus transitoris vexatus.

Ergo necesse est, ut color ille oriatur ab humoribus, Infantis in corpore reperiundis.

Adest 1) ibi saliva copiosa, ob salivalium glandularum in Infante magnitudinem;

2) mucus oris; sed non potest colorare;

3) succus gastricus, 4) entericus, 5) pancreaticus; in sectione cadaverum hi omnes tali colore nunquam inventi fuerunt præditi:

6) Bilis occurrit, quæ potest excrementa tingere, quæque eadem revera tingit.

Nam 1) in ictero ab obstructo hepate excrementa sunt alba; bilis retrogressa in sanguinem flavo hunc colore tingit, uti & urinam. Signa solutæ obstructionis hepatis sunt excrementa per gradus flavescentia.

2) In phrenitide futura alba fæx alvina observatur, sed sanguis non tingitur flavedine: in hoc morbo phrenitico videtur circa diaphragma & hepar spasmodica constrictio effluxum bilis ad intestina, refluxum bilis in sanguinem præpedire.

Verum, si a bile, cur excrementa Infantum non potius flavescent, quam virescunt; talis enim bilis color?

Bilis colore multum mutatur a motu & convulsione: ait B. §. 788. „Bilis flava, vitellina, porracea, æruginosa, isatodes, solo motu, convulsione, animi adfectu sæpe nascitur: causa vix explicata hactenus.“

An ergo bilis motu febrili aut convulsione ita mutatur in Infante, ut fiat ex flava jam viridis & æruginosa?

Antequam id sic se habere adfirmemus, examini subiciantur casus alii, in quibus bilis ita mutatur colore.

1) Observatum *Hippocraticum* & omnium sæculorum est, quod homo caput percussus, aut vulneratus, bilem sæpe vomat primo flavam, dein viridem, vel etiam æruginosam: ita, ut eo plus in morbo sit discriminis, quo plus recesserit ille color a naturali. Immo & in acutis morbis *HIPP.* sæpe loquitur de vomitu bilis flavæ, viridis, æruginosæ, nigræ; *lib. 3. Epidem. ægr. 4. § 12; lib. 7. text. 61. Prognost. p. 41. Prorrhet. 2. text. 28. 40.* — Bilem æruginosam non vidimus aliquando in nostris Ægris in nosocomio.

2) In convulsionibus, epilepsia idem cernere est.

3) In mobilis systematis nervosi hominibus ab accepta contumelia, ab ira, ab invidia, mutationes tales colorum vomitu observantur.

4) Homines sani, sed longo itineri in curru, vel maris agitationi minime adsueta, reddunt talem bilem, vel materiem, a flava usque in viridissimam mutatam, eamque adeo copiosam, ut mirum sit prorsus, unde prodire potuerit. Rem hanc bis in me ipso junior olim expertus, adfirmo verissimam: semel in itinere

celeri 12 horarum, ubi in carpento mobilissimo obverso corpore vehebar; semel etiam in mari, vento procelloso, eoque fere contratio. Varios omnes illos colores miratus sæpe fui in vomitu, copiamque incredibilem.

Quid ad hæc itaque respondebimus? Si adeo mala est mutatio coloris bilis in morbis, cur mihi & aliis ab insueta agitatione id passis nil mali adtulit; nam eram velperi sanus, optimique appetitus?

(Vomunt & homines nonnulli mobiliiores bilem viridissimam, æruginosam, dum per unum alterumve minutum ocysime in gyrum ducuntur; aut capite prono, quin tamen lædantur, labuntur.)

Sunt ergo casus, ubi bilis ex flava mutata sic in æruginosam & viridem, denotat morbi magnitudinem: sed præterea sunt casus alii, ubi illa magna mutatio nil mali adfert; immo corpora bene expurgata agilia reddidit; ut in me ipso expertus fui.

An ergo referendus est Infantum acido laborantium casus ad horum primum; nempe ad malam, morbosam coloris mutationem?

Difficultatem pariunt sequentia:

1) Infantes sæpissime viridia excrementa habent, citra ulla mali indicia, sine ullo adparente morbo. — Infantum excrementa etiam non semper viridia sunt a solo acido. Infans sanissimus cum flavis excrementis, a dentitione febricitat; mox viridia sunt excrementa. Cura antacidis facta hic nulla est; sed cura fiat dentis prodituri; eo foras emerso sensim iterum flava excrementa.

2) Viridia, immo viridissima excrementa dedit Infans, usque ad mortem; cujus cadaver altera a morte die cum dexterrimo Anatomico aperti 30. Junii 1744. Acido acerrimo laboraverat; ita, ut ventriculus & intestina elota, & scalpro purgata quasi a La-

nione viderentur, nec mucī oblinientis quidquam superesset: immo ut in vitæ fine pituitam vitream vere reddiderit. Invenimus vesiculam fellis satis repletam, ipsam vero bilem non viridem colore, non flavam; sed aquæ vel lymphæ similem; gustu in ea deprehendimus vix quidquam amari.

Ergo non est bilis, quæ ita tingat excrementa; sed sublitescit hic aliquid aliud.

1) Enim ab initio dixi, quod Medici quotidie experiantur, fæces videri flavas, aurantio fere colore tinctas, dum ab Infante redduntur; sed per aliquot horas adservatas plane æruginosas, aut variegatas adparere.

2) Idem Infans, de quo mox agebam, quarto ante obitum die reddidit in mappas inter fæces frustula triaglutinosa, albida, transparentia; magnitudine quodvis unius floreni batavi, sive austriacæ monetæ 17 cruciferorum.. Fæces has cum his corporibus ferra vespera mihi adtulerunt ad meas ædes: per noctem ea servavi inter easdem mappas, in quas Infans illas deposuerat. Mane conspexi denuo easdem: sed en! ficciora facta illa pellucida alba corpora, penitus viridescebant. Idem & postera die contigit.

Die 16. April 1755. rem vidimus in nostro nosocomio singularem: Mulier 30 annorum sæva laborans peripneumonia, quæ partim per sputa pauca, partim per copiosam alvum solvebatur, habuit die octava morbi alvos sex bonas quidem, sed adeo debilitantes, ut horrerem. Unde unc. vj. lactis cum gr. j. opii injeci. Mansit forte per iv. minuta in corpore enema, & lac purum sine ullis fæcibus exivit collostratum. — Quæritur jam, a qua id factum causa; febris erat acuta, putrida, inflammatoria. Urina, die quinta emissâ, adeo putrida erat die septima, ut eandem cum spiritu nitri miscens, ostenderim Adsiscentibus vehementer
esser-

effervescentem. In intestinis certe est etiam illa putridissima cloaca, per quam materies putrida flava se exonerat. Ergo impossibile hic cogitare possumus causam acidam, sed tantum alkalinam. Eandem rem sæpius vidi in putridis morbis. Sed hic non vidiſſemus hæc phænomena, si fæces junctæ fuissent: nunc vero lac sic collostratum purum exivit.

Homo feбри continua correptus, sexta die citra ullam indicationem emetico fortiter operante agitato, ad nos ducitur sub finem sextæ diei. Die septima, octava, nona, decima plane viridia excrementa deposuit, ut omnes vidimus; die nona finiente prodire petechiæ: in putrido ergo morbo denuo viridia excrementa.

Peripneumonici urinam servavimus a quarta die ad decimam quartam omnes. Priores tres copiosæ intra triduum ita virides factæ sunt, ut jurasset quis, esse expressum succum beccabungæ, aut nasturtii aquatici: color abiit sensim in fuscum, ac fere nigrescentem — HIPPOCRATES *Epidem.* 7. pag. 1217. in conjuge THEODORI: „urinæ acerbæ, succum referentes.“ Pertinent hæc ad solutam bilem atram.

Quid ad hæc omnia responsi? fæces, pituita vitrea, minime viridia; sed vel flava, vel alba, post aliquot horas fiunt plane viridia. An ergo colores sic in se mutari queunt? Aër dicitur mutare colores. Accessit aër: tenuior pars in aëra avolavit; quod remansit, repertum est colore mutatum. Tincturæ plures a Pictoribus fiunt, quæ aëri expositæ brevi abluunt a colore, quo mox antea fulgebant. Verum, ne intremus in Physicam, ne nimium a scopo nostro aberremus. — Fatebor, rem hanc mihi comprehensu videri difficillimam, reponendamque esse inter illas actiones, quæ experimentis sint ultra elucidandæ, antequam certi quid statuamus. Interim volui Vobis,

quæ explicationem faciliorem, quæque difficultates illam difficiliorem captu reddant, candide obferre, ut sciatis, quid ab omni parte dici queat.

(*Cel. ZEVIANI* colorem fæcum viridem optime deduxit exin, quod in intestinis diu detentæ acres & corrosivæ fiant; hinc vero bilem admixtam adeo virentem reddant, uti ab addito fit acido nitroso.)

Urina stranguriosa, crassa, alba, cum sedimento crasso copioso. Acidum mistum humoribus, quoque sero urinoso immiscetur, & rodentes sæpe colores facit ad vesicæ orificium stagnans: unde urina guttatim tantum dimittitur: uno momento stimulat acredo, altero momento apertura vesicæ stimolata spasmodice se contrahit.

Crassa est talis urina, quia vasa laxa non conpingunt chylum novum, qui tunc manet sæpe, ut in hominibus serum adparet sanguinis, brevi post pastum missi.

Alba est, quia in his corporibus deest oleum sanguinis; quod bona vigente circulatione rite adest, in validiori nimia copia præsens, urinam colore intenso tingens; circulo sanguinis obtinente languido oleum hoc ipsum minus præsens, urinam vix tingit.

Urina autem stranguriosa, crassa, alba hæc alia est, quam quæ in acutis liberat ab abscessu: nam ibi acidum non potest adcurari: ergo urina hæc per se non notat acidum. Sedimentum vero differt: in acutis his est vere purulentum; in acidis farinaceum.

Sanguis crassus, quandoque pallidior, aliquando nigrescens. Crassior in iis est sanguis; non ut in hominibus bene sanis bonus, compactus; sed crassus ea ratione, ac si frustum videretis hepatis. Serum enim crudum non intime mistum cum humoribus, plane & cito secedit a parte rubra; nec multum ejus in parte rubra manet, uti quidem in sanis fit hominibus.

San-

Sanguis porro ita crassus est a miscela imperfecta, sed *varius* etiam *colore* dicitur; pallidior nempe, vel nigrescens: id pendet a natura globulorum. NEWTONUS demonstrans colores, recte varietatem colorum deduxit in sanguine humano a densitate & crassitie eorundem. Igitur, quo plus pallet sanguis, eo minus densi globuli, & contra. Nigredo porro quasi sanguinis potest esse ab acido austero, de quo ante, quo moles globulorum nimis condensata fuit.

(Notum nunc satis est, quot variæ sententiæ in medium adlatæ fuerint exponendo sanguinis colori rubro. Deduxit *Inl.* HALLERUS colorem hunc a martialibus moleculis sanguini admistis; quæ quidem & demonstrari præsentibus in eo possunt ad oculum. Dixit quidem *Cl.* JADELLOT, *Physica hominis sani* &c. §. 74.; infinite minimam esse hanc portionem ferri, ut tam vividum colorem rubrum vix conciliet, qui terræ martiali non sit proprius. Præterea in ovo incubato jam adparere læte rubicundum colorem sanguinis; esse alia fluida, quæ multo majorem ferri copiam gerunt, & hunc colorem non præstant: dubiam demum esse hujus ferri in sanguine existentiam, quum non nisi post validam ignis actionem adpareat. — At, non adeo refellitur aut dilucidatur his effatis adsertum *Hallerianum*; quin nonnulla objectorum non firmissimo nituntur talo. Non novisse videtur JADELOT colores pulcherrime rubros, qui ex terra martiali parari queunt encaustici: esse fluida, quæ majorem vehunt ferri copiam, non tamen rubentia, lubenter concesserim; sed quis dixit unquam, colorem ubique debere prodire eundem rubrum, qui suis ex causis prodit in liquido sanguineo? Abs omni ignis violentia martem in sanguine, hujusque fero præsentem demonstrari posse, HALLERUS du-

dum dixit *Element. Physiolog. l. 5. sect. 2. §. 43*; qui & monuit, parcum reperiri ferrum in sero & albumine, parcissimum in pinguedine. Adiecit sub finem *Sphi cit.* JADELOT, materiem colorantem extractivam tamen demonstrasse nupera experimenta.)

Sudor multus acidus. Aquosa non bene mista diffuunt de corpore; inprægnata, quo corpus scatet, acido: eo magis quidem, quod laxa & flaccida temperies nulla repagula ad cutim ponat huic sudori; inde addit textus: *cutis laxior.*

Inflammationes leviores & lentiores. Si quandoque patiantur a vulnere, contusione, aliquam inflammationem; sanguis tenuior, vasa laxiora, cor debilius efficiunt inflammationem levem; ex generali doctrina de inflammatione: sed simul etiam tardas vel resolutiones, vel suppurationes.

Lac acidum. Acidi non tantum jam in sanguine, sed saltem in viis primis nota est lac colostratum prodiens vomitu, alvo. In comperto enim est, lacti bono acetum adfusum, vel cum eodem coctum, coagulare partem caseosam, & simul cum caseosa includere butyraceam; ita ut serum inde separetur. Acetosa cocta cum lacte, poma citrea &c. idem efficiunt.

Verum ex colostrato lacte acidi præsentiam concludere semper non licet, citra periculum erroris. Illud etiam addi debet, quod, etsi raro lac evomatur, quin coagulatum sit; viderim tamen lac non colostratum vomitu redditum; ergo sæpe, non semper, coagulatur.

Mulier lactans feбри acuta correpta si mammam Infanti præbuerit, videt, Infantem abominari lac istud, ut fugere ultra renuat. Mamma indurefcit a colostro, Medicus dat absorbentia. Nihilominus pergit mammæ inflammatio, suppuratio, abscessus; vel materia irresolu-

solubilis vertitur in scirrhum. Medicus interim credit sua, quæ potuit peregisse, quia antacidis malo obviam ire sategit.

Sed quid ibi causa fuit? Coagulum hoc forte factum fuit ab alkalescente, & mora diuturna fere alkalino facto. "An igitur alkalia lac coagulant? Etiam: instilla ebullienti lacti oleum tartari per deliquium; fiet coagulum verum, flavesceus, magis quam ab acido, & in glebas. forteiis, quæ acidum facit, minores. Unde venerandus Præceptor *Elem. Chem. p. 3. proc. 91.*, „ In coagulatione ergo lactis, una cum febris calida, & colore flavescente, non licet Medico cogitare de causa coagulante, acida; sed de calore nimio & forte alkalescente potius degeneratione. Quin forte centies Medici observant lac coagulari sic a febris, ubi ne semel vident id factum ab acido.“ Quum ergo causa tam contraria diversa sit, adeoque & medelam contrariam adhibere oporteat; videmus, quantum Ægrotantium intersit, ut, qui causas recte interlinguat, nanciscantur Medicum.

(Exactius multo actionem alkalium in lac examinavi in *examine chemico ovi & lactis*, ante paucos annos *Vindobonæ* edito.)

OLAUS BORRICHIVS apud BONNETUM *Med. sept. pag. 735.* animadvertit, lac, cujus in balneo Hydropticus federat, coagulatum; unde acidum fuisse ejus sudorem concludit: ast lac hoc forsan non recens, & calore demum coagulatum fuit.

(Ast vidi lac, quo Puella otiosa, mensibus anomalis laborans pro pediluvio usa fuerat, recentissimum, nec igne vexatum, mox abiisse in coagulum; quo sane *Bonnetianum* confirmaretur observatum.)

Profecto potius, si experimentum rite captum est, alkalinae dispositioni corruptarum ac foetidarum Hydro-

pici aquarum, quam acidæ dispositioni phænomenon adscriberem. — Corollarii loco quædam, Praxin concernentia, hic monenda.

Nostis Phthificos pulmonicos confirmatos, febris lenta purulenta consumi, quæ humores eorum dissolvat, & alkalinae indoli reddat proximos. Ut putrefactioni huic obviam eat, soletis illis lacticia magna dosi commendare; idque quidem ex arte. Interim reperietis, quos dolor ventriculi vexare incipiat, tandemque ita adficiat, ut coagulatum lac laborioso vomitu ejectum Vobis monstrant.

Duplici de causa id oritur. Imo quibusdam illorum ventriculus plane iners non digerit; non mutat accepta: quum igitur diæta eorum tota ex acescentibus paretur, facile fit, ut lac etiam in tali inertiventriculo suam sequatur naturam; & licet humores gastrici potius ad alkali vergerent, debiliores sunt illi, quam ut acescentiam illam doment. Verum 2do horum hominum saliva, liquor oesophageus, gastricusque aliquando sat fortes sunt, ut vincant inclinationem illam acescentium in acidum; & ut lactis coagulum, si tunc adsit, alkali rectius, quam acido adscribamus.

In his casibus abstineat Medicus parumper a lacte; donec symptomata illa cessent; detque ejus loco serum lactis bene colatum.

Rogabitis, an non præstaret, semper illis serum lactis dare; ne metus coaguli ab acido vel ab alkali unquam adesset?

Minime. Solemus enim omnibus Phthificis, aut ad phthisin dispositis exhibere lac eo ipso momento ex vacca, capra, asina sumtum; ut illud tenue, vaporosum, quod cæteroqui avolat, simul bibatur.

(Unde & proficuum imprimis est, si, dum in consumptione lactis humani usus præscribitur, lac ex ipsa nutricis exsugatur mamma; ut subtile illud, re-

ficiens, æthereum, coctione mox dissipandum, quod *spiritum rectorem lactis* adpellare poteris, una cum reliquo latice corpori exhausto ingeratur.)

Nota doctissimi CAPIVACCII historia est, Juvenis nobilissimi, hæctica consumti fere, cui omnia artis auxilia frustra adhibita erant: quum tamen inclytæ familiæ unica spes esset, ex consilio medico habito quæsitæ sunt binæ Nutrices sanissimæ, quarum lac, ne quid periret de illo rore exhalante, ex ipsis exsugeret mammis. Res in melius adeo mutabatur, ut oportuerit eum a Mulieribus illis amovere, ne ipse lac in iis generaret.

Sequitur *acrimonia alkalina alkalescens*. Ex Chemicis noscitis vim vocis kali; tum quibus ex corporibus alkalina salia parentur.

In hanc spontaneam corruptionem, quæ sal volatile alkalinum producit, inclinant ex propria natura omnia animalia; homine plane non excepto: acescunt vero (dum corrumpuntur) nunquam: *vid. Aph. BOERH. §. 83.*: scilicet animalia omnia mortua, relicta sibi, aëra fœtore implent, ob sal liberatum volatile alkalinum (oleo fœtente animali maritatum) in quod sal (dissipata utique jam, quod HÆNIUS non monuit, ingenti copia phlegmatis aquosi) fere tota ita resolvuntur, ut vix nisi ossa, & duriores coriaceæ partes supersint.

Porro in homine vivente alkalina dispositio illa nunquam adest (aut exactius loquendo, alkali verum non extricatur); spontanea enim corruptione tantum producitur mortuo animali, vel ex animali parte producitur vi ignis: exemplum præbeat sanguis humanus, cujus examen in chemicis latius traditur. Patet autem ex illa chemica analysi satis, quam diversa producta sanguis præbeat; expositus aut calori bullientis aquæ, aut 600 grad. therm. Fahrenheit. : primum horum sanguis

guis in corpore nostro nunquam experitur ; sed nec eo adhuc evolvitur alkalinum sal.

Videtis vero differentiam : videtis , quid putrefactio humorum nostrorum queat efficere præ vi ignis. Ast , repeto , in homine vivente talem nunquam adesse dispositionem (conditionem) : nam longe citius viscerum , cerebri v. c. tenella stamina destructa essent , priusquam sal tale alkalinum in humoribus posset adesse.

Dantur ecquidem casus , ubi verum alkali intra corpus humanum generatum visum fuit ; v. c. hominum calculos in vesica gerentium urinam plus simplici vice alkalinam deprehendi , ut cum aceto manifeste efferveret , ac foetorem spargeret. Verum nata erat talis alkalina acrimonia non in humoribus humanis , sed in loco extra leges circulationis hærente , nempe in vesica urinaria ; eo , quod scilicet urina sæpe stagnans ac retenta corrumperetur in vesica , introsuscepta calculi poris diu ibidem hærens , acrem induens indolem , recenterque ex sanguine adfluenti lotio natam corruptionis imprimens.

Idem vero & alia potest ratione contingere. Adfui homini primo vehementer per totum corpus rheumatico , deinde lenta nephritide vexato ; qui tandem lotium emisit sine signis præsentis calculi , purulentum , foetidumque. Hoc ipsum lotium , mox redditum , puroque vase exceptum , ego cum Collegio medico quotidie examinavi , deprehendique illud cum aceto & maxime cum spiritu nitri ita effervesce , ut sal volat. alk. fumi quasi specie adscendens horridam per ædes spargeret fracedinem. Quinque adhuc menses vixit cum tali urina sæpe reddita Æger.

Hic porro casus docet , renes posse subpuratos suum pus aliquamdiu continere ; idem pus tali mora posse acre fieri ; urinam ab humoribus in alkali vergenti-

gentibus secretam præterlabendo, & forte aliquamdiu stagnando, hanc corruptelam augere, & hinc verum alkali nasci. Verum id alkali non in hominis generatur humoribus; sed postquam ex humoribus materies, unde generatur, deposita fuit: eadem ratione id factum hic in renibus, quod antea in vesica. Licet enim renalis arteria quibusdam in locis adhuc per tubulos Belinianos, vel saltem per abruptas horum tubulorum partes, urinam secerneret; videntur tamen renes, magnam partem consumti, talem putridam materiem in sacco quasi extra circulationis arcam gessisse.

Phthificos reperire est, qui materiem purulentam, copiosam ore sæpe excernentes, vitam tolerabilem trahunt; ubi vero contigerit illud, quod Phthificis solemne, ut pus subsistat, inminuaturve multum, tunc sæpe fœtor oritur fracidus adeo, ut Æger, antequam eidem adsueverit, ac Adstantes animo fere linquantur. Si pergat hæc corruptio, cubiculum ita inquinatur, ut magno sane animo sit, qui debitam Ægro operam navet Medicus. Homines tales tamen per menses nonnunquam vitam trahunt, quamdiu illa materies adhuc utcunque ore excernitur: ubi vero subsistit prorsum, putrefacit omnia, absorbetur, corrumpit humores, & diarrhæa colliquativa demum vitam cum morte commutat. Initio autem pus illud in vomitis extra leges circulationis hæsit. Quamdiu in cavo abscessu hæret putrida sanies, spes vitæ tota adempta nondum est; & plures ipse vidi curatos. Immo, si pessima acuta febris a resorptione hujus oriretur; quamvis homo in summo tum versetur vitæ periculo, nondum tamen absoluta adest sententia mortis. — Hoc ipso anno in Viro nobilissimo experimentum habui: post devictam talem febrim acutam, quacum miliaria alba se junxerant, postea ulcus terribilis fœtoris se per os evacuavit adeo
copio-

copiose, ut ex omnibus signis nil amplius videatur superesse.

Casum in nosocomio vidistis Vexilliferi, ex quo vivo pus corruptissimum alkali spirans sæpius prodiit: ast non fiebat tale in humoribus ipsis, sed extra massam universam illorum in sinibus stagnans.

Homines lue venerea exesi, homines pessimo scorbuto putrido adfecti, habent sæpe ulcera maligna, adeo putrida, ut jam vix ultra possibile sit, malum proferens a gangræna præservare. Verum tunc jam mors incipit induci, saltem in illa parte, brevi cum toto corpore communicanda; ni limites ponere noverit Artifex: est tale ulcus extra territorium humorum & circulationis.

Ergo in ipsis humoribus viventis hominis non datur talis dispositio: sed possunt humores inchoare talem dispositionem, & gradum ad putredinem proximum obtinere: quo in statu si diu corpus pergat, gangrænosa putredine incipiente peribit.

Adest ergo in nostris humoribus, dum vivimus, tale quiddam, quod aliquomodo sit de natura alkalescentis; quod dispositionem habeat, data occasione vergendi in alkali; quod, si illa dispositio augetur multum, necem inferat.

Hæc ergo vocatur *acrimonia alkalescens*, observanda maxime in illis, qui victu ut plurimum alkalescente utuntur: maxime, si tales homines vim vasorum fortem habeant in talia ingesta, seque probe moveant. Si tunc postea contigerit, ut homines hi acuto morbo decumbant; aut si otio, sive sponte, sive coacti, nimis torpeant, nascitur proxima adeo ad putredinem dispositio, ut corruptos fere dicamus humores.

Miramini forte, me ex duabus e diametro sibi obpositis causis, qualis nimius motus est, nimiaque quies, unum eundemque effectum, nempe corrupte-

lam

lam humorum putridam, nasci statuere. Tamen res sic se habet. In motu incitato atque protracto vis auge-
tur vasorum in humores; violentius illi per vasa agun-
tur: hinc major adtritibus inter vasa & humores, inter-
que ipsas humorum particulas sphæricas, & salinas.
Unde summa nascitur humorum adtenuatio, proximus
ad putredinem gradus.

Ex obposito autem humores hominis sani, quo te-
pidiori in loco diutius quiescunt, eo propius ad putre-
dinem accedunt; tepore quippe dissolvuntur; idque eo
magis, si natura alimenti quoque huic effectui faveat.
Sed si homo, antea corpus multum exercens, vitæ genus
mutaverit, mollique nunc diffuat otio; sane eo citius
hæc obtinebit in illo dispositio ad putredinem. Hinc
illæ lacrymæ, dum morbo acuto detenti nunc dicti ho-
mines diu quiescunt.

Talis acrimonia præsens tantum in primis viis esse
potest, dum spontaneam corruptionem subeunt alimen-
ta alkalescentia, & non multum adhuc ut talia in san-
guinem intraverunt.

Facit sitim in primis viis. Oportet enim conside-
rare, oris, linguæ, faucium, œsophagi, ventriculi in-
ternam membranam esse unam eandemque, atque con-
tinuitate illa effici, ut vitia proserpant facile ex ore
in ventriculum, & vice versa. Quamobrem Medici ex
linguæ inspectione sæpe judicant de habitu interiori
ventriculi & intestinorum. Immo sæpe, ut in apthis,
ab interiori hac membrana in ventriculo oritur malum
ad fauces, ore adhuc libero; atque tum sensim a fau-
cibus per os ad angulos usque serpit labiorum. Putri-
di halitus quandoque exploduntur copiose ex ventri-
culo in os, ut hoc inde totum foeteat & sordescat.
Creati porro sic sumus, ut, si alicubi tam foetida sabur-
ra adsit, quæ corpus possit inquinare, adfatim biba-
mus, quasi inexplebiles.

Prostratum appetitum. Horrent homines hi ab omni re putrescente, nec ultra admittere quidquam, præter acida, aut aquosa possunt. Dixerat bene HIPPOCRATES 2—10. „ Inpura corpora, quo magis nutriveris, eo magis lædes. “ Hoc ipsa natura hic exsequitur; nam pleraque alimenta augerent putredinem. Hinc perpetuus horror a cibis.

Ructus nidorosos, veluti a semiputrida pingui carne (aut ovis putrefactis), qualis putrescentia & revera obtinet; nam alkalescentia pingua adsumta semiputrent (& rancent) in tali ventriculo.

Sordes ori, linguæ, palato, faucibus, amarescentes, putridos. Hic adplica, quæ mox dixi de continuitate membranæ, ac de explosione ructuum.

Sed AA. necdum hinc explicatum habetis hoc ipsum in ore, lingua, faucibus phænomenon in acutis; nam agitur hic tantum de iis, quæ talis putrefactio adhuc existens in primis viis efficit: in acutis vero pessimis hæret dispositio ad putredinem in humoribus; qui vel non exhalant; & tunc os fit siccum, crustaceum, coloraturque illa crusta a medicamentis, alimentisque, aut potibus adsumtis; vel qui nimis spissi obturant, & incrustant ultima in ore emissaria, ac pro gradu caloris majori plus minus corrumpuntur externo aëre jam accedente. (*)

(*) Faciunt huc imprimis sequentes, textus *Hippocratici Epidem. 6—5.* „ Lingua humorum serum quale sit, indicat. Pallidæ quidem linguæ ex bilis redundantia fiunt; rubicundæ a sanguine, nigræ ab atra bile, aridæ ab exussione fuliginosa & utero, albæ a pituita. — — Lingua concolor est humori prædominanti, ideoque per hanc dignoscimus humores. — — Si carnes videantur esse salsæ gustanti, redundantie signum est. “ *Aphorism. 4—17.* „ Non febricitanti, cibi fastidium,

dium, oris ventriculi morfus, & tenebricosa vertigo, & os *amarefcens*, fufum purgante opus eſſe, indicat.

Nauſeam, a materie acri, vellicante ventriculum: tum & naturali inſtinctu, qua turget, qua angitur eam expellere nititur ventriculus materiem; unde mox ſequitur

Vomitus putrefactæ bilioſæ materiæ.

Verum, ſi nauſea hæc in actum non ducitur, producit materia hæc *cruditatem putridam*. Ut enim in acrimonia acida vidimus, aceſcentia & acida in illo temperamento manere talia in debili ventriculo; ab eodem non ſubigi, & hinc manere cruda: ita & ab hiſce putridis fordibus ventriculus ſenſim debilitatur; adſumta non mutat; quæ ſi ex alkaleſcentibus conſtent, in loco illo calido putrido cito in alkalinam naturam abeunt. Cruditatem enim vocamus, quando corpus omnis generis alimenta non mutat in naturam ſuam.

Diarrhæam bilioſam. Bilis omnium citiſſime in alkali vergens in hominibus eſt acerrima, & alkaleſcens; ſtimulans proinde inteſtina continuo, ac irritans.

Dolores iliacos, inflammatorios. Si diarrhæam non faciat acris illa bilis; acris alkalina materies inteſtinis contenta tunc diu noctuque pungit, vellicat, irritat membranam villoſam, quæ tandem inflammatur: inflammationem inteſtinorum ſequitur eorum contractio ſpaſmodica, atque ſic formatur paſſio iliaca dicta inflammatoria; morbus sæpe non expers discriminis.

Caloris moleſti ſenſum; ab agitatione & perpetua irritatione illius materiæ (inprimis a putreſcente, rancido pingui.)

Si talis acrimonia in ſanguine multum dominetur, oritur *fetor*, ut *cadaver olens*; in toto, aut in parte. Sequuntur nunc ſigna præſentis in ſanguine alkali: ſed hæc ſigna leviſſima eſſe oportet: cæterum gradu pro-

vecto, ut hic describitur a B., jam adest mors præforibus: brevi enim tenerrima vasa destruentur.

Sed iterum hic bene distinguendum. Habet homo ulcera putrida antiqua. Fonticulus ponitur: curantur ulcera, & homo sanus est. Pertæsus incommodi fonticuli, exsiccationi eum relinquit. Vel, in alio exemplo, infans herpete, achoribus, favis laborans, sanus est. Curantur vitia cutanea unguento tabaci vel picis. Putrida maligna febris in his binis oritur. Si forte fortuna per valida epispastica, vesicantia materies introversa foras rapitur, vita servabitur.

Ergo antea sanguis fomite putrido oneratus se per has cloacas evacuabat, & vita erat sana: ergo dispositio alkalina potest esse in humoribus; sed ea ratione, ut totus sanguis quotidie sese exoneret per quamdam cloacam, per ulcera, per urinam, per alvum &c.; ita, ut sanguis quotidie inde depuretur, & ut homo nondum moveatur; licet sit periculosa dispositio a motu aucto, vel & inminuto, &c.

Sed dum res eum jam ad gradum deducta fuerit, qui hic in *textu* describitur, in acutis; mors brevi adest.

Percipitur autem, ut redeamus in viam, fœtor halitu oris, denotans saltem alkalinam in primis viis corruptionem, præcipueque prodeuntibus ex ventriculo ructibus & flatibus: hic fœtor *in parte*. Sed infecto sanguine talis homo sudans, quod frequenter illi non evenit, sudorem fœtidum spirat.

(Fœtorem manifeste alkalinum in variolis sæpius observavi; ipsis ægris molestum: charta cærulea ex flavo subvirescente a sudore reddita: tum vero vix non semper funestus insequutus exitus.)

Dum de hoc fœtore hic ago, narro simul symptomata plura communia cum scorbuto fœtido alkalescente: sed est diversitas in multis. Hinc considero
syn-

symptomata alkalescentis acrimoniæ, ut VV. eam consideraverunt, qui scorbutum ignorabant. Scorbuti alkalescentis sanguis aliter se habet, quam illorum qui acrimonia alkalescente laborant. Quippe in scorbuto tali sanguinis pars rubra, insula dicta, sero innatans nigrum colorem habet, inæqualis adparet, grumosaque, & levi vi adhibita solvitur in fuscum quasi liquamen: serum vero ejusdem sanguinis viridescit magis, sapore acre est, & quandoque instar gelatinæ lentescit. Aliquando serum totum in talem mucosam tenacitatem abit; aliquando tantum feri pars, quæ insulæ superficie tenacius adhærescit. Quæ tunc superest haud crescens pars lymphatica, copiosa, acris, non contrahit tenacitatem — At vero sanguis in acrimonia alkalescente aliter se habet, ut mox patebit.

Sapor ut carnis, aut urinæ putrescētæ. Saliva illorum hominum jam vergit in alkali; sed bene distinguendum, an non a dentibus, gingivisque putridis; vel an non sordida lingua, ut crusta putrescat?

Erosio cineritia, plumbea, nigra, quoad colorem; eaque celerrime proserpendo grassans. Quia solida quasi per diabrosin exeduntur, fiunt ecchymoses; humores acres ibidem stagnando, & liquidiora amittendo, fiunt atri, qui antea floridi: & quia vasa semiexesa cito destruuntur, erosio celeriter proserpit: in maculis purpureis acutorum forte, & Variolosorum tale quid obtinet.

(Magis adhuc in petechiis lividis, plumbeis, flavis, nigrescentibus, &, ipsis petechiis funestioribus, vibicibus latis longisque.)

Sitis ingens, vix sedanda. Ob stimulum perpetuum natura continuo anhelat ad dilutionem stimuli; explere sitim suam vix potest, quia sal illud acre adeo copiorum ubique prædominatur.

Fæces alvi solutæ, splendentes, cadaverosæ, fusæ, nigræ: fæces igitur demonstrantes, colluvie putrida obsideri intestina; immo humores eo adfluentes, bilem puta, succum pancreaticum, gastricum, entericum, hac quoque corruptione infici incipere.

Erunt hoc in casu fæces *solutæ*, quia a debili systemate chylopoëtico non exsugitur bene omne nutriens chylosum. Præterea irritatio continua provocat undique corporis liquidiora ad dilutionem: qua etiam de causa siccitas major oritur in toto corpore, & confirmatur; quod mox dicebamus de *siti vix sedanda*. Quo nunc gradus corruptionis major, eo coloris mutatio magis ad nigrum accedit, ut passim HIPPOCRATES advertit: quo enim a naturali colore vel humor in corpore, vel excernenda materies, plus abludit, eo sunt peiores.

(V. C. HIPPOCR. *Aph.* 4.—21. „Dejectiones nigræ, qualis sanguis niger, sponte prodeuntes, & cum feбри, & sine feбри, pessimæ: & quanto colores dejectionum plures fuerint peiores, eo deterius.“ — Postquam etiam in *coacis* & *libr. de crisib.* variis locis recensuerat varias conditiones plus minusve laudabilis alvi dejectionis, ait: „His vero omnibus magis funesta sunt nigra, aut pinguis, aut livida, aut æruginosa, aut graveolentia. Dejectiones variæ majorem, quam illæ, diuturnitatis spem adferunt: sed tamen non minus sunt funestæ. Hujusmodi sunt strigmentosæ, biliosæ, cruentæ, porraceæ, & nigræ, sive secedant simul, sive aliæ ab aliis segregatæ.“ — *Coac. Prænot.* 633. „Qui nigra egerunt, ii tenuibus & frigidis (hinc funestis maxime) sudoribus diffuunt.“ — Dixit etiam DURETUS *Comment in Aph.* 4.—23. „Nulla quæ sua sponte movetur sanguinis atri dejectio, in bonis ducenda; semper omnino pestifera est, ac cita morte non raro funesta:

nam,

niam, qui a morbo emarcuerunt, quum nigra dejecerint, postmodum moriuntur.“ Notum autem est, ad acmen deducta alkalina acrimonia, ipsum sanguinem nigrum, ex erosis vasis fluentem, alvo excerni posse.)

Urina acris, crassa, fusca, spumescens, fœtida instar putrefactæ, vix dimittens fæces. Urina ex sua quidem natura in sanis corporibus utcunque acris esse debet, quia lixivium est salia ex sanguine abluens; at vero nunc acrior est, quia humorum in alkali vergentium soboles.

Crassa est, quia cruda, non subacta, neque elementa habens compacta; ideoque aquæ innatant illa, quia aqua leviora sunt. Adde, quod in aquosa urinæ parte non tantum sal humanum, ut semper, sed etiam sal copiosum in alkali vergens adsit, eamque ob causam aquosa urinæ pars solito gravior impediat descensum materiæ crassæ inhærentis.

Fusca est urina, ob acrem bilem admistam, & ob partium vere aquosarum penuriam; quod semper fit in liquida alvo.

Spumescens est, quia olea & salia sanguinis dissoluta jam in speciem saponis coeunt; ita quidem, ut, qui inter mingendum irretitur aër, expedire se suasque bullulas effringere nequeat.

Et fœtida instar putrefactæ; quia exaltantur salia & olea, fiuntque volatilia.

Sudor vix ullus; quia, ut jam in urina vidimus, quo excretio major unius materiæ, eo parcius alterius. Fæces alvi solutas copiosas qui habent, rarius perspirant & sudant: unde aliquando diarrhæa nimia sudore aut perspiratione curatur, notante SYDENHAMO. Hinc in tali acrimonia rarius sudor. Quod si vero observetur aliquando sudor, ille *similis lotio putrido,*

modo descripto, flavus, fuscus, fœde indusia inquinans vix delendis maculis.

Cutis arida externa, ut & interna narium, oris, linguæ, faucium: quia, uti mox dictum, vix perspirant. Hinc tam epithelium in angulis oculorum, internis naribus, ore, faucibus, labiis, quam universa cutis arent.

Cruor tenuis, dissolutus, floridus, vix concrescens; quia chylus solutus, non subactus & sanguis solutus; hinc talis sanguis est tenuis, dissolutus, ob levissima admixta alkalescentia color lætus; ut sit dum alkali pauca copia cum sanguine e vena fluente bene miscetur. Si autem non misceatur bene, sed in superficie adspergatur tantum, sive alkalinum sal volatile, sive fixum; indurat sanguinem & fere nigrum reddit. Sanguini vero sal alkalinum fixum adspersum, ex quo sanguine membrana Ruyschiana ablata esset, concrevit quidem contra morem illius sanguinis in rubra parte, sed lætissime rubicundus erat die 12. Aprilis in experimento, eratque rutila illa rubedo perspicua sub sero multo superfuso: nam ablata membrana Ruyschiana rubra pars semper est sero gravior: rubebat ergo sic sine adtactu aëris.

Vix concrescens dicitur talis sanguis, quia intime cum alkalescente mixtus; sed alkali etiam hic adspersum, non intime mixtum, indurat in placentam duram, ut in experimentis *Pringlianis*.

In morbis acutis neglectis dum sero fit venæsectio, Medici sæpe ita sanguinem inveniunt solutum floridum vix concrecentem ab alkalina dispositione.

Qui pesti interfuere, testantur, sanguinem eodem modo (sæpius) se habere.

WEPFERUS *Exercit. de apoplexia*, p. 429. ait, se in cadaveribus febris continua Exstinctorum aliquoties, nonnunquam & in malignis morbis, sanguinem
flui-

quidum, nec post obitum coagulabilem invenisse. Miratur hoc phænomenon, inque eo exponendo vehementer laborat BAGLIVIVS: causam intelligimus.

Alia tamen in acutis causa esse potest sanguinis talis fluidi, viz concrefcentis. Si v. g. in peripneumonia, pleuritide, variolis, feбри ardente vel putrida multum provecta, mortem brevimirante, narratur sanguis; ille, ut dixi, adparet dissolutus, tenuis, viz concrefcentis; quia sanguis reliquus hæret in pactus pleuræ, pulmōni, aliisve visceribus. Medicus interim corpus implet diluentibus, adtenuantibus: quæ quidem diluentia ultra non nascuntur cum illo sanguine, qui ad fines arteriosos jam in pactus hæret; sed transit per tubulos hinc inde adhuc perios per viscera aut pulmōnes ad cor sinistrum, per quos tubulos apertos vitiosa circulatio adhuc continuatur. Ergo talis sanguis ex pulmōne in cor sinistrum, aortam, venas faciens, excipitur de vena fluidus totus & tenuis, vizque concrefcentis: ita, ut jam comprehendatis, in morbis acutis duplici de causa tennem, solutum, & viz concrefcentem cruorem videri.

(Non pro generali canone statuendum, in hisce morbis sanguinem esse dissolutum, adtenuatum. In febribus, magnus HALLERUS ait *Elem. Physiol.* 1. 5. *sect.* 1. §. 3. exanthematicis, inflammatione tamen stupatis, deprehensus fuit sanguis sero carens a BARTHOLINO *de respirat. diffic.* p. 232., sub initium saltem morbi. Sanguis meus proprius in miliaribus minime benignus, tum in feбри alla, ad erysipelaceum genus pertinente maxime coagulatus fuit. Testes fide digni adseverarunt idem de variolis, v. BROWNE LANGRISH *direct. on the smallpox* p. 5: alii v. c. BAGLIVIVS, BARKER, BIFFINGER, QUESNAY, FRANK, & in angina maligna HUXFAM, idem viderunt phænomenon in febribus ma-

lignis aliis : in febris siamensi, v. TITSINGH *Geneesk. konst* &c.; *Nouv. voyage de Guinée*, & *Nov. Collect. Art. Edimb.*, tum in peste, v. BERTRAND *de la peste*, sanguis denuo deprehensus densissimus, ut in ultimo morbo ne quidem ex vena stillaret ob visciditatem : talis adhuc fuit in lue epidemica vaccarum, v. *Europ. medicin. p.* 256. & *Gränf. Unmerk. T. 2. p.* 105. Hæc HALLERUS — Ipse vidi in puella pessimis variolis, ter ex ordine, prioribus nondum prorsum exsiccatis, erumpentibus, quæis & demum enecta fuit : vidi, inquam, sanguinem tertio morbi die e vena missum ruberrimum, ne guttulam quidem feri obferentem, maculis in superficie subcærulescentibus hinc inde notatum : in eadem tamen, octo circiter elapsis diebus, sanguis adeo solutus, ut in febris putridissima, copiose per nares, os & alvum prodiens.)

Pustulæ rubellæ, ichorosæ, fuscæ, plumbeæ, nigrae, subito gangrænosæ. Si naturam dissoluti sanguinis quis consideret, quo nunc expositum modo ; facile percipit, talem sanguinem ad corporis peripheriam majori motu adlatum, si vel cutis sicciore, vel frigus æris exhalationem inpediat, dissolvere debere sua vascula, elevare epidermidem, tumque eundem colorem conciliare elevatis hisce bullulis, vel pustulis, qualis est effusi humoris color.

Hinc color pustularum *rubellus* erit, si ipse ille ruber dissolutus sanguis in illas effusus sit ; ea tamen lege, ut diu ibidem eo colore pollere nequeat : nam subtiliora absorbentur undique, & qui floridus adparuerat, purpurascit sanguis, tandemque nigrescit.

Si pustula talis non sit a sanguine rubro, sed a lymphâ alkalescente ; pustula *alba* erit : nam alba epidermis

dermis si per pellucidam lympham elevetur a cuti, albidior adparet.

Si serum flavum alkalescens influxerit, pustula erit *flava*.

Quo autem in pustula rubra, ut dixi, magis tenuia absorbentur, eo rubedo fit obscurior, ut tandem fere *nigrescat*.

Ita videmus in morbillis, variolis, quæ rubra tantum macula incipiunt efflorescere, in petechiis quoque, a rubro colore nasci purpureum, a purpureo lividum, pessimo ægri obtinente flatu. Alkali videtur vere nasci cœptum in humoribus & solvere eos in putredinem: porro in sanguine putrescente, etiam antea florido, videmus perire colorem lætum, & per gradus nigrescere. Unde in dictis morbis pessimis, quæ stigmata comparuerant rubra, a nigrescente sanguine adveniente purpurascunt, & grandescencia tandem nigrescunt; si adhuc vita eo usque prolongetur.

Talis sanguis aliquando oritur in variolis cum pessimis hæmorrhagiis; in renibus vel pulmonibus, (vel intestinis, aut & utero) facta subita diabrosi. Funesta res intra paucos dies vel horas, a qua neminem resurrexisse vidi; SYDENHAM tantum semel vidit.

(Confirmatur *Haenianum* effatum casu puellæ variolosæ, cujus paullo ante *pag.* 88. meminimus.)

Potest tamen fieri, ut post purpureas maculas homo sanescat, cujus rei exempla tria pro certo novi. (Sed & ex vibicibus, rariori tamen fortuna, homines emergunt). Eo in casu videntur purpureæ maculæ ortæ non a putrido factò sanguine ad maculam rubram adpellente, ut in morbis prædictis; sed ab ipso sanguine rubro sub epidermide effuso, & absorptis undique partibus tenuioribus, coloris obscurioris factò: ut antea alia occasione diximus. Vel putridum ali- quod nasci cœpit in humoribus, quod dein viribus

vitæ ad corporis ambitum deferatur; ita, ut sanguis sic ab incæpto illo putrido purgetur. Variolæ, v. c., morbilli, omne suum venenum foras pellentes, spem faciunt curæ perfectæ: si vero expulsio fit, & æger male habet, & putredo in humoribus nasci incipit; iterum duplex exitus. Si sanguis separet illud incipiens putridum; potest salus redire: si ideo maculæ purpureæ, quia totus sanguis ita constitutus est; mors instat. — Videmus hinc, quo in casu maculæ purpureæ non absolute lethales aliquando sint.

Miramini forsan, AA., quod nihil interferam hisce de miliaribus; quum quandoque de dicta ita malignitate cum memoratis morbis certent.

Sane ab iisdem causis ea oriri, a quibus oriuntur petechiæ, aliique morbi similes, videntur omnia suadere; excepto sudore acido, vappido prægresso, vel comite. Nam ex illo solent Medici hariolari futuras eruptiones miliares. Sed Imo miliaria oriuntur quandoque citra talem sudorem: 2do petechiæ non oriuntur cum tali sudore, sed potius putrido. Si quis vellet hinc concludere, ab acre oriri miliaria, ab alkalescente putrido petechias; rogabo eum denuo, quo ille modo intelligat morbos ex adeo obpositis causis natos eodem tempore, eodem in corpore simul oriri, vigere, curari? Ita bini doctissimi Viri, Signiferi nostri (in nosocomio?) defuncti Medici, scripto mihi retulere, se in illo Signifero observasse; passimque audio, hujates Medicos ita hos morbos combinatos observare.

Concludam igitur, sudoris illius acidi, vappidi expositionem difficiliorem esse, & data occasione experimentis forte elucidandam, aut non elucidandam; cæterum autem miliaria quoad originem, progressum, statum, declinationem, quoad curandi etiam methodum ad hanc classem esse referenda. — Quid enim? sanguis aliquando æque phlogisticus, in ipso morbi prin-

principio, postea minus; ut & in variolis, morbillis idem. Febris acuta præcedit cum pulsu forti, frequenti; urina flammea. (Excipere hinc debuisset *Cel. de HAEN miliaria chronica*, febri carentia; nec in miliaribus *lacteis* adeo comes accedit febris.) Acme illarum febrium aliquando adest die quarto, ut in cæteris eruptionibus; aliquando die sexto, aut septimo. Quo eruptio melius processerit, eo melior fit febris. Urina post æmen usque ad finem nulla unquam indicia dat urinæ, quam, de acrimonia acida agentes, descripsimus. Revera minus dat sedimen criticum soluto morbo, quam acuti reliqui: sed ea res communis est cum omnibus morbis, qui ad cutim maxime evacuant morbosam materiem. Quod vero sæpe alios acutos subsequantur, idem & petechiis, & aphthis solemnne est; quas tamen nemo ex acido deduxerit: oritur id ab incipiente dissolutione putrida humorum; uti mox videbimus.

Inveni sane miliaria hic non alia, quam quæ videram in Belgio. Quatuor curati sunt in hoc nosocomio coram Vobis. Diæta usi fuerunt Ægri acescente & acida; medicamentis similibus. Tota antiphlogistica methodus in illis adplicata fuit. Aëre usi sunt liberissimo cum reliquis Ægris, cortinis lecti apertis, lecto superius aperto; stragulo unico tecti; in ipso morbo in lecto sederunt erecti, & vigentibus adhuc pustulis in sedili locati. Si cui symptoma quoddam parvum contingeret, ut febris major, coma, animi deliquium; id camphora, opio, acidis sopivimus; non stragulis, non calore. Memor scilicet eram magni SYDENHAMII, malignas eruptiones sæpe deberi regimini calidiori docentis, & hominem a tali causa petechiis jam laborantem, eximendo a lecto curantis. (Qua methodo & *Inl. L. B. de STÖRCK* Adolescentem, pessimis variolis vix non jam enectum, e medijs lethi faucibus eripuit.)

Unus in hemitritæam incidens, mediis in miliaribus cortice peruviano sanatus est.

Erant morbi hi miliares, petechiales, scarlatini & aphthosi in Belgio longe numerosiores, & maxime in fine acutorum: dum calore subfocarentur homines in acutis morbis; dum misturis & pulveribus absorbentibus & incrassantibus implerentur; quibus omne acidum, quod adhuc a potu prodesse potuisset, in viis primis absorbebatur: sane est talis calor summum putrefaciens humorum nostrorum; uti in hisce jam vidimus. Jam vero, postquam homines batavi in morbis aëre liberissimo fruuntur, & acidis diluentibusque implentur; morbi ejusmodi, vel eruptiones habentur longe rariores: ut cogamur adserti & vaticinii *Sydenhamiani* veritatem fateri.

Quam felicitatem in Belgio fœderato læti experti sumus, hanc eandem & his beatissimis regionibus auguror, dum tandem Medici ab illo calido regimine abhorrebunt, & diluentibus, refrigerantibus, acidis, solventibus, nitrosisque suorum corpora *Ægrorum* replebunt. Ultimum nonnulli jam faciunt; prius vero adhuc vix ausint facere.

Bubones, Anthraces, ad inguina & axillas, aliaque glandulosa loca, ut in peste, aliisque malignis, ut vocant, inflammatoriis. Neque pessima adhuc pestis species hæc est: in pessima pereunt homines sine bubonibus a summa putrefactione: in hac autem morbi specie fit metastasis materiei morbi ad loca glandulosa. Raro porro hic bonæ subpurationes; ob acrem materiem, tenellam glandularum fabricam destruentem.

Maculæ purpureæ — sphaceli cum bullis elevatis: atqui hæc omnia jam explicata sunt.

Transeamus nunc ad *acrimoniam oleosam*: habet hæc plura communia cum alkalina, sed est gradu putredinis auctiori. (An hoc abs exceptione admittendum?)

Ordinem chemicum sequutus B. quintuplicem fecit oleosam acrimoniam: 1) *olei in spiritus adtenuati*; 2) *olei adritu nimio quasi exusti*; 3) *olei salini*; 4) *olei terrestres*; 5) *olei acris, quasi exusti salini & terrestres simul.*

Oleum componitur ex globulis, (uti, dum conquassatur cum aqua, optime conspicitur); usto vero, aut frixo eo aculeati fiunt globuli hi, atque tum exurunt fauces. Oleum animale, lactis scilicet pars butyracea sive temporis diuturnitate, sive ignis actione, acrescit, amarescit, horrendi demum saporis fit. Hepar piscium maxime oleosum est: si hoc igne torreatis, redigatisque in pulverem; nascitur aliquid, quod sæpe miros motus efficit in corpore humano; uti patet in *pulvere Helmontiano ad dystokian*, parato ex hepate & felle anguillarum; excitante torpidos parturientium ad partum motus. Nationes maritimæ majorum & minorum piscium hepata cocta adfatim comedentes, experiuntur sæpe hanc oleosam acrimoniam in viis primis cum maximo horrore ab omni cibo.

(Monuisse hac occasione juvat, curandum esse, ut oleum sic dictum musclæ fluviatilis, quo ad curandas maculas oculorum utuntur, nunquam adhibeatur annosum jam; quum rancidum fiat mora, ac partem, cui adplicatur, inflammans.)

Observantur sane olea, & oleosa a calore vel igne ita rancescere, ac veluti amburi, ut pessimæ inflammationes, difficulter curandæ, in corpore nascantur.

(Discant hinc linguæ blanditiis excogitandis dediti, quam male consulatur sanitati, cibis illis pinguibus, inprimis in sartagine frixis; nascuntur

hinc

hinc ructus horride urentes, caustici, œsophagum fere erodentes, oritur sœdæ species pessima, cum cardialgia, prostratoque appetitu; oriuntur febres, ægre haud satis raro expugnandæ; inprimis dum carpionum, silurorum, mulorum, aliorumque piscium obesiorum, tum & agnina pinguior caro hac methodo, in pinguedine jam aliquoties in usum vocata, uti in diversoriis publicis toties fit, ustulata ingeritur. Quantum studium frequenter adhibetur, ut grata sub forma morborum pessimorum indispicamur fomites!)

In ictero bilis horrenda hujus generis mala solet facere. „Bilis quippe hepatica minus, cystica plus, oleo, sale, spiritibus inprimis concrevit; non combustilis, nisi siccata prius; acerrimus humorum circumductorum corporis, & facillime putrefaciendus, tumque penetrabilissima transfudatione quaquaversum diffusus.“ Hæc definitio bilis *Boerhaaviana*, *Inst.* §. 99.

(Demonstravit celeb. SPIELMANNUS *Exper. circa nat. bilis*, *Argent.* 1767., componi bilem animali acido, oleoque unguinoso, quæ plurimæ admixta sunt aquæ, addito simul præter terram, ferrumque, muriatico sale, mirabili glauferiano; an & alkalino minerali? Terram biliarem calcaream esse vidit *Cl. CADET*, *Mem. de l'Acad. des Sc.* 1767. Plura circa bilis historiam dabo in *examine chemico regni animalis.*.)

Ubi itaque bilis, via ad intestina obturata, cogitur intra sanguinem remeare, & cum humoribus nostris celeriore motum subire; cito illa acris fit: acris autem bilis, simul acris oleosa, acrisque salina dissolvit humores, vertitque in putredinem, citam faciens corporis destructionem. Hæc tunc vera acrimonia oleosa alkalina: ergo acrimonia composita alkalina.

Sed

Sed non semper acrimonia talis oleosa alkalina, a bile nata, statim occidit: nam aliquando ex dissolutis humoribus producit hydropem; qui plerumque, ob summam aquarum putredinem, cito funestus.

Acrimonia oleosa alkalina in quibusdam Atrabiliaris nascitur stagnatione materiei a visceribus abdominalibus pro bile conficiunda paratæ, i. e. in toto systemate venæ portarum. Sanguis in illa stagnatione corrumpitur ab illo oleo putrefacto, & dissipatis per transudationem aut absorptionem liquidioribus solutis, nascitur, dicente HIPPOCRATE, ἀμοεγῆ, quasi fæx olei, quæ sua acrimonia vasa rodât, & cum summo vitæ discrimine solutis vasis per vomitum aut alvum prodeat: ita, ut dum ex HIPPOCRATE, & observatis BORELLI ac BOERHAAVII vidimus, materiem hypochondriacam acidissimam factam, ut cum terreis (alkalinis) fermentaret; hic videamus eandem materiem summe alkalinam.

Acrimonia oleosa quandoque nascitur terribilis in homine pinguissimo, qui feбри continua putrida correptus, 50, 80, 100 libr. illius pinguedinis in morbo amiserit. Sæpe medicabilis per se morbus jam prorsum lethalis fit, a soluto oleoso pingui, violentia febris acri facta, & summam corpori conciliante putrefactionem.

Signa acrimoniæ oleosæ putrefactæ sunt: fætor empyreumaticus, *Inst. §. 915.* sapor amarus, rancidus, acer, pinguis, ut ab oleo ambusto, vel putrefacto, fauces exurens, nidorosus. Non melius intelligitis, quid sibi velit hic B., quam gustando, aut comedendo oleum ambustum lardi frixi, aut butyri: vel bibendo oleum v. g. amygdalinum jam corruptum. Si quandoque similia gustavistis, in Vobis omnes hos fætores ac sapores abominabiles essis experti. Quodsi jam homo, licet ab aliquo tempore talia non comederit,

derit, conqueratur talem sibi foetorem, saporemque perpetuo obversari; concludite, vel oleosam partem bilis, vel pinguedinem in eo solutam, inque foetorem talem saporemque exaltatam.

(Examinandum tamen simul antea, an non, ut sæpius accidit, a saburra primarum viarum, corruptique in illis ingestorum olei; symptomatum enarratorum proficiatur syndrome.)

Erosio fervida, nigra. Quia acris materies in putrilaginem carnes solvit, membranasque. Ita quidem, ut si homo habeat alicubi ulcus, fonticulum, setaceum, vulnus; fundus ulceris tumeat, doleat, labia retorrida fiant, & subito nascatur putredo: fibris putridis emortuis nigredo adparet in fundo. — Est periculosus admodum status hominis, morte brevi terminandus; nisi præcipue putrida pars ulcere ceu camino educatur: tunc misera vita aliquamdiu protrahitur: mox ubi ficcitas supervenit, mortem certo brevi adfuturam prænuntiet Medicus.

(Erosiones tales haud raro, morbo jam latius provecto, contingunt in ipso ventriculo aut intestinis: atque tum & eo sæviora sunt symptomata, & eo difficilior curatio: nascuntur & ex hac causa intestinorum, aut ventriculi inflammationes; quæ frequenter ortum debent acri cuicunque, aut in hisce partibus generato, aut in eas deducto: optime hæc adnotavit *Int. CULLEN, Practice of Physic, Vol. I. §. 366.* „*The inflammation of the stomach, ait, may arise from various acrimony generated within the body; either in the stomach itself, or in other parts and poured into the cavity of the stomach.*“)

Adpetitus omnino & cum horrore deletus. Quia abominabilis ille nunc expositus in saliva sapor (*) se mox cum omnibus communicat alimentis, non valde aquo
sis,

lis, acidis. Acida, quia communicata cum illo putrido oleoso in sal neutrum abeunt; aquosa, quia fœtorem multum abluunt, unice tolerantur.

(Conqueruntur nonnunquam Ægri tales, videri sibi alimenta omnia infecta aurichalci, aut cupri ærugine, a resistente diu in hisce substantiis oleo, aut pinguedine producta.)

Sitis summa; quia acré illud fervore exurit fauces, omnesque, quas attingit partes; & quia etiam hæ (utpote pingui vernice oblita, & acrimonia adstricta) non debite perspirant.

Fæces alvi pingues, fœtidæ, dum redduntur fervidæ; ab eodem oleoso acri: ita ut ab illo fervore falso sibi imaginentur esse natas hæmorrhoides.

Urinæ flammeæ, fœtidæ, spumosæ, paucæ, calidæ. Notum ex Chemicis, colorem urinæ saturatiorem inprimis ab oleo pendere. Notat talis urina intimam, eamque tenacem, olei, salis, terræ, aquæ, in humoribus permissionem, adeoque magnam cruditatem. Hinc talis urina perseverans notat in acutis, præagiturque coctionem difficilem, & crisin tardam, valdeque ambiguam.

Fœtidæ; maxime si cito sic sint, non ab accedente calore: quanquam, quo citius fœtent, eo sunt in putredinem magis dispositæ. Iterum reperio, urinas putridas sæpe reddi, sine ullo malo, ut in nosocomio visum: est veluti incipientis putredinis critica evacuatio.

(Distinguendum autem probe inter fœtorem urinæ a) morbosum, vitio corporis universi, de quo tum hic agitur, tum alio loco recurret sermo; b) dependentem ab ingestis, v. c. brassica, asparagis, vini quibusdam speciëbus; c) dependentem ab medicamentis, inprimis resinosis; observavi quondam, totam familiam lotium emisisse, odore eodem infe-

ctum, qualis nascitur ab adsumta terebinthina; causa erat, quod deguerint in cubiculo non adeo amplo, ubi fornaci major copia ligni pinei siccanda imposita externe fuerat; unde atmosphæra cubiculi tota exhalationibus terebinthinaceis gravida facta, quæ per respirationem in corpus deducta phænomeni præbebant causam; d) dependentem a mora longiori nonnihil urinæ in vesica, accedente simul motu corporis validiori, caloreque æstivo; e) dependentem a vitio aut renum, aut ureterum, aut vesicæ, aut urethræ; labe venerea; quin & lithiasi, quæ subin adesse potest in corpore, quin vivente homine ullum ejus indicium; etsi in mortui vesica reperiatur calculus: veritatem sententiæ hujus nuperrime denuo confirmavit Cl. WEITZ; f) dependentem dcmum ab impuro vase urinali; unde urina, de qua judicium castum est ferendum, nunquam non vitro excipitur purissimo: nec per plures horas urina adservetur; nam plures dantur homines, uti sæpius jam observavi, quorum, cætera sanissimorum, urina intra 4 aut 5 horas, jam multo infecta deprehenditur fœtore.)

Spumosa; quodsi talem urinam valde conquassaveritis, bullas diu retinebit; quia irretitus aër non facile per oleosam, terream, salinam superficiem vel pelliculam transire potest. Nec magna copia hi homines excernunt urinam, quum hæc difficulter a sanguine separetur; hinc *pauca* dicitur. Est tandem *calida* urina, quia tot acribus composita calorem ardoremque nervosis, quas permeat, (irritatione & adfrictu) conciliat partibus. Talem urinam sæpe habent in acutis homines obesissimi a soluta pinguedine, ut ante dixi.

(Talis & in dysuria imprimis venerea, v. *Cel. PLENCK, Doctrina de morbis venereis* p. 36. &c;
tum

tum observata ab adtracto in corpus volitante pol-
line tusi arsenici e. s. p.)

Cutis arida; quia non perspirant. Humores enim
talium hominum sunt intime misti; ita, ut difficulter
quid inde separetur; ut jam vidimus exponentes uri-
nam eorum. Quam ob causam vitiatae in illis omnes
secretiones, & excretiones, ob tenacitatem, qua in-
time adeo sibi commista manent humorum principia.

Oris siccitas, sordes, graveolentia; a stagnantibus
ad ultima vascula exhalantia his acribus, corruptis
particulis; hinc in ore siccitas, quia nil perspirat; &
quia simul particulæ hæ pingues, fit, ut ad oscula
adhærescant, atque ab adluente aëre adhuc magis cor-
runipantur; unde sordes nascuntur adeo graveolentes,
ut cogamur caput avertere, cum illis confabulantes.

Cruor ambustus; nempe colore ater, siccus (spis-
sus), non secedens in partes, ob dictas causas; ergo
non floridus, ut ab alkali.

Inflammationes acres, celeres, pertinaces; cogita-
te modo talem sanguinem obstruere arteriarum fines,
& vim febrilem a tergo urgere: videtis illico, quam
parum spei hic adsit, vel resolutionis, vel subpura-
tionis: gangræna potius metuenda est. *Acris*, est
enim inflammatio a pessima acrimonia: *celeris* est, quia
stimulum ingentem indit solidis; hæc vehementer sti-
mulata contrahunt se validissime. *Pertinax* est, ob te-
nacitatem intimam humorum; unde, ut dixi, spes
vix superest *resolutionis*, ad quam requiritur humor
blandus; motus sedatus, obstructio parva; vel *subpu-
rationis*, in qua requiritur etiam humor non acer.

Si vero in subpurationem bona fortuna aliquando
illa inflammatio vertatur, erunt *subpurationes similes*.
Ut enim inflammatio erat, erit & subpuratio. Ne-
que expectate ibi pus laudabile, bonum; sed icho-
rosum, saniosum, foetidum, fere gangrænosum.

Hanc ob causam merito textus ait: gangrænæ fœtidissimæ; quum exitus harum inflammationum plerumque in gangrænâ terminetur.

Juvamen a frigidis, acidis, aquosis, saponaceis. Pleraque explicui. *Frigida* placent, quum tantus adsit fervor, & ardor; *acida*; quia putredini adversa; i. e. eam minuentia, partem ejus mutando in sal tertium. *Aquosa*; quia diluunt, & abluunt ejus acris partem. *Saponacea*; quia intimam olei, salis, terræ, aquæ permissionem dividere aliquando observantur: ut sunt succi fructuum horræorum, fragorum, ribesiorum, sambuci, grossularum, ceraforum, morellorum, rubi idæi, mororum, acido-dulcium pomorum pyrorumque, persicorum, armeniacorum, prunorum; quibus hi homines unice delectantur (tum & serum lactis purum, & lactucæ variæ species, endivia, aliæque plantæ solventissimæ, oleracæ) Neque dantur in tota Pharmacia similia remedia adeo potentia, quam succi dictorum fructuum sint, in morbis acutis, ab hac causa natis: prout vidimus elapsa æstate, dum magno Ægrorum acutis morbis laborantium bono exhibebamus illis decocta, parata ex quibusdam hisce fructibus, & sero lactis.

Etenim AA. rem summi momenti hic oportet advertamus. In summis acutis aliquando potus & medicamenta diluentia, aquosa, non miscentur cum tenaci sanguine, sed quasi præterlabuntur, inmutataque fere iterum per urinam, aut aliunde exeunt. Hinc intelligitis, cur in his morbis adeo pertinacibus funestissimi sit urina aquosa, pallida, alvus fere aquosa, sudores aquosi. Etenim denotant tenacitatem summam humorum Ægri. In tali casu quandoque visi sunt hi succi arte parati, & magna copia ingesti perpetrasse mira; solvendo pertinacem sanguinis miscelam, vi sua saponacea, acida: (unde & salia illa subsaponacea,

v. c. terra foliata tartari, hujusve liquor, tum tartarus tartarifatus, sal Seignette, &c. prudenter administrata, in hisce casibus convenire queunt.)

Quam sapienter ergo HIPPOCRATES, ARETÆUS, GALENUS, & omnes VV. propinarunt in acutis, ac sæpe in tenacitate chronica, mellita sua: mel enim saponum est æmulans hac dote succos saponaceos.

Videamus *acrimoniam* sequentem *saponaceam*.

Ad saponaceam acrimoniam &c. Saponaceum Chemicis audit omne id, quod oleo & sale compositum.

Qualis in venenis animalium, & vegetantium deprehenditur. Hæc venena vocat B. *saponacea*, quod in illis neque sal solum, neque oleum solum seorsim agere, sed combinata videantur; agere autem ita, ut, quæ agant, vix capiamus.

Homo non adsuetus comedat copiosius cochleariam, & maxime lepidium: copiosius inquam. Conqueritur mox os inflammari sibi, levem anginam fieri, cardialgiam, vomitum. Hanc tamen adeo acrem herbam erucæ minimæ, quas levissima digiti compressione fere totas in liquamen aquosum destruimus, adamant, depascuntur & vivunt.

(Insigniorem multo instantiam præbent larvæ exedentes radicem igneam pyrethri, victitantes substantia resinosa, nobis vix non fauces vulnerantem; tum aliæ corrodescentes purgantem adeo helleborum, causticum capsicum e. s. p.: quin nec ipsa aromata suis carent insectis, a quibus abs noxa consumuntur.)

Vipera ex rictu (ex vesicula, denti vulneranti excavato adnata) fundit spumam salivæ similem, (liquidum, oleum amygdalinum, uti RENDI retulit, refert); quæ admista immediate sanguini pessima symptomata, ipsamque mortem creat. Quæ sit, ut venenum hoc nervos, vasaque animalis non destruat?

Cantharides vivunt diu satis, saneque pro tali animantium genere. Dum mortuæ teruntur in pollinem, cutique cum idoneo vehiculo adplicantur, rodunt cutim, solvuntque ab illa epidermidem. Intra sanguineam autem ubi venerint, strangurias pessimas producunt. (Ea effluviorum subtilissimorum cantharidum actuositas, ut vel in sacco gestatus eorum pulvis symptomata notabilia excitarit in viis urinariis; prout constitit observatione, in *Esprit des Journaux* elapso anno relata, quam alio loco fusiolem dabo.)

Cur jam in his animalibus sua propria vasa, nostris infinito minora, non eroduntur? Nisi mavultis, hanc acrimoniam acerrimam ipsis demum a morte innasci; sed quo id probabitis argumento?

Genus itaque hoc acrimoniarum, quum nec ad solum oleum, nec ad solum sal reduci posse, ob mira phænomena videretur; maluit id B. ad acrimoniam reducere saponaceam; tum sali, tum oleo vires suas debentem. Verum de his latius suo loco, ubi Pathologicus ordo nos ducet ad historiam venenorum.

Nunc contemplemur *acrimoniam compositam ex quatuor præcedentibus*. Nam acrimonia alkalina fit peior, si accedat simul oleosa: ponite hominem, alkalescente acrimonia laborantem, nunc febris acuta putrida affligi. Si oleum pingue fundatur copiose in hoc morbo, & valida vi febris acre fiat, acrimonia exsurgit composita saponacea, quam illico vidimus vix esse extricabilem. Sed, cum acida acrimonia componi oleosam rarius est; qui enim acido sanguinis laborat, raro adeo pinguis fit; quia acidum remedium contra nimiam obesitatem subpeditat. Si vero contingat, ut homo obesus acido copioso abusus cito acidum generaret in humoribus, & morbo acuto afflictus funderet suum adipem; oleosa acrimonia non potest tam violenta his nasci; nec strages edere tantas, nisi devicto prius acido.

Po-

Potest autem esse acrimonia acida in viis primis, & alkalina in sanguine: fit homo talis ab alkalescente acrimonia debilis; utatur modo acidis & acescentibus; possunt in debilissimo ventriculo abire in suam naturam, & acidum generare; ut aliquando in Phthisicis fit.

Tum & ad eam — — — ut a vitriolis metallicis. Adsumimus quandoque acris, quæ non nocent nobis, si vel sponte illa evomamus; vel si vi viscerum nostrorum ita inmutentur, ut in naturæ nostræ partem abeant: quæ vero non, vel non satis, subacta per nostras vires, evadunt venena. Sumat homo tantillum colocynthidis; mutatur ita a colocynthide, ut *ΙΟΙΕΣ ΙΖΙΕΣ* alvum deponat foetidam, liquidissimam: sed mutat idem homo denuo vi viscerum suorum ipsam colocynthidem, ut illa plane iners fiat, nec ultra queat nocere, nisi iusto major adsumta fuerit dosis. Verum, si nimia fuerit adsumta copia ejusdem colocynthidis, homo non mutabit hanc, sed hæc hominem, efficietque dysenteriam horrendam, tandemque sanguinolentam. Hæc dicitur vera *ὑπερεκκέντησις*, *superpurgatio*; ubi purgans fortius est, quam ut hominis viribus subigatur. Hæc vera ratio, qua omnia validiora alimenta & medicamenta agunt a nobis adsumta.

Ad vitriolum quod adinet metallicum, sane res hæc meretur adtentionem; acrimoniam enim habet effectuum terribilium. Globus mercurii (quis concipiat mercurium corpori ingestum *globi* formam retenturum?) non videtur in nobis ut acre agere; sed inpetu, gravitate, divisibilitate, & forte alia adhuc ratione. Potatus mercurius ad uncias, ut aliquando in morbo iliaco fit, innocue pertransit corpus. Dedi in tali morbo libram semis, & mercurius spatio dierum trium alvo innoxie exivit totus. Oleum vitrioli ad plures guttulas aqua dilutum sæpe salutare remedium in morbis putridis; bene etiam fertur in tartaro vitriolato

(aliisque salibus mediis pluribus.) Ergo sejunctim hæc duo corpora adsumta bene a nobis tolerantur. Ast ambo hæc in calcem coquite invicem (inpropria sane Chemico loquendi phrasis!) ut fiat turbith minerale; tunc a gr. x. xij. homo fere redigetur ad incitatas. Quid hoc est? Argentum vivum spiculis vitriolicis armatum est, & omnia perfcindit.

(Verum quidem est, a turbith minerali paullo majori dosi corpori ingesto sæva produci posse symptomata; interea tamen, adlata malorum expositio mechanica nimis adparet; nec in turbith, aqua multa edulcorato, propterea tamen nequaquam inertī, tot spicula, & acinaces abs nimia hypothesi adsumi posse videntur. Colocynthis v. c. aut helleborus terribiles, immo lethales excitare valet hypercatharses, quin ullis ad hoc indigeamus spiculis perfcindentibus.)

Absolvi nunc gravem hanc materiem de acrimoniis, quam toties in Pathologia recursuram sicco pede transibimus; quum hic integre tractata fuerit: paucis tantum repetam, ubi de qualitate nocente alimentorum agendum erit,

Juaret componere laterculum, quo notarentur in singula acrimonia symptomata quæque & effectus: fœtor, sapor, erosio, sitis, adpetitus, fæces, urina, sudor, cutis, sanguis; inflammatio: pateret hinc primo adspectu, in quo convenient, discrepantve. Habentur enim signa communia, quæ possunt in errorem inducere, si signa discrepantia & particularia in memoria non essent præsto: sitis v. c. magna adest in acrimonia alkalina, oleosa & muriatica; cutis etiam ariditas adest in hisce tribus acrimoniis; denuo adest erosio lenta in acrimonia acida & muriatica. Qui nunc vellet concludere ex paucis, quæ in me-

mo-

moria reservaret signis, erraret; unde opus est notare, in quibus convenient, discrepent.

Simul hinc intelligeremus, non ex uno signo esse acrimoniam dominantem definiendam, sed ex pluribus simul: sunt homines acido in humoribus minime laborantes, utut anxie inquisiveritis, qui tamen æstate multum sudantes acidum sudorem habent. Igitur nunquam ex uno signo, sed ex pluribus concludendum. Interim ab alia parte ne erremus, credendo, quod omnes homines debeant habere omnia illa signa simul: sunt gradus diathesium incipientium, progressarum, acutarum, summarum; unde, ut morbi iidem æque multa, æque gravia symptomata non habent, sed variant pro gradu intensitatis; ita & peculiare acrimoniam.

(Ut voto satisfaceret *Cel. de HAEN*, infero hic tabulam sequentem acrimoniarum quatuor præcipuarum; ex *BOERHAAVIO* inprimis, & *Prælectionibus Haenianis* tum hisce pathologicis, tum ad lectos Ægrorum habitis, concinnatam.

TABULA SIGNORUM ACRIMONiarUM.

	Alkal inæ.	Acidæ.	Amōniacal. partim & muriaticæ.	Oleosæ.
Fœtor.	Cadaverosus.	Spirans acidum.		Empyrematicus.
Sapor.	ut carnis , aut urinæ putrefactæ.	Acidus.	Oleofus.	Amarus , rancidus, fauces exu- rens.
Erosio.	Cineritia , plumbea , nigra, cito proserpens.	Lenta, cum pallore.	Lenta , cum pruritu , & rubore.	Fervida , nigra.
Sitis.	Ingens, vix sedanda.	Non magna	Ingens , adfidua.	Summa.
Adpetitus	Prostratus , abhorrens ab omni cibo.	Sæpe in- gens, dige- stio celerri- ma.		Prorsum, & cum horro- re, deletus.
Fœces alvi.	Solutæ , splendentes cadaverosæ , fuscæ, nigræ.	Tormina- les , acidum spirantes.		Pingues , fœtidæ , & dum red- duntur, fer- vidæ.
Urina.	Acris, cras- sa, fusca , spumescens, fœtida cum nullo sedi- mine.	Strangurio- sa, crassa , alba ; cum sedimento crasso, co- piofo.	Salina, tar- de putre- scens, cum sedimento spisso, pelli- cula pingui.	Flammea , fœtida, spu- mosa, pau- ca, calida.
Sudor.	Vix ullus , aut urinæ dictæ simi- lis.	Multus, aci- dus.		
Sanguis.	Tenuis, dif- folutus, flo- ridus.	Crassus , quandoque pallidior ; quandoque nigrescens.		Ambustus.
Cutis.	Arida, sic- ca, sordida.	Laxior, cum pallo- re corporis.	Sicca, nigra	Arida.
Inflamatio	Acutissima , celerrima.	Levior, lentior.		Acris , cita, pertinax.
Ructus.	Putridi.	Acidi.	Salini.	Nidorosi.
Juvamen,	Ab acidis.	Ab absor- bentibus.	Ab aquosis.	A frigidis , acidis , aquosis , sa- ponaceis.

§. 726. *Est & morbus gravis — — — dividi-
que nequeant.*

§. 727. *Sed & eadem — — — auctis contacti-
bus concrefcunt.* Est modus in rebus: sunt vasorum
in corpore series forſitan infinitæ. In vasis primi ge-
neris adſunt omnes omnino humores; rubri, ſeroſi,
lymphatici &c., quia ex globulis rubris diffilientibus
fit ſerum (ex *Theoria* ſcilicet *Boerhaaviana*, *Inl. HAL-
LERO* adcuratius examinata; v. *Elem. Phyſiol. L.*
V. ſect 2. §. 18.); quod ſerum per ſecundi generis
vaſa, ſeroſa dicta, fluit. Serum illud iterum diffiliat
oportet in globulos minores, ex quibus minoribus de-
nuo fit lymphæ, quæ denuo per vaſa tertii generis,
lymphatica dicta, fluit; & ſic porro, ad ultimam te-
nuitatem ſerierum, nobis ignotarum, uſque: quæ ulti-
ma ſeries forte ſpirituum eſt, in cerebro paratorum,
deinde per nervos tranantium.

Jam ille ruber ſanguis vasorum primi generis a ſo-
liditate differt, ut ſolo mechanico motu in ſtatu fluido
contineatur; ſibi autem in vaſe, quo exceptus eſt,
conmiſſus, mox ſolidiſcat. Hunc in ſoliditatem ni-
ſum, ſeu fere jam ſoliditatem, patuit ex antediſtis,
perquam eſſe ad vitæ robur conſervandum, neceſſa-
rium: ne catholico illo humore diſſolutiori per vaſa
non ſua fluereſcent humores alieni.

Sed ſi ille in ſoliditatem niſus ſit major, globuli-
que ſanguinei rubri haud facile ſint in ſeroſos dividen-
di, ſeroſi quoque non commode in lymphaticos abeant;
deficiet ſeri in ſeroſas arterias, deficiet lymphæ in
lymphaticas influxus; ergo turbabitur circulatio, &
brevis erit de vita actum.

Ubi autem, ex obpoſito, facile nimium dividun-
tur globuli rubri, exinanientur nimis vaſa primi ge-
neris: ſeroſi globuli ſi juſto citius diffiliant, exinanien-
tur vaſa ſecundi generis. Unde homo fere diffluet *con-*

ſum-

juntione, quam adpellant, *anglicana*; nisi Medici roborantibus, equitatione, vim plasticam, debitam globulorum soliditatem restituerint.

Auctis contactibus concreescunt; & fiunt inde obstructions, impermeabilitates, cohæsiones ramosæ non penetrabiles per rotunda lateralia oscula.

Etiam illa nimia soliditas partium in humoribus extrinsecus advenit a venenis; antimonio, arsenico, vitro maxime contuso, pilis animalium ita minutissime confcissis, ut sit fere pollen &c. Homines hi vomitu vitam finiunt; sed de his in historia venenorum.

§. 728. *Quin & notabilis* — — — *caloris, aut motus comprimantis*. Antea, de plethora agens, explicui Vobis omnes effectus plethoræ nasci posse, etiamsi copia humorum non sit pro corporis illius ratione auctior; quando illa eadem sanguinis copia rarefcit, sive se elementis suis dilatat. Est revera humorum raritas (rarefactio); sive, si ita dicere liceat, diffilientia (dispanfio potius) humorum.

Incomprehensibile autem, quam levi de causa illa augeatur rarefcentia humorum. Homines sunt, qui vix uvam comederunt, supra quam forte cucurrit aranea (*), vel cerasum, vel similem fructum, quem in horto deambulantes legerunt; quin momento temporis tumeant facie, collo, lingua, brachiis, thorace, totoque corpore. Idem sæpe vidi accidisse comestis mytulis. Solo, eoque copiosissimo oleo *ἀνὰ καὶ κατὰ* exhibito sanantur.

(*) Non opus ad hoc ulla aranea. Debilitati viscerum inprimis debentur talia phænomena, in ingesta copioso aëre scatentia, non debite reagentium: unde & adsumto musto, vel & cerevisia plurimi pessime adficiuntur ob solam hancce causam: non tamen ideo negaverim, a quorundam esculentorum, v. c. fungorum, venenata indole produci posse sym-

pto-

ptomata, quæ ab aëre extricato incassum omnino deduceres. Subin & idiosyncrasia singulari talia debentur; uti v. c. *Inl. VAN SWIETEN* intumescere vidit totum corpus ab exhibitis cancrorum lapidibus: similem casum ab esu ovorum retulit, ni fallor, *JOUBERTUS*: a pisces demum labia cum lingua tumere, faciem nigrescere, præfocari respirationem, certissimo semper eventu in homine cæterum nullatenus delicatæ indolis, miratus non una vice fui.)

Tantillum ergo corpusculum, forte acre, forte alio vix explicando modo, noxium, momento temporis rarefacit universos per totum corpus humores.

§. 729. *Immo & firma &c.* Hæc antea explicui: revocate modo *Leeuwenhoekiana* tentamina de globulis rubris in memoriam, quomodo nascantur ex rubris serosi, ex his lymphatici &c.

Si jam, ut dixi, nimia cohæsiō adsit, non parantur illi minores globuli, qui minora genere vasa subire debent. Forte hinc tanta debilitas in corpore ab inflammatione rubri sanguinis: nam nutritio tantum in minimis vasis fit. Quum autem in acutis spissitudo talis adsit, videntur inepti esse humores, ut fluant per vasa minima, atque sic intercipitur omnis nutritio. Si vero cohæsiō debilior adsit; oportet, ut oriatur dissolutio tanta, ut, quæ in vasis majoribus esse debent particulæ, in minora serie vasa abeunt; atque sic de serie in seriem. Unde adtenuati humores vitam instabilem reddunt, atque hydropes, extenuationem, consumptionem, tabem efficiunt.

§. 730. *Et sunt sane hi morbi &c.* Mirabimini statuentem B., horum morborum cognitionem tanti momenti esse, eosdemque tamen vix intelligi posse sæpe, ingenuè fatentem. Verum res haud raro sic se habet. Ut enim firmis verisque principiis instructi ad *Ægro-*

accedentes, plerumque, quæ causa subsit, quodnam acrimoniæ genus peccet, quid in globulis solidioribus aut rarioribus vitiosum sit, vere capimus; contingit tamen, ut aliquando prorsum fluctuemus dubii.

§. 731. *Si autem spectaveris humores &c.* Hæc Vos arbitror intellexisse ex prioribus. Nimia fluiditas posita est 1mo in minuta mole fluidi elementorum; 2do in minuta cohæsiōne; 3tio in utrisque. Nimia tenacitatis prorsum contrariæ sunt causæ.

Præterea excessus motus mutat humores & vasa; ita, ut humores adtenuentur primo, & ampliores fiant diametri pororum, ea ratione, qua vires distendentes vel velocitate vel copia humorum augmentur. Nimia quies contrarios effectus edit.

§. 732. Omnia explicui, *cap. de morbis ossium & de vulneribus, & contusionibus, &c.* Agit hic B. de humoribus nulla ratione vitiosis, sed morbos tamen producentibus vitio vasorum, aut diametro auctorum, aut ruptorum; ita tamen, ut mora fiant morbos.

§. 733. Hoc demonstravimus.

§. 734. *Sunt autem — — — ex ipsa &c.* Ita ut deinceps de morbis peculiari sermone habito miraturi sitis, quod hæ generales regulæ tantum lucis adferant. Ex sola v. c. sanguinis vel inflammatione in extremis vasis, vel aberratione in vasa non sua, oriri videbitis in capite phrenitidem, in naribus coryzam, in faucibus anginam, ad pulmones peripneumoniam, ad latera pleuritidem, ad ventriculum gastritidem, ad intestina enteritidem, ad uterum hysteritidem &c.: tunc explicandis omnibus morborum initiis hæc nunc exposita adhibebimus.

Progredieremur nunc ad *Causas morborum*; sed in via retardat morborum partim bona, partim superflua divisio, *VETERIBUS* observata & *RECENTIORIBUS*;
quam

quam intelligere necesse est, ut Auctores legentes noscatis, quid sibi velint.

§. 735. *Ufu vero obtinuit &c.* Sub initium Pathologiæ jam monui, quam, tum inutili, tum noxia & inepta distinctione morborum doctrinam obscurarint ARGENTERIUS, SENNERTUS, alique. Illi in genere sic totam Medicinam oneraverunt distinctionibus: qui autem de morbis scripserunt peculiaribus, auxerunt adhuc distinguenda nomina; ita, ut v. c. MAGISTER JOANNES ter centies distinguendos censuerit solos oculorum morbos. (*) Voluere ingenii ostendere acumen; sed secundum VERULAMIUM telæ aranearum sunt, pulchræ quidem texturæ, & subtilitatis, at vero usu cassæ.

(*) (Famosus ophthalmiater John TAYLOR morbos oculorum 263 distinxit in dissert. nova de anatomicæ oculi &c.)

Hæreditarii, connati. Hos inter bene distinguendum, quod male sæpe confundantur. *Hæreditarius* morbus dicitur is, qui ex qualitate paterni seminis, materni ovuli, & alimenti, sive formatricis virtutis (quod *galenice* nimis dictum), tenellis Embryonis flaminibus ipsis infusus sit: cujus generis sunt epilepsia, apoplexia, podagra, hydrops, nephritis, calculus, hæmoptoë, phthisis. (Lues venerea, arthritis, scorbutus, uti observavi, scrophulæ; HOFFMANNUS hæreditariis morbis addit & maniam, & melancholiam, & hæmophthisin, & cachexiam, & malum hypochondriacum. Pertinent huc & vitia nonnulla alia: v. c. ephelides, macrocephalus, oxycephalus, erythrotrichiasis, dentes caduci, e. s. p.) Qui morbi aliquando ad certam ætatem plerosque illarum familiarum adoriuntur. Quodsi homines tales vel arte vel natura definitum istud tempus superarent, plerumque immunes ab illa labe salvantur; quæ tamen labes aliquando & ad eandem æta-

tem adficit illorum profapiam. Res intellectu difficilis, comprobata tamen experimentis; nec minus certo ex hac causa hæreditaria sequatur necesse est, quam ut digitus ipsis aut manus adfit.

(Nimium, uti videtur, tribuit *Cel.* HAENIUS morbis hæreditariis, dum eos *certo* adeo evenire *debere* adserit, ac digitorum manuumve accidit formatio. Ut enim taceam, Viros quosdam clarissimos morbos hæreditarios prorsum negasse; probandum foret HAENIO, Nephriticum v. c. aut Hæmoptoicum *A*, (de quo evictum jam fuerit, eum nephritide aut hæmoptoë hæreditaria laborare,) non interrupta unquam serie Avos Proavosque habuisse nephriticos, aut hæmoptoicos: constat autem certissimis observatis, Filium sedigitatum, Patre prognatum sedigitato, hinc hæreditario, non adventitio, morbo laborantem; Avum & Aviam habuisse, quinque digitis, ad morem aliorum omnium hominum, instructos. Idem & de aliis morbis hæreditariis habetur evictum: novi hominem, cui in juventute jam plurimi elapsi dentes; Filio idem proprium malum: Proavi autem, MORYSIS adinstar, firmissimos, candidos sepulcro intulerunt dentes, e. s. p. In animantibus variis evictum etiam, morbos hæreditarios non in infinitum produci; in quibus, ob brevius vitæ curriculum, eo facilior observandi ratio. Nec rem exponere aut refutare videntur, quæ ex *Cl. de HAEN* mox dabo.)

Connatus morbus dicitur is, qui Fœtui, materno in utero degenti, supervenit, moxque a nativitate adparet. Imaginatio prægnantis Mulieris, incuria, aut cura præpostera Obstetricis aut Custodis causa esse morborum talium potest: sed de his suo loco.

(Verissima sunt, quæ de morbis ex cura præpostera Obstetricum aut Custodum hic adnotantur:
huic

huic sæpissime debentur luxationes; gibbositates; membrorum variorum vitiosa, aut detorta conformatio; capitis ipsius figura compressa, acuta: fatuitas; epilepsia. Discant hinc Parentes, quam male faciant, si familiæ spes Ancillarum custodiæ ex integro credant; incassum dein quærentes causas morborum, sæpe nimis incurabilium; quorum, incuria sua, primarii exsisterunt fontes. — Venerei morbi connatis pariter accensendi. *V. Cl. PLENCK. Doctrina de morbis venereis p. 149.*

Adquisitus, qui homini jam nato, suæque spontis facto per aliquam causam inducitur; ut sũnt morbi propemodum omnes. *Adquisiti* hi sæpe per artem curabiles, sive acuti, sive chronici. *Connati* vix unquam curabiles, raro saltem: hæreditarii per se curatu impossibiles: *per se* inquam: nam diathesis adest adeo necessaria ex illa progenie, quam adsit digitus aut nascus: (v. quæ paullo ante circa hæc monui: quibus & accedit, morbum subin oriri ab Avo, transire ad hujus Filium, &, saltu facto, adficere non hujus Filium sed Nepotem, vel prorsus evanescere abs causis manifestis, ab HAENIO illico adsignandis.) Verum aliquando fit, prout vidimus in epilepsia, ante certam ætatem, qua consueverat in familia morbus adparere, Juvenem bello vel alio exercitio adeo robustum fieri, ut ad illam ætatem habeat temperamentum omnino alienum a reliqua familia, in qua diathesis in actum deduci nequeat. Præterea elucescit optimorum Medicorum industria in hisce; dum arte sua ita adnituntur corpora Infantum in tali familia mutare ante illam ætatem, ut diathesis mortua maneat. Novi egregia rei hujus exempla.

Ratione subjeñi sunt: morbi ætatis &c. Primus HIPPOCRATES multis in locis hos ætatum morbos recensuit, nec absolvit: multi deinceps Auctores idem prosequentes, telam reliquere imperfectam. Est tamen

res pertractatione dignissima. Brevi sermone exponam, ab infantia orsus.

Infans primo, (patitur monente B. *Aph.* §. 1340. &c. a strigmentis glutinosis, cascosis, lentis; quibus os, œsophagus, stomachus, intestina, ei replentur: unde nausæ, vomitus, tormina, singultus, convulsiones, sæpe oriuntur, atque deinceps restant indigestiones adsumtorum) quamdiu lacte nutritur, habebit morbos vel a lacte, vel a sua infantili constitutione, vel a vitio Custodum. A lacte patitur plerumque acorem, & acido, sæpe vix debellando laborat. A sua constitutione sæpe laborat morbis, tum variis; tum, nisi ætas illos mutaverit, inexpugnabilibus. Summa quippe omnium teneritudo est. Vasorum & liquidorum numerus & copia maxima; systema autem nervorum omnibus majus. Toties vidi in paucarum septimanarum Foetibus caput fere dimidiam, saltem tertiam omnino partem totius corporis magnitudine æquans. Minuitur sensim pro incremento corporis illa capitis magnitudo, tamen in homine adulto caput incredibiliter parvum est, ratione capitis recens nati Infantis; (uti tum oculorum fide, tum Pictorum ac Statuariorum corporis universi divisionibus satis adparet.) Ergo Infantes habent cerebrosum, & nervosum systema respectu reliquorum maximum; adeoque & morbos nervosos plurimos, laboriososque. Tandem patitur alios morbos vitio Custodum, perversa fasciatione, adsuæfaciendo laterali luci, accersendo somnum nimio opio e. s. p.

Excipit mox has ærumnas dentitio, tot calamitatum parens, mortis adeo fertilis causa: adeo ut magnus Hipp. operæ pretium duxerit, tractatulum de illa conscribere.

(In compendio etiam recensuit Dentientium morbos *Aph.* 3—25; quos iisdem vix non verbis etiam exposuit CELSUS l. 2. c. I. p. 46. Facile

autem

autem patet, quanta mala in tenellis Infantibus a dentitione oriri queant; si adtendas, & Adultos ipsos pessimis symptomatibus tum a dentium dolore, tum a dentitione serotina, adfici. „Novi, HILDANUS ait, qui ex nimis dentium doloribus facti sunt epileptici; alii visum amiserunt; alii visum duplicatum adquisiverunt.“ Post enormia symptomata a dentitione serotina in sene Medico mortem luctuosissimam descripsit TULPIUS *l. i. Obs. c. 36.*)

Variolas porro, morbillos, febres, scarlatinas, tussim convulsivam studio omitto, alia sub classe hos morbos recensiturus. Adtuli priores ideo solum, ut intelligatis, cur in Necrologiis nunquam plures numero Mortui reperiantur, quam intra septimum ætatis mensem.

Juvenum; quorum ætate vasa extenduntur, nasciturque plethora: ob quam acutis morbis fiunt magis obnoxii, motu perenni exercitati.

Adultorum; quorum corpora non crescunt ultra, sed perstant. In his æqualis est solidorum & fluidorum proportio. Unde illis alii novi proprii sunt morbi; si aut plethora extendens vasa exorbitet, aut nimix sint vasorum vires. (Morbi præterea his inprimis ab intensioribus laboribus, exercitio membrorum, curis, animi pathematibus e. s. p.)

Senum; quorum morbi oriuntur ab excessu solidorum; quo fit, ut magis indies his rigescentibus, vires minuantur, quæ humores per vasa propellant. Deficiunt senibus & debilitantur quoque emunctoria, quibus superflui humores & noxii corpore eliminantur: unde alvus, vesica, nares, jugi sæpe auxilio indigent.

Morbi generis: masculini. Mares patiuntur a genitura retenta, nimiumve excreta: patiuntur in partibus generationi dicatis hydropes, sarcocèles, varicocèles

les. *Fæminæ* patiuntur morbos sui sexus in utero, cum huic adnexis, & mammis; inflammationes, subpurationes, scirrhus, prolapsus, (cancrum, rupturam, hydropem &c.) fluores albos. *Virgines*, (tum & maritatae Mulieres, & Viduæ juniores) a defectu menstruorum, nimiave horum copia; quacunque de causa natis.

Gravidæ, parientis, nutrientis. Incipiunt ærumnæ harum cum ipsa graviditate. Mox a mutata circulatione, forte etiam ab imperio, quod uterus, τὸ ζῶον ἐν τῷ ζῳῳ (animal in animali) ratione nervorum suorum habet, patitur Gravidæ nauseas, vomitus, anxietates, cardialgias, plethoram peculiarem, abortus, sanguinis profluvia, dolores lumborum pedumque, oedemata pedum, crurum varices, alvum urinamque subpressam. (Morbos Gravidarum ex septemdecim fontibus deduxit nuperrime *Cel. VAN DOEVEREN, Prim. lin. de cognosc. Mul. morb. Lugd. Bat. 1777 §. 27—46.*)

Aliæ iterum calamitates Parientis eo, quod Infans uterusve bene versi non sint; quod desiderentur dolores requisiti, vel adsint pravi perversique; quod Infans mortuus partum non adjuvet; quod placenta præeat Infantem, aut funiculus umbilicalis; quod angustia nimia pelveos sit pro transitu Infantis; quod placenta nimis cohæreat, aut frustillatim excidat; quod transitu rudiori Infantis vagina & pudendorum labia findantur, aut inflammentur, aut subpurentur; quod mammæ doleant e. s. p. (Desiderantur utique in hoc catalogo plurimæ adhuc Parturientium adfectiones. *VAN DOEVEREN* reduxit eas ad tres species; quatenus Imo a Matre; 2do a Fœtu; vel 3tio ab Obstetricante oriuntur.)

Quodsi Mulierem contemplemur obeuntem munia Nutricis, en mox alia in procinctu mala! Pati poterit

a lacte suo vel acido, vel alkalescente; utraque autem ratione inflammationes, subpurationes, vel scirrhus (cancrorum sæpe & carcinomatum primos fontes) producente. A nimio emulcto, vertigines, dolores dorfi & debilitatem universalem contrahunt. Etiam ab Infante multum patiuntur nimium premente papillas; tum ab eo morbofo, varioloso, morbillofo, apthoso, (inprimis lue venerea infecto.) papillas excoriante, findente.

Tum universales & particulares. Universales, quando totum corpus simul in suis solidis & fluidis adificitur; ut in scorbuto, plethora nocua, lue venerea: *particulares*, ubi topica obstructio vel inflammatio, vel aliud malum adest. Rusticus v. c. sanissimus immanes experitur dolores ad imos pedum articulos; tota anterior pars pedis decidit instar putrefactæ. Elapso quodam temporis intervallo idem fit ad totum pedem, deinceps ad manum: quod utique, unde ipsi oriatur, vix dici valet; contigit tamen. Ad particulares morbos referuntur pleuritis, gastritis, phrenitis &c. quamvis deinde universales fiant, dum in pejus mutantur.

(Intercalari hic commodissime posse videntur differentię morborum, minime otiosæ, aut hypotheticæ, quæ debentur exercitio artium, opificiorumve variorum, vitæque generi lauto, arcto, sedentario, otioso, litterario, jucundo, melancholico, anachoretico, irrequieto, aut stipato situ corporis varie contorto, compresso, tum vapore vario, e. s. p. Nominasse hic sufficiat summās classes; plura qui circa hæc scire voluerit, adeat opera Cl. Cl. Virorum, qui de hisce speciatim egerunt: v. c. RAMAZZINI, HENCKELII, SCHEFFLERI, ZIMMERMANNI, TISSOTI, LANGHANSII &c. &c. Legi etiam merentur, quæ adnotavit in compendio Cl. PLENCK, in *Pathologiæ chirurgicæ* parte ætiologica, inprimis p. 36. sq.)

Ratione temporis: acutissimi intra 4 dies terminandi. Morbus omnium acutissimus est pestis spirituum dicta, quæ fulminis instar prostermit homines. 2do: Pestis macularis, maculis hominem adficiens instar granorum milii, aliquando instar granorum piperis. Celerissima quoque hæc. 3tio: Pestis, quæ solet cita cum partium syderatione contingere; dicta etiam *αντρεα-χόειδες*, uno momento feriens locum quemdam, qui mox fit durus, dolens, rubensque ita, ut totus tandem excidat. Si locus is syderatus in corporis extremis sit, sæpe homo evadit; si in nobilioribus, minus. Hæc febris pestilentialis dicitur; durans hora, horis aliquot, die 1. 2. 3. ad quartum usque.

Sunt etiam aliquando febres ardentes, apoplexiæ, aliique morbi, qui intra quatuor dies terminantur, inter acutissimos numerandi.

Peracuti, intra 7 vel 8 dies terminantur: ita ut spes adsit, fore ut Ægri evadant, qui octavum diem transierunt; nisi in alium morbum prior morbus transiverit.

Acuti, intra dies 20: ut sunt plerique acuti morbi & febres continuæ putridæ. Verum in omnibus his diversitas. Febris ardens si intra 4 dies terminetur, est acutissimus: si excurrat ad 7, est peracutus. Pleuritis, peripneumonia si ante 7. vel 9. diem terminentur, sunt peracuti; si ultra excurrant, sunt acuti: hinc non possumus v. c. dicere: pleuritis est peracutus morbus; nam variat.

Chronici: ita vocare lubuit morbos, qui ex acutis ultra 20 vel 24 dies multum excurrunt; vel qui citra acutos prægressos sensim in corpore nascuntur, ac diu, sæpe per annos, immo per totam vitam perdurant. Revera variolæ v. c. sunt ex morbis acutis: sed si ultra 21 dies excurrant, fit morbus a mutatis variolis in diathesin purulentam, ichorosam, & acrem hu-

humorum. HIPPOCRATES tamen morbos acutos numerat aliquando ad 40. 60. 80. 100. 120. diem: at, quum ea, quæ tunc homines patiuntur, non sint proprie id, quod in principio passi erant, sed quod ex priori sequutum est; hinc maluerunt Alii potius hæc mala chronica appellare.

Dein verni vel autumnales. Accessus & recessus solis vernus & autumnalis mutat omnia; homines, animalia cuncta, ipsum telluris gremium: mutat proinde & in homine dispositiones ad morbos. HIPPOCRATES tantus in his describendis, tamque multus fuit, ut rem exhauserit fere: illum excepit SYDENHAMUS. Videbitis sane deinceps distinctionem cognitu perquam necessariam, qua vernaes morbi excipiunt autumnales, hi vicissim illos; adeo, ut sibi successive locum cedant.

Continui; qui continuo crescunt quotidie, donec in summo violentiæ gradu consistant.

Continentes; qui hominem per vices, aut paroxysmos adoriuntur quidem, sed tamen immunem non relinquunt.

Intermittentes; qui oriuntur ab una causa certa, uata, crescente, stante, decrecente; manente diathesi in corpore subtilissima, se manifestante, ubi dein idem morbus sit. Si tumultuarie adoriatur, vix intermittentis nomine morbus venit. Est sane mirus morbus talis. Ut arbores semel in anno folia, flores & fructus perficiunt, hyeme iterum quasi moriuntur, insequente autem vere denuo frondent &c.; sic in corpore nostro quartana exquisita sæviens, relinquit corpus totis 48 horis adeo liberum, plus minus, ac si penitus jam exsulasset. Revolutis tamen his 48 horis tranquillitatis, eadem, uti antea, sævitie hominem ex improviso adoritur, denuo relictura; idque nonnunquam per 3, 6 menses, aut annum integrum, eodem

plane tramite; ita tamen, ut corpus sensim inde turbetur, & plerumque absente etiam febris homo male habeat.

Ratione effectuum: salubres; ut v. c. quartana simplex, adorta hominem in media ætate, vel juventutem jam transgressum, disponere observata fuit ad longævitatē. Non est sæpe salubrior morbus ad alios complures, vel integre sanandos, vel ad tempus moderandos, quam quartana: id in epilepsia manifeste vidimus: in podagra similia prostant exempla: sic & scabies, utut foedus morbus, notante HIPPOCRATE, Melancholicos curavit. (., Melancholicis & Nephriticis hæmorrhoides supervenientes, bonum. *Aph.* 6—II. Recte monuit circa hunc aphorismum HECQUET, HIPPOCRATEM non dixisse fluentes, sed supervenientes, ἐπιγινόμεναι; quum quandoque sufficiat, etiam citra evacuationem, mutata directio peccantis humoris. Textus huius aphorismi non vitiatu græcus est: Τοῖσι μελαγχολικοῖσι, καὶ τοῖσι νεφριτικοῖσιν αἰμορροΐδες ἐπιγινόμεναι, ἄγαθον. Eadem etiam vix non verba leguntur *lib. de Judicat. n. 10.* Cur autem & CORNARIUS & FOESIUS pro Nephriticis posuere: Phreniticis? —

Benigni; qui functiones humanas non multum lædunt; humores parum tantum mutant, vitæ discrimen non minitantur,

Maligni; in quibus omnia contraria benignorum adsunt: en veram maligni ideam!

Sanabiles; qui vel a vi vitæ superstite, vel ab arte, vel ab utrisque possunt in sanitatem mutari. In hisce basis vitæ fundamentalis inlæsa manet.

Insanabiles; ubi omnia prioribus contraria cernuntur. — Nolim autem, credatis, me morbos HIPPOCRATI, GALENO, multisque VV. insanabiles habitos, nunc etiam omnes pro insanabilibus habere; nam ars multa deinceps detexit (ac indies detegit); uti ad-
pa-

paret v. c. ex historia vulnerum ; uti & videbimus, acturi de lue venerea ; quam, insanabilem olim in Europa habitam, *Jacobus Berengarius CARFENSIS*, vires mercurii primum expertus, sanabilem esse demonstravit.

Est in Hollandia pessimus morbus chronicus, qui organa deglutitionis, guttur, œsophagum, os ventriculi, adortus, hominem lenta & miserrima morte vivis eripit ; e quo etiam, si incrementa jam ceperit, vix quisquam emergat. Quum multa similia infortunia in praxi mea lugens contuerer, adcuratius rem in pluribus examinavi cadaveribus : quæ in his detexeram, ea cum observationibus & antea & postea in Vivis factis conferens, praxinque dein secundum hæc observata dirigens, edidi tractatulum de læsa deglutitione hacce chronica ; quo patuit, morbum, quamvis luctuosum adeo, haud tamen ita insanabilem vocandum : quum citius detectus, in pluribus jam feliciter persanetur.

Hæc de minori numero morborum, qui olim habiti pro insanabilibus. Verum ab alia parte idem catalogus insanabilium nobis auctior, quam VV. est. *HELMONTIUS* narrat, Vagabundum quemdam fuisse hominem, qui insperso pulvere caneros exulceratos curaret, quos hucusque habemus (habuimus) pro insanabilibus. Idem de alio homine *Hieron. CARDANUS* scripsit, eumque jam in inferni profundis locari credidit, quod non revelato arcano ex vivis excesserit. De potione calculos in vesica frangente, salva sanitate, idem retulit *CARDANUS*, cujus etiam parandi ignoramus methodum.

(Non infelices adeo nos esse, satis patet, si remedia egregia nostro ævo ex hyosciamo, aconito, cicuta, flammula Jovis, arnica, belladonna, &c. parata, revocemus in memoriam.)

Navanda autem opera nobis nunquam non est, ut & sedula observatione morborum, & adtento examine medicamentorum, maxime simplicium, & adcurata

cadaverum lustratione, artis extendamus magis magisque pomœria.

Lethales, qui ex se citra omne dubium sunt incurabiles; ut vidimus in vulneribus absolute lethali-
libus.

Contagiosi, differentes ab endemicis, & epidemicis.

Endemici morbi sunt cuidam regioni determinatæ familiares, non certo quodam tempore, sed semper ibidem reperiundi: ut v. c. strumæ & indurationes colli apud Styrios & Carinthios; consumtio anglicana apud Britannos; scorbutus apud nationes septemtrionales; (oculorum morbi, hydrops, adfectiones pulmonum, hæmorrhoides, hic loci. Retulit mihi egregius MOHRENHEIM, plurimos sibi occurrisse Adolescentes, eodem anno jam hæmorrhoidarios, quo in Puellis menstruus oritur fluxus: ipse autem in Pueris septem octoque annorum jam observavi hæmorrhoides): non quidem, quod consumtio v. c. aliis in locis ignoretur, sed quod in hisce non frequens adeo occurrat.

(Morbis endemicis etiam adnumeranda, præter alias instantias, videtur singularis illa constitutio *Æthiopum* sic dictorum *alborum*, seu *Albinorum*, de die cœcutientium, capillis niveis, laneis, oculis rubris ad instar cuniculorum alborum præditis, medio vitæ humanæ curriculo senescentibus &c., de quibus omnino legatur *Cel. PAW, Recherches sur les Americains*; tum *Dissertatio: le Negre blanc* &c., *Cl. BLUMENBACH dissert. de generis humani varietate nativa*, & *Inl. HALLERI Element. Physiolog. T. V. p. 24. &c.* — De morbis endemicis v. libellum *Cl. CARTHEUSER* sub hoc titulo; *BATTY Specimen morborum Hungaris endemicorum*; tum varia opuscula, in quibus territorii cujusdam descriptio traditur physico-medica v. c. *KLEINII tentamen*

men de aëre, aquis & locis agri Erbacensis &c.
 BEHREND, der Einwohner in Frankfurt am Mayn
 ic, tum opera CL. CL. BISSET, LIND, HILLARY
 &c., qui & epidemicorum morborum spectarunt ra-
 tiones. Itineratorum denique recentissimorum, ca-
 sta Philosophia instructæ relationes.)

Epidemici morbi adesse dicuntur, quando ab aëre, ali-
 mentis &c. mutatis, vel certa quadam ratione adfectis
 numerosi morbi oriuntur (dicendum potius: numerosi
 homines eodem morbo affliguntur); uti erant ante ali-
 quot annos, tusses catarrhosæ, plures Europæ natio-
 nes adorientes, (hoc anno 1779 dysenterix): ut sunt ali-
 quando labente æstate febres quartanæ, continuæ pu-
 tridæ, diarrhææ, suntque diversis annis alii; quando-
 que nulli. Solent sæpe epidemix sese invicem exci-
 pere; v. c. febres continuas diarrhæa, diarrhæas pleu-
 ritides, e. s. p. uti apud SYDENHAMUM tot exem-
 plis videre potestis.

Contagiosi autem videntur oriri ab alia causa quam
 endemici, vel epidemici: si enim endemici essent, ori-
 rentur semper, (aut potius non cessarent, nisi mortuis,
 saltemve adfectis, omnibus hominibus illius regionis)
 pestes, aut variolæ, &c. Epidemici non sunt; nam
 manifesto hi videntur ab aëre, aut alimentis oriri: ut
 vidimus ardentes febres epidemicas maxime ardente sy-
 rio; quartanas & remittentes autumnales a sanguine so-
 lis calore inspissato, & inminuta per autumnum per-
 spiratione nasci; diarrhæas, & dysenterias epidemicas
 oriri a fructibus horræis nimis, (inmaturis ingestis;) &
 a cerevisiis æstivis copiosioribus: (frequentius ab acre-
 dine materie perspirabilis ad intestinorum tractum de-
 lata) &c.

Quænam ergo contagiosorum causa? Ea hucusque
 (magnam partem) latet.

HARTSOECKERUS microscopiis tot detegens infecta, eorum ovula etiam iis in locis, in quibus ea vix suspicaremur adesse; in eam sententiam abiit, ut statueret, contagiosos morbos omnes oriri ex invisibilibus infectis, per sua sese ovula propagantibus; ita, dixit, pestem communicari, ita ipsam veneream luem. Nec multum alienus ab hac opinione fuit *Celeb.* olim *Athan.* KIRCHERUS (plurimique alii *Pathologiæ* sic dictæ *animatæ*, VAPRONI jam, COLUMELLÆ, tum VERULAMIO &c. cognitæ, Auctores, HAUPTMANNUS, ANDRY &c.; interque RR. ipse *Inl.* LINNÉ, & *Cl.* PLENCIZ hanc foverunt opinionem.)

Ast, si id verum foret de lue venerea, sane tempore contagii Innumeri, qui nullo venereo crimine se conmacularunt, infontes lue punirentur; ut sit a contagio pestilentiali, varioloso &c.; quod autem veritati minime consentaneum est.

Præterea, si ab infectis hæc dependerent, utique ope aëris communicatio hæc contagii fieret; quod de novo minus verum adparet. Bene animadvertit SYDENHAMUS *sect. 2. c. 2. p. 109.*, tempore, quo pestis totam fere Europam devastabat, magnum Hetruriæ Ducem COSMUM III., totum Ducatum Florentinum ab illa labe præservasse immunem; positis ad omnia regionis confinia excubiis, & præterea adfixis ad confinia chartis, quæ innuebant, mortem sclopeto mox inferendum esse illi, qui præfinitos transcendere ausurus esset terminos.

Ergo contagium, si ope aëris adveheretur, æque Hetruscos adflixisset, quam omnes finitimas Nationes; aër enim movetur continuo.

Quidnam ergo proprie causa subsit communicati contagii, latet: sed patet, illud ab uno homine alteri communicari: sive per ipsum hominem, sive per aliquid ab ipso infectum: hujus generis morbi sunt pestis, variolæ, morbilli, lues venerea, & forte etiam pectoris quidam morbi; nam
ob-

observatur, ab uno equo peripneumonico totum stabulum infici.

Narratur in historia pestis Germaniam quondam (quo anno?) adfligentis, sceleratos fuisse homines, qui sub larva misericordiæ erga Proximos, hominibus peste infectis famulabantur; sed, eorum diripiendi bona desiderio ardentes, frustulum lardi sub morientium Ægrorum axillis ponebant, vel etiam ori illorum inmittebant, illud dein lardum adplicantes clanculum ad eorum corpora, qui inceperant ægrotare; ut eo citius perirent, eorumque ipsi bona possent rapere.

Equi, oves, porci in eodem cum infectis bovis stabulo degentes, aliquando liberi manent. (Notandum autem probe, non unicam esse luis bovillæ speciem; ac, dum genericum nomen luis ponitur, semper redire quæstionem, quænam illa fuerit?)

Miri in peste id nonnunquam accidit, quod non solum non omnes adficiat homines; sed, notante DIERMBROECKIO, SYLVIO DE LE BOE, & SYDENHAMO, homines hypochondriaci, melancholici, pituitosi, hydropici, tam bene valentes inde fuerint rediti, ut penitus reconvalescere a prioribus morbis viderentur. Ignoramus hucusque veram hæc exponendi rationem. (Accidere videtur eodem modo, uti ante quartana, hæmorrhoidibus &c. morbos alios solvi aut emendari notatum fuit.)

INGRAM dissertationem edidit, qua demonstrare adnititur, neutiquam pestem levantinam, seu smyrnensem, aëre, mercibus incluso, cum Europæis communicari: vide etiam circa hæc SYDENHAMUM p. 109.

(Legendus de pestis contagio omnino elegans libellus *Cel. de MERTENS, Obs. med. de febribus putridis, de peste &c.* Vind. 1778.; ubi plurima circa pestem præjudicia magna cura examinantur, ac refelluntur. Dolendum, quod vitiosa admodum sit,

quæ hujus opusculi nuper prodiit versio germanica. Vide circa pestis contagium & optimum CHENOT *tract. de peste*. — Universum de peste illos inprimis legendos suadeo, qui pesti interfuerunt ipsi.

Habet certe pestis miri quid, & incomprehensibilis. Pestis non adficit omnia animalia: pestis hominum non est pestis boum; hæc non est pestis equorum; pestis ovium diversa a peste porcorum. Vidi porcos lingere saniem ex peste adfecti bovis naribus effluentem, tamen inde non adfici. Equi, oves in eodem stabulo cum infectis & morientibus bobus stabant sanissimæ. A peste hac homines non adficiuntur. Tempore pestis boum in Hollandia millenis bobus peste adfectis interfui; pestem examinavi; cum tribus Medicis sociis quotidie invisi stabula 20, 30, 40 boum, qui ferme omnes morbo dicto moriebantur: nunquam deprehendere potui, ullum hominem a peste animalium vel minimam læsionem accipere.

Est ergo pestis animantium generi cuique propria; ita, ut aliud genus minime adficiat; quis vero determinabit veram naturam hujus veneni? Si animalculis deberetur origo mali; vix potest cogitari, animalcula hæc unum modo genus adficere, intactis reliquis. Sed, inquietis, eadem difficultas obtinet in quavis de peste opinione — crediderim; ideoque præstat ignorantiam fateri, & nullam potius adoptare opinionem. Etenim mirabilitas pestis crescit ex eo, quod notantibus DIEMERBROECKIO, SYLVIO, SYDENHAMO, aliisque de peste Auctoribus, homines cachectici immunes magis maneant pestis, quam alii, sanissimi: immo, quod convalescerint ministrantes peste Adfectis. Hinc PIGRÆUS, FERNELIUS, FRACASTORIUS, PLATERUS, FORESTUS, candide fatentur, se rationes hujus veneni prorsum ignorare.

Magis adhuc memorabile, quod non modo Cachecticis plus parcat, quam Sanis; sed & ex Sanis ipsis plus parcat his; quam illis, (quod & in aliis morbis contagiosis indies usuvenit.)

EVAGRIUS, Scriptor ecclesiasticus, refert, maximam sui temporis pestem non simul omnes regiones invasisse; sed sine ullo ordine modo hanc, modo illam adfecisse: subjungit, sæpe aliqua in urbe dimidium populum fuisse infectum, altero dimidio manente libero.

CARDANUS *lib. 8. de rer. varietat. c. 40.* meminit pestis cujusdam basileensis, in qua soli Helveti, non Itali, non Galli, non Germani adficiebantur.

Joan. UTENHOVIUS in *Peregrinat. eccles. Anglic. c. 4.* meminit sævissimæ pestis Hafniæ in Dania, a quo omnes Advenæ, Angli, Belgæ, Germani, immunes erant; quamvis etiam promiscue inter Infectos, in ædibus infectis versarentur. Vide & DIEMERBROECKIUM *de peste cap. 4. adnot. 6.* ubi refertur, familias fuisse integras, e quibus nonnulli horarum intervallo ab aliis remoti habitarent; qui omnes, nullo excepto, & adficiebantur, & peribant; dum interea multæ familiæ existerent, in quibus vel nulli, vel pauci inficerentur; Infecti vero omnes convalescerent.

Quid tandem mirabilius, quam valido pestis contagio grassante, fere silere omnes morbos alios: si vero quis alio morbo adficeretur, pestim se mox huic morbo jungere? Vide SENNERTUM *de peste 1619. & 1626.*: confirmat id MINDERERUS *lib. de peste c. II.*

(Ait autem *Celeb. de MERTENS p. 186.*: Creditur vulgo, grassante peste alios morbos non occurrere. Eodem anno 1771. morbos sporadicos cujuscunque generis curandos habui; immo & morbilli epidemice regnabant. In monasterio ad S. Si-

meonem, ubi Suspecti detinebantur, plures Infantes morbis correpti sunt.)

Inprimis ratione status: initii, progressus, status, decrementi, finis. Non explicabo hæc, nam quotidie de iis sermo est in nosocomio.

A I T I O Λ Ο Γ Ι Α

ΠΑΘΟΛΟΓΙΚΗΣ.

§. 737. *Causa morbi vocatur, quæ morbum præsentem facit.* Eginus 1). de vita & actionibus hominum sanorum variis, ut ex iis bene perspectis vera haberetur morbi idea. Consideravimus enim, has actiones posse minui, atque ad minimam actionem perducì; ut, si adhuc aliquid demeretur, restaret nihil, & mors adesset. Constitit tunc nobis, hanc inminutionem, læsionem dictam, observari vel in solis solidis, vel in solis fluidis, vel in utrisque.

Hac de causâ consideravimus solida duplici ratione: 1) quidem, quatenus sint partes similes simplices, e quibus cæteræ componuntur; 2) quatenus solida sint functionum instrumenta: recensuimus morbos, qui in his organicis partibus, ut solidis, oriri observantur. Tum seorsim consideravimus humores varios, morbosque, qui ex diversis eorundem vitiis nasci solent.

Hinc bona firmaque, nisi me fallat animus, jacta sunt fundamenta, quibus morborum systema deinceps superstruatur. Quod ut rite fiat, de causis incipiendum est, e quibus plerique possibiles morbi originem ducunt; eaque de causâ doctrina hæc exponens, *Ætiologia Pathologica* nuncupata, basin ponens totius

tius morborum & cognitionis, & curationis. Vestram attentionem quam summam prævideo, meretur, postulat, jubet.

Causarum morborum nomine plerumque intelligitur quidquam, aliud omnino ab eo, quod re vera est; unde causæ cujusque ideam justam conemur adipisci.

Causæ morbi nomine solemus aliquid tanquam a morbo ipso distinctum considerare: fallimur tamen in eo; nam causa morbi completa est ipse morbus; atque hic est causa sua completa, seu proxima.

Magnus Philosophus s'GRAVESANDE, in *Introductione ad Philosophiam*, c. 8. sic habet: „Ubi res quotidie mutari videmus, & has res consideramus; adquiremus ideam causæ & effectus: causam vocamus illud omne, cujus vi res est. Illud autem, quod vi causæ est, vocamus effectum.“ Morbus est causa physica, sive ens physicum. Ergo omnia axiomata & regulæ generales, quæ causæ physicæ competunt, competunt etiam morbo, ut causæ, sive enti physico. Causam vero entis physici dicimur tunc cognoscere, quando certo novimus, entia aliqua esse, quæ a nobis concipi nequeant, quin simul ea res physica concipiatur, cujus causæ dicuntur. Sed juvabit rem illustrare exemplis.

Phrenitis est res physica, quæ, in homine nata, facit, ut cum furore deliret; & quæ a vitio cerebri cum febris ardente producitur.

Intelligo causam phrenitidis, si intelligam, quid in vasis sanguiferis, & seriferis, lymphaticis, inflammatio sit; si simul intelligam, quid sit cortex cerebri; si intelligam præterea, quæ sint leges humanitatis, secundum quas, ad singulas cerebri conditiones physicas definitæ species cogitationum in mentē oriantur. Ex his nempe bene intellectis, quid phrenitis sit, cognosco: febris scilicet continua, acuta, cum cere-

bri inflammatione, atque inde orta cerebri perturbatione, & idearum consensione.

Si jam me rogetis, quænam sit hujus phrenitidis, ita expositæ, causa; ego vero respondeam, inflammationem meningum cerebri, functiones mentis turbantem; jure utique Vestro regeretis mihi: num eadem ergo res & morbus est, & morbi causa?

Sane non potest in cerebro esse inflammatio, & febris, quin simul ipsum cerebrum turbetur: neque potest cerebrum turbari, in phrenitide, quin ejusmodi causa adsit. Ergo totus effectus idem est cum tota sua causa. Clare concipimus alterum absque altero esse non posse. Nonne ergo s' GRAVESANDE causam bene definivit? Legite etiam, quæ *Inl. L. B. VAN SWIETEN* circa hoc negotium commentatus fuit ad §. II. *Aphorismorum BOERHAAVII*. Videmus, ex adlato ibi exemplo, qui statum vasorum in pleuritide peccantium cogitat & sanguinis, eum totam quoque cogitare pleuritidem; & qui pleuritidem cogitat, eum hunc vasorum intercostalium &c. statum cogitare.

Inbecillitate ac limitatione ingenii nostri, nos, qui & successive, & pauca simul, cogitamus, & qui, ut ita dicam, successive existimus; rem existentem hoc momento minus perfecte, quam alio momento, concipimus; & ob hanc solam causam rem primo conceptam vocamus causam; effectum autem rem illam, quam postremo concipimus. Ast propterea non vera adest in causa & effectu diversitas; sed & causa effectus est, & effectus causa: unum quippe sine altero non potest adesse: & id, quo differunt, tantum est a duratione, respectu nostri.

Semper fere res physica jam præsens est, id est, causa hæc fere semper realis est, sive res vere existens. Morbus quippe est verum ens physicum, & causa morbi est idem ens, cum morbo ipso: ergo & causa morbi

ibi ens est reale, sive vere existens. Est modo veluti quædam reciprocatio; ita, ut effectus non sit, nisi causa adsit; nec sit causa, nisi adsit effectus.

Aut revera producit — — — ad exercitium functionis; i. e. postremum hoc, etiamsi sit ablatio entis alicujus ad sanitatem requisiti, non eo minus est reale. Sanguinem oportet ut homo habeat, si vivere pergat: infligatur autem ipsi vulnus in magna, haud comprimenda, arteria. Hic illa sanguinis absentia morbus est, & lethalis quidem; quem sane non dicatis meram esse privationem: nam est cordis talis collapsus, & articularum talis contractio, ut sanguis, qui adhuc adest, versus cerebrum continuo filo ultra non fluat, indeque fiat syncope: si vero arteriæ & cor contrahere se adhuc possent, vita etiam adhuc continuaretur.

Adeoque morbus, ut ita dicam, privativus, æque ens physicum est, quam ens physicum est morbus, qui impedimentum est functionis.

Hinc videtis, inanes esse, quas Medici Philosophi inter sese foveant lites; quæ non oriantur, nisi præjudicata ex opinione crederent causam morbi aliquid esse ab ipso morbo diversum; quum manifesto unum sint idemque.

Exemplum iterum sumamus ex morbo. Apoplexia est subita actionum animalium omnium destructio, sive quies; superstita sensimque auctiori vitali actione. Fons actionum animalium physicus læsus est; medulla scilicet cerebri. Videmus igitur, quod, ubi quædam causa sensorium commune privavit facultate exercendi functiones animales, tunc adsit apoplexia.

Quæ porro hujus apoplexiæ causa? Ponamus ex centenis unam. Homini sanissimi caput malice ita percutitur, ut aliquot sanguinis unciae intra cranii cavitatem effusæ hæreant. Hoc sanguine cerebrum comprimente, apoplexia adest. Nam hæc cerebri com-

pressio efficit, ut ejus medulla actiones animales nequeat perficere. Has paucas sanguinis effusi uncias si ex cranio sustuleritis, morbum sanastis, sustulistis apoplexiam. Ergo compressio cerebri talis, ut pars sentiens, percipiens, intelligens, movens inde compri-matur, est morbi hujus causa proxima; sed quæ illud idem est cum eo, quod in tota historia jam narravi-mus. — Compressio cerebri inflammatoria talis, ut pars intelligens, movens, sentiens inde turbetur, una cum acuta febris, est phrenitidis causa, effectus, de-finitio.

(Adtulit *Cel. de* HÆEN amplum adhuc exem-plum læsi vulnere nervi: quum vero fuisse satis ha-ctenus adlata eo unice confirmentur; hinc, ne in infinitum excurrat oratio, illud omisi.)

§. 738. *Si illa causa — — — interna vocatur.* Si in sano humano corpore nil mutetur, sanum manet; verum si oriatur quædam mutatio, in ipso illo corpo-re, unde morbus fit; dicitur ille morbus oriri a *cau-sa interna*: & vice versa, si a causa extrinsecus ad-veniente, non intrinsece in corpore nata, oriatur; dicitur morbus deberi *causæ externæ*.

Homo v. c. epilepsiam habet a causa nervum ad-ficiente cruralem; quæ, ubi plethora crescit, vel ubi lunæ phasēs mutantur, vel animi passionēs corpus mu-tant, vel aër ipse qualitate mutatur; epilepsiam pro-ducit: est hic *causa interna*.

Habet autem homo alius eundem morbum, dum vulnere accepto acria, vel digitus, vel instrumentum Chirurghi nervum tangit: est *causa externa*; licet hoc contingeret eodem nervi loco, in quo, in priori ho-mine, ab adfectione nervi oriretur epilepsia.

Sed quid, si causa interna talis sit, ut per se non producat morbum, nisi per causam externam fue-rit exsuscitata? Tunc ad morbos tamen a causa inter-

na ortos solet referri: exemplum præbet plethora in-
sons, quam accedens ira rarefaciens peccantem reddit.

§. 739. *I terna lædunt — — — & humores
deinde.* Pleuritis v. c., internus morbus, ut nascatur,
sanguis phlogistice mutatus esse debet; ex quo
mutato sanguine cum arteriarum intercostalium strictura,
& cum aucto ejusdem sanguinis per febrim motu,
pleuritis fit. Vulnura vero, contusiones, usiones,
fracturæ, prius solidas partes adficiunt, deinde cor-
rumpunt humores. Pleuritis potest quidem aliquando
ad causas externas referri: corpus v. c. sanum, calens
est: potus frigidus vasa subito stringit, aërve gelidus.
Humores a motu vel calore rarefacti stagnant, fit mox
obstructio, & vitæ vi urgente inflammatio. Sed, an
tunc non est potius rarefactio causa proëgumena, &
frigus procatactica?

*Venenatos paucos, & contagiosos, morbos forte ex-
ceperis.* EX SANCTORIANIS demonstratis novimus, quam
vere sapienterque dixerit HIPPOCRATES ὅλον τὸ σῶ-
μα ἀνδρωπίνον διάπνευσον ἐστὶ εἰς τὰ ἔξοθεν, εἰσοθεν.
Ubi ergo per venas bibulas corpus quoddam externe
adveniens corpus humanum subiit, seseque prius intra
humores insinuavit; oritur plane nova, eaque tertia;
classis morborum; in qua causæ externæ mutationem
suam prius fluidis, quam solidis, inferunt.

Externa causa est saliva rabidi canis: externa cau-
sa est materia putrida dysenterica; contagium variolo-
sum; illa luis venereæ species, Antiquis descripta,
quæ sine ulla externa parte adfecta hominem in putre-
dinem vertebat. Hæc omnia forte prius adficiunt flui-
de, quam solida; dico forte; nam nescimus, quam
deleteriam vim saliva v.g. canis rabidi inprimat, quos
tangit, nervis. Methodus felix curandi Anglorum
format hanc suspicionem. Opio, moscho, camphora,
cinnabari, spiritu vini, ad enormem copiam datis,

curant hydrophobiam. Atqui hæc potius in ipsos agere nervos videntur: sed sit ita, ut prius hæc recensitæ causæ agant in humores: exceptis his, thesæos nostræ veritas manebit inconcussa. Causa externa, aër v. c., est, qui primo austro flante, calidus humidusque corpora laxat, infirmat, dissolvit: mox autem aquilone acri perflante mutatus idem aër in siccum frigidumque, laxata corpora iterum contrahit, stringit. Catarrhorum hæc origo frequentissima morborumque pulmonum & faucium. Catarrhus hic, pulmonicique morbi hi orti non fuissent, nisi aër in solida agens, quæ laxa olim humoribus plena erant, contrahendo solida, simul liquida in iisdem copiosa mutasset.

§. 40. *Causa proxima morbi* &c. Sit iterum, ut ante, pro exemplo apoplexia, nata ab effuso sanguine intra cranium, supra cerebrum. Quæ hujus morbi causa proxima? Est illa causa, quæ sentiens illud in homine movens, percipiens principium plus minus inpedit, suffocat. Quæ jam causa proxima hujus inpedientis & suffocantis hocce principium? Compressio cavitatum, canalium, medullæ cerebri, nervorumque. Hoc rite concepto, concipitur morbus. Quæ enim hujus apoplexiæ causa? Compressio cerebri. Quæ causa hujus compressionis? Sanguis arctans cavum cerebri, inpediensque omnem fluxum ac refluxum spirituum. Ablato, vel per trepanum, vel per revulsivam methodum illo sanguine; sublata est tota apoplexia; si partes non sint destructæ.

Ergo, si totum morbum definitum concipio, prius illas partes concipio, quæ prius faciunt hanc ipsam causam.

Alio exemplo utar. Quæ causa inflammationis primi generis? Est infarctus sanguinis rubri, cum febris accensa. Est ergo 1mo moles major; 2do vas angustius;

flus; 3tio vis vitæ major. Concipe hæc tria simul, tunc concipis inflammationem. Febrim tolle; non est amplius inflammatio, sed tantum obstructio; causa inflammationis prægumena. Ergo sufficiens causa proxima est eadem cum morbo ipso: morbus est tantum id ipsum, quod est causa proxima. — Concipiatur apoplexia nata ab inflammatione. Quum ad inflammationem requirantur tria illa mox dicta, simul præsentia, facientiaque causam proximam omnis inflammationis; si incipiat sanguis inpediri per vasa cerebri, fit vertigo; si ultra, ἀναισθησία; si ultra humor spissus per vasa angustiora vi febris adigatur, fit tandem inflammatio cerebri, aut ejus meningum; fit apoplexia; fiet inflammatio aut phrenitica, aut apoplectica. Nonne ergo causa completa est tantum res eadem cum suo effectu.

Causa remota est id, quod aliquid præternaturale in corpore facit, sed non morbum; ut vidistis ex toties jam recensitis exemplis. Quid ergo est morbus? Est sua causa proxima. Quæ causæ hujus causæ proximæ, sive morbi? Sunt causæ prædisponentes & excitantes.

§. 741. *Causa remota* — — — *causam proximam, sive ipsum morbum.* Toties hæc jam explicui. Sanguis densus & arteriæ arctiores intercostales non sufficiunt constituendæ pleuritidi: oritur tantum obstructio. Febris sola non facit pleuritidem, si vasa arcta non sunt; si humor non est spissus: sed junge tria hæc simul; habebis ipsam pleuritidem.

§. 742. *Causa remota* — — — *cacochymia.* Πεονυγμένη; est pars morbi, quæ prius existit, quam altera causa accesserit. Est v. c. diathesis spissioris sanguinis in homine, nondum pleuritico, nondum apoplectico. Ut enim in illo pleuritis nascatur, aut apoplexia, utique alia causa accedat oportet.

Hæc causa semper interna est; ut temperies, sive *ἰδίουγκρασία*; temperatio quædam, inclinatio vel repugnantia ad certos morbos, quæ Cuivis propria est; ut haud ita pridem in divisione classium morborum explicui. SYLVIVS DE LE BOE, & DIEMEREROEKIUS, & SYDENHAMUS suorum temporum pestem describentes, bene hanc *ἰδίουγκρασίαν* notant. Hydropici, Melancholici repugnantiam habebant adversus causam pestiferam, quum inde non adficerentur: flos vero Juventutis inclinationem in causam hanc habebant, quum tantopere inde adficerentur.

Quod vero maxime mirandum, causa pestifera tamen aliquid egit in corpora illa hydropica ac melancholica; quum vice medicamenti in illis fungeretur.

Nonne hinc certum, quodsi veram naturam nosceremus causæ pestilentialis; fore, ut simul nosceremus optimum remedium contra morbos lentos? --- An vero causa pestifera conciliat corporibus robustis, quibus applicatur, tam violentam circulationem, ut cito destruat fabricam subtilissimam nostræ machinæ; dum interea applicata in tardiori circulatione reddit tale robur vasis, quale ad sanitatem requiritur: ita, ut vi resuscitata vasorum, ea absorbeant effusa liquida, & ducant ad corporis emunctoria?

Præter temperiem etiam plethora & cachochymia: quæ ambæ toties jam explicatæ: ultra explicandæ, ubi de temperamentis agetur.

Sed illud tantum consideremus modo, quando plethora & cachochymia ita increverint, ut obpleant vasa pulmonum aut cerebri, utque infarciantur illæ partes; tunc plethora & cachochymia non amplius inter causas proëgumenas recensentur: nam, sine ulla causa excitante illas, sufficiunt sibi, ut causam completam proximam faciant apoplexiæ, vel peripneumonix.

§. 743. *Causæ quæ remota accidit. &c.* Omnes hæ voces, præcedente & præsentī Spho comprehensæ apud HIPPOCRATEM nondum distinctam & definitam significationem habent, sed promiscue sumuntur; quod monere debeo, ne legendo has voces in magni viri operibus deciperemini. Neque etiam exquisite hoc sensu intelliguntur apud GALENUM. Ipse CICERO, qui *lib. de finibus & de fato* circa has voces disputat, eas minime hac distincta significatione donavit. Quum vero subsequētia sæcula peculiarem illis distinctamque significationem tribuerint, atque illa rerum intellectum facili- tet adjuvetque memoriam; etiam easdem oportet usui adhibere & explicare.

Igitur his nominibus insigniverunt eas causas, quæ ad causas in corpore ante præexistantes, nec per sese morbo excitando aptas natas, accedentes, simul cum illis causam proximam, i. e. morbum, facerent. Latentem antea in corpore dixerunt προηγμένην, eamque, quæ ad hanc latentem accederet, cum eadem creatura morbum προκαταρκτικήν, sive προφασιν, seu præloquentem aut occasionalem; causam scilicet, quæ accessu suo ad προηγμένην, occasio esset, ut ex se, & ex προηγμένη, morbus nasceretur.

Homo sanus ita percutitur cranio, ut vas frangatur: nata illico causa completa est apoplexiæ, proëgu- mena & procatactica simul. Sed a causis internis ambo simul causæ solent concurrere, paucis exēntis.

Solis nocet Prædispositis, ut fiat talis morbus: ut patuit exemplo sæpius adlegato pestis. Nocuit Ju- venibus; pepercit, immo salutaris fuit, Hydropicis & Cachecticis.

Sed præterea faciat in variis obpositis tempera- mentis morbos; necdum erunt morbi illi iidem: va- riat enim hoc pro varietate causæ prædisponentis. Sint bini homines, plethoricus unus, alter atrabiliaris:

ambo cogantur ad velociorem atque protractiorem cursum: ergo eadem est causa procatarctica; sed diversæ sunt proëgumenæ. Atrabiliario mota materies atrabiliaria vasa disrumpet, & vel effundetur in corpus, vel alvo vomituve ejecta varia symptomata dabit: Plethorico mota materies morbos efficiet inflammatorios, vel in parte, vel universales.

Aliquando est interna, quandoque externa. Plerumque quidem externa est, sive extrinsecus adveni-
niens, sed tamen quandoque est interna.

§. 744. *Hæ posteriores omnium commodissimæ &c.* Plerumque solent Auctores vocare has *res non naturales*, quia alienæ omnino sunt a nostra natura; nec, nisi prius a nobis subactæ sint, in nostram naturam trans-eant. Sunt entia physica, ἀδιάφορα, quæ ad sanum corpus adplicata, certo & legitimo usu partem faciunt nostri corporis; usu malo, morbum. Cibis ac potibus, (si quantitate & qualitate non peccent,) tales conservamur, quales fuimus, sani; his destituti, brevi ex sanis ægri evadimus. Eadem tamen homini ægrò data (adeo, ut vel copia excedant; vel qualitate sua, universim, aut relate ad illum, quo laborat, morbum, noxia evadant) morbum augent. Sunt utique res, quibus sani carere nequimus; nisi fidem adhibeamus deliramento hodierno in Galliis celebrato a Chirurgo, qui pulvisculo scribitur homines sanos, seque ipsum ita sanum servare nosse, ut nullo indigerent ultro alimento.

Solent vocare res illas non naturales, Veterum divisione; JONSTONUS autem videtur aptius easdem in 4 classes rede-
gisse; quem porro sequemur.

1) *Ingesta: aër, cibus, &c.* Aëra enim ad ingesta refero, quod cum cibis potibusque simul ingeratur. Omnia vegetabilia aëre scatent; animalium quoque partes, & potulenta, immo & ipsa aqua. Vi-
detur

detur volatile in aëre contagium nonnunquam, forte sæpe, licet non semper, ut in peste vidimus; intra os receptum cum saliva misceri, deglutirique: unde forte fit, quod in variolis v. g. prima infectionis indicia se ad os ventriculi superius manifestent.

Asiatico populo consuetudini fuit, ad rem abominandam mox in terram, immo in ipsum quandoque abominandum objectum spuendi, quæ consuetudo parum decora nobis videtur. Juvabit tamen, ubi aër variolosus, dysentericus, luosus a nobis hauritur, sæpe salivam, in qua delitescit, exspuere; quo susceptum miasma minus deglutiatur.

Sed, quæso, admiremini mecum, quanta, quamque exactissima cura magnus Præceptor hic doceat, qua multiplici ratione hæc quinque res, sive ingesta, corpus humanum adficere queant. Erat quippe tam distincte enuntiandum, ut Medici noscerent, a quot causis & per quasnam vias, morbi nascerentur. Oportet enim, adcuratissime hæc noscatis, & Vobiscum certo ordine recenseatis, in prima praxi; ne forte, quid prætervidentes, in ipso morbo determinando erretis, idque cum ingenti vitæ Ægrorum discrimine, tum etiam aliquando propriæ famæ dispendio; dum forte alius advocatus simul Medicus, rerum callidior, turpes Vestros relevet errores. — Sistamus hinc parumper gradum, ut discamus, quas hic exponimus regulas, ad praxin adplicare.

Primum igitur ad Ægrum adpellatus Medicus morbi penitus ignarus est. Cognoscenda autem necessario ipsa causa proxima morbi, i. e. ipse morbus. Novit Medicus, illam componi ex causa προηγυμενη & προκαταρχτική. Ergo necesse est, ut harum binarum classes percurrat omnes, Ægrumque, vel Adstantes, secundum illas examinet.

Causas itaque προηγμενας primum secum recenseat, videatque, num illa petenda sit ex temperie, an ex plethora, an vero ex cachochymia.

Cur vero ita? Patiamini me circa hoc tantisper excurrere; velim enim, rem ut ipsis digitis palpetis. Incipiamus a temperie, sive ab idiosyncrasia.

Homo v. c. talis est idiosyncrasiae, ut viso sanguine mox cadat in animi deliquium. Medicus forte praesens & ignarus hujus dispositionis, mira quaeque somniat de hoc animi deliquio, mira praedicit, inepta praescribit medicamenta. Adstantes rident hoc, saltem mali nil ab hoc symptomate metuunt, quia homo id pro consuetudine habet. Nonne decorum magis fuisset Medico, verbulo rogare, num hoc semper eadem ratione accidere soleat; quam faciem ad seria compositam gerere, dum hominis lapsi pusillanimitatem alii jocantur.

Ab odore casei, a praesentia felis in animi deliquium cadentes homines novi, vidi, miratus sum. Quam ridicule, haec ignorantem, nec examinantem, illico quævis velle artis adhibere molimina; ut animi deliquium curetur? Unicum remedium foret, si homo ille posset tota vita a caseo remotus, a fele absens esse: quia vero sæpe impossibile; semper haec praecavere; redibunt & illa omnia animi deliquia.

Homo quodam morbo adfectus dat Tibi pulsum suum tangendum, exilem adeo, ut dubites, an adsit. Contagio pestilentiali vigente, pronuntias illum jam peste adfectum; ut famosiori Medico Amstelædamensi apud TULPIUM accidit, qui ex tali pulsu Viri amplissimi augurabatur, peste jam laboraturum illum, magno sane Viri famæ detrimento. Ut enim TULPIUS notat, arteria quæ in carpo solet tangi, Scabino illi erat multum a consueto loco remotior; ita, ut ramulus tantum exilis ejus loco consueto adesset. Mirus ille

naturæ lusus non adeo rarus est: unde ignotorum nobis hominum in prima visitatione oportet ambosprehendere carpos, antequam iudicium ex pulsu formetur.

Ægroti, cui adfueras nunquam, pulsum intermittentem deprehendis, horres; sinistra ominaris. Est forte ita, ut judicas: sed res forte est longe alia. Oportet enim alia adesse signa, quæ ratiocinium forment, quam quæ solo petantur ex pulsu. Toties id Vos in nosocomio monui, ut ex uno signo nunquam, sed ex pluribus collectis auguraremini. Forsitan enim homo habet perpetuo talem pulsum intermittentem, quales aliquot novi. Immo talem Ægrum habui, qui, quum me videret solito diutius sibi reconvalescenti pulsum tangere; respondit se de vita dubitasse, quum pulsum suum æqualem in morbo deprehendisset: sæpius se ægotasse, & semper cum pulsu æquali maximum adfuisse periculum; illi autem semper eximi incepisse, consueta redeunte inæqualitate. Mira sane aliquando idiosyncrasia! Revera posset in Medici gloriam ex tali re, morbum periculosum denuntiante, eventus fortunatior multum cedere; at candido pectore Viri talem Agyrtis propriam gloriam adspernantur: & si forte vel Æger vel ejus Necessarii Te, acerba data prognosi, hujus consuetudinis commonefaciant; nonne probrosum est, revocare debere sententiam.

Vocaris ad hominem dormientem in febris acuta, vides album adparere oculorum inter commissuras palpebrarum. Territus tristia ominaris. Concludis ramulos primum & secundum quinti paris jam inertes fieri. Plures tamen Uxores id mihi de suis adfirmarunt Maritis, Mariti de Uxoribus, de Infantibus Parentes; quod solerent tempore sanitatis semper dormire conniventibus oculis. Idiosyncrasia iterum, jubens, nunquam ex uno solo signo formandum iudicium.

Adpellamini ad hominem, qui cum febris delirat: versari illum magno in discrimine pronuntiatis ob hanc causam. Forte vera dixistis. Sed forsitan est ex tali idiosyncrasia, ut nunquam febricitet citra delirium; ut novi homines, qui delirent, vel in sola ephemera, aut intermittenti. Plura iterum signa in opem vocanda sunt, ut prognosis fiat; & si cætera signa non mala adsint, ne ex hoc uno male vaticinemini.

Infinitæ tales instantiæ adterri possent, idem semper evincentes. — Videtis igitur, quanta cautela opus, ne, dum ad novos Ægros prima vice accedimus, decipiamur.

Ad idiosyncrasiam pertinent morbi hæreditarii & connati: quos bene cognitos esse debere Medico, jam antea monui.

Quodsi tamen in tota hac idiosyncrasiarum classe nil reperiatur, & causa proëgumena nulla hic pateat; oportet, ut ad alteram classem causarum proëgumenarum, scilicet ad plethoram, Vos convertatis; quam numeris, ni fallor, absolutis Vobis explicui in præcedenti capite de humorum morbis.

Hanc igitur plethoræ classem percurrentes, si inveniamus causam procatarcticam, hanc notamus: verum, si neque in hac classe, transimus ad tertiam, scilicet ad cocochymiam.

Homo podagricus, arthriticus, rheumaticus, scorbuticus, rachiticus, leukophlegmaticus Vobis cognoscendus est bene, ut causam procatarcticam bene in illo detegatis. Ad Pleuriticum v. c. laborantem acutissime vocati, mox summa artis molimina adhibenda esse censetis, quibus morbum debelletis. Verum sæpe incassum laborabitis, si neglexeritis examinare, numne ille Vester Æger podagra laborare consueverit? An nunc tempus, quo paroxysmus inflaret, haud adsit?

An

An forsitan ipsa podagra in ortu suo a quopiam commisso per Ægrum errore perturbata non fuerit, sicque pessimam hanc ad intercostalia depositionem non fecerit. Quæ si curatius examinassetis, profecto morbum pessimum confodere satagentes, simul non neglexissetis ad loca, in quæ podagrica materia desævire consueverat, adponere epispastica, vesicantia, cucurbitas, fomenta acria; quibus demum eo revocaretis materiem podagricam, ab intercostalibus abductam.

Aliud exemplum. — Puer jacet præ opthalmia fere cæcus, vel præ summo asthmate fere suffocatus & strangulatus; vel habet dysenteriam horrendam. Adhibetis summa evacuantia, quacunque via. Inania vero agitis, nisi prius indagaveritis, numne Infans olim fuerit cacochymicus, habueritque achores, tineam, favos; quas exulcerationes stulta quidem pulcritudinis cura sustulerit; ea tamen ratione, ut innoxia olim in facie materies nunc fere fiat lethalis, vel saltem perpetuus chronicorum morborum fomes. Si rem probe examinassetis, per folia betæ, brassicæ rubra, circumdata capiti & faciei, per fonticulos, per setacea, per vesicantia conati fuissetis, a partibus nobilibus in antiquam sedem convertere materiem.

Asthmate Æger laborat suffocativo. Ad illum vocati frustra tempus teretis quævis tentantes: sic vero obliti estis moniti magni *Caroli PRISONIS*, qui *tract. de colluvie serosa* pulcerrimo demonstravit, levem ad leukophlegmatiam aut hydropem dispositionem olim in eo corpore præsentem, posse demum bronchia petere, & dira producere asthmata. Causa hac detecta, remedium est lene hydragogum, quod in alia causa asthmatis vel non prodesset, vel noceret.

Centies peccant Medici etiam famosiores, dum vocantur ad homines, qui vomitu continuo laborant,

eme-

emeticis hos perpetuo exagitantēs: vomitus quippe causa forte hernia est; quæ vel nova, ignorata fere ab homine, aut Medico, saltem non adnuntiata; vel etiam inculpate gesta per annos & tandem accedente causa aliqua incarcerata.

Longus forem AA. omnes similes casus enarrando: pauci hi suffecerint, ut comprehendatis necessitatem summam & inevitabilem, recensendi has causas proëgumenas, ut cognita proëgumena causa demum sufficientem eamque veram totius morbi causam intelligatis. Quam infortunati & sibi, & Ægris, qui aliter agunt! quam titubant! quam vacillant, fluctuantque! Quam mutant sæpe methodum incerti, in perniciem Ægrorum! Quovis die alia cogitant, & si quandoque curent Ægros; id fit, quia non arte sua, sed bona fortuna inciderunt in bonam viam. Si jam plures tales sint, cogitate, qualia debeant esse consilia medica, quæ componuntur hisce Viris! An mirum, quod adeo discrepent? Miraculum foret illorum in sententia ferenda, concordia; nisi forte, ut Aliquem in illo consilio melius sapientem perdant, vel ut Juniori adulentur. — Arduus certe est in principio labor; verum adfuescimus illi, ac utilitate ejus capti cum delectamento eum exantlamus, vertimusque ita in consuetudinem, ut aliter agere nec velimus, nec possumus.

Facta hac necessaria digressionē redibo Vobiscum ad classes causarum procatarcticarum.

Ponite me jam invenisse v. c. in classe 2da de plethora, causam proëgumenam morbi mei Ægri; tunc incumbit mihi examen rationis, ob quam, & qua hæc plethora proëgumena, olim fere innocua, jam noxia reddita fuerit? Ex doctrina de plethora olim Vobis data nostis, qua ratione in hoc Vobis sit examine pergendum. An forte pergræcatio prægressa sit; unde humores rarefacti? An ingurgitatione nimia ventriculi,

triculi, aorta per aliquot horas compressa causa fuerit, ut jam partes supernae corporis tanto plus intra sese humorum locare debuerint? An comederit quid male sanum, unde in vomitum actus habeat jam caput, oculos, faciem plenam sanguine? Nostis enim prudentiam SYDENHAMI, semper mittentis sanguinem, antequam vomitorium exhiberet, si sanguinis copia adellet; ne plethora versus caput mota enkephalon infarciret.

Sed meus Æger nihil horum commisit, & tamen manet hoc firmum; quod causa proëgumena in plethora sita sit. In auxilium vocabo alias causas procatarticas; plethoram excitantes. An ergo motum exercuit majorem? Minime. An ira excanduit aliove adfectus fuit animi pathemate? Neque horum quid commissum. An huic Homini forte plethora noxia facta, eo quod hæmorrhoides molestas perperam sibi curari permiserit? Nostis enim HIPPOCRATES *Aph. 6—21.* insaniam curari docentem, si fluant largæ hæmorrhoides. An itaque huic forsan homini ab hac causa excitante plethora noxia facta cerebrum obruit? Verum neque hoc contigit. An igitur Ægro extrinsecus aliquid fuit adplicatum, quod vice causæ excitantis fungeretur? Solebat BOERHAAVIUS narrare, quod olim Infans feбри acuta & convulsione laborans nulla potuerit ratione levare; donec tandem juberet B., Infantem totum coram se denudari, quo omnia externa illius probe perlustraret; & ecce! acicula corpori Infantis infixā deprehenditur; procul dubio inter vestiendum, tractandumque Infantem a custode vel nutrice decidua, & lintheaminibus obvoluta. Si B. pro sua exactitudine non quæsiisset hac lege causam excitantem, nunquam curasset Infantem a feбри & convulsione.

Homo habet forsan ob ophthalmiam, otalgiam, odontalgiam, cephalalgiam &c. vesicans adplicatum ex cantharidibus. Sunt, qui vix illas ferant, quin sanguinem

guinem mingant. Idem esto iudicium, ubi *Æger* ischuria, aut stranguria laborat; nam forte ab eadem est causa.

Cernitis hinc facile, percurrendo omnes classes, inventuros denique Vos esse unam, quæ vere hic excitans dicatur.

Classes causerum procatarcticarum, olim in 6, nunc commodè in 4 divisarum methodo *Jonstoniana*, recensentur in hac §. 745. & seq.

§. 746. Inter procatarcticas causas *aër* primum sibi vindicat locum.

Animalia omnia, nos omnes, quotquot sumus, in illo *aëre* semper degimus, fruimur vescimurque illo assiduo. Vitæ ratio, & inevitabilis necessitas cogit nos, *aëra* ut inspiremus, expiremus.

Experimentis constat evidenter, vix esse ullum in rerum natura liquidum, vix ullum solidum, cui *aër* sese non inmiscet, & ex quo aliqua arte educi non possit. Prorsus ut vix detur operatio naturæ cognita, quæ sine *aëre*, aut penitus extra illum contingat.

Per experimenta etiam novimus, nulla ova animalium, matura, prægnantia, optima quantumvis fuerint, si absque *aëre* in vacuo, aut absque renovato in vasis hermetice clausis hæserint; fœcundante licet tepore secundum indolem suam fota, unquam embryones suos in ovò latentes producere; sed ex obposito prorsum manere inertia.

Ita pariter omnes plantulæ, vel musci minimi licet, aut aquatiles algæ, moriuntur statim in loco, ubi non est *aër*; vel ubi *aër* assiduo stagnans quiescit.

Quod idem quum de omni animali, ad minima usque insecta verum sit; clare cernitis, quam necessaria ejus nobis idea sit, cujus actio tam sit universalis, cujus late adeo pateat imperium. Ut porro rite co-

gno.

gnoscamus, qua ratione in corpora humana agat, ejus nobis sunt inquirendæ proprietates.

(Retinui hic ea solum, quæ in usum medicum utilia esse posse censui.)

Ima aëris proprietas est *fluiditas*, quæ tanta, ut nulla exempla sint, amissæ hujus fluiditatis aëris, ne quidem in summo gelu.

Huc primo facit aëris singularum partium *tenuitas*, quarum una microscopio nullo visibilis reddi potest. Non est autem aër fluidum omnium tenuissimum. Tenuitas particularum ejus minor est, quam tenuitas ignearum, quæ metalla, lapides, ligna penetrant; minor etiam tenuitas, quam plurimorum liquorum. Vidistis enim sæpe in corio, campanæ antliæ pneumaticæ subposito, non transire aëra, transire autem manifesto aquam, oleum, alkohol, muriam &c.

2) Huc facit partium *lubricitas*, qua minimæ aëris partes adeo facile a se mutuo separabiles sunt, ut, in quamcunque plagam hanc separationem tentaveris, aërem invenias æque obsequiosum. (Patet id inprimis, dum acicula e filo suspensa magnetis ope in diversa latera ducitur; evincitur & instantia phænomenorum soni, ac lucis.)

3) Obtinet quoque forsitan, secundum magnorum Philosophorum sententiam, *adtractio* quædam exigua, inter particulas aëreas; licet repulsum inter illas statuatur NEWTONUS; ut patet in liquidis, in quibus aër primo non adparet; sed ubi vel igne, vel ablata atmosphæra, aëreæ particulæ moventur; sociantur inter sese invicem, ac in bullulas exiguas, sensim majores adolescunt.

4) Oritur dein hinc ejus cum tot aliis rebus *miscibilitas*, ubi hæ particulæ a sese divisæ sunt: ita cum omnibus liquidis aëre vacuis miscentur, uti salia dissolvuntur in aqua.

5) Est notanda aëris ad sensus nostros *inperceptibilitas*; nunquam enim de aëre cogitaremus, nisi corpora ponderosa lata superficie per illum mota essent. Tum autem illico notabili represso motui resistens corporeum manifestat solidum. Ast, quum resistantiæ illæ, quæ veri modo repulsus sunt, valide increcant ab augmento velocitatum, quibus feruntur corpora, quam in duplicata ratione ponunt Mechanici; fieri potest, ut reddatur inperceptibilis aëris liquidi mollities fere saxi instar dura.

6) Consideranda est aëris *gravitas*, cujus respectu omnes simul partes, quæ adgregatæ illum aërem constituunt, ita vi gravitatis nituntur in centrum telluris, ut tamen fluidæ forment sphaeram circa terræ ambitum, quam *aëro-sphaeram* adpellare licet; quamque a vaporum copia exhalantium maxima in hanc ipsam, *atmosphæram* hactenus adpellant Philosophi. Exploratum fuit, quod summum visum athmosphærae pondus æquilibratum fuerit cum mercurio, in tubo Toricelliano usque ad poll. $30\frac{1}{2}$ adscendente. Minimum autem elevavit argentum vivum ad $27\frac{1}{2}$ poll.; ut differentia fere sit IONA pars ponderis maximi. Intra quod intervallum decurrit perpetuo & absolvitur tota illa atmosphæra, ponderis ratione, differentia.

Nicolaus CRUCQUIUS multam operam inpendit, ut exactiores mutationis quotidianæ tabulas conderet; detectumque fuit, quod aër communis circa tellurem nostram, tempore ponderis medii in atmosphæra simulque in calore totius anni medio, si comparetur cum aqua ratione ponderis, sit fere octingenties & quinquagesies levior aqua.

Erunt jam nobis considerandi generales hujus atmosphærae in corpora effectus.

1) Premit incumbens telluri nostræ ejus superficiem vi perpetua.

2) Pre-

2) Premit corpora in tellure posita eo magis, quo est telluris centro vicinior.

3) Premit corpora eo magis, quo est illo tempore gravior; minus premit, quo est pondere levior: ergo corpora omnia variam perpetuo sustinent aëris pressionem; ita tamen, ut nunquam pressionis differentia sit major una decima totius.

4) Premens corpora aër ab omnibus corporibus elasticis vicissim reprimitur.

5) Aër, ut fluidus & gravis, insinuat se inter omnium corporum intersitia inania, adeo capacia, ut aërem externum admittere possint.

6) Aër, gravis & fluidus, premit æqualiter omnia corporum latera, horizontalia, verticalia, superiora, inferiora, obliqua; idque æquali ubique pressione, nisi quod infima ejusdem aëris pars semper tanto fortius premat sursum, quanto inferius magis hæc fuerit posita.

7) Aër comprimit corpora undique, inplet eorundem cava, atque format super ea superficiem, valido nisu coërcentem.

8) Aër fluiditate sua semper mobilis & gravis, adterit, concutit, agit, semper & mire, superficies; variis modis permiscet ipsa fluida. Quod mobilis sit semper, docet lux in obscura camera per punctum irradians, & rapide moveri atomos exhibens. Motus hic est adtritrus eo major, quo vehementius vel ab igne, vel a procellis, agitata moles aërea fuerit.

9) Aër ille ægre particulas suas dividi permittit; sive hoc fiat ab aëre, quod vim se adsociandi possideat; sive a liquoribus aliis, quod vim aërem a sese repellendi habeant.

Sed sunt adhuc aliæ aëris proprietates privatae, ipsi propriae, quarum

1) est *elasticitas*, & quidem talis, ut similem cætera nobis cognita fluida non habeant. Elasticitas, qua in spatium decies sexies minus possit comprimi ab incumbente pondere, & mox pressu liber se resiliuat, & etiam in spatium trigesies & bis majus expandi queat; dum igne vel aliunde, rarefit. Quæ elasticitas indelebilis, licet infinitis experimentis aër fuerit lacesitus.

2) Peculiare hoc in aëre observandum, quod plura secum *conmixta* habeat, quæ observare necessarium, ut ideam ejus justam habeamus.

1) Namque ipsi admixtus est *ignis*: infinita experimenta physica docuerunt, ignem in *vacuo Boyleano*, *Toricelliano* in aëre, in omni corpore; copia & vi eundem.

2) *Aqua* ab aëre non separabilis. Sanctorianæ exhalationes ad libras 5 ex singulis hominibus adultis sanis, 24 horarum spatio in aëra evaporantur: quamvis pro variis & hominibus, & nationibus, & alimentis (& vitæ genere, & anni tempore, & ætate, & corporis fabrica, & sexu) hæc varient.

3) Egregius Hales in incomparabili libro suo de *Statica vegetabilium* experimentis quam plurimis, tam suis, quam aliorum magnorum Philosophorum, demonstrat, incredibilem fere copiam aquæ quotidie evaporare in aëra: tum etiam ex plantis materiem quasi perspirabilem in aëra evehi; quæ perspiratio plantarum ipsa hyeme integre non cessabat: si legatis infinita experimenta facta; videbitis exactissime ad pondus hæc deducta.

4) Ignis subterraneus, culinarius, domesticus, chemicus aquosorum vaporum vim incredibilem in auras vehunt.

5) Ventus & sol enormem etiam copiam elevant aquarum; ita, ut accuratissimus Cruceus, cujus

experimenta plura ex *Transactionibus Anglicanis* refert HALEs, observaverit, anni tempore unius circiter 30 pollices aquæ specie nebulæ, roris, pluvix, pruinx, grandinis, nivis, humoris nocturni, in terram cadere; & etiam ex universa telluris superficie ad 30 pollicum altitudinem exhalare. In *vacuo Boyleano* aqua aëris manifestatur, educto aëre multo. Aquam aëris docet sal tartari siccissimum, cujus unc. j. tres aquæ unc. adsumit ex aëre, dum in oleum sic dictum tartari per deliquium mutatur. Est certe aëris pars maxima aqua; quæ forte adeo ejus gravitatem facit, ut reliqua pars fere gravis non sit.

Ex hoc facto cum sale tartari experimento concludendum erit: vel aëra in loco clauso, quieto, subterraneo, ubi hoc experimentum fit, semper moveri, ut contentam in sese aquam successive sali adplicet; vel aquas per aëra motum dispersas certo quodam tempore per illam aëris molem ita moveri, ut jam in hac, jam alia parte spatii aërei sint, atque ita tandem concurrere omnes cum illo sale, quod intra hunc aërem positum est: vel tertio esse inter alkali fixum igneum, & aquam talem vim adtractricem, ut magneticæ quasi trahantur ab invicem; forte omnes illæ tres causæ concurrunt. Illud interim mirum, sal illud alkalinum nihil de aëris elasticitate in se traxisse videri, sed ineram aëris aquam. Unde patet, nunquam magis elasticum aërem esse, quam ubi aquæ minimam, nunquam minus elasticum, quam ubi maximam aquæ gerit portionem. (Adtractionis aërei laticis plurimæ aliæ subpetunt instantiæ; v. c. calcis vivæ spontanea in aëre libero facta extinctio; efflorescentiæ pyriticosæ; olei vitrioli auctum pondus; salis communis humescentia e. s. p.)

(Sequuntur nunc in Codice *Haeniano* multa circa genesin & indolem roris, pluvix, fluviorum &c. Subpressi ea, quum hic locus non sit, tra-

dendi carptim talia exempla, in Physica dudum Medicinæ Tironibus exposita.)

Consideremus jam hunc aërem fluidum, gravem, elasticum, saturum aqua, saturum exhalationibus vegetantium, eorumque seminum, saturum exhalationibus perspirantium animalium, eorumque fœcundatorum ovulorum, saturum etiam exhalationibus fossilium; (innumerarum etiam spurcitierum, fimetorum, sepulcrorum, paludum, corporum putrefactorum; tum diversarum officinarum, refertarum vaporibus magis minusve noxiis e. f. p); consideremus, inquam, tale fluidum agens in omnia corpora vegetantia, fossilia, animalia: mox intelligemus plurium phænomenorum rationem. Verum, quum de aëre non agimus, nisi respectu animalium; ejus modo effecta in corpora animalium examinabimus.

(Subprimendum denuo hic duxi, Lectorum commodo, amplam digressionem Auctoris, unice exponentem, quid de aëre HIPPOCRATES aut cognoverit aut scripserit.)

Aër nimis æstuans &c. Demonstratum enim jam antea fuit, aëra siticulosum esse & ab omnibus corporibus partes tenues, aquosas inbibere, adtrahere. *Vascula ibi exsiccat*, per gradus magis magisque humida auferens. Aër talis exsiccat vasa exhalantia; verum simul impedit, quo minus venæ inhalantes inbibant quid. Id toties observatur in oculis: tum, Qui per totam diem itinerati sunt per sabuleta æstuantia, vesperi sentiunt membranam Schneiderianam sibi exsiccatam esse, periisseque fere olfactum.

(Hac ex ratione, & ob album colorem soli, radios solares eo vividius refringentem, Melitæ ophthalmiæ, & oculorum lippitudines frequentissimæ: quæ symptomata & Káhiræ ob ingentem æstum observantur. Aleppenses adficiuntur, referente

Rus-

RUSSEL, ophthalmiis endemicis, inprimis Augusto & Septembri mense; ubi summus calor.)

Pulmonis sanguinem magis cogit; utraque causa pulmonis actiones impedit. Pulmo reddit aërem continuo humidum, ut videtis hyeme, dum vapor, ore Vesiro exiens, a frigido aëre condensatur. In summis æstatis ardoribus si e cella glaciale speculum, vel aliud politum corpus, educatur, halitumque in illum adigamus, miramur, halitum ibidem fere in glaciem verti. Ergo pulmo tantum humidum aëri dedit, qui aër mox siccissimus erat: ex halitu enim a frigore condensato potestis judicare, quantum invisibiliter diffletur. Pulmo enim totus est humidus in cavitate aërea sua; exhalat continuo, docente *Ruyschiana* injectione, in vesiculas ejus continuus humor.

Si ergo aër æstuans ficcus primo hanc pulmonum humiditatem inibit, redditque superficiem eorum aëream penitus siccam, inflexilem: deinde, si idem æstuans ficcus aër, qui omnium est ponderosissimus, barometro id testante, sicciosorem hunc pulmonem pondere majore premat; si denique cogitemus, vasa humida laxa esse, siccata vero contrahi; quam mirifice non debet sanguinem, ibi nudum fere hærentem, premere, comprimere, cogere?

Hinc bene textus: *utraque causa pulmonis &c.* sed addit: *multos morbos inde oriundos excitat.* Et quidni? Nam talis aër, aucto pondere, agit in exsiccatum, tandemque inmeabilem sanguinem. Hinc tunc peripneumonix, pleuritides, & similes morbi grassantur: toties id advertente & monente HIPPOCRATE.

(Bene monuit egregius *Lionel CHALMERS*, tetanum, & opisthotonum in regionibus sub australi magis latitudine sitis, endemium esse: multo autem magis noxia est aëris æstantis qualitas, dum subito intercedunt

frigoris & humiditatis vicissitudines: quibus causis inprimis debetur species paralyseos Indiæ orientali peculiaris, *beriberi* dictus; v. *Cel. LIND, an Essay on diseases incidental to Europeans in hot climates &c.*)

Humores externos semper tenuiores — — — exsiccant. Sani degentes habemus semper ad distantiam aliquot digitorum ab ambitu corporis, atmosphæram humidam, toti circumfusam corpori. Æstivo tempore admove manu Vestræ frustum glaciæ; videbitis crassum fumum (vāporem) a condensata perspirabili materie præ frigore. Equus tota die currens in hyeme, dum in stabulo reponitur, præ denso fumo vix oculis perspicitur.

Cogitabitis forte & a nobis, vehementer motis, sudantibus, tantum talem fumum nasci posse; nobis quiescentibus minime. Erratis; perpetuo talis a nobis vapor emanat, sed calido aëre dissipatur inconspicuus; aëre autem frigido illum condensante fit manifestus. Exemplo sit halitus noster; qui, ut supra memini, æstate invisibilis, hyeme adeo fit conspicuus. — Dicitis, si ille aër ita humida nostra inbibit; ergo humidus fit: ergo adplicatus corpori non ultra exsiccant; sed humidus nos facit: ergo reparat, quod nocuerat. Respondeo: moles aërea magna inde vix humescit, deinde movetur & renovatur perpetuo: ergo novus continuo adplicatus vix humescit.

Veteres, ut HIPPOCRATES, vocabant hominis humores exassatos, ita, ut tandem eorum periret meatibilitas.

Ut hoc bene intelligatis, considerate, quæso, solida nostra calore & longiora fieri, & latiora; fluida vero rariora. Quæ enim vestes corporibus Vestrīs hyeme exacte quadrabant, ex Vobis erunt æstate arctiores:

res: vasa enim omnia laxiora & pleniora: tota igitur area sanguinis est major.

Hac rerum conditione, si diu agit aër calidus siccus in talia vasa talesque humores; dissipat liquida, adeoque minuit copiam vasa extendentem: verum quid non damni hinc in crasi humorum? Explicantem audiamus BOERHAAVIUM.

Ergo partes aquosas — — — diminuit; illas scilicet partes, quas hic vocat, quasque ex omnibus corporibus maxime volatiles in auras abire animadvertimus.

Contra vero salina — — — in massas inresolubiles adunat. Paullo ante intuebamur hominem, ut in omnibus suis vasis ampliorem, quando aër fit calidus & siccus, sanguinemque in his iisdem vasis rariorem. Ubi autem illa aëris conditio perennat, pars humorum tenuior & volatilior, continua aëris actione aufertur: hinc rariores olim humores subtilioribus ablati, compinguntur, crassescunt; fiunt demum impermeabiles canaliculi; ut homo jam sit alius omnino ab illo, qui incipiente æstate fuerat.

Hinc causam capinus, cur Illos, qui vel prope lineam æquinoctialem, vel intra binos tropicos habitant, vel saltem ibidem per aliquot annos deguerunt, adeo exsuccos, adeo ex incrassatis humoribus melancholicos & atrabiliarios passim cernamus: ut toties Batavi observant in suæ nationis hominibus, quos India orientalis, occidentalisve, aliquot detinuit annis.

Hinc itaque *inmeabilitas humorum*, ut mox exposui, *simul elongatio & debilitatio solidorum, & quæ inde sequuntur, obstructio, exsiccatio, inflammatio.* Elongatio quidem & debilitatio solidorum eo, quod sanguis exassatus nunc vasorum fines dilatare, extendere, labefactare debeat, ut possit in venas transire.

Hinc

Hinc vasa elongantur debilitanturque: sed quia sæpe penetrare per angustias nequit, ideo vasa illa eo magis extendit. Si tunc viribus cordis crassa materies adhuc vi in venas prematur; iterata sæpe tali actione vasa elongantur, debilitantur, ampliantur, ut elasticitatem seu vim contractilem sensim amittant. Si vero debilitate vasis crassus humor demum prorsus stagnet; fit obstructio lenta. Si demum vasa ab humore crasso non elongantur; obstructiones citius fiunt, & brevi inflammationes.

Peropportune hic adscribam locum HIPPOCR. *ex libro de aëre, aqua & locis*; quo, ut summus Philosophus, ea quæ antea physice de aëre dicta sunt, adplicat morbis.

„ Si æstas, inquit, sicca & aquilonia fuerit — — præterea si aquilonius & ficcus fuerit autumnus, ac neque sub canem, neque sub arcturum pluviosus; Pituitosis quidem, præcipueque natura Humidis & Mulieribus, confert; Biliosis vero hoc est maxime adversum. Admodum enim resiccantur, iisque lipitudines aridæ contingunt, & febres acutæ & diuturnæ, quibusdam etiam melancholiæ. In bile namque quidquid est humidissimum & aquosissimum, consumitur; quod vero & crassissimum est, & acerrimum, hoc remanet; quod in sanguine eadem quoque ratione accidit; unde ii morbi illis contingunt. Pituitosis vero hæc omnia auxilio sunt: resiccantur enim, & ad hyemem perveniunt, ab aliis temporibus, invicem succedentibus, resiccati.“ Conferte, quæso, hæc magni Viri verba cum illis, quæ ex Physicis & ex BOERHAAVIO exposui; nonne sapientissimum Philosophum fuisse HIPPOCRATEM pronuntiabitis?

Coctio impedita. In criticis toties jam vidimus, quid nomine intelligatur coctionis. Scilicet morbosorum humorum mutatio talis, ut e morbofis accedant ad
sta-

statum, qui a salubri minus recedat, adeoque minus corpori noceat, & morbi inpetum minuat. Facile hinc capitis, quantopere talis aër calidus noceat his hominibus, quorum una salus in humorum dilutione, adtenuatione, in restituta illis, quam amiserant, meabilitate; dum interea vitio aëris corpus magis magisque exsiccat, densanturque humores: cogitent hæc, qui calidum aërem Ægris suis adsiduo conciliant. (Quo quidem facto millia Ægrorum olim rapta fuerunt; optimæ indolis variolæ redditæ pessimæ, prolecta exanthemata, generati morbi putridi, qui nunquam fors Miseros illos corripuissent, e. s. p.)

Putrefactio: aqua & tenuiores partes sanguinis continuo avolant de corpore nostro in aërem siccum calidum, aquæ bibulum; quo fit, ut remaneant partes salinæ fixiores, oleosa, crassa & tenacia, acria, exusta, & iis involuta, tum terrestria fixa: quæ omnia a tali acri adcumulantur, magis magisque uniuntur, & in massas adunantur inresolubiles. Atqui status hic est ad corruptionem proximus; hæc enim dissolvuntur demum mora & tepore: si esset nunc blanda materies, posset specie evacuationis criticæ eliminari, ut in morbi pepasmo sit; at vero hic est omni ratione materies acris, salina, oleosa: hæc adtenuantur, & sic ad putredinem disponuntur; ut in quadam scorbuti specie & in atra bile toties Practici observant. Qua etiam putrefactione misere pereunt, qui siti, tormento maximo, exstinguuntur. In acutis morbis nunquam humorum in putrefactionem dispositio magis metuitur, quam ubi Ægri vel non bibunt, vel symptomatico sudore diffluunt.

Alvus adstricta, quum continuis sudoribus, & perspiratione etiam intestina exsiccentur.

Sitis,

Sitis, quia ob eandem causam internæ partes omnes arescunt; aquosis deficientibus sitis quoque ab acredine & inmeabilitate.

Stranguria, urina rubra. Generalis regula est, eo minores fieri secretiones quasdam, quo aliæ fiant abundantiores. Igitur per cutim aucta indies excretionem tenuiorum partium, excretio per alvum necessario siccior fit, ut vidimus; si siccior, etiam difficilior; idem proinde de urina verum. Si quis multum bibat tenuioris aquosi humoris; reddit urinam limpida, copiosam, vix coloratam, facilemque. Si tale liquidum jam non copiose, sed mediocriter bibat; etiam mingit facile, reddit autem urinam colore naturalem: sin vero parum aquosi biberit; tunc urina minus diluta prodit, saturatior partibus humorum salinis, oleosis, terrestribus, adeoque magis accedens ad rufum, immo rubrum colorem: ab acredine tunc, mucis vesicæ & urethræ abrasio, dolor, stranguria. Unde in praxi toties observamus urinam nimiam ac debilitantem, diarrhæas multas pertinaces, aquosas, non curari, nisi auctis evacuationibus aliis, maxime sudoribus, aut perspiratione.

Humoris flavi; ex HIPPOCRATE vidimus, ablatis continuo aquosis, bilem fieri acriorem, spissiore, colore flavo intensiorem; unde & hac ratione, citra icterum, cum alimentis mista, & lacteas venas ingressa flavedinem humoribus facit.

Morbi acuti, calidi, sicci, quam maxime generari solent; ut ipsis his verbis HIPPOCRATES laudato mox loco dixit. Quippe hi morbi habent pro causa spissitudinem humorum, quam aquosa, acida, saponacea unice solvere queant: si nunc aër in humoribus olim sanis hanc creat spissitudinem; causa proëgumena nata est, ad quam si causa procatarctica accedente febris oriatur, natus erit acutus inflammatorius morbus.

In-

Inprimis autem genus nervosum, — — — inde summo opere læduntur. Quid frequentius, quam siccescente parte, ejus nervorum actiones debilitari, perire? Nervorum motorum actiones sustinentur, continuanturque, si nervi conservent debitam flexilitatem in fabrica sua, si etiam in partibus, quas percurrunt, quasve movent, simul inveniant debitam mollietatem & flexilitatem. Si nunc jugiter illæ tenuiores partes aliorum defluant, totumque exsiccetur corpus; intelligimus quoque & nervos siccare, & partes, ad quas & per quas decurrunt: ergo perturbantur hinc nervorum actiones. Addatur his causis parcior forte spirituum secretio, ob humorum tenacitatem & acrimoniam. Quid si nervorum humor tenuissimus quoque avolet quam facillime, ocysime? Causas certe plures combinatas habetis læsæ actionis nervorum.

Læditur, ait textus, & *genus lymphaticum*; lymphæ est tenuior sanguine rubro, tenuior sero; adeoque avolat magis. Lymphatica autem vasa partibus tenuioribus subtilioribus nutrimentum & mobilitatem mollietatemque servant. Si ergo hæc vasa plus evacuentur, minusque excipiant, partes tenuiores corporis marcescunt, atque ut nervorum motibus obsequantur, ineptæ fiunt: unde & novam eamque secundariam, habemus causam impeditarum nervosarum actionum. Atque hæc de effectibus calidi sicci aëris: videamus, quid idem aër siccus, sed jam gelidus efficiat.

(Antequam vero aëris sicci & gelidi effectus in sanitatem contemplemur, inferendum hic ratus fui, quum *Cel. de HAËN* de hac re, maximi licet momenti, non egerit, examen virium aëris cubiculorum nimium calefactorum in corpus humanum. Utar hunc in finem dissertatiuncula propria, quam ante paucos annos inserui *Bibliothecæ meæ physico-medicæ Vol.*

I. p. 90. &c. — Observatum fuit, aërem talem similia haud raro produxisse symptomata, qualia a vapore carbonum solent proficisci; etsi cætera indoles hujus satis ab illo differat. Conqueri potissimum solent homines, qui cubiculo nimium calefacto inclusi hæserant, vertigine sese laborare, aurium tinnitu, nausea, vomituratione, insultibus leipothymicis, cephalalgia, impedito respirio, angustiis circa præcordia, palpitatione cordis e. s. p.

Aër calidus & siccus motum sanguinis reliquorumque humorum multo celeriores reddit; quo major particularum ignearum per atmosphæram dispersa est copia; aut, quod eodem redit, quo calidior est aër atmosphæricus, eo magis intenditur inpetus humorum per vasa raptorum; adteruntur sanguinis molculæ ad vasorum latera majori vi; adteruntur & eo magis inter sese: quæ omnia minori gradu fiunt, dum aër minus calidus est; siquidem omnium reliquorum par sit ratio; nec accedat, aëre remissius quidem calente, motus corporis auctus, potus spirituosus, cibi aromate multo conditi usus, animi pathematum actio, &c. Agitur vero eo inpetu sanguis versus partes minus resistentes, vi inpellenti facilius cedentes; agitur in mollissimam enkephali pulpam, in delicatum pulmonum viscus: vasa intra idem datum tempus magis semper magisque replentur, exoritur intensio, irritatio universalis; inde universalis demum inflammatio, ex hac nota pessima mala. Videtur jam origo vertiginis, cephalalgiae, syncopes, palpitationis cordis, impediti respirii, subitanæ haud raro apoplecticæ mortis.

Oriuntur etiam ex iisdem causis contractiones fibrillarum minimarum, tum nervosarum, tum aliarum quarumcunque; excitantur inde spasmi, convulsiones: hemiplegia & apoplexia, ex inruente in

tenerrimum encephalon maxima sanguinis mole, compressa hinc nervorum origine, distensis ruptisque demum vasculis facile exponuntur. Motu etiam validiori & velociori humorum major fit secretio; sanguinis liquidissima pars difflatur; reliqua, una cum vasculis, exsiccatur. Secretionem auctam sudores sequuntur ingentes, una cum cæteris notioribus symptomatibus; fugata per diapnoën & sudores ipsos effusos liquidiori parte sanguinis, morbi nascuntur inflammatorii pessimi, cito lethales. Dum autem sudore undique perfusi ex æstuanti tali cubiculo in frigidiorē aërem subito excurrunt, profunde anhelantes, corpus denudant, gelidam ingurgitant; nova inde malorum cohors. Kephalgiaë enormes, otalgiaë, fodientes oculorum ac dentium dolores, catarrhi, anginaë, morbi rheumatici universales aut topici; pulmonum inflammationes, tubercula, subpurationes, &c.

Ab aëre autem nimium calente intra breve tempus rapi posse robustissimos licet homines, certissimum sane est; idque experimentis constitit tam consulto institutis, quam & infelicibus hac ratione eventorum casibus. Vidit egregius ARBUTHNOT, malignam febrim a calore fornacis nimio in binis hominibus enatam. — Refert *Cl. HANOW*, Studiosum Dantisci litteris operam dantem cubiculum inmoderate calefieri curasse, occlusis insuper ope pastæ farinaceæ, chartæ segmentis inductæ, omnibus fenestrarum januæque rimis: petiisse illum tandem lectum; sequenti vero die inventum in eodem fuisse mortuum, multa spuma os obsidente, auxilio omni incassum adhibito. Consodalis ejus media nocte vomere debuit, causam plane ignorans; atque is mortis faucibus ereptus narravit, correptum sese fuisse vertigine, tum vero ægerrime invenire potuisse lectum,

ctum, quum sibi plane non foret conscius. — Aliam insuper funestam talem historiam refert HANOW de tribus Judæis, qui eandem ob rationem, 'accedente insuper singulari vaporis genere, occubuerunt. Corium rufficum, quod venale Dantiscum adtulerant, quum humidum foret factum, denuo siccaturi, in cubiculo diversorii largum instruxerunt focum: lecto tum sese una committunt: caloris tamen excessu, corique simul vaporibus omnes tres sequenti die inventi fuerunt mortui; servus, quem secum adduxerant, languida quidem vitæ adhuc dedit indicia; mox tamen, incassum adhibito omni auxiliorum genere, heros suos insequutus est. — Ipsemet vidi *Cl. BRAMBILLA* duodecim viros in cubiculo nimium calente huic eidem lethi periculo expositos. Octobri anni 1759 milites nonnulli legionis Lascianæ excubias agebant in loco Praga Bohemorum non multum distante. Die quodam tempore matutino tantus in cubiculo calor erat, ut omnes in eo degentes humi strati inventi fuerint; alii ex illis vix vitæ edebant jam indicium; alii, ob summe inpeditum respirium, suffocationi videbantur proximi. Maxima eorum salute advenit contra vim frigoris sese muniturus quidam ex inferioris ordinis ducibus. Vix aperta adhuc janua tanto jam feriebatur vapore, tamque calente, ut egredi omnino debuerit. Visis obiter quibusdam horum infelicium humi prostratis, celerrime ad me venit, quum habitatio mea non procul distaret, infaustum indicaturus casum, meque, ut illis succurrerem, rogaturus. Advolaui illico; ægre tamen, etsi aperta jam esset janua, in cubiculo manere potui. Facies militum rubro & ex cæruleo nigricante, fune Peremtorum adinstar, colore erant fœdæ: pulsus in quibusdam ex integro erat subpressus, intermittens in aliis. Septem ex illis

illis intra paucas horas restituti fuerunt solo aëris liberi usu, reliquis vero quinque, fortioribus, magisque plethoricis non eadem obtigit fortuna. Venam hîsce ego, & Chirurgus mihi subjectus ocyssime secavimus, quum abs ullo vitæ jacerent signo. Movere tum demum sese, ac loqui: venæsectione versus vesperam repetita tres opus habuere. Quinque tamen diebus de capitis quæsti sunt gravitate: medicaminis nil omnino iis exhibitum; binis solum, quum alvi laborarent obstructione, injecta enemata. Nec vinum illis concessi, nec cerevisiam, sed dilutiorem potum limonatum; hac methodo intra quinque dies omnes ex integro fuerunt sanati.

Occurrunt in monumentis Medicorum plura talia tragica exempla; quin & sæpius ea observandi adest occasio: hyemali tempore unius ejusdemque anni plures contigisse probe novi. Transire tamen jam liceat ad tentamina, quæ cum animantibus magno caloris gradui expositis fuerunt instituta, ex quibus simul patebit aliud insuper phænomenon, de quo mentionem antea non feceram; putredo nempe citissima, tanto calore excitata. Exposuit *Celeb.* BOERHAAVE passerem caveæ inclusum in loco, ubi coni sacchari ad siccandum collocantur; gradus caloris 146 mercurius thermometri designabat. Elapso horæ minuto anxie jam respirabat passer, aperto late rostro aërem captabat. Respiratio omni momento celerior reddebatur; brevi adeo vires erant dejectæ, ut bacillo insidere diutius nequiret, sed fundum peteret caveæ, ubi & velocissime respirans elapsis septem minutis moriebatur. Eodem tempore inclusit BOERHAAVE canem eidem loco. Post septem minuta avidissime jam adtrahebat aërem; exserta lingua velociter respirabat, quietus tamen in cavea lignea jacebat. Elapsa circiter hora sub magnis ron-

chis respirabat, enormiter sese hinc inde torquebat, exitum ex cavea quærens: mox tamen viribus destitutus, sensim sensimque debilius respirabat; sub finem profunde, languideque adtrahebat emittebatque aërem, adeo, ut vix percipi potuerit ultima respiratio. Interea temporis plurima spuma tegebat os, magno molimine expulsa, rubicunda, enormem adeo exhalans fœtorem, ut Adstantes ferre eum minime potuerint. Sed & venenata eousque simul erat, etsi intra brevissimum hoc temporis spatium in animali producta, ut propius quis unico solum momento accedens vix non mortuus fuerit, ope alcoholis & myrrhæ demum restitutus. Tanto licet calori canis fuerit expositus, nec minima sudoris madebat guttula. In mortui fauces inmissum thermometron 110 caloris notabat gradum. Felis, quæ in eodem loco, elapso horæ quadrante, iisdem fere, uti canis, enectæ fuerat sub symptomatibus, sudore adeo erat perfusa, acsi ex aqua quis illam extraxisset: quam quidem canes inter ac feles differentiam observavi, dum sub antlia pneumatica bina hæc animantia necabantur.

Legendam suadeo diatriben Cl. EBERHARD de *noxia caloris nimii in corpus humanum actione*, quæ in ejus *dissertationibus Physicis, Medicis ac Ethicis* lingua germanica editis continetur. Mutationes a calore nimio in homine sano producendas dividit in classes tres; quarum prior eas continet, quæ ab *adaucta secretione & excretionem* dependent; altera examinantur ab *aucto proficiscentes motu*; tertia demum sistit omnes illas, quas excitant *vapores per atmosphæram dispersi, impuri*. Intacta relinquo hic loci ea omnia, quorum quidem compendium in adducto antea libello dedi. — Plurima omnino forent dicenda, si quis damna omnia, quæ eadem ex causa

redundant in Agrotos, vellet enumerare. Monuisse intermi sufficiat, quod & Cuivis ex dictis facile patebit, actiones enumeratas omnes caloris ingentis, favora longe producturas esse symptomata, si corpori agroto, viribus plus minusve jam destituto, prostrato, fuerint applicata. Morbus certe nullus poterit assignari, qui ab excedente calore non increverit in peiora. Una cum caloris gradibus augentur gradus violentiæ morbi: quo & majori homini sano inde paratur incommodum, eo propinquior Agrotus redditur Ditis imperio. Homo sanus in calore ingenti corripitur vertigine; agrotus extra se rapitur: sanus cephalalgia laborat; delirat agrotus: genæ rubent sano; inflammationis periculum inflat agroto: sano timidunt aures; agroto kophosis, quum apoplexia tactus fuerit: sanus de siccitate oris conqueritur; agrotus ardere, comburi sese clamat: sano pulsus celer; agroto febris ardens: sanus tremuit; agrotus convulsionibus rapitur: sanus colliquativo sudore undique madet; agrotus, antequam mortuus sit, in putredinem abit.

Legatur imprimis de aëris calidioris effectibus in corpus humanum elegans opusculum *Cel. James LIND'S Essay on diseases &c.* tum & *BISSET'S Essay on the medical constitution of great Britain* c. f. p.)

§. 747. *Aër gelidus — — — in humores auget.* Possimus in optimis thermometris, quæ primum *FAHRENHEIT*, dein *PRINZIUS* fabricavit, ut & in optimis, quæ *Celeb. REAUMUR* condidit, totius anni calorem notare, eumque redigere in summam. Si quis plures per annos observationes has exacte continuaret, posset medium caloris gradum definire. Egrotum multum cum indefesso *CRUCQUIO BOERHAAVIUS* hac super re. Per 36 annos *CRUCQUIUS* summam caloris totius

anni observaverat: & quamvis alius atque alius annus præ aliis tantum vel caloris vel frigoris habuisset, ut enormem crederemus differentiam enaturam esse, tamen alter annus ab altero vix grad. 4. differebat. Observaverat nempe intensiora frigora semper intensioribus compensari caloribus: & dum gradum medium vellet statuere, qui ex totius anni cujusque calore aucto minutove ita exurgeret, ut omnes 365 anni dies æque quæsi calerent; invenit calorem illum fore 51. 52. gr. — Calculus utcunque deficere visus forte est asperima hyeme anni 1740, quum nec æstas præcedens, nec insequens admodum calidæ fuere: sed forte compensavit hoc tepor vernus & autumnalis protractior anni præcedentis & autumnus sequentis. Cæterum generalis observatio est: quo acerbior hyems, eo æstivior; uti etiam constitit vere anni 1755.

An calculus autem idem conveniret altitudine polialia quacunque, explorandum foret. In zonis torridis sub linea æquinoctiali certe urentissimus est calor æstivus, nec datur sub linea hyems, & parva tantum hyems in zonis torridis. Sed id verum est in insula Javanensi, ubi Batavi ditissimam suam coloniam habent, Bataviam dictam, occiduo sole tantum frigus nasci & manere per noctem, ut Nostratium plerique morbi acuti & chronici oriantur inde, quod se a frigore nocturno non defendant; suntque noctes ibidem fere æque longæ atque dies, per totum annum; ita, ut frigus illud nocturnum ibidem sit undecim & ultra horarum. In zonis autem frigidis, ubi glacies per semiannum fere aquas tegit, etiam æstivo tempore noctes fere non adsunt; ita, ut sol v. g. Archangeli, portu maritimo Russorum, media æstate tantum per trihorium horizontem relinquat.

Hinc

Hinc dico: forte calculi æquabilitas obtinebit in alia elevatione polorum, forte non obtinebit; observationes rem decernent.

Etiam ab hac calculatione summæ totius caloris & frigoris CRUCQUII, excludere oportet peculiæres situs montium, vel aliarum rerum. Si nives copiosissimæ ceciderint in aliqua regione montana, æque nives non tantum in cacuminibus, sed ad eorum radices hæserint per aliquot etiam vernaes, immo primos æstivos menses; poterit calculus deficere. In Lapponia moscovitica calor æstivus intolerabilis, & plane loca multa pro aliquot mensibus inhabitabilia reddens, adest, tum solis radii a candidissimis his montibus niveis toti fere reflectuntur. Hispani tale quid experiebantur in America meridionali in regno Chili, dum vellent per Chili cum exercitu toto penetrare in Peruviam; a latere tales nive tecti montes dabant tam vividam urentemque solis reflexionem, ut debuerint vel de nocte tantum proficisci cum exercitu, vel aliam seligere viam. Hi casus semper excipiuntur.

Ponamus nunc CRUCQUII supputationem in multis Europæ regionibus justam esse, & adæquatam; medius ille 51,52 graduum calor si semper adesset, malus foret quidem alia ratione, sed saltem sua mutabilitate perenni nobis non noceret. Adficit porro nos admodum stupenda varietate, aliquando admodum ingrata & noxia.

Si enim æstate fervida post tonitrua aër calore subito a grad. 75. ad 60. mutetur, mox conquerimur aëris inopportunum frigus: immo, si calor minueretur ad graduum medium 51., valde subito a gradu 75. aut 76., intolerabile prorsum frigus pronuntiarem. Tamen, si media hyeme, dum calor est 15. 20 grad., ex illo aëre mox ingrediamur cubile, in quo aër ad

52., medium scilicet, gradum caleret, adesse ibi calorem diceremus.

Sed si aër in illo cubiculo tantum ad 52, 54 gradus caleat, & maneamus ibi, iterum per horam temperiei aëris adfueti, frigus conquerimur. Fit sic iterum, respectu nostri, mutatio sensus caloris. Hyeme diu in cubiculo manentes indigemus grad. 60—65., ut moderate nos calefieri sentiamus.

Igitur idem aëris calor uno tempore nobis adparet frigore intolerabilis, alio tempore aestu molestus.

Est ergo frigoris & caloris aëris diversus admodum respectu nostri sensus; idem licet sit utriusque gradus.

Exemplo Vobis sit cavea, sive cella subterranea, quam si quis ingrediatur aestuans, dum aestivus calor 70. 75. 80 grad. est, gelida veluti se perfundi existimat. Quod si hyeme eandem caveam intremus, dum aër externus 15. vel 20- grad. est, calido aëre illo subterraneo mox incalescimus toti. Multum tamen abest, ut calorem hunc caveæ hyeme, frigus ejusdem ætate, soli aëri mutato tribueremus. Thermometron forte per paucos gradus differt in locis illis subterraneis; nam æstate & hyeme aër ibi solet esse inter 45. & 50. grad; saltem in Belgio sic inveni. Ut adeo tota differentia, quam adeo enormem credimus, fere nulla sit, nec aliam ob causam ita nobis visa, quam quod æstate ex calidiori, hyeme ex frigidiori aëre in hunc temperatum ingrediamur.

Videtis itaque, illa loca subterranea ad medium totius anni calorem quam proxime accedere. In profundissimo puteo Observatorii Academiae Parisinæ aqua neque hyeme congelatur, nec æstate admodum calet, ob æquabilem fere aeris temperiem.

Hæc præfari oportebat, ut de calore & frigore rite judicaretur. Vidimus quippe frigus 50 grad. æstate noxium esse, quod tunc temporis posset calenti
fæ-

fæpiusque in illud ingredienti corpori damnum maximum conciliare; quod ipsum frigus, media in hyeme, nos sui veluti caloris sensu adfecit.

Adtenti ergo ad hanc observationem accingamus nos ad textum *Boerhaavianum*.

Aër gelidus — — — *roborat*. Aër gelidus tunc potissimum vocatur, quando aqua in glaciem efformari vel leviter cœpit. Aër tunc calorem habet aliquantum infra 32; frigus illud potest multum augeri; ita, ut intensissima hyeme ad gr. 0. mercurius videatur descendere; immo hac hyeme, quo hæc scribo (1755) septima & sexta Januarii hora septima mat. gr. 3. infra 0. notavit, quem gradum anno 1740 etiam mercurii notavit in Hollandia. (Multo major autem mercurius descensus non adeo rarus est, uti ex tabulis meteorologicis satis constat.) In Moscovia sive Russia habuere anno 1740 mercurium ad gr. 32. infra 0. ergo 64 gradibus infra incipiens glaciale frigus; sunt etiam observationes graduum plurium frigoris in regionibus ultimis zonæ frigidæ.

Quod autem de aëre calidissimo & frigidissimo notavimus, industria humana imitari novit quovis tempore.

Si sumatur glacies, eique tufæ adfundatur spiritus nitri (fumans, glauberianus) thermometron designabit grad. 40. infra 0.: quam terribile frigus!

Ex obposito autem hominis potestatem cernimus in augendo calore, dum in Vilettiani metallici concavi speculi foco calorem ita augere possumus, ut nulla thermometra illius gradum notare queant, quum non tantum thermometra, sed omnia vitra, lapides, metalla, mutantur, fundantur, vitrescant.

Atque hæc de artis potestate in augendo minuendoque caloris gradu. Dum autem aër gelidus dicitur, est, ut dixi, aliquantum infra 32. Ut nunc in §pho præcedente aer nimio calore peccans solida nostra laxaverat, elongaverat, debilia reddiderat; ita gelidus

solida adcurtat, densat, roborat. Solidissimum ferrum, quod frigidum per datum annulum exacte transibat, candefactum haud ultra transire valet. Ita aurum omniaque metalla, lapides, ligna: nec tantum solida hæc, sed fluida quoque, aqua, oleum, mercurius, aër calore diducuntur, frigore contrahuntur. Halitum nostrum, in calore invisibilem, frigus condensando visibilem facit, atque hinc

Actionem earum fibrarum in humores auget. Quo enim partium fibræ magis densantur, adcurtanturque, eo vim elasticam acquirunt majorem, eoque proinde majorem renixum edunt in fluida, quæ inpetum in illis faciunt; unde consequenter vim fluidorum intendunt; neque in animalium tantum corpore, sed ubique id observatur. Qua hyeme tonderis novacula, cæteroqui optima, ea aliquando ita præ frigore rigescit, ut Barbitonsor citra culpam suam tibi lacrymas ex oculis excutiat.

Quid quod specula ardentia, de quibus mox sermo erat, ubi valide frigent, longe plus radiorum solis reflectant, quam ubi calent? Unde etiam initio vim majorem edunt, quam ubi aliquamdiu experimentis incaluerunt. Quare & horum speculorum actio hyeme, quam æstate, major: quod sub initium experimentorum suorum mirabatur HOMBERGIUS in fervida æstate anni hujus sæculi quinti.

Ratio est, quod metallorum pori majorem, ubi calent; minorem, ubi frigent, diametron habeant: unde fit, ut radii lucis copiosius poros penetrent, minusque reflectantur. Deinde, metallicæ partes rarefactæ & calentes, minus sunt elasticæ, adeoque ineptiores, quæ radios lucis reflectant. — In experimentis capiendis circa electricitatem, ignis statim minuitur, ubi globus vitreus nimium incalescit. Frigidiori vitro adhibito intenditur electricitas.

Ubi

Ubi autem regelascit, tum fibras dissolvit, destruit.

Etiam hæc necessaria observatio. Nam subitæ calefactiones & refrigerationes alternantes, crebroque repententes, vim solidorum penitus perdunt. Sic ipsum ferrum fit instar vitri fragile. Caro in frigido aëre diu servatur incorrupta; mox ubi regelavit, incipit in tabi speciem defluere. Medici Britannici adnotarunt, nunquam tusses populariter magis grassari, quam in his subitis frigoris & caloris alternationibus. Tusses epidemicæ annorum 1729 & 1733 tales hyemes habuerunt.

Si jam fibræ debiles sint, & fere corruptæ, ut in tabe pulmonali, eæque, a frigore validiores, jam subito laxentur; sæpe ita destruuntur, ut brevi mors insequatur.

(Patet hinc denuo, quod jam antea monui, artubus gelu adustis non admovendum illico calorem esse, ni gangrænam, alias fors non sequuturam, velis accersere. Instantiam manifestam præbent poma frigore adstricta, in cubiculo calido mox maculis corruptionis notanda; injectione in aquam frigidam curanda.)

Idem aër gelidus humores cogit, densat; ubi scilicet talis dispositio diu durat. Hinc & Atrophici, qui rariori cute sudoribus diffluunt, suosque humores admodum tenues, minime plasticos habent; hi, inquam, sæpe tam bene per longas hyemes se habent, ut fere convaluisse videantur, atque multo melius posthac vitam degant.

Si ergo in sanis hominibus diu continuet adtritum ille a frigore auctus inter solida & fluida, interque ipsas fluidorum particulas; facile intelligitis, tenuiora multum oportere dissipari, reliqua figi. Atque ita videtis hanc humorum condensationem, præcedenti Spho calidiori aëri adscriptam, nunc in hoc Spho
aëri

aëri gelido adscribi: ergo ab obpositis causis idem omnino malum in nobis generari.

Moneo id de industria, quum eosdem morbos in seq. ex diversis iisque sibi obpositis causis sæpius oriri visuri simus: moneo & ideo præcipue, ne cum multis Inperitis magnum HIPPOCRATEM ignorantiae crassæ insimulemus; quod in *Aph.*, *Progn.*, *Prorrhet.* recensens morbos ætatis, anni tempestatis, aëris, ventorumque qualitatis, eosdem morbos toties deducat ex obpositissimis causis. Si cum hac cautela legatis totam 3. sectionem Aphor., magnum Virum potius mirabimini, quam cum Stolidorum gente acerbè carpatis.

Pulmonem siccatur, stringit, coagulatque sanguinem pulmonalem. Sanguis enim nudus fere exponitur aëri in pulmone, adeo tenera ibidem sunt integumenta. Unde in proclivi est, ut actione continua ejusmodi aëris, solidi constrictio, fluidi coagulatio oriatur. Quam ob causam aliquoties in sævissima hyeme homines animaliaque subito humi concidunt mortui, inmeabilitate sanguinis sic nata.

Unde obstructio, inflammatio, exsiccatio, anhelitus, tussis. *Obstructio* a solidis constrictis, densatoque humore. *Inflammatio*, si his binis febris accesserit. *Exsiccatio* a præclusis præ frigore osculis vasorum exhalantium: etiam, quia a sanguine coagulato ultra non fiunt debitæ secretiones humorum tenuiorum perspirabilium, & internas partes humectantium. *Anhelitus*, quod atmosphæræ vis nequeat explicare rigida bronchia & vesiculas pulmonum; quodque rigidior pulmo aëra commode expellere nequeat. Hinc crebriori respiratione eaque laboriosa, hic defectus compensari debet. *Tussis*, vel, forte, quod spicula in aere gelido hærentia nudis adplicentur pulmonibus, eosque irritent; vel quod in anhelitu illo tussis naturæ veluti
cona-

conamen fit, quo ad aëra expellendum deficienti rigido pulmoni opem ferat; vel quod frigore omnia constringenti ea, quæ exhalassent alioqui in cavum aereum pulmonis, nunc retineantur, & nervulos exstimulent.

Corryza, *catarrhus*; fere idem significant, nisi quod forte *corryza* adfectionem præcipue narium doceat; *catarrhus* autem narium, faucium, ac sæpe pulmonum.

A subito frigore, calefacto prius corpore, suscepto, vasa membranæ Schneiderianæ ejusque glandulæ constringuntur. Quod tenuissimum, mobilissimum, exprimitur; hinc tenuis illa lympa, perpetuo exstillans prima & altera die catarrhi. Si homo nares multum emungit, & magna vi, plus adhuc illius humoris tenuioris exprimit. Membrana hæc Schneideriana ita constricta, nec, ultra id tenue, quid dimittens, tumet, dum a tergo continuo novos excipit humores: hinc fit, ut iter aëri per nares in pulmones præcludatur, Hinc oculi madescunt: humor enim, oculum continuo abluens, solebat per puncta lacrymalia in saccum lacrymalem, inde per canalem nasalem in nares depluere: jam vero a turgente membrana mucosa narium canales nasales se non possunt exonerare: unde humor oculis colligitur, & dilabitur per genas. Sternutatio magna fit, quia siccitas maxime incommoda statim oritur: secretio enim, quæ humectaverat totam hanc membranam materiæ mucosæ, impedita est, & mox ubi tenuis illa lympa effluxit, de qua supra, summa siccitas molesta percipitur. Aër ergo adluens, cum volitantibus in se corpusculis, irritat nervos narium, unde sternutatio. Adde, quod nervi olfactorii & quinti paris continuo agitentur a pulsu sanguinis advenientis, & plus minus
hæc

hæc loca inflammantis; unde etiam in convulsionem sternutatoriam cientur.

Nares excoriantur & labium, quod 1) forte ferum illud tenue acre fiat stagnando; 2) quod nares & labia sicca, non transpirantia, hinc facile rodantur; 3) quod omni momento nares emungamus, & velimus vincere obstructionem narium, continuo emungendo; hinc autem fricemus nunquam non partes, easque excoriemus; 4) lymp̃ha semper falsi quid habet: mucus mollis involvit lymphæ falsedinem: in sanitate non excoriabantur nares, quia mucus excernebatur, idque rarius; jam non mucus, sed tenuis lymp̃ha, idque continuo, excernitur.

Interea phlogisticam diathesin induit humor obstructus, & a tergo agitatus, donec die 3, 4, 5. & materia tepore utcunque adtenuata, & vi a tergo velociter agente, fiat solutio illius materie puriformis adeo copiosæ, ut homo 2, 3 strophis de die indigeat. Causa copiosæ diuturnæque hujus materiæ excretionis est amplitudo, primo intuitu vix credibilis, membranæ Schneiderianæ: si enim sciretis illam prudenter solvere ab omnibus anfractibus ossis ethmoidis, ex sinibus frontalibus, ex sinibus maxillaribus, ex naribus faucibusque; ingentem utique ultra omnem expectationem cerneretis membranam.

Mucus, pus, gangræna, sphacelus. Mucus & pus quomodo a corryza producantur, dixi: sed si corryza pulmonem occupet, & non resolvatur, inflammatione nimia se jungente; fit gangræna & sphacelus.

Verum gangræna & sphacelus etiam hic potest oriri alia ratione: nempe si humores congelentur, v. g. in arteria pulmonali; si partes salinæ humorum nostrorum aquosis congelatis adunentur in massulas majores; si præterea forte spicula aëre advecta, & conge-

latio-

lationem promoventia, simul in parte congelata hæreant infixa; ubi tunc homo magno foco, vel calidissimo hypocausto se exponit, quo probe calefiat; oritur pessimus sphacelus; agitatæ nempe spiculis & salibus, sua vasa destruentibus.

(Omitto hic disquisitionem: an dentur *spicula frigorifica*, quum hæc Physices intrent pomœria. — Præter Physicos Auctores recentissimos egregios, circa naturam, formationemque glaciei inprimis consuli meretur *Cel. MAIRAN, Dissert. sur la glace; ou explication physique sur la formation de la glace, & de ses divers phénomènes. Paris 1749. 12.*)

Si autem corpus simul valde movetur — — mors subitanea. Quippe humores valide illo motu in vasa agitantur; vasa autem ab externo frigore firmissima & ἐλασικότατα, valide reagunt in humores: quo vehementi motu, & adritu vincitur externi aëris intensum frigus; ita, ut corpus jam penitus caleat. Quam ob causam summa humorum adtenuatio fit.

Verum simul ad excitandam, continuandamque perspirationem validius non datur remedium, teste experientia quotidiana, quam humorum summe adtenuatorum motus per vasa concitator redditus.

Hinc efficitur id, ut, si homo corpus movere in hoc statu pergat, copiosiori indigeat alimento; quod etiam in hyeme solemne esse antea jam ex HIPPOCRATE patuit. Si sola tempestate frigida hoc verum; quanto magis, ubi homo in frigida hyeme corpus ita moverit, ut adtenuatio humores plurimos perspiratione vehementi amiserit?

Quodsi quis pergat movere sese, nec alimento reficiatur; tantum humorum hac actione amittit, ut sustinere sese nequeat, & cadere debeat in animi deliquium, demumque mori. Qua de causa in asperriima hyeme Viatores multi intereunt.

Magnam partem horum expertus ipse junior fui, mecumque experti omnes, qui calepodiis ferratis super glaciem iter faciunt.

Nec hi homines refocillantur, aut refocillati diu manent, jure carniū, levique cibo: sed ut itineri perficiundo apti maneant, indigent pane, lardo, carnis fumo & sale induratis; quo diuturna sit viscerum in hæc ingesta actio. Hinc pertinacibus viscerum obstructionibus, cum integritate vasorum, est sæpe remedium præstantissimum, modo memorata administrare.

Si contra — — — scorbutus, contingunt. Si homo vitam colat sedentariam, longe alios habebit a frigore effectus. Quippe frigus jam illi quiescenti contrahit omnia vasa, adeoque & exhalantia: qua de causa etiam inhibet perspirationem. SANCTORIUS, KAAUW, KEILIUS, DE GORTER, hoc evidenter, tum argumentis, tum effectis demonstrarunt. Retento porro perspirabili torpor nascitur, quia partes gravantur; retentione & mora perspirabile illud fit acre; unde dolor partium, potissimum earum, quæ in motu ad se mutuo adfricantur, ut sunt artus; quumque diathesis scorbutica a nulla causa citius in actum erumpat, quam ab inhibita perspiratione, uti in explicatione scorbuti patebit; necessario scorbutus se manifestabit.

Verum alio modo accidit torpor corpori in summo frigore quiescenti. Audivi id a pluribus, qui in se ipsis rem experti fuerunt. Audivi idem a magno BOERHAAVIO, qui junior adhucdum Medicus in asperissima hyeme anni 1709. ad pagum carpento vectus, gratissimum torporem, mentem ipsam voluptate captivantem animadvertit; quem quum prænuntium somni, & aliquando somni æterni, a frigore nosset esse, videretque, eodem capi socium suum; vi sibi facta se excitavit, jussit Aurigam sistere gradum, amboque curru
exsi-

exsiliantes Pedites sequuti sunt, superaruntque hac ratione torporem.

Sed maxime nos veritatis hujus convincit parvus Commentarius, quem ediderunt Batavi, qui missi ex Hollandia, ut viam quærerent per Septentrionem circum Norvegiam, Russiam & Tartariam in Chinam. Spe sua frustrati mense Septembri ita glacie circumdabantur, ut ea hyeme cogereantur hybernationem in Nova Zembla agere. Narrant in Diario suo, se construxisse tentorium ligneum, ut ibidem tota hyeme degerent; ea spe, ut adventante vere ab aliis navibus adpellentibus revehi possent. Quamdiu exire ex tentorio poterant, ad capiendas vulpes, aliasque prædas, utcunque bene cum illis agebatur. Ubi vero tam densa nix ceciderat, ut, clausis undique viis, exire non possent, mala exoriri cœpit rerum suarum conditio. Nam ignes exstruebant, nec poterant se calefacere; exstruebant ignes majores, & maximos; sed, quum caminum ob intensum frigus & nivem claudere oporteret, exstinguebatur ignis defectu aëris. Quare nonnullas facere rimas coacti; sed simul frigus adeo intolerabile experti sunt, ut in illa coacta corporum in tentorio quiete omnes ægrotare ex ordine inciperent: notant in Diario pessima scorbuti signa; ita, ut penitus immobiles facti essent, & loquentes morerentur. Etiam ultimus adscripsit: Hæreo inter cadavera, moriorque; ita enim nie habeo, ut artus nequeam ultra movere. Qui autem sequenti æstate navibus vecti Nautæ in hanc terram descendebant, quæsitura forte illos, viderunt tentorium, invenerunt cadavera, victum adhuc superstitem, & Diarium sive Commentarium.

Æque mirabile est Diarium binarum navium missarum eandem ob causam 1696. Debuerunt etiam glacie interceptæ manere a Septembri mense in sequen-

tem usque Julium eodem modo, ac priores, postquam binæ naves se mutuo amiserant. In Russia una feliciter hybernavit: sed altera in Nova Zembla: in tentorio exstructo superfuere *Jacobus van HEEMSKERK* cum undecim Sociis, qui demum una cum amissa in glacie nave majori, binis parvis naviculis, miraculo fere Russiam petierunt. Scorbuto omnes pessimo laborarunt in quiete illa propter frigus tolerata: qui ex illis occubuerunt, vix de morte cogitantes, licet toti languidi, loquentes moriebantur; procul dubio ab hæmorrhagia magna interna; ut in pessimo scorbuto, exesis vasīs omnibus fieri demum solet.

(Bene dixit *CÆLsus* *l. 2. c. 1.* Aquilonem tussim movere, fauces exasperare, ventrem adstringere, urinam subprimere, horrores excitare, item dolorem lateris & pectoris; sanum tamen corpus spissare, & mobilius atque expeditius reddere. Ast notandum, si de frigoris effectibus in corpus humanum agatur, distinguendum esse inter frigus humidum, frigusque siccum. Frigus siccum, aquilonare maxime, *HOFFMANNUS* ait, *Med. rat. systemat. Tom. 2. p. 3. c. 7. §. 24.* aërem valde compressum & constrictum continet, qui calore expanditur. Humidum vero oritur maxime hyeme, austris & zephyris flantibus. Siccum & constrictum frigus argentum vivum in tubo torricelliano in sublime tollit, ob elasticam fortem pressuram: humidum vero illud dimittit, ob elaterem inminutum. — — Nocet frigus siccum boreale, ubi partes nerveæ & membranosæ rigidæ sunt, spasmo & dolore adfectæ; quare omnes morbos a spasmo exasperat, & quietos facile resuscitat; nocet quoque iis, qui macra & extenuata habent corpora, qui inbecilles sunt, & qui non diu a morbo convalescerunt — — — Frigus humidum plus valetudini corporis insensum videtur, quam

quam siccum; quia non modo valde inspissat humores, & minimos meatus obstruit, sed & humiditate tonum fibrarum relaxando universum humorum cursum retardat, & sic transpiratione diminuta & copiam & impuritatem succis adjicit: quare ad morborum generationem atmosphæra humida & simul frigida & diu perstans plurimum confert; quum aër siccus & frigidus eo magis moveat, atque in actum deducat. Hæc HOFFMANNUS.

Mutationes aëris frigidi humidi non solum Ægri, inprimis Pneumonici, graviter ferunt; sed & sani homines, & animantia plus minusve persentiscunt. Nam, ut recte observat VIRGILIUS:

„Ubi tempestas & cœli mobilis humor
Mutavere vias, & Juppiter humidus astris
Denfat erant quæ rara modo, & quæ densa relaxat,
Vertuntur species animorum & pectora motus
Nunc alios, alios dum nubila ventus agebat,
Concipiunt.“

(Ab adstrictione cæterum, quod in fibris animalibus frigus producit; ut de salubribus etiam frigoris non excedentis humanas vires quid adferam, Eorum in gratiam, qui ad fornacem educati, quamvis auram frigidiusculam ceu pestem horrent delicatuli; bene deduxit HOFFMANNUS rationem, cur, qui septemtrionales regiones incolunt, sana, robusta & quadrata habeant corpora, quæ non facile offenduntur, & vitam quoque agunt longiorem. Islandi, & Grönlandi, observante Cl. ZÜCKERT von der Luft &c. p. 122. &c. corporis licet parva gaudeant statura, pondus trium centenariorum humeris sustinere queunt, Færoënsium adinstar morbos fere ignorant cum Medicis & Chirurgis, & centesimum ætatis annum haud raro adtingunt. Galli Canadam in America septemtrionali petentes, robustiores multo ibi

loci fanioresque evadunt : universim etiam loquendo, regiones calidissimæ Fœminas pulcerrimas non foveant.)

§. 748. *Si idem nimium humidus* — — — *inprimis pulmonales.* Videtis hic omnia contraria recenseri, quam quæ superius de aëre frigido sicco dicta sunt. Omnia corpora hinc debilitantur, extenduntur, elongantur, laxantur; ita, ut quæ vestes antea exacte nostris quadrarent corporibus, jam arctiores deprehendantur. Ipse hominum vigor perit animi corporisque, ut penitus quasi enerventur & hebescant. Causas intelligimus, convertendo causas ad aërem siccum descriptas. Quod lugubres Cannæ Romanis, id Carthaginienfibus tepentes Bajæ & capreanæ deliciæ fuerunt: Heroum exercitum ex Africa Hannibal duxerat in Italiam, Effæminatorum turbam reduxit domum. — Si linteamina humida aëri sicco exponantur, cito siccabuntur, omni ablato humido. Si vero exponantur aëri humenti, siccantur difficulter & vix integre. Cogitate nunc idem fieri circa nostra corpora; sed ea insigni cum differentia, quod ex corpore nostro nova materies perspirabilis ad ambitum corporis accedat continuo, & hinc fibrarum laxatio & debilitas inmensum augeatur.

Inprimis pulmonales fibræ id patiuntur. Duas enim, velim, superficies corporis nostri consideretis, una cutis est, seu epidermis potius tota: altera membrana Schneideri & interna tunica oris, faucium, asperæ arteriæ, bronchiorum, vesicularum pulmonalium, ut & œsophagi, ventriculi & intestinorum.

Dum igitur ponitur aër siccus nos ambire, ille, ut vidimus, averrit assiduo aërem humidum, halituosum, qui ex pulmonibus egreditur; pulmonis enim membrana cavum aëreum investiens jugiter perspirat & humida est. Ponite nunc aërem externum humidum
valde

valde esse, nebulosumque; desinit talis aer excipere humidum vaporem pulmonis: ergo pulmo manet humidus, accumulatoque humido oneratur; hinc ait textus: *serum pulmonum retinet, auget, accumulat*; ut jam explicui.

Perspirationem in iis prohibet: ita, ut demum abundanti serosa materie cavum aëreum repleatur, & ab accumulata hac materie vasa exhalantia ibidem obpleantur. Id vero ubi contingeret, quinam ejus effectus? Respondet textus:

Unde rursus tusses, peripneumoniæ serosæ, diarrhææ similes, torpores, febres, paralyses, apoplexiæ, asthmata. Natura enim saburra tali onusta, seque inde expedire conans; seu potius sero hoc, stagnatione acri facta irritata, pulmonem tussi continua conquassat. Atque etiam, quia & in pulmone, & in toto reliquo corpore perspiratio inhibita est ab ejusmodi acri; materies illa accumulatur, corpus onerat, & cum reliquis circumducta humoribus, invenit jam pulmones infarctos, sufficienterque explicari ineptos. Hinc fit, ut ille sanguis materie perspirabili retenta onustus, tenella pulmonis vasa etiam pressa & onusta obstruat, & urgente a tergo vi cordis inflammet.

Quin & retenta materies perspirabilis aliquando causa est, ut *diarrhææ serosæ* oriantur, quas vix curabitis, nisi restituta perspiratione.

Facit enim *torpores*: quia humore aquoso inertis, sensim lentescente vasa replentur; vasa autem ab humido aëre laxa haud multum agunt in suos humores: unde tandem motus vitalis & animalis torpet.

Febres, quia serum illud retentum acre factum stimulo agit suo: accidit sæpe, ut motus, qui a stimulo illo factus, lentum illum humorem in vasa tenuia adigat, eaque vasa, inertia ab humido aëre quum sint, humores lentos quidem excipiant, sed per suas

angustias non transmittant. Ergo tunc fient necessario obstructions. Motus auctus a tergo facit inflammationem, facit febrim; quæ febris etiam potest oriri, quia jam cor pauciora vasa patula reperit ad circumducendos humores; unde, ut cursum suum sanguis absolvat, id velocitate adaucta compensari debet. Velocior autem cordis contractio, BOERHAAVE ait §. 581., cum aucta resistentia ad capillaria, febris omnis acutæ idæam absolvit.

Si magnus calor illi jungatur, cito putrefactio Aëris calidi jam vidimus effectus ad producendas putredines; sed tantum ut *calidum siccum* eum consideravimus. Si jam cum calore humescat, ratione caloris partes omnes vehementer exagitat, ut facit omnis calor, omnis ignis corporibus adplicatus. Quamdiu aër ficcus manet, absomit simul magnam humoris aquosi & volatilis copiam, & sensim hac lege putredinem in reliquis oleo ac sale magis onustis, sua agitatione promovet. Ubi vero calidus ac humidus aër, tunc ille motos a calore humores retinet, exhalare inpedit, accumulat. Scimus porro per insensilem transpirationem avolare de corpore, quod manendo noxium fieret: igitur agitati copiosi illi perspirabiles humores fiunt acres, & promovent sic reliquorum putrefactionem. Novimus, carnes nunquam citius putrescere, quam aëre calido humidoque obtinente.

Si magnum frigus, tunc serosa colluvies. Ab aëre humido vidimus totum corpus laxari, & humores perspirabiles ab illo aëre non auferri, non absumi; adeoque eosdem humores manere cuti adplicatos. Hinc corpus manet infarctum humoribus, noxam brevi inlaturis. Junge jam huic humiditati magnum frigus; iterum alia rerum facies. Frigus enim, ut *Spho præc.* vidimus, si homo vitam sedentariam agat, omnia solida constringit, exhalantia oscula claudit. Igitur, si
aër

aër humidus humores perspirabiles coacervaverit, & dein frigus in homine quiescente corpore oscula vasculorum exhalantium arctaverit; nihil superest, nisi ut corpus acri serosa materie infarciatur.

Carolus Piso scripsit de morbis a colluvie serosa Tractatum, qui ab omnibus Medicis decies legi relegendum meretur. Plures morbos, alioqui vix explicabiles, aut curabiles, tam manifesto docuit, tum huic colluviei serosae originem deberi, tum sublata ea curari, ut in sui admirationem & laudes omnes pæne Medicos rapuerit.

Verum omnia, quæ hucusque de aëre humido, tum calido, tum frigido, dicta sunt, si compendio legere velitis, en! quam breviter, quam concinne, quamque ad amissim omnia complectatur magnus *HIPPOCRATES*, *Aph.* 3—13. „ Si æstas sicca & aquilonia fuerit, autumnus autem pluviosus & australis, capitis dolores ad hyemem fiunt, & tussis, & rauces, & gravedines; quibusdam vero etiam tabes.“

Et *Aph.* 3—16. „ Morbi autem in pluviosis plerumque fiunt, & febres longæ, & alvi fluxiones & putredines, & epilepsiæ, & apoplexiæ, & anginæ.“

Et *Aph.* 3—17. „ Quotidianæ constitutiones austrinæ (quas humidæ & calidæ dixerat) corpora dissolvunt & humectant, & auditus graves, & capitis gravitates faciunt, & vertigines in oculis, & corporibus motum difficilem, & alvos humectant.“

Observatione exacta adhibita videbitis, *HIPPOCRATEM* omnia fere novisse, quæ ex *Physicis* legibus & experientia nunc explicui.

§. 749. *Atqui nimis siccus patrat — — — nimio ageret.* Scilicet siccitate materiem perspirabilem omnem auferens, & reliquos incrassans humores. Sic producit quidem eadem, quæ aër calidus, siccus, phæ-

nomena ac symptomata; sed eo tamen lentius, quo est caloris gradus minor.

§. 750 *Aër nimium gravis comprimit &c.* Aëris gravitatem definire primo ausus fuit magnus Hetruscorum Geometra TORICELLIUS anno 1643; GUERIKIUS, PASCHALIUS, BOYLEUS, MARIOTTE, negotium perfecerunt. Patuit omni examine instituto, totam differentiam esse tantum $\frac{1}{10}$. Aër gravissimus est plerumque, ubi & maxime & diutissime serenus est, tam hyeme, quam æstate. Demonstrant id barometra.

Quoad aëris gravis tolerantiam, ea certe exacte definiri non potest. In genere gravis aër salubrior homini inventus quam levis. Ponderosior enim aër robur addit, densat, firmat corporis humani internam externamque superficiem. Etiam quo est ponderosior, eo validius vasa comprimit, redditque arctiora: tum & vires parietum vasorum in sua fluida incitat: auget proinde & adtritum & calorem: vitam sanam ergo & robustam conservat, si moderatus sit.

Eundem tamen aërem norunt Physici incredibiliter rarum & densum reddere. Post eruditos viros *Academiae Florentinae* multi conati sunt explorare, quousque valeat animal inpune ferre aërem gravissimum & levissimum. Non sine magna animi voluptate recorder experimentorum, quæ vidi a *Celeb. s'GRAVESANDE* fieri in animalibus vivis. Audiamus eum loquentem in *Phys. Element. mathemat. l. 4. c. 5.* „ In aëre compresso non subito animalia moriuntur, quia compressione aëris vasa in corpore non franguntur; potius magis hilaria fiunt animalia. Si tamen diutius in tali aëre degant, hic noxius illis est, & etiam in compressione majori brevi tempore pereunt.“ *Exp. 26. & Exp. 27.* „ Ad oculum demonstramus, quid vasis animalis contingat, quando in aëre compresso degunt;

gunt; si vesicam inflatam & exacte clausam in dicta machina suspendamus. Ubi aër comprimitur, flaccida hæc fit, sed aperto epistomio subito sese expandit.“ Intelligitis igitur, quomodo aër in vesica comprimatur, ita, ut vesica flaccescat ab aëre graviori reddito, & vesicam undique, in omni parte comprimente.

Experimentis factis a summis Physicis patuit, in aëre duplo & triplo densiori reddito animalia varii generis per horas vixisse, & quædam mortua esse, quædam languentia, etiam post 6 horas inclusa revivixisse mutato aëre.

Dum egregius MUSSCHENBROEKIUS hæc tum Aliorum, tum sua experimenta consideraret, in suis *Additamentis* ad *Exp. Acad. florent. p. 119.* „ Ex hisce, ait, experimentis sequitur, animalia diutius in aëre condensato vivere posse, quam in aëre naturaliter constituto, nec renovato. Quamvis enim animalia inclusa aliquid aëris consumant, aut elasticitatis portionem minuant, nihilominus in aëre condensato, sat aëris superest, vigetque satis elasticitas.“

„ Hinc in inspiratione, pulmones, vesiculæ facile & probe explicantur, liberrimusque per arterias venasque pulmonis conceditur sanguinis circuitus.“

Moriuntur tandem tamen animalia in hoc aëre condensato. Sed quamnam ob causam? Non ob aëris defectum, non ob amissam elasticitatem: nam mercurius in indice hæc ambo satis superesse ostendit. Sed, vel moriuntur, quia expirationes ex corpore animalis sunt suis noxiæ pulmonibus, aut vitæ; vel quia ex aëre aliquid consumtum fuerit, quod continuatæ vitæ causa est, & sanguini admiscendum est continuo.“

„ Hoc ultimum tamen vix potest locum habere, quum céleberrimus BOERHAAVIUS invictis probavit argumentis, nullum aërem in pulmonem inspiratum transire ex vesiculis in vasa sanguinea posse.“

„ Quare restat id tandem, ut concludamus, nostra perspirata nobis ipsis, & ea aliorum animalium illis ipsis esse noxia, venenique instar.“

„ Atque hinc intelligimus, quare Urinatores, campanæ, dolio, aliive vasi inclusi, novo reficiendi perpetuo sint aëre, ut commode respirent. Tum, quare Fossores profundis in fodinis laborantes anxietate premantur; nisi novus purusque aër perpetuo fodinis inmittatur, folium vel quorumcunque ventilabrorum ope.“

Observatum hoc in Urinatoribus explicat s'GRAVESANDE *lib. 4. c. 5.* „ Si vitrum conversum in aquam immergatur, aër aquam excludit, ad quamcunque profunditatem immergatur. Quo tamen vitrum profundius descendit, eo etiam in minus spatium aër in hoc reducitur “

„ Hoc fundamento nituntur machinæ, sub quibus Urinatores in mare descendunt. Campanæ speciem referunt hæ, & gravitate sua descendunt. Aqua ad ipsum Urinatorem non pertingit: novus aër continuo huic mittitur, contentus in vesicis, funi adligatis, quas ad se trahit. Aër inspiratione calefactus ad superiorem partem machinæ ascendit, & per epistomium expellitur pressione aquæ, quæ, in inferiori parte, in aëra campana contentum, premit. Hæc pressio vim superat, qua aqua per epistomium descendere conatur. Pressio enim fluidorum cum profunditate augetur.

Videtis proinde aëris densioris effectus, eosque longe minoris, quam forte putaveritis, periculi.

Ex his tamen experimentis, aliisque, notum est, continuatum diu hunc compressum densum aërem, non tantum nocere, quantum exhalationibus propriis animalium refertus incluso intra se animali sit noxius & adversus, ut statuit egregius MUSSCHENBROEKIUS; sed etiam, quod sua densitate comprimat omnia vasa, & hu-

mores. Cor tamen pergens sanguinem projicere ad compressa hæc vasa humoresque majorem resistantiam invenit. Resistentia hæc augetur sensim hac ipsa pel-
lentis cordis actione, fitque tandem adeo magna, ut motus humorum suffocetur, & homo vel animal, pereat: ut ex textu BOERHAAVII evidenter liquet.

Nonne etiam in experimentis circa animalia factis oportet considerare aëris calorem? Quippe aër ille densus continuo incalescit transeundo per animalis pulmones, & absumendo continuo animalis perspirabilem materiem. Ita, ut tandem adquirat tantum gradum caloris, quantum diu inculpateque nequeunt animalia ferre, quin suffocentur.

(Gratis hoc sane quæsitum, sæpius saltem, videtur; quum certissimis experimentis constiterit mihi, animalia majorem multo aëris calorem abs manifesto vitæ aut sanitatis detrimento ferre posse, quam ille sit, quo atmosphæra, in qua, non renovata, diutius inclusa fuerunt, donec moriantur demum, unquam inficitur. Præterea certum est, insecta, aliaque animantia frigida in aëre non renovato etiam mori, etsi aër ille nullatenus caloris gradum mutatum exhibeat. Experimenta quæ cum ranis, lacertis, piscibus &c. institui numerosa, veritatem hanc universim testabantur. Pisces, qui in glacie obductis lacubus defectu aëris renovati moriuntur, sane non ob calorem nimium enecantur; enecantur tamen. Cur vero aliam adsumere oporteret causam mortis in animalibus sanguine calido, aliam in sanguine frigido præditis? Quodsi autem me quis interroget, quænam ergo in utrisque, aëris liberi usu privatis, causa mortis sit; candide fateor, me eam ignorare; sed & ex iis omnibus, quæ ab Auctoribus clarissimis in rei dilucidationem fuerunt adlatæ, sufficientem videri nullam; quum ubique aut phænomena supersint non

exposita; aut exposita, ratione multum sane hypothetica, & coacta; quum & Nonnulli phænomena animalium morientium explicationi potius, quam explicationem phænomenis adplicuisse videantur. Sensisse eadem incommoda credo Viros celeberrimos, qui nuper: „quænam causa sit mortis animantium aëre libero privatorum“, interrogarunt.

Eandem ob rationem omisi hic responsionem amplam quidem, nil tamen decernentem, quam hic loci adtulit *Cel. de HÆEN* pro resolutione quæstionis quam sibi formarat: An etiam mors tandem contingat illis, quia aër aliquid ἄγρωτον habet, quod vitam sustineat? Deveniens tandem ad occultum quemdam vitæ cibum in aëre latitantem; de quo tamen Ipse subjungit, in obscuro haberi, quid illud sit, quomodo agat, quid proprie efficiat? — Instantias autem noxiæ indolis aëris inclusi adtuli in dissertatione: *Von dem Nutzen und der Weise, die Luft rein u. zu halten*, quam plurimum auctam diario erudito Vindobonensi *Realzeitung* ante paucos annos inserui.)

Aër autem gravis tantum, gravitate naturali non observatur adeo noxius, quam vulgo creditur. Est enim, ut ante vidimus, tota unquam observata differentia trium pollicum: nempe in altitudine $30\frac{1}{2}$ pollicum, gravitas naturalis maxima est $27\frac{1}{2}$ pollicum, ut in omnibus barometris notare potestis; est adhuc rarior illa gravitas; ita, ut plerumque gravitas consueta describatur intra altitudinem modo 2 pollicum; differentia proinde tantum sit $\frac{1}{15}$.

Observamus porro homines plerosque valere pancreaticæ, ubi aër diu serenus & siccus, ac proin gravissimus fuerit.

Vim autem gravioris aëris observamus diversam in Asthmaticis: quosdam novi, qui pulcre haberent aëre gra-

graviori, quo pulmones minus obsequiosos melius explicarent; quique proinde leviori reddito aëre anhelarent summis cum difficultatibus: novi Asthmaticos alios, qui nunquam rectius habebant, quam ubi aër in tempestate nebulosa & pluviosa levissimus designatur barometro; nunquam pejus, quam ubi mercurius multum in barometro adscendit.

In puteo profundissimo Observatorii Parisini, in fodinis, in imis specubus, non observatur magnum adeo aëris in densitate sua incrementum. Neque profundas adeo abyssos nobis imaginamur, quam Poëtæ: quum ad mediocrem tantum profunditatem aqua vel ignis vetet ultra pergere. (Apertura perpendicularis fodinarum Schemnitzensium profundissimarum est 1110 pedum, seu 185 orgyiarum; hinc æqualis $2\frac{1}{2}$ altitudinibus turris Sti Stephani Vindobonensis, 444 pedes seu 74 orgyas altæ.) Hinc in subterraneis magnopere non increfcit aëris gravitas; nec ratione auctæ gravitatis tantum in profundis locis periculum, quum in tota specus profunditate vix pollicem differat. Periculum potius est ab aëre non renovato, non puro, ut supra vidimus. Noxius magis foret aër levitate peccans, ut in summis montibus.

Dicendum itaque, tunc noxium esse aërem gravio-rem, quando gravitas insigniter augetur, & ejusmodi diu durat conditio. Sit hic thorax, ibi aër externus, in medio pulmo. Si nunc aër fieret triplo gravior, $\frac{1}{3}$ plus thoracem premeret, thorax $\frac{1}{3}$ plus resisteret: ergo omnis humor $\frac{1}{3}$ plus comprimeretur: ergo cor $\frac{1}{3}$ plus virium deberet exercere. Unde fieret difficilis tandemque impossibilis humorum per vasa illa trajectus.

§. 751. *Idem si levis nimium fuerit &c.* Illico dixi, aërem levio-rem longe esse periculosiorem, quam gravio-rem. Etenim humores jam minus premuntur, sed

sed potius minus pressi rarefcunt & vafa expanduntur. Huic expansioni refiftebat aër gravitate naturali; fed vis hujus aëris prementis & refiftentis inminuitur: ergo & vafa dilatentur neceffe eft.

Si autem vafa dilatentur & humores rarefcant, tunc humores minus compacti & jam tenuiores, dilatata lateralialia vafa facilius intrant; ita, ut primi generis liquida excipiantur a vafis fecundi generis; humores fecundi generis a vafis tertii generis, ut Vobis explicui, agens de errore loci: veluti & in cute fit, ubi vel fuétione, vel cucurbita adpofita, aërem abftulerimus. Sanguis aliena vafa ingreffus fœdas exhibet fuigationes.

Sed confideretis velim, quam in violento ftatu plerumque degant pulmones humani! Mufculi enim dicti mefochondriaci pulmones femper minores faciunt, dum illi corpore exenti hærent, quam dum in viventis hominis thorace continentur. Aër denfus & gravis vim infert his mufculis, ut magis explicentur, & aëreum fpatium pulmonum dilatari permittant. Si jam ponatis hanc vim horum mefochondriacorum mufculorum manere eandem, & aërem reddi longe leviozem, adeoque vim longe minorem in hos mufculos exercentem; capitis mox, vim horum mufculorum augeri ea ratione, quo aër debilius agit. Aër ille non poteft ad requifitam amplitudinem dilatare pulmones; hinc anhelat tunc homo, infpiratque difficillime. Ergo videtur aliud afthma, diverfum a priori: illud a graviori, hoc a leviori aëre. Experimenta vidi, quæ cum pafferibus, alaudis, columbis, canibus, pifcibus vivis inftituebat optimus s'GRAVESANDE in antlia pneumatica. Mirum erat videre, quam male adficerentur illa ab aëre reddito vel parum leviori; quæ fymptomata increfcabant in ratione auctæ levitatis aëris. Ait Vir celeb. *Phyf. Elem. mechan. l. 4. c. 5.* Animalia, ad vivendum

dum aëre indigent. Si animal quodcunque vitro antliæ includatur & aër exhauriatur (notate tunc, quando dicitur aër exhaustus, adesse summam aëris raritatem; nam omnis aër hucusque exhauriri non potuit, & perfectum *vacuum Boyleanum* non datur: *de H*); ergo, si aër exhauriatur, statim violento motu agitur, & ni subito aër iterum admittatur, vitæ expers cadit. Dantur quædam animalia, quæ diutius in loco evacuato vivunt. Inflantur animalium corpora, dum, sublata externa pressione, aër aut fluidum quodcunque elasticum, in vasis sese expandit. Quidam etiam pisces sine aëre vivere nequeunt; in aliis nulla fere observatur mutatio, nisi quod oculi inflentur. Experimenta circa pisces instituenda sunt in vitro, quod orbi antliæ pneumaticæ inponitur, & quod aquam cum piscibus continet. Recipiente tegitur hoc, & aër extrahitur. Sublata aëris pressione in aquæ superficiem, aër in piscis corpore se expandit; quo hic, levior factus, in aquam descendere nequit.

(Omisi hic fusam descriptionem experimentorum circa animantia in vacuo posita institutorum, quam *Cel. de HAEN* ex *Actis Acad. Florent.* a *MUSCHENBROEKIO* editis huc transferre placuit; quæ majori cum utilitate in ipso opere nunc adducto legentur. Sequentia solum hic inferenda credidi. Moriuntur in evacuato aëre recipiente intra horæ dimidium minutum plurimæ aviculæ; passerres, chlorides, pari majores & minores, alaudæ, sturni; sed vespertilio diutius vitam protrahit, moritur tamen. Deinde canes, feles, mures, glires, talpæ, cuniculi, non diutius, quam ad 30 minuta secunda vivunt; immo nec per majus temporis spatium sub aqua vivere possunt, sed suffocantur, ut liquet ex *Philosoph. Transact. No. 62*. Quibus autem animalibus foramen ovale in corde apertum est, hæc

in vacuo diu vivunt; nec, nisi ob alias causas, sitis, famis, &c. pereunt. Hinc feles juniores quinque vel sex diebus in vacuo positas, quidem tumere, convelli, vomere, angi observatum, non tamen exstingui; clauso autem hoc foramine æque cito in vacuo pereunt feles, quam memorata animalia.

Ratio discriminis hujus in Physiologicis, ubi de respiratione agitur, exponitur.)

Atque hæc quidem de aëre, quantum ope antliæ fieri queat, educto: ut autem sciretis, quid contingat animalibus, quibus aër tantum levior redditur, en etiam paucis.

BOYLEUS inmisit linariam in amplum recipiens $4\frac{1}{2}$ pintarum capax, & inde dimidium aëris eduxit. Vixit avicula per horam $1\frac{1}{4}$. antequam vitæ discrimen adpareret: aperto dein vase, convaluit. Non tamen omnia animalia aërem adeo rarum æqualiter ferre advertit: quum enim chloridem in eodem recipiente incluserat, educta dimidia aëris copia, aviculam elapso minuto ægrotasse & vomuisse observavit; tum sequentibus 4 minutis iterum visa fuit hilaris, sed rursus vomuit, quo facto per $\frac{1}{4}$ horæ hilariter vixit, & ex aperto vase avolavit.

Mus autem, observante BOYLEO, in aëre, nondum adeo rarefacto, ægrotavit, vomuit intra 4 horæ minuta, neque ejus pedes amplius officium faciebant, valde tremantes, ut & totum corpus, licet illico aëri aperto commissus fuerit. Quum autem postea in eodem aëre æque rarefacto includebatur, vixit per $\frac{1}{4}$ horæ contremiscens: deinde aëre magis rarefacto, ut duplo rarior fieret, vixit adhuc quietus; sed aëre plus de novo rarefacto, vitæ illius discrimen adparuit.

Alauda in recipiente, quod $4\frac{1}{2}$ pint. capiebat, & in aëre ad $\frac{3}{4}$ rarefacto posita, intra sesquiminutum con-

vel-

vellebatur, atque nondum elapsis 2 minutis moriebatur.

Ait etiam MUSSCHENBROEKIUS in opere ante citato: „Ferunt aves aërem rariorem facilius & absque incommodo, quam terrestria animalia. Solent enim in altum volantes aura rariori vesci: non tamen aërem ad $\frac{3}{4}$ rarefactum ferunt: ideo ad aliquam usque altitudinem in atmosphæra adscendere modo possunt, non ad quamlibet. (*) Anguntur enim in aëre rariori hæc animalia, quia illis aër vix sua elasticitate vesiculas pulmonales expandere potest, nisi thorax vi magna ampliatur: unde ista auxietas producitur, quam & homines perceperunt, qui in altissima montium Armeniæ, Sabaudix, Pyrenæorum, Teneriffæ cacumina adscenderunt, in quibus aër multo rarior, quam prope terræ superficiem est, veluti videri potest in *Philos. Transact. Nro. 63.*

(*) Notum est, non ad eandem altitudinem in atmosphæra libera volitantes adscendere aves: prout vero altius adscendere solent variæ, sic & attenuatum magis sub recipiente ferre posse videntur aërem: ut adeo, æstimatione præmissa & magnitudinis corporis, & voluminis aëris ambientis, cavi-que coercentis, omnibus positis æqualibus, gallina citius moreretur aut male haberet, quam aquila, aut falco. Experimenta, quæ cum diversis avibus aliisque animalibus instituta fuerunt, tum a VERATTI, tum a LACHI, aliisque Viris clarissimis, latius exposita legi poterunt in *dissertatione de aëris vaporibus variis &c. insecti actione in sanitatem*, quam in *Realzeitung* 1774. inserui, mox denuo edendam. Inprimis etiam legi meretur hunc in finem *Int. HALLERI Elem. Physiolog. lib. VIII. sect. III.*)

Mutationem hanc in barometro constanter adeo æqualem pro locorum altitudine invenit doctissimus Itinerator SCHEUCHZERUS, ut in quatuor suis libris *itineris alpini* pro constanti regula adsumserit, definiri & determinari loci altitudinem ex aëris levitate seu raritate; id est, ex descensu mercurii in barometro: usu nempe didicerat, ex locis, in quibus veram altitudinem montium metiri potuerat, nosse etiam altitudines eorum, quos metiri non poterat. Refert *tom. I. pag. 8. & 9.* dilapsum mercurii ad 22 scrupulos, seu decimas digiti tigurini dare altitudinem montis 1760. pedum tigurinorum; si mons perpendiculariter consideretur: scrupulum enim unum vel digiti decimam respondere 8 perticis, sive 80 pedibus.

(Legatur de hac re elegans opus *Cel. de Luc. physisch, moralische Briefe über die Berge* &c. Leipzig 1778. Ister Theil.)

Absolvi, ni fallor, pensum de aëris, ut aëris qualitatibus. Jam considerandus est nobis aër, ut referretur aliis corporibus; quæ nosse omnino oportet, si, ut genuini HIPPOCRATIS Discipuli, ut veri naturæ Cultores rem medicam administrare velimus. Audiamus loquentem BOERHAAVIUM.

§. 752. *Cælum, anni tempestates, solum &c.* Cælum nostrum, hoc sensu, vocamus aërem cum æthere & corporibus cœlestibus omnibus, quæ perpendiculariter nostro, de quo nunc agimus, loco incumbunt. Ergo definiendus est primo gradus latitudinis nostræ habitationis, de cujus cœlo definiendo agimus. Statim videtis in eodem hoc cœlo magnam dari differentiam, prout sol 23 gradus cis aut trans æquatorem degit: quo enim directius mittit radios, eo reflexi radii generant majorem calorem; eo minorem, quo obliquius.

Anni tempestas, æstiva, autumnalis, hyemalis, verna; ob rationem mox expositam varia dat phænomena. Quid enim? Ponite per mensis spatium terram præ gelu crusta tectam & constrictam; maria quoque quibusdam ad littora locis, flumina & lacus glacie tegi. Exhalationes jam sunt parcissimæ, aër purissimus. Revera vis ignis artificialis longe major illo tempore est; sed ignis aërem reddit puriorem. Interim calor sub illa crusta agit omnia putrefaciendo. Id cernitis ad oculum, ubi, foramine in glacie facto calorem exire animadvertitis. Soluta a tepore aëris hac crusta aquas terrasque obtegente, vapores qua data porta ruunt, & aërem implent. Quam ob rem intelligimus, cūr eo tempore tam cito quandoque, ubi regelaverit, calor oriatur, & tonitrua & fulgura.

Solum: vocamus hac voce illam superficiei telluris partem, quam incolimus; quod solum sæpe inmensum differt & a se ipso, pro anni tempore, ut mox consideravimus; & ab alio solo vel regione aliorum populorum. Aliud enim solum arenosum est, aliud aquosum, aliud bituminosum, aliud metallicum, aliud salinum, &c.

(Videri hunc in finem inter infinitas alias instantias poterunt, quæ adnotavit LEO A CAPUA *delle Moffette*; DU CASTERA, *hist. du mont Vesuve*; PLOT *natural history of Staffordshire* p. 135.; BLAINVILLE *travels*, T. III. p. 385.; BRADLEY *new improvements of agriculture*, p. 257. &c.)

Mare: illud profecto magnam mutationem diversæ atmosfæræ infert. Est enim mare chaos verum. MARSIGLIUS demonstravit in aqua marina bituminosum atque amarum quoddam, quod ab aqua marina ne destillatione quidem abigi queat. (Novimus tamen nunc methodum, ex aqua marina eliciendi aquam dulcem, potui aptissimam.) Sal deinde gerit copiosum. Vim

incredibilem piscium, tantæ sæpe molis, ut integros montes nonnunquam Te videre credas, continet, eosdem in sinu suo sepeliens mortuos; continet & copiosa vegetabilia, algas, corallia, conchyliæ &c. Vapores ex mari adscendunt copiosi. Mare idem in fluxu tegens littora, relinquens in refluxu, deponit eo tempore pisces, maxime in fossis multis, quæ vi maris æstuantis solent in littore excavari. Ubi ergo mare omnino refluxit, aëri expositi hi pisces, aliaque corpora marina dant fracedinem, quæ novis additamenti altero fluxu augetur: unde nonnulla loca ob hanc causam valde insalubria. Potui aliquando quadrante horæ adhuc a mari distans fracedinem hanc subolfacere. Hinc horrent Batavi Duces militum, quorum copiæ militares in quibusdam Hollandiæ, Seelandiæ & partis Flandriæ oris in præsidiis ponuntur: vocant enim illa loca Militum suorum cœmeteria. Dein enormes sunt exhalationes maris, quæ vento adlatæ conditionem atmosphæræ mire inmutant.

Montes sunt loca eminentissima telluris, in quibus antea vidimus, aërem esse leviores purioresque, quum vapores non alte adeo adtollantur. Demonstrant utrumque collocata in fastigio montium barometra.

Hi montes sæpe nive tecti manent in cacumine suo, idque aliquando ad magnam profunditatem; etiam in calidissimis regionibus: quod, magno suo cum damno experiebantur Hispani, quum media æstate prope & per montes niveos americani regni Chili exercitum ducere in Peruviam vellent: reflexio enim radiorum calorem facit intolérabilem. Nix autem manet diu ibi; quia, quo altior locus est, eo & erit frigidior. Candor porro nivis causa fuit tanti caloris, quum ex Physicis constet, corpora candida maximam radiorum copiam, quam acceperant, reflectere. Loca vero, in
quæ

quæ reflexi hi radii numerosi cadunt, exuruntur calore.

Sunt in America montes sale albo tecti: ob intolerabilem calorem a reflexu radiorum natum coguntur Incolæ pro aliquo tempore sua domicilia relinquere; donec sol ab iisdem recedens radios suos oblique magis mittat; quo fit, ut obliquius reflexi radii minorem calorem excitent.

Montes habent suas utilitates, quod ventos frigidos avertentes mitiorem aëris temperaturam regionibus concilient. Novi locum, qui a vento borea & euro per montes defensus est. Ibi hyeme quadam in bonis thermometris Fahrenheitianis non notabatur frigus ultra gradus 14 supra 0.; dum in vicinia plerumque 3. 4. 5. supra 0. notaretur.

Sed possunt etiam montes avertere aërem calidum, a calidis venientem locis; hinc excitare majus frigus.

Efficere possunt, ut pravæ exhalationes ex vicinia non adferantur in aliquam regionem; sed ita quoque locati esse queunt, ut impedian, ne regio a propriis purgetur exhalationibus.

Lacus, paludes; in eo tantum differentes, quod lacus sint stagna majora aquæ dulcis; paludes minora (aquam corruptam, mephiticam recludentia.) Lacus etiam quandoque videntur esse dilatata flumina; ita, ut rapiditas fluminis fere quiescat; uti v. c. lacus Lemmannus in Helvetia natus a Rheno, lacus Genevensis a Rhodano, tum similis lacus a fluvio Aar, qui in Rhodanum se evacuat.

Quid hisce in atmosphæra mutetur, patet Consideranti, quanti vapores inde in aërem vehantur, Variant autem vapores hi pro varietate aquarum, inque his contentorum. In Hollandia lacus ingens Harlemensis dictus plurium horarum ambitum æquans; adsunt ibi & alii lacus ingentes, magnitudine indies crescentes,

ubi terra bituminosa pro efformandis cespitibus, Torff, eruitur. Urbes plures, v. c. Amstelædamum, Haga-Batavorum, aliæque, plenæ sunt fossis stagnantis aquæ, in quibus aquæ non renovatæ fœde corrumpuntur & fœtorem in vicinia non tantum, sed aliquando per urbem totam spargunt. Argumentum est, quod vasa & ornamenta argentea, flannea, cuprea ita inde nigrescant & æruginem contrahant, ut nitorem quotidianus labor assiduus tantum iis reddere queat. Cogitate nunc, homines etiam tales vapores in pulmones debere suscipere.

(Generatur in talibus stagnis aëris illa species singularis inflammabilis, quam latius persequutus est nuperrime *Cel. VOLTA* in singulari libello, lingua italica edito, nunc & in germanicum verso. — Pluribus ostendi in adducta paullo prius dissertatione, quam mali effectus ex halitibus mephiticis paludum in sanitatem queant proficisci. Omne dubium circa hanc rem tollere queunt observata circa febrium malignarum indolem, quæ relata habentur in *Cel. LIND Essay on diseases* &c., tum & exactissimæ descriptiones similium morborum, traditæ ab *Inlustri PRINGLE on diseases of the army* &c.; ab egregio *MONROO* in opere, *an Account of the diseases which were most frequent in the british military hospitals in Germany* &c.; a *Cl. PLATTNER* in *diff. de pestifer. aquar. putrescent. exhalationibus*, &c. &c. Collegi juniorum Medicorum in gratiam præcipua huc facientia in singularem libellum, quem proxime prælo committam.)

Flumina multum boni, mali multum regionibus inferre possunt. Quid Nilus in Ægypto boni malive faciat, nostis. (v. inprimis *descriptions itinerum Cl. THEVENOT, d'ARVIEUX, POCOCKE* &c.) Flumina vehunt aquas in uno torrente, ut adeo metus hic non adeo obtinere vi-

videatur oriturorum a stagnante aqua malorum; sed simul inundationes producere queunt: unde provinciæ Hollandiæ, Ultrajectina, & Geldrina, & Transfulania sæpe misere teguntur aquis Rheni & Mosæ, dum vis aquarum deciduis nivibus aucta fuerit.

Variant quoque flumina, uti & fontes, si in itinere misceantur aliis adfluentibus rebus; si transeant hinc inde incunabula metallica varia vel semimetallica, de quorum dein natura utique participant ipsæ aquæ.

Vapores, exhalationes; in eo differentes, quod vapores intelligantur humidi, aquei, uti ab aquosis corporibus adscendentes: exhalationes autem minus humidæ, veluti quæ de accensis corporibus sulphureis, (sed spiritus sulphuris per campanam utique siccus appellari non poterit —) aut de rebus putrescentibus, tum & de salinis nascuntur & spirituosis. (Denuo non video, quæ ea, quæ de salinis & spirituosis substantiis in sublimine adtolluntur, *generatim* vaporibus siccis queant inferi; quum tot subpetant instantiæ, adferentes exceptionem, si proprie quamvis rem adpellare velimus.)

Vapores autem denuo varii sunt pro diversa origine sua: alii enim a mari, alii a flumine, alii a palude surgunt: quam eandem ob causam & exhalationes variant. Quantam sæpe naribus mephitim terribilissimam obferri experimur, dum in itinere animal semieffusum putret! Quam sæpe templa & cœmeteria putridos cadaverum halitus redolent! (vide *Cl. HABERMANN diff. de salubri sepultura*, & *diff. meam Abhandl. von dem Nutzen und der Weise, die Luft rein zu halten* &c.) Quanti vapores & exhalationes a putrido littore maris!

(Patet hinc, quanta cura Magistratibus incumbat, ut causas omnes removeant, quæ aquas stagnantes, paludes putrescentes procreare queant;

quanta cura adferenda sit, ne aër inficiatur exhalationibus pestilentialibus cadaverum. De cœmetæriis ex urbibus removendis toties jam actum; eorum noxa ultra omnem adeo controversiam jam evicta iuit, ut momentorum illorum repetitio sane videatur tædiofa.)

Meteora. HALES, BOYLE, BOERHAAVE, MUSCHENBROEK, aliique clari Viri demonstrarunt, quod, ut terra omnia ex aëre cadentia excipit, sic & rursum aër de terra accipiat universa: adeo, ut terram inter & aërem perpetua quasi fiat revolutio, destillatio adfida.

Aër enim, præterquam quod fluidum sit elasticum & grave; continet omnes vegetantium partes, (subtiles, exhalabiles) spiritus v. c. florum, (rectores, balsamicos, æthereos) qui sæpe per aërem dispersi toties nos recreant; ut Nautæ ex hoc odore se terris (potissimum aromaphoris v. c. Ceylanæ insulæ, aliisque similibus) quas nondum viderunt, propinquos concludant. Vegetantium etiam fermentatorum (& fermentescentium) aër continet spiritus, quorum tanta copia quotidie in auras adscendit; spiritus volatiles, igne chemico productos; olea vegetabilium nativa; olea chemica arte elicitæ, (olea vegetabilium maxime, minori copia & animalium empyreumatica, sub combustionem in altum raptæ); salia plantarum nativa; ipsam vegetabilium terram, uti de altissimis caminorum fastigiis collecta docet fuligo; immo integras vegetabilium partes, minutissima v. c. semina; qua ratione papposæ plantæ in altissimarum turrium perveniunt fastigia (uti v. c. cichorium natum in turri S. STEPHANI), ibique terram quantulamcunque nactæ suas propagant stirpes. Dein continet perspirabilem materiem hominum, animalium plurimorum, exhalationes adscendentes ex eorum omnium stercorebus & urinis, in aperto
aëre

aëre fere evanescentibus: tum vaporem foetidum cadaverum animalium, vel non sepulcorum vel etiam sepulcorum, ex terra emergentem. Putrent enim sub terra cadavera, & vel plane non, vel raro, a vermibus consumuntur; uti semper fieri, homines falso putare solent. RUYRSCHIUS, junior adhuc, sordida veste indutus nocte Vespillones comitatus est, & in sepulchretis sibi aperiri curavit sandapilas, ut cadavera lustraret per viginti, quadraginta, quinquaginta annos sepulta. Multa tum, vix credenda, in cadaveribus detexit, & vidit illa a vermibus non corrota, nisi eorum forrent hominum, qui tempore æstivo sepulti; in quæ dein muscæ ovula sua posuerant: invenit talia cadavera vermibus referta, aureliis ex vermibus mortuis (metamorphosin passis) enatis. Vide *Advers. anat. Decad. 2. sub fin.*

Putrent itaque sub terra hominum cadavera, putridique halitus ex ipsa terra adscendunt in auras; ut in multis templis magno incommodo sæpe experiuntur vivi. Quid quod aër demonstretur gerere insectorum ovulorum milliones millionum, de qua re agere poterō, dum de Vermibus erit sermo. — Salia ipsa fossilia arte chemica fiunt volatilia, & cum aëre miscentur. (Quantane vaporum sulphureorum copia quotidie in auras abit! Immo ne ipsa quidem metalla hic excipiuntur; uti v. c. in arte deaurandi ex amalgamate auri cum mercurio, hic omnis vi ignis in auras abigitur: uti & metallorum terræ, post ea, calcinatione, aut rubigine destructa, superslites demum ventis rapiuntur.

Jungite his heterogeneis aërem inquinantibus, pulverem filicum conminutorum, qui atmosphæram Vindobonensem aliarumque magnarum urbium adeo replet, ut dum extra urbem es, eam, vento validiori flante, nigra quasi nube tectam conspiciere haud raro queas.

(Adtentius paullo causam hanc morbificam juvat considerasse, quum alias in Pathologicis præter-
videri soleat. Utar denuo hunc in finem disserta-
tiuncula, quam *Biblioth. phys. med. Vol. I.* inferui.
Effectus pulveris hujus, platæis nubium adinstar sæ-
pe incumbentis, noxios perspicere quivis facile po-
terit; etsi ex Medicis eorum non longius deduce-
retur expositio: in his enim reconditi nil sane ob-
tinet; quum pulvis talis vi plane mechanica in cor-
pus agat. Pulverem platæarum constituunt maxi-
mam partem lapides terræque ab hominibus, animan-
tibus, curribus, aliisque demum quibuscunque cau-
sis in minimas moleculas redactæ, contritæ; tum &
fordes variæ, animalium excrementa, vegetantium
partes &c., quæ omnia ab adlatis nunc causis, vel
a putredine spontaneaue corruptione pariter con-
minuuntur; tumque a ventis, aut motu externo quo-
cunque in sublime feruntur, per atmosphæram tur-
binis adinstar obvolitantes. Molecularum nunc enu-
meratarum pleræque asperæ sunt, scabræ, pungen-
tes, scindentes, angulis prominentibus cuspidibus-
que præditæ: hinc vero vi mechanica in partibus
queis adplicatæ fuerint, teneris irritationem excita-
bunt, & stimulum ingratißimum, summe moleßtum,
dolentem. Nemini non sat superque notum est,
quam ingrata oriatur sensatio ab inlapsa in oculum
arenula. Jure merito ophthalmias subito sæpe ena-
tas ac lippitudines, quin & subsequenter interdum
cæcitatem ab hoc fonte, saltem aliquoties, licet de-
ducere. „ Morbi oculorum, THEVENOT ait, mor-
bos Káhiræ Ægypti exponens, etiam hic loci grassan-
tur: obviæ maxime sunt, summeque nocivæ; oriun-
tur autem tum a radiis solaribus a terra in oculos
repercutis, eosque exurentibus, tum & a pulvere,
qui

qui Káhiræ penetrantissimus est, ac salus, ventorum ope oculis injecto. Ob hanc ipsam causam Káhiræ tot occurrunt Cæci. Dum ego ipse inibi degebam, Mercator quidam gallicus oculo uno privatus fuit: Galli alii per quatuordecim dies, tresve septimanas hoc morbo fuerunt vexati: ob excessum dolorum summe urentium dormire non poterant, sed diu noctuque clamabant. Æstatis tempore vix non omnes Káhiræ Incolæ ophthalmiis laborant, fasciis cæruleis oculos gerentes obvolutos: adserere omnino licet, inter decem homines, morbo dicto novem esse adfectos.“

Incommoda urbis Bassoræ enumerans *Cl. ORTER, voyage en Turquie &c. T. 2. p. 58.* pulverem etiam nominat, adeo ibi copiosum, ut solis jubar cripiat, clausa optime penetralia subeuntem, oculisque insigniter molestum.

Pulvere vero non soli læduntur oculi; sed & inspiratione inevitabili semperque necessaria in pulmones adtrahitur; ubi nova subpeditat variorum, sæpeque rebellium adversus omnia remedia morborum seminia. Oritur sic magna respirandi difficultas, ab adtracti pulveris, pulmones obsidentis, infarciensis pondere, irritatione deducenda: oriuntur indurationes pulmonum, tubercula, inflammationes, exulcerationes, tales inflammationes excipientes, hæmoptoë, tusses molestissimæ &c. Consona tum rationi tum experientiæ videtur sententia: enasci ex hoc fonte partim frequentem adeo, & vix non endemiam Vindobonæ phthoën; præsertim eam, quæ tubercula pulmonum comites habet. Quo subtilior pulvis est, quo tenuius terreæ saxeæque moleculæ conminutæ sunt, eo & facilius per motum variorum corporum ventorumque vim in sublime rapiuntur, inspirantur, excitandis pluribus pulmonum morbis aptæ redduntur.

tur. Per angustissimos enim licet mæandros pulvisculis hisce vix sensibilibus, interea tamen non minus noxiis, patet via. Experimentis constitit, obvolitantem in laboratoriis Statuariae, Lapicidarum, aliorumque Artificum, qui circa lapides occupantur, pulverem, intrasse vesicam urinariam suillam, aëre, flatu adacta, distentam, firmissime superius constrictam, eamque ad notabilem satis implevisse altitudinem. Narrat DIEMERBROEKIUS, exemisse se multos calculos ex defunctorum Lapicidarum pulmonibus. Invenit & RAMAZZINI calculum majorem, ex minimis particulis concretum, in pulmonibus ancillæ, quæ in Lapicidæ servierat laboratorio.

Ab irritatione, quam excitant pulveris molecule, tam saxæ terreæque, quam aliæ corruptarum sordium, excrementorum putridorum, acrium quorumcunque, rodentium, in alta elevatorum, deduci debent haud infrequenter incommoda alia, queis, suspensis per atmosphæram ejusmodi pulveris nubi- bus, homines infestantur. Coryzam a tali causa exortam & in me ipso & in Aliis expertus fui: efflorescentias etiam cutaneas inde nasci posse, dubitandum non erit; confirmatur id ipsum & observatione illa *Inl.* REAUMUR, qui vidit ab volitantibus pilis rigidulis, erucarum exuviis inhærentibus, oriri molestissimum pruritum, cum subsequa inflammatione, atque in tumores elevatione.

Ab introductis autem in ventriculum acribus, irritantibus, putridis talibus per aërem dispersis, varias generari posse adfectiones præternaturales; & ex observatis conficitur & res ipsa loquitur.

Atque hæc quidem de noxia *pulveris platæarum* in sanitatem actione. — At aliam adhuc morborum mortisque sæpe nimis causam *Cel. de HAEN* hic in-

intactam omisit; *vaporem* puta *carbonum*; cujus itaque examen ex *Bibliotheca* mea illico adducta denuo excerptum, hinc inde mutatum, subplementi loco jungendum duxi. Adducam autem hic funesta solum symptomata; reservatis interim in aliam occasionem illis omnibus, quæ circa rationem, qua vapores illi in corpus agere videntur, circa detecta per anatomen in cadaveribus hoc infortunii genere Enectorum, circaque methodos iisdem ferendi auxilium, hætenus innotuerunt; dubium omne nondum tollentia.

Inter symptomata pessima, quæ a carbonum vapore producuntur, eminet inprimis kephalgia adeo enormis, ut *Ægri* nonnulli enkephalon torculari comprimi, oculos extra orbitas protrudi, vel & enkephalon cranio validissime adprimi, suturas maxima vi ab invicem divelli, clamitent. Vertigine corripuntur eousque valida, ut humi procumbere debeant, sæpe non amplius surrecturi; nec loco se movere queant: anxietates simul his junguntur summa; quæ verbis quidem exprimi minus possunt, quam si earum descriptionem ex singulorum *Ægrorum* relatione quis percipiat; nam plures diverso modo de iisdem conqueruntur: conveniunt tamen Plerique in eo, videri sibi, objecta in gyrum maxima celeritate rapi, oculos autem, œsophagum, ventriculum, aliaque viscera ex suo trahi situ. Sensatio hæc ingrata jam manifestior est, jam & obscurior, pro diversa ratione actionis, indolis copięque vaporis. Conqueruntur, ægerrime sese respirare: cor citissime palpitat, donec ejus ex integro subflaminatus fuerit motus: Miseri tales toto corpore sæpe contremiscunt: oculi adficiuntur hallucinatione, amblyopia, scotomia; aures tinnitu, bombis, surditie: sensus omnes in suo turbantur munere; lei-

popfy-

popfychiæ; convulfiones; paralyfes; apoplexiæ; catalepſes; coma; cataphora; carus; mors.

Merito hinc dixit *Inl.* VAN SWIETEN: „Quin & illi, qui carbonum nidore in loco clauſo exſtinguuntur, & ſuffocari creduntur inſedita reſpiratione, videntur primam noxam in capite percipere; licet tanta virulentia præditus ſit carbonum vapor, ut paullo poſt & vitales functiones omnino deleat, lethali ſyncope.“

Melius vero in compendio antea adlata patebunt ex hitoriis vapore hoc ſumme nocivo Interſectorum: ubi ſimul adparebit, etſi congruerent in quamplurimis ſymptomata, non tamen in omnibus obſervata fuiſſe prorſum ſimilia & eadem.

Narrat WEPFERUS caſum, quem & VAN SWIETEN *Commentariis* inferuit, ex quo patet, ſopore lethali, abs aliis notabilioribus ſymptomatibus nonnunquam exſinctos fuiſſe a carbonum vapore Inſelices. Bini homines, WEPFERUS ait, in conclavi anguſto, nec valde alto, ubi furnus digeſtorius, *piger Henricus* vulgo dictus, carbonibus calefactus aderat, noctem tranſegerunt, & mane ambo mortui inventi ſunt: unus genibus flexis trunco innitens ligneo, manibus complicatis limini fenestræ incumbens, per quam vigil ſpectaverat, habebat ſpeciem hominis ſomno obruti. Alter humi proſtratus ſupinus jacebat, & videbatur cecidiſſe, dum exitum ex hoc loco moliebatur. Verum idem ille ante octiduum per horam circiter in eodem loco manſerat; & dum in aprium venit, titubare cœpit, dein obdormivit, ita ut vix excitari potuerit, cum ſtortore. Ubi vero aqua frigida, faciei & pectori adſperſa ad ſe rediiſſet, credebat ſe ſuaviſſimo ſomno correptum fuiſſe, nullamque anxietatem ſenſerat. Nec, pergit VAN SWIETEN, HELMONTIUS, pro-

proprium infortunium narrans, anxietatis ullius meminuit; sed circa orificium stomachi instans animi deliquium sensit; & dum ex musæo, nidore carbonum infecto, egrederetur, mox concidit, & occipite iniegit gravissime in pavementum lapideum: gustum atque odoratum omnino perdiderat, auresque tinniebant, & per aliquot menses mansit vertiginosus.

Vaporibus carbonum, dum rebus chemicis operam dabam in laboratorio, cujus caminus fumum & vaporem non optime mittebat, sæpe per integros dies expositus, inmani capitis dolore, anxietate circa præcordia, & vomituritione haud raro correptus ipse fui; cessavit dolor subin altero primum, aut tertio demum die: subin citius dissipatus fuit: observavi autem simul, nunquam non frequentissimas adfuisse oscitationes, quæ sexcenties repetitis dolor sensum cedebat. Nonnunquam vomitus accessit: appetitus autem, dum tali adfectione laborabam, summe prostratus erat.

Quatuor homines, ait MARCELLUS DONATUS, angusto carcere in urbe nostra detenti, ferreos cancellos, seu transfennam ignitis carbonibus ignire & emollire tentarunt, fugam inde eripere procurantes, quumque opus adgressi fuissent, lignea fenestra, quæ exterius transfennam muniebat, atque tunc temporis clausa reperiatur, vaporum & fumi, a carbonibus elevatorum exitum prohibebat; unde in carcere angusto fumus totus cogeatur: hinc omnes tetro illo vapore male adfecti concidere; quorum unus penitus resolutus mortuus est, alter vero, qui dolosi hujus inventi Auctor exstiterat, sine loquela stupidus, ac immobilis per horas viginti tres facie mortua permansit; tandem, apertis oculis, confusus, & sine ratione resolutus, fere totus delirans loqui

cœpit, sed postea, feбри indeficiente, laterisque dolore, & tussi molestissima subsequuta, exstinctus fuit: reliqui duo longo temporis tractu, multisque opportunis adhibitis remediis, ope excellentis viri *D. Antonii CAPRIANI* Medici convaluerunt.

Binas etiam historias hujuscemodi Infeliciū *SCHENCKIUS* refert. Erat homo, ait, ex iis, qui laneos birretos super ligneas formas extendunt: hic hyberno tempore, quum madentes multos, ut moris est, extendisset; exsiccandosque hypocausto hujus muneris gratia parato, inposuit, atque succensis carbonibus abiit. Pueri bini, ei in arte ministrantes, quum cœnassent, ut calefierent vaporarium ingressi, somno correpti, intus totam noctem transegerunt somno. Mane surgit Magister; ambos sine sensu & motu humi procumbentes reperit; faciem tamen non mortui referentes, sed dormientis. Hos ego quum invisissem, non penitus pulsu destitutos inveni, tamen brevi morituros pronunciaui; malum enim altius radices egerat, paulatim vero vivido colore faciei deficiente vesperi exanimis omnino sepulturæ traditi sunt.

Altera historia sequens est. Anno quoque 1575 *Fabri ferrarii* bini *Filii* in *gabiana vil'a* commorantes, quum per sex horas in thalamo cubassent, quem Pater calce dealbandum curaverat, carbonisque accensos indiderat, ut citius exsiccarentur parietes; resoluti sine sensu & motu reperti sunt; aliquali tamen vitæ residuo remanente, ut ex pulsu & vivido faciei colore deprehendebatur: quo paulatim exstincto non nisi per multas horas delituit, ita ut nulli dubium relinqueretur, ipsos apoplexia correptos concidisse. Quod postremo exemplo alio clariori confirmare libet. *Alexius CHIAPONUS Manianus* quum Bononiæ Jurisperitiæ operam navaret, accen-

lis in thalamo carbonibus, ut frigidi aëris inclementiam arceret, fenestris, januaque optime clausis, fludere cœpit: paullo post Confocii ad cœnam ipsum advocant, quumque remorantem minimeque respondentem animadverterent, ostio cubiculi reſerato, illum sensu & motu destitutum, in terra prostratum, spuma ore madente reſeperunt. Medicos statim advocant, qui capiti multis adhibitis præſidiis, tandem candenti ferro in occipitio inuſtere, ſicque ſenſum & motum recuperare cœpit, ac tandem ſanitati reſtitutus adhuc vivit &c.

RHAZES recenset hiftoriam duorum Famulorum cujusdam Pharmacopœi, qui Mediolani ex fumo carbonum thalamo incluſi exſtincti ſunt.

Cafus ejusmodi infelices adnotarunt HILDANUS, LANCISIUS, MUSA BRASAVOLUS, AMATUS LUSITANUS; BOERHAAVIUS &c. ex quibus & in citata diſſertatione ſelectos exhibui, quos hic compendii cauſa intactos prætereo. Fato functi hoc mortis genere ROMANI in Campania; ZOE martyr; QUINCTUS LUCTATIUS CATULUS, uti CICERO, JUVENALIS, VALERIUS MAXIMUS, FLORUS, PLUTARCHUS, S. AUGUSTINUS referunt: tum JOVINIANUS Imperator, EUTROPIO, SOZOMENO, PHILOSTORGIO, ZONARA, NICEPHORO, HIERONYMO Presbytero, AMMIANO &c. referentibus. (*)

Notior eſt, quam ut latius referri debeat triftis illa Hiftoria, HOFFMANNO, TANNÉNBORGO, AUCT. Actor. Wraſſlav., WOLFIO, Aliisque plu-

(*) Diverſa quidem eſt circa JOVINIANI mortem Auctorum ſententia; dum Alii nimix vini ingurgitationi, Alii fungis venenatis, &c. Plurimi vero carbonum, in cubiculo calce recens obducto expoſitorum, vapor eandem tribuant.

pluribus descripta, Studioforum Jenensium, qui anno 1715., thesauros eruturi, carbonum vaporibus fuerunt occisi; manifesto sane tam summæ vaporum horum noxæ: quam & insanix vulgi, dæmoni gazophylaci illorum tribuentis interitum, argumento!

Plurimæ aliæ in Antiquiorum æque ac Recentiorum monumentis, tum & omni vix non anno in Diariis publicis occurrunt observationes, quæ summam carbonum vaporis vim deleteriam evincunt.

Aëris præterea corruptelis adnumerari utique debet *gas illud sylvestre Helmontianum*, ex potentis fermentantibus ingenti copia adscendens, deleterios non minus, & subito præfocantes edens effectus; multiplicibus infortuniis celebre, circa cujus indolem Physicorum industria nunc potissimum occupatur. Pertinet huc demum *aër diu reclusus; mephiticus &c.*)

§. 753. *Venti autem agunt &c.* Ventus est aëris ex tam variis substantiis compositi, seu partis atmosphæræ, ex loco, in quo erat, in alium facta translatio. Ventus igitur ab aëre non differt, nisi ut fluvius a lacu. Ventus nobis adfert illa corpora, quibus aër in remotiori regione, unde venit, satur erat (& corpora in nostra vicinia exhalantia a nobis aliorsum vehit) Intelligitis proinde, quam ventorum sit necessaria cognitio Medicis, quum pro vario loco, unde advehuntur, (& pro varia violentia) varia edat effecta in corpus humanum.

Venti quadrifariam dividuntur: 1) in *generales & constantes*; quales inter tropicos; 2) in *periodicos*, in mari indico, & in Græcia; 3) in *marinos & terrestres*, 4) in *vagos & variabiles*, quales extra tropicos.

Historiam ventorum non dilucidatam suo tempore querebatur VERULAMIUS, idque observationum defectu. Nam singulis in locis observatio variat. Montes,

tes, sylvæ, maria sæpe hujus varietatis deprehenduntur causæ. Hinc Medici foret, ut loci, quem incolit, ac circumjacentium exactam chorographiam sibi compararet; quod olim jam nos monuerat HIPPOCRATES.

Prudentia tamen in his opus; sunt enim regiones, quæ, versus septentrionem densa sylva, aut montibus tectæ plurimum, a vento septentrionali non adficiuntur. Sunt & regiones, quæ a parte illa nudæ, ut Hollandia, & Seelandia, pessime habeant ab iisdem. Sunt regiones, quæ vento occidentali vel austro patulæ, mari vel lacubus expositæ, maximum detrimentum inde experiantur. Hinc de ventis dici nihil generaliter potest.

Id de ventis in genere dicam, eos nostram atmosphæram continuo mutare. Sit ær calidus ad grad. 75. silente omnino vento, ut ne arborum quidem folia vel tantillum moveantur. Expositi huic aeri calorem enormem conquerimur. Venit paullo post ventus, isque sensim crescit. Grato illo nos adflante vento, omnes cogitamus, eum adtulisse ærem frigidior: tamen non est ita, neque thermometron mutationem ullam fere demonstrat. Ratio est, quod calida nostra atmosphæra, semper minus calida quam nos, a nostris exhalationibus magis magisque incalescat, & respiratori incommoda fiat. Si jam ventus oriatur, amovet is continuo a nobis calidam nostram atmosphæram, & substituit omni momento aliam frigidior.

Intelligitis adeoque, quomodo ventus queat nocere homini disposito ad inflammationem. Habeat quis dispositionem inflammatoriam in sanguine: calida atmosphæra laxa servat vasa, ita, ut causa proëgumena silens maneat: verum accedit ventus auferens continuo illam calidam atmosphæram, eique omni momento frigidior substituit. Vasa olim mollia, laxa, fiunt rigidiora,

diora, duriora: transitus incipit denegari per minima constricta vasa: cor pergit agitare sanguinem, propellere quasi vi conatur eundem; hinc causa proxima nata est inflammationis; nata ipsa inflammatio.

Agunt & venti in corpus humanum motu, dum pulmoni vim adplicant majorem. Aër enim sudus & stagnans agit in pulmones solo pondere: sed quando aër agitato jam v. c. duplicato motu in pulmones incumbit, pulmones ab illo aëre plus patiuntur, quo se plus moverint: ita, ut homo, licet commode inspiret, vix possit expirare, si in adversam procellam gradi cogatur: expertus aliquando ipse fui respirationem talem dolentem. (Evadit hæc respiratio eo magis laboriosa, si simul adscendere debeamus locum adclivem, obverso furente vento, nube aut humida pluviosa, aut pulverulenta cincto; quo in casu nonnunquam vix non omnino impossibilis redditur respiratio; violentum inde natum vidi dolorem laterum.)

Optandum foret, ut plures HIPPOCRATES, VERULAMII, MARIOTTI, CRUCQUII (HUXHAMI, SWIETENII &c.) unita opera in variis telluris plagis notarent ventos, eorumque naturas (cum excipientibus eos constitutionibus morbosis; aut natis, aut ingravescentibus, aut emendatis)! Completam forte sic historiam adipisceremur ventorum: maxime quum ita variant. Subsolanus v. c. Batavis salutaris, noxius Anglis. Immo in eadem regione, alteri civitati salutifer ventus, alteri adversus. Idem ventus certo quodam tempore bonus, longiori tempore durans minus bonus. Ventus septemtrionalis & barapetiotès, *Noord-oost*, Batavis aërem adferunt ex septemtrione frigidissimum; eoque tempore serenitatem salubrem adducunt. Si pergant nimium, totum quasi septemtrionem adducentes, calamitosas produxere hyemes.

Refert novisse, quid adferat ventus ad aliquam civitatem supra lacus aut paludes adiens, quantumque ab eo differat ventus ad aliam urbem per viciniam salubrem, siccam, amœnam adpropinquans.

(„L'air de Basra, *Cl.* OTTER ait, *Voyage en Turquie* &c. T. II. p. 58. qui locus huc adpræme quadrat; est très-pur, & les nuits sont fraîches quand le vent du Nord souffle, ce qui arrive assez régulièrement dans le tems des plus grandes chaleurs, sans quoi il seroit impossible d'y vivre; car, quand il vient du côté de la mer, on est sans force & tout languissant, s'il dure deux fois vingt-quatre heures.“

Jungam huic observationi aliam adhuc, nam adferre ex optimis imprimis Itineratoribus possem plurimas, quæ debetur *Celeb.* ZIMMERMANN von der *Erfahrung* 2 B. S. 226. Einer der größten Männer unser's Jahrhunderts lächelte über die liebliche Verrückung der Aerzte, die in ihren Büchern ordentlich entschieden, was der Ostwind oder Nordwind würde; da doch jeder Wind allemal dasjenige in jedes Land bringt, was auf dem ganzen Striche liegt, woher er bläset, und jeder Wind also nach Verschiedenheit dieses Striches verschieden ist.“

Adtendendum autem, id maximam partem de vicinioribus valere plagis, quas ventus adveniens pererrat; quum vix vero videatur simile, ventum, qui v. c. e regione quadringentis milliaribus a nobis dissita ortus, ibique trans mare latus, dein autem siccas ardentisque plagas peragratus fuit, humiditatem adhuc omnem illam maritimam nobis esse adlaturum; plures hunc in finem instantias adtulit *Cl.* ZÜCKERT *Abhandlung von der Luft und Witterung* 1c. p. 27. &c.)

Adtendere juvat hac in re ad magni HIPPOCRATIS sapientiam. Illyrii & Græci consilium prophylacticum ab illo petierunt contra morbum quemdam epidemicum, quem pestem vocabant, quemque aëre communicatum iri secum timebant. Illyriis consilium aptum dare non potuit, sed Græcis quidem. Morbus, inquit, sævit retro hos montes. Hi quidem alti montes possent avertere a Vobis aëra pestiferum, nisi idem aër liberiori aditu potiretur per fissuram quæ dividit montes. Ubi ergo etesiæ spirabunt, hi venti aërem inquinatum ad Vos per hanc aperturam adferent. Hinc hæc pylas, sive hanc portam obturate. Legitur hoc consilio Græcos præstitisse immunes. Nec egit aliter HIPPOCRATES, nisi ex sola peritia chorographica locorum: etesiæ enim erant venti statis anni redeuntes temporibus; hinc circa illud tempus metus erat, ne morbus Græcis adveheretur.

(Refert etiam VARRO *de re rustica* l. I. c. 4., se Corcyram insulam a majori peste liberasse, seu præservasse, obstructis iis fenestris, quæ austrum spectarent, & apertis, quæ vergerent ad aquilonem.)

Notandum hic quoque, etesias alias Græcis esse saluberrimas: verum salubrem huncce ventum præfagebat HIPPOCRATES eo anno fore calamitosum, quod ad Græcos haud adpelleret, nisi spatia peste infecta primum emensus, adeoque ducturus secum aërem infectum.

(„Certa observationum fide constat, ait FRID. HOFFMANNUS *Med. rat. syst.* T. II. P. II. c. 4. §. 25. *schol.*, quod tempore pestis illa gravius sæviat, ventis flantibus ex austro & oriente; sub flatu vero septemtrionalium statim remittat.“

Addi quidem capiti huic de aëris influxu insanitatem multiplici possent adhuc plurima; quæ tamen

men omnia, ne additiones præfixos operi limites transcendant; in aliam occasionem reservare invitus debeo.)

§. 754. 755. 756. *Cibi quidem, & potus, &c.* Subponimus hoc loco hominem sanissimum, magno appetitu valentem, cibus utentem optimis, sed copia tantum nimis. Huic dicimus ventriculum extendi. Nostis ex physiologicis, ventriculum moderate repletum tumere, in anteriora adsurgere, & tandem actione ejusdem musculosa, nervosaeque liquidiora sensim pelli & dilabi per pylorum, qui in hac ventriculi dispositione patentior est orificio superiori. Jam vero ventriculo distento nimium, etiam ad pylorum resistentia augetur, sanguis per vasa compressa circuitum suum non rite obit, adeoque vita partis minuitur; nervi pressi difficulter aut vix agunt; ita, ut ventriculus fiat quasi sacculus paralyticus, oraque ejus exacte ac veluti convulsive claudantur: fibræ enim orificiorum, quibus vis infertur, reagunt & ventriculum claudunt.

Hoc statu *dilutio, digestio, contritio, separatio, expulsio humorum prohibetur*. Quia in statu mox descripto actio ventriculi iners est, & quo hic status diuturnior, eo tetrius malum: nam clausa ingesta, aëre mista, magis rarefcunt magisque: ut compressio vasorum & nervorum omni momento arctior fiat. Etenim rarefacta agunt, ut mole aucta: ergo ventriculus magis magisque extenditur. Crepuisse ventriculus ita visus est sui voracissimo.

Inde dyspnoëa, quia diaphragma a tumido ventriculo sursum truditur, & in sua actione a tanta subiecta mole impeditur: unde pulmonis dilatatio ut plurimum prohibetur, quum in suo descensu valde impediatur. (Uti etiam eadem ex ratione dyspnoëa post adsumptos flatulentos cibos, aut potus, qui, rarefcentia aëris extricati, eosdem effectus producere apti nati sunt,

quos ab nimia eorum quantitate observare alias solemus.)

Circuitus humorum perversus. Ipsa aorta succumbens turgido ventriculo impeditur, quo minus debitam sanguinis copiam ad inferiora mittat; unde tanto major copia per carotides & vertebrales caput petit. Vasa quoque coeliaca in substantia ventriculi, & sub ventriculo, compressu suo efficiunt, quo minus sanguis arteriosus libere effluat per eadem. Venæ e ventriculo sanguinem excipientes flaccescunt.

Cruditās; crudum & coctum frequentis in Medicina usus, adeoque bene explicanda. *Coctum* in ventriculo alimentum vocamus tunc, quando per vires & proprias suas & adjurices, ventriculus cibos mutat in talem pultem, sive humorem, qui naturam induere humanam incipiat; ita, ut humoris inquilini prima indispiscatur rudimenta. Sic vocatur bonus chylus paratus ex alimentis solutis, maceratis, ex succo gastrico, glanduloso, salivali. Sin vero alimenta maneant in ventriculo parum soluta, parum macerata. vix mutata, nisi quatenus ad indolem propriam accedunt, adeoque ab humoribus animalibus aliena maneant, ineptaque ad nutriendum; *cruda* vocantur.

Cruditās ergo hic obtineat necesse est, quum ventriculus exceperit modo alimenta, non vero mutet eadem; immo turgescens magis magisque in unam eandemque compingat molem; ita, ut alimenta ibi hæreant tanquam inertis vesicæ inclusa.

Ructus, ab aëre rarefcente, & ventriculum expandente; vi quasi & furtim orificium superius reserante. Ructus hi momentaneum solamen adferunt, & quo plures liberati fuerint, eo majus; quum elastico aëre ventriculus hac ratione partim liberatus, minus tumeat. Sæpe tamen ne minima quidem aëris prodire valet quantitas.

Nausea, ab humore crudo, acri, calido, mordente, atque vellicante nervosum orificium superius. Forte etiam ab eadem materie vellicante cæteri dispersi per ventriculū nervi irritantur. Constat enim, materiæ copiam vix tantillam adplicatam ventriculi nervis posse nauseas excitare, experientia Sydenhamiana id confirmante.

Cardialgia. Vox hæc sæpius recurret in pathologicis, sed nata a diversis causis, licet idem nomine morbus. *Καρδιά* Veteribus denotabat præcordia, seu loca cordi proxima, quumque os ventriculi superius nervosissimum, cordi proximum sit, id etiam dixere *καρδίαν*, ejusque dolores *καρδιαλγίαν*. Est certe locus hic multarum ærurnarum sedes, ut in morbis nervorum explicandis videbimus. Sufficit hic monuisse, locum illum ita intus pressum, ita extrinsecus compressum, aliquando vehementer oportere dolere.

Vomitus, est nausea protractior, eaque in actum ducta: quid autem (proprie) sit vomitus, suo dicetur loco. Magno utique hominis bono tunc vomitus fit, alioqui nonnunquam interituri. Ast vomitus non fit, nisi convulsi muscoli abdominales & diaphragma ventriculo vim intulerint, irritaverint, & resistantiam oris superioris ventriculi superarint. Profui talibus Helluonibus, dum, metuens, ne, si non vomerent, suffocarentur, si autem violentius vomerent, forte apoplectici fierent; profui, inquam, illis plumulâ oleo illita fauces lenissime titillando: unde blandus vomitus sequebatur, præsentaneum mox adferens levamen.

Res certe facilis adeo non est, vomitum ciere onuslo & jam spasmodice clauso adeo ventriculo: lethalis inde apoplexia oriri visa est; quum jam sanguis majori copia præsens in encephalo, ut mox vidimus, aorta compressa: violenta etiam vomitus actione longe copiosius vehementiusque adprimitur. Immo exempla

sunt rupti ventriculi aut oesophagi; quale tristissimum exemplum nobis descriptum reliquit BOERHAAVIUS.

Putrefactio: in sano homine moderate comedente alimenta cujuscunque generis a vi homini huic propria virtute fabricæ ventriculi vertuntur in ejus naturam; non ergo in acidam, non in alkalinam, non in rancidam, sed in humanam naturam. Verum ventriculus maxime infarctus, qualem nunc describimus, in contentam materiem nihil agere potest, nihil eidem admiscere.

Sequeretur nunc, ut non mutata a ventriculo acefcentia vertantur in acidum, alkalescentia in alkali: cur ergo textus folius putredinis, id est alkali, meminit, & non acidi? Ob gravissimam rationem: vidimus antea in explicatione acrimoniæ ita rem se habere, ut acefcentia in acidum, alkalescentia in alkali abeant, dum ventriculo excepta mox mutantur ab illo. Verum ibi consideravimus flaccidum, debilem, inertem, contentis non turgentem. Alia longe res est in præfenti casu: non agit quidem ventriculus in ingesta, mutaturus illa in naturam humanam; sed, quia nimis repletus, hinc primo fortissime constringit eadem, adunatque in unam massam. Dein rarefcente massa in loco calido occlusa, ita extenditur ventriculus, ut tonum amittat; ergo manent alimenta adpressa sibi invicem, compacta. Porro extra corpus humanum vegetabilia acefcentia, ut gramen & fœnum, immo acida ipsa, ut acetosa, in acervos collecta, compressa æque in putridum, rodensque alkali abeunt, ac ipsa cochlearia, allium, cœpa, aut raphanus. Toties in Hollandia contingit, rusticorum ædes & bona flammis perire, dum fœnum in acervos compactum incipit in hanc rodentem alkalinam naturam abire, & prægresso empyreumatico fœtore (& incalescentia, mali totius causa) in

in flammam erumpit. Qui sapiunt, solent percepto illo foetore disjicere acervos, foenumque exponere aëri. De industria facta in Chemia experimenta cum acetosa idem demonstrarunt.

In ipso animali corpore hoc fieri patuit ex instantiis boum, peste bovum enectorum, in quorum ventriculis gramen & foenum adeo vidi putrefactum & rarefactum, ut ad exitum sibi viam praecluserit, utque animalia illa quasi exusta interne viderentur; immo ut tunicae ventriculorum gangraena nigrae & separatae per magnas lacinias inde extraherentur.

Capitis ergo facile, quanta hic nascatur putredo in loco tam calido, si ventriculus diu ita maneat.

Vertigo, confusio. Ex ante dictis patet. WEPFERUS integro tractatu de apoplexia de hac re agit.

Cachexia. Est maxime notandum, quod si diu illa ventriculi expansio & constrictio duraverit, & demum homo ægre ab illa sarcina liberetur, quod, inquam, sæpe diu poenas luat ingluviei. Ut enim homines, qui urinam diu retinere, ischuria laborant, quia vesica ita extensa amisit vim contractilem; sic & ventriculus (atonus fit.) Hinc, licet a sarcina liber, non contrahitur: & quia a bono chylo bonus sanguis; a bono sanguine, bona nutritio; hinc chylus non elaboratus a ventriculo manet crudus; sanguis quoque crudus non habet id ultimum nutriendum: hinc homo desinit nutriri, cachexia oritur.

Neque a cibis tantum id malum; sed & a vino copiosiori, (inprimis a cerevisia non bene defœcata ac a musto, ac hydromelle.) Quin & ab ipsa aqua copiosissime ingurgitata: exempla talia notata sunt in Potatoribus aquarum spadanarum: perinde enim est, qua materie ventriculus ultra tonum expandatur.

Quæ omnia vitia &c. Regem corporis ventriculorum merito vocat SERENUS SAMMONICUS. Characterem

rem ille primum humanitatis inprimit crudis adsumtis. Ille eadem sic præparat, ut per reliqua organa chylo poëtica queant in chylum converti nutritivum. Si prima officina deficiat, reliquæ officinæ excipiunt non nisi inepta. Hinc homines tales nutriri desinunt; choleras, lenterias patiuntur; de quibus post.

Vidimus antea omnia, quæ hominem per gradus ducere queant ad apoplexiam. Cura est, provocare penna oleo illita fauces irritante, vomitum. Leviores ructus si oriantur, jam levamen adferunt, & tandem vomitus sequitur, irritationem sæpe repetendo. Sic octuagenarium Helluonem ab imminente jamjam apoplexia liberavi.

An autem convenit in hoc casu venæsectio? Quæro hoc, quum & hic, & in Italia, & in Gallia recepta sententia sit, quod si a sanguine apoplexia, vel minæ ejus ingruant, venæsectio conducatur: si vero a ventriculo repleto, venæsectio occidat. Contigit mihi vocato ad Magnatem, qui vehementer oneraverat ventriculum, & vertiginosus jam minabatur apoplexiam, ut, me venæsectionem imperante, Princeps, qui ibi pransus & adhuc in ædibus aderat, cæteris Magnatibus adfereret, actum de viro illo esse, ubi audiebat, venam illi secari; quod tamen falsum fuisse, jam tertius annus ostendit. Confirmabant tamen tum temporis cæteri Nobiles Principis sententiam.

Profecto si ita repletur ventriculus, ut producat enarrata symptomata, jam morbus cerebri est, a vasis ibidem turgentibus, & medullam comprimantibus; eo, quod per compressam aortam, coeliacam &c. sanguis transire nequeat. Si diu status hic maneat, erit apoplexia ischyre. Des nunc homini huic emeticum; an non auges motum ad caput, ut possent vasa crepare, & homo inde mox mori? Cur SYDENHAMUS volebat venæsectionem præmitti emetico, si utrumque in-

indicabatur? Ob hanc ipsam causam: sed si facile & illico homo potest ad vomitum perducī, si potest dein aqua tepida aut potu Thée ad copiosiores & faciliorem vomitum perducī, optimum est.

Sed in hominibus, qui sæpius regulas diætæ excedunt, & ventriculum nimium obnuunt, sit immedicabile malum, de quo textus. Omnia tunc sunt, quæ in textu enumerantur; siqua medela, hæc tentanda nutritione parca & crebra, & facili (cupepta) remediisque roborantibus.

An jam miramini, ab indigestione, ac repletione ventriculi paroxysmos excitari epilepsiam, podagræ, cephalæ, ophthalmiæ, cardialgiæ, asilmaris? &c.

(Difficillimus casus est, dum ventriculus non solum nimium oneratus, sed & ejusmodi rebus intarctus fuit, quæ & ponderis sensum excitant, & viam sibi una cum aliis ingessu admissis præcludunt. Talis casus scilicet mihi obtulit in homine ex plebe, qui magnam quantitatem panis recentissimi, cerarum cum nucleis, & cerevisiæ ingesserat:angebatur clapsis paucis horis adeo, ut ventrem sibi discindi ardentissime flagitante: facies collumque ruberrima, ut in Strangulato: Abdomen tumidissimum, disynocha summa; cæterum nec ructus, nec flatus. Jussit hic omnium primo secari venam ad unc. circiter viij., tum injici enema ex mera aqua tepida sale acuta; haurire præterea debuit sexrarium scilicet dimidium olei lini recentissimi, vasaque aliquot infusi chamomillæ; fauces irritatæ plumula oleomadida. Factum sic, ut orto vomitu magna quantitas nucleorum panisque, oleo lubrica reddita via, eicerentur: respirio tum facto liberiore enemate quoque, præter multos flatus, evocatæ simul faeces: homo vitæ manifestus, & certo sane ereptus periculo.)

§. 757. *Quodsi defecerit in inedia absoluta, equidem quum merus sit defectus, per se nihil efficit: nam est mera tantum privatio.*

Attamen homo debet vivere, exercereque actiones vitales, animales, naturales. Atqui ipsa vita per suas actiones se destruit ipsa, novis alimentis continuo non resecta. Vita ergo hominis inediam diuturnam observantis; vita illa, quæ motus perpetuus est, mutat humores, dissipat subtiliora, reliqua figit, ad tritu continuo acriora reddit, adteritque solida; ita, ut mors insequens potius adscribatur vitæ se ipsam destruenti, quam quidem inediæ.

Hinc bene textus: *sed tum interea temporis actiones vitæ — — — anhelitum sedant: quæ quidem omnia certissimis nituntur observatis.*

(TSCHIRNHAUSEN, *Med. Corp. p. 23.* postquam ad tertium diem cibo abstinuerat, observavit, dentes sibi vacillasse, os universum acri saliva inundatum fuisse, &, quum manderet, os acriter doluisse. Judæis hac ex causa halitum foetentem esse, passim adnotatur.)

Hinc spuma salina, acris, biliosa, putrida; in ventriculo inprimis & in intestinis. Bilis & pancreaticus latex in intestina ferri consueta, jam flaccidis aliquando intestinis, maxime duodeno, eo, quod nil alimenti a ventriculo excipiat; sæpe ad plicatas valvulas jejuni remoram offendunt, facileque sursum repunt ad ventriculum, per laxum eo tempore pylorum. Bilis & pancreaticus succus, humores ambo summe animales, in alkalinam corruptionem proni maxime sunt, si non diluti commercium cum aëre habeant. Id porro hic obtinet. Neque modo in ventriculo id fit; sed superflite actione ventriculi & intestinorum humor ille corruptus a ventriculo defertur ad intestina, eaque eodem foetore inficit, simulque corrumpit succum entericum.

cum. Est res in morbis acutis adtente consideranda. Hinc diluentia in acutis, non tantum ut sanguis diluatur, sed & humores in ventriculum & intestina adfluentes: unde Ægrorum, qui non bibunt, periculum augeatur necesse est.

Spuma autem, in textu notata, nascitur, quia nullum alimentum adest, sed solus aer, mistus cum saponaceis, corruptis humoribus.

Ructus, nausea, animi deliquia. Stimulat enormis illa primarum viarum acrimonia intestina & ventriculum. Nervi hinc in spasmos aguntur: ructus inde nascuntur nausæque; foetorem suum proprium abominabilem ultra vix ferens homo animo linquitur; maxime si consueverat a foetoribus animo linqui, aut mobile habeat nervosum systema. Utique sæpe in hominibus brevi morituris observantur animi deliquia a debilitate, viriumque defectu; quæ animi deliquia mortem brevem adfuturam denuntiant; ita & hic idem a debilitate potest contingere.

(A debilitate sane, ac irritatione per acrem stimulum frequentius orietur animi deliquium, quam ab illo foetore: nam adest sæpenumero syncopticus accessus citius, quam ullus adhuc adsit foetor manifestus; inprimis in subjectis acredine humorum aliunde laborantibus. Confirmatur id ipsum & instantia venenorum acrium, tum vermium sola irritatione mechanica, nullo foetore pessimas leipothymias toties excitantium. „ Adstipulatur experientia, bene monet HOFFMANNUS, *M. R. S. Tom. I. l. 2. c. 4. §. 2.*, Eorum sanguinem, qui diuturnam inedia perpeffi sunt, in excrementa falsa ac biliosa, quæ per alvum, urinam, & sudorem ejiciuntur, converti; immo gelatinosum suum ac dulcem habitum prorsus deponere.“ — Patet nunc facile, hæc omnia maximam per totum tubum alimentarem factura esse irrita-

ritationem, sufficientem utique producendo, in corpore potissimum sensiliori, animi deliquio. Plures novi homines, qui, dum carendum illis erat consueto jentaculo, binis circiter ante meridiem horis animo linquerentur. Fœminis nonnullis haud infrequens, producta magis graviditate, id symptoma est.)

Ingens & atrox adpetitus. Nervi continuo stimulantur; unde adpetitus hic est quasi motus naturalis a stimulo acri irritatus & incitatus, ut accipiat, quod diluat obtundatque stimulum. Forte bilis amaror quoque talem adpetitum excitat, uti amara sæpe in multis hominibus languentem excitant adpetitum.

(Atrocitas adpetitus aucti satis omnino evincitur tristissimis illis instantiis, ubi deficiente, in obsessis urbibus &c., omni plane alimento, coacti fuerunt homines, ut comederent morticina, animalia quæ natura alias nunquam non horrere solet, coria, humanas carnes, immo, ut Matres occiderent proprios Infantes, dilaturæ eorum carnis ope fatalem horam.

Nova tum sæpe oritur maiorum syndrome, quando, alimenta nunc demum adepti, homines ea immoderate ventriculo injiciunt potius, quam adsumunt. „Nota, FORESTUS ait, l. 18. *Observ. 2. schol.* est Multorum historia, qui a longa inedia sese repleverunt adeo, ut inde suffocati fuerint; uti nos cognovimus in obsidione Harlemensi & Leidana id præcipue contigisse, quando obsidione liberati Cives, victu pleniori se replentes, mortem quam plurimi incurrerunt. Denique non ignotum est, Milites, ex castris in hybernia secedentes, liberaliter passos, ex corruptela ciborum in debili admodum corpore, in febres pessimi moris stomachicas & caput validissime adficiētes incidisse.“ — Patet hinc, noxam ingentem nos adferre posse homini famem diu perpeffo,
sub-

subpeditando eidem majorem simul & semel alimentorum, inprimis panis sequioris notæ, copiam: nam omnis repletio nimia mala, panis autem pessima.)

Ejusdem deinde integra prostratio succedens; ubi vellicatur diu & erosus ventriculus, tandem fit iners, insensibilis, stimulo ultra haud excitandus; quin jam gangrænosus sæpe factus fuit.

(Hinc & post jejunium diutissime toleratum haud infrequenter omnia dein alimenta ingesta, sive fluida sive solida sint, sive eupepta sive dispepta, rejiciuntur; ad summum jam debilitatis ac atoniæ gradum deducto ventriculo. Quædam vero intercedit diversitas ratione intervalli temporis, per quod, donec moriantur demum, durare homines, aut animantia queunt; a robore solidorum, indole, crassique fluidorum, vitæ genere, corporis mentisve exercitio aut requie, climate, ætate, sexu, anni tempore, idiosyncrasia, potissimum dependens. In experimentis *Redianis* abs cibo & potu capones vixerunt diebus quinque, septem, octo & novem; unus, cui semper adposita aqua, ad viginti quatuor dies vixit; columbæ vixerunt diebus duodecim, & tredecim; aquila regia diebus viginti octo, alia, ardente Sirio, uno & viginti; canes abs omni cibo & potu diebus triginta quatuor, & diebus triginta sex; catellus calidissima æstate diebus viginti quinque, diutius duraturus, nisi ingenti fame stimulatus ex fenestra profiliisset; felis *Zibethi* diebus decem; felis magna sylvestris diebus viginti; gazella totidem; melis hyeme mense integro; mures ad summum diebus tribus (*); testudines ter-

re-

(*) Delicatham satis mures vivunt vitam: nam & frigoris & caloris excessus omnis eos illico necat, observante *Inl.*

restres ad menses octodecim, viperæ ad decem &c. Prostant exempla hominum, qui quatuor, qui & octo diebus abs cibo vixerunt, etsi potu tamdiu carere non potuerunt: ut eos hic taceam, qui per plures annos abs cibis vixisse perhibentur: eorum enim historiæ exactius requirunt examen.)

Postea inumanis sitis, ob humorum diluentium defectum, præsentium acrimoniam ardentem.

Siccitas; prius præsentis humores abierunt; novi non adveniunt, nil subpletur.

Debilitas; quia nervi desinunt succum nerveum suum a cerebro accipere; quia & pro deperditis ultimis solidis ex fluidis elementa nova ultra non subpeditantur; quia demum nervi præ siccitate non sunt amplius permeabiles, aut saltem inepti.

Tormina, borborygmi. *Tormina*, quia his hominibus ventriculus & intestina nuda sunt; adeoque acrimonia nunquam non adluens nervis sensum inprimit doloris. Dolent maxime; quum *Franc. REDI* invenerit in animalibus, inedia studio enectis, partes has nitidas, deterfissimas. Quapropter consilium dedit, ut homines, qui purgandi forent, quo ventriculus illis mundaretur & intestina, ut, inquam, potius jejunent, quam purgarentur (medicamentis); quum a jejunio nitida adeo redderentur intestina.

(Ver-

PRIESTLEY, *Experiments and observations on different Kinds of air*, T. I. p. 10. edit. 2. Cæterum notatu dignum est, eos aqua abs vitæ periculo carere posse, nec oblatam tangere. „I found, ait PRIESTLEY, to my great surprize, that mice will live intirely without water; for though I have kept them for three or four months, and have offered them water several times, they would never taste it; and yet they continued in perfeæ health and vigour.

(Verba REDII hæc sunt: „ Quam autem nitida sint animalium, fame hecatorum, viscera, vix credi potest: quod documento esse deberet, *jejunium apte institutum, tutissimum esse remedium restaurandis visceribus hominum*, intricatissimisque nostrorum corporum canalibus, ac flexuosis meatibus detergendis.“ — Controversiam quidem nullam patitur, fame enectorum animantium intestina esse, posse nitidissima: interim tamen facile videre est, multum abesse, quin in omni casu jejunium in usum vocari queat, ubi remedia indicantur cathartica, vel & eccoprotica; utut minime negarim, subin emendari, vel curari eo symptomata nonnulla ab indigestione post ingluviem enata.)

Borborygmi (*): vocantur sic ventris latrantis murmura. Aër enim semper in cavo intestinorum adest, descriptis antea halitibus putridis foedatus. Acrimonia valida adplicata partibus nudis, contractionem excitat in illis, qua aër tunc intercipitur: at rarefscens ille destruit suos carceres, & alium in locum cum sonitu se recipit.

(*) Usi fuerunt VV. voce hac, non solum ad designandum sonitum aëris per intestinorum tractum oberrantis; sed & humores aëri misti, inibique circulantes hoc termino fuerunt comprehensi, uti patet ex GALENO *Comment. in Aph. 73. sect. 4. tum ex lib. III. de symptomat. caus. c. 4.* Vox hæc apud HIPPOCRATEM aliosque VV. frequentius occurrit: derivatur a simili vix non sono, qui excitatur dum in via lutosâ incedimus, *lutosum* enim græcis Βορβορώδες dicitur; unde Βορβορώδες πύον, *pus turbulentum*, HIPPOCR. *Prognost. & Coac. & Aph. 7—44. Βορβορώδεα ὕδα*, *urina turbida*, GALEN. *Comment. in Aph. 69. l. IV. c. f. p.*)

Bilis cumulus, vomitusque. In nobis sanis bilis magna copia videtur generari, ut magnitudo hepatis (*) & totus officinæ biliosæ docet adparatus. Comedentibus nobis, bilis illa invenit in quæ agat. Misceatur cum alimentis, ea dividit, (reliquaque officia præstat, in Physiologicis exposita.) At vero ventriculo atque intestinis vacuis manentibus, bilis nil habet in quod agat, quo diluatur, quo misceatur, ut extra hoc cavum exeat: ita, ut HIPPOCRATES & CELSUS advertant, bilis oriri vomitum ante prandium homini, qui alias jentaculum adsumere solitus, illud nunc non adsumerat. (Id illis inprimis accidere solet, de quibus antea dixi, eos vacuo ventriculo syncope tentari.)

(*) Vidit GLISSONIUS, *Anat. hep. c. 7. p. 80.* hepar libras æquare tres cum drachmis sex in foemina sana, libras centum & octo adpendente. — REVENHORSTIUS intra bihorium unciam semis vel drachmas tres bilis, in cane instituto experimento, collegit. Canis autem hepar, ait HALLERUS, est pars vigesima quarta totius: in homine vero trigesima quinta. Cæteris paribus ergo, si tres in hora drachmæ canis secedunt; in homine, triplo ponderosiori, secedent sex, & intra viginti quatuor horas uncix sexdecim; prodeuntibus intra idem datum tempus in cane unciis ad minimum sex.)

Macies, quum corpus quotidie perdat, nec novum quid adquirat.

Pervigilium, a pluribus causis, ut dein patebit, nascens: oritur hic ab acrimonia stimulante nervos membranarum cerebri, hincque impediende sensorii communis quietem.

Epilepsia; cujus causas innumeras propemodum esse Vobis toties dixi. In præsentī casu nascitur a

nervis per humores acres in continuos, eosque inordinatissimos motus agitat; ut etiam a defectu materiæ a corde ad cerebrum missæ pro reparandis spiritibus; unde Epilepticos jejuniis deditos vidimus paroxysmo corripi, uti Vobis in lectione matutina de epilepsia retuli. (In Infantibus & Puellis frequentius ex hac causa epilepsia, quam quidem in Adultioribus & Viris.)

Febres furiosæ. Cerebrum adeo tenellum ac rebellum ab acrimonia tali destruuntur; unde tandem ipsa mors; quæ eo velocior, quo animal simul diutius tam a potu quam a cibo abstinuerit. Longe enim diutius sine cibis cum potu, quam sine potu etiam, vivunt animalia, ut in *Redianis* experimentis patet.

(Legenda hic, quæ circa effectus abstinentiæ nimiae retulit pulchra egregius ZIMMERMANN von der Erfahrung, ubi de alimentis, ut causa morborum remota agit. Ab hac causa homines demum factos fuisse rabidos observata docuerunt medica; idem & in animantibus, imprimis canibus & lupis, docuit experientia.)

§. 758. *Ex quibus patet, abstinentiam &c.*

(Textum hunc expositurus Celeb. DE HAEN fuisse usus fuit dicendi genere, adferens tum *Aphorism. Hippocratis* I—4. & 5., tum magnum locum ex *historia vit. & mort. Baconis de Verulamio*, tum integram *odam Horatii* l. 3. 6., cum *vita Cornarii* & *obitu*, & *dissertatiuncula* in cit. *Aphorism. Hippocrat.* vitasque Anachoretarum *Ægypti*. Gratum Lectoribus fore credidi, & utile, si præcipua momenta inde excerpta, breviora sisterem.

Observatum quum esset, quæ vitia ex nimia adsumtorum copia nascerentur, homines inciderunt

in hanc sententiam: præstare diætam exquisitam & sobriam observare, ut incommoda ab ingurgitatione nimia evitarent. Ita multi judicarunt Auctores & Medici, & præcipue Ascetici. VERULAMIUS dixerat, diætam Pythagoricam aut monasticam plurimum facere ad longævitatē videri; interim tamen & ex iis, qui libere & communi more vivunt, repositos fuisse longæviores sæpenumero, uti & ex Edacibus & Epulonibus, & Qui liberaliori mensa utuntur: mediam diætā, quæ haberi solet pro temperata, laudari, & ad sanitatem conferre, ad vitam longævā autem parum posse; quum diætā illa strictior spiritus progignat paucos & lentos, unde minus consumat; at illa plenior alimentum præbeat copiosum, unde magis reparet; mediam neutrum præstare: dixit præterea, vitam religiosā & in sacris videri ad longævitatē facere: in hoc genere esse vitæ otium, admirationem & contemplationem rerum divinarum, gaudia non sensualia e. s. p., quibus si accedat diætā illa austera, quæ massam corporis induret, spiritus humiliet; nil mirum, si sequatur longævitas insignis, qualis fuerit PAULI Eremitæ, SIMEONIS Stylitæ &c.

Vera hæc esse HAENIUS largitur, debere tamen *Verulamiana* Observata conferri cum Aliorum Adnotatis ac in regulam verti dicendorum. Ex biographiis Anachoretarum &c. patere quidem, ait, longævos multos fuisse, ex myriadibus autem illorum paucas ad nos tantummodo pervenisse descriptiones vitarum; hinc ex illis paucis non posse nos de multitudine tanta concludere. Tum de Sanctis eadem ratione, uti de aliis hominibus esse concludendum; visceribus debilibus præditos, ab incunabulis arctæ diætæ adsueto, talem facilius utique laturos esse

esse, quam robustos, & cum summa valetudine edaces: prioribus convenisse vitæ normam monasticam illorum temporum, & anachoreticam: non admittendam esse sententiam Illorum, qui homines antiquorum temporum, præsertim in Asia & Africa, longe robustiores nobis fuisse ajunt; ab omni retro tempore vixisse robustos, vixisse & debiles. — Si in mores, prosequitur, antiquos, quos cœce veneramur, inquiramus, visuros nos esse, Baccho & Venere, omnique voluptatum sorditie homines consumsisse ætatem viresque; adeoque & liberos procreasse debiles, teneros, effœtos; teste, inter alios, HORATIO, *Carm. l. 3. od. 6.* Fractis ejusmodi hominibus voluptatis omni genere diætam exactiorem proficuam præ liberaliori fuisse: scëminarum, luxuriosissimam ante viventium vitam, corporibus exhaustis diætam exactam sanc salutarem evadere debuisse; tales hinc ad decrepitam pervenire potuisse senectam. Idem adferendum de celebri illo Veneto, *Ludovico CORNARO*, qui, in juventute viribus omnibus exhaustis, demum adhibuit normam vivendi a priori longe diversissimam, adeo circumscriptam, ut ad grana determinaret ciborum pondus. Aliam vero rationem esse Illorum, qui corpora firma, vegeta habentes, diætæ exactiori se tradiderint: hos quippe hanc mutationem ægrius ferentes toties dedisse pœnas, uti conficitur exemplis pluribus hominum, qui Anachoretas, qui CORNARUM satagerent imitari; tum & exemplis ipsorum Anachoretarum, quorum plurimi, si historias eorum perscrutemur, longævitatem non sunt adepti. Si hisce jungamus cujusque vitæ generis complures, qui maxime longævi fuerint, diætâ pleniori usi; fore, ut profecto aliter argumentari cogamur. Necrologia plures exhibere homines mortuos 80, 90, vel & 100 ætatis anno;

ipsum VERULAMIUM meminisse census sub Imperatore VESPASIANO facti, quo patuit, in plaga Italiae Apenninum & Padum inter posita, inventos esse 124 homines, qui annum 100 adtingerent, aut excederent; quales & nunc, tum alibi, tum in republica Batava, & VERULAMIO referente, & in Anglia, uti etiam in regionibus borealibus occurrunt: constare autem, hos omnes populos nequaquam solenni adeo diæta uti, Asiaticis edaciores esse, & quo sint propiores polo, eo inveniri edaciores: hinc, non tantum dubitandum esse, sitne regula *Cornariana*, quam tueri VERULAMIUS aliquæ conati sunt, in Medicinam recipienda; sed etiam suspicari fas esse, an non potius noxia dicenda: quin ipsum VERULAMIUM fateri, CELSI non temendam esse sententiam, jubentis varietatem & alternationem diætæ, adducereque exemplum Senis centenario majoris, qui, productus testis de antiqua quadam præscriptione, & a Judice familiariter quæsitus, quid agens tamdiu vixisset, respondit: edendo antequam esurirem, & potando antequam sitirem; quod quidem sobrietatis magnum non fuerat testimonium in homine centenario tamen majori.

HIPPOCRATEM autem infinitis locis condemnare tum excedentem nimium, tum & tenuem omnino victum; magis quidem rejecisse postremum, quin tamen laudaret ideo ingluviem; diætam autem commendasse mediam.

Quodsi vero, HAENIUS demum ait, plures homines haberemus curandos, quorum pars altera nimia regiminis tenuitate, altera nimia adsumtorum copia in magnos morbos dilapsi forent; facilius per phlebotomen, per purgantia, enemata, emetica, quod abundaret, auferemus; quam ut extenuatis
illis

illis aliis id, quod deficeret, adponeremus: immo hi nutriri desueverunt; vasa omnia facta sunt contractiora, vis adsimilatrix (plastica) in humoribus periit, unde cruda in humanam naturam non amplius vertuntur. Ergo tales sunt longe difficilioris curationis.)

Tandem limitatur hæc sententia observatis peculiaribus. Si in genere minus noxia diæta plenior, id intelligendum est de hominibus, qui visceribus & corporis proportionem ad id aptis gaudeant. Qui enim collum brevissimum v. c. habent, lauteque pascuntur, sunt in apoplexiam lethalem proni. Quibus ventriculus more solito longe minor, dum interim valido appetitu gaudentes corpus bene explent; illi vitiis pessimis, sæpe non reparandis §. 756. recensitis, & sæpe, & facile, adficiuntur. Tandem, Qui quandoque pœnas lucentes intemperantiæ, in eandem sæpius relabuntur; fiunt sæpe incurabiles, uti sapienter monuit BOERHAAVIUS. Horremus sane, dum hujus rei exempla & crebra, & atrocia, apud WEPFERUM passim legimus.

Est ergo sententia hæc circa copiam majorem vel minorem alimenti una ex illis, in quibus qui student scyllam evitare, incidunt in charybdin. Sæpe dum vitant stulti vitia, in contraria currunt: medio tutissimus ibis.

§. 759. *Illa autem vitia &c.* Vellem libenter etiam addere tenuitatem, de qua mox pluribus.

§. 760. *Acrimonia cibi & potus &c.* Iterum hic de acrimonia sermo. Nuper Vobis explicui totam doctrinam de acrimonia, quatenus varia in humoribus præsens, varia etiam vitia morbosque produceret. Hic vero agitur de modo, quo hæc in corpore generatur acrimonia, & de præcipuis ejus effectibus. Hinc se-

quentes 4 §phos brevi sermone complectar, ea omit-
tens, quæ de effectibus variæ acrimoniæ jam antea
dixi.

De acrimonia, quæ hic primo loco occurrit, *aci-
da*, repetendum hic nil habeo.

§. 761. *Acrimonia secundo in cibis & potu est
aromatica, &c.* *Aromata* vocamus vulgo omnia vege-
tabilia odorata, plerumque amœna. Sane languentem
vitam hæc sæpe mirifice subitoque refocillant; debilem
stomachum glutinosamque temperiem emendant ad stu-
porem usque. Magni fecit illa semper totum genus
humanum, industrieque hinc correxere vitia quorum-
dam alimentorum. Mos ea ex ratione obtinuit, ut
fabis, pisfis, quæ glutine suo (gluten autem in hisce
non præcipue pars peccans est; & multa, glutinosa
magis, minus nocent) forte sanguinem inspissarent, in
culinis addant petroselinum, satirejam, allia, porrum,
sinapi (in Austria vix) piper. Eadem ratione pin-
guia animalium conati sunt emendare. O ter quater-
que beatos nos, si hos intra limites mansissemus! Ve-
rum ope horum ingluvies invenit, quo ventriculum in-
fontem infarcire, obprimere, destruere potuerit. Cona-
mur stimulo addito irritare ventriculum, ut adsumta ci-
tius per pylorum amandet, novaque sibi ingerenda po-
stulet. Id quo commodius ventriculus possit præstare;
tempus multi ipsi concedunt adeo largum, ut bonam
diei partem gulæ inpendere, utilia & salutaria negligere,
æquum licitumque autument.

Ex quo autem Europæi, sævum mutandis merci-
bus æquor arantes, ex Indiis præstantissima illa aro-
mata educta nobis venumdederunt, nulli ultra condi-
mentorum limites positi videntur. Et, quod profecto
miremur, non in frigidis hyperboreis modo regionibus,
sed & intra tropicos & prope lineam æquinoctialem
hic mos obtinuit. His cibos ita condiunt, ut advenæ

Europæi linguam sibi adustam doleant, si cum illis comedant; dumque in Europam reduces ex India coacervatas divitias decreverunt in sua quisque patria dispendere, pergunt alimenta ita condire. Rogavi toties Viros primarios & Fœminas insigniores ex India orientali vel occidentali in Hollandiam reduces, qui ferendo essent? Responderunt mihi, in Java, sive Batavia nova in India orientali, vel in Paramaribo in insula Surinamensi in India occidentali, calorem esse tantum, ut homines fere deficient & sudoribus diffluant: hinc eos opus habere tantis stimulantibus, quibus deficientia membra erigere possent.

Sed videant Illi, quam male mulctentur hac agendi ratione, quum ex illarum regionum ephemeridibus manifesto liqueat, Plerosque ibidem flore ætatis extinguî, sexagenarios raras, septuagenarios vero vel octuagenarios homines, rarissimas ibidem aves esse.

Ratio est, quod aromata illa consent ex sale & oleo acribus; in quo oleo est summus spiritus rector, qui modico sub volumine magnus virium dilapsarum restaurator; ob eamque causam vitam humanam blande moderatur, copiosior mordet, copiosissimus comburit. Sal plerumque adtenuat, dividit, solvit, obstructa tenacia; majori dosi adsumtum, stimulo suo febrim generat; maxima, vasa diffringit.

Exilissimum mole aromatibus inhærens acre illud, subtilissimum; nil ergo miri, nervos ab illo penetrari posse nostros, destrui arescique omnia. Sentiant se quasi aduri, Qui aromatibus, etiam amœnissimis, uti v. c. cinnamomo, diu multumque utuntur; dentes illis pereunt, gingivæ &c. igne veluti destruuntur. Igitur, quod exilissima copia proficuum, id majori copia deleterium. SYLVIUS DE LE BOE, BONTEKOE, CRAANEN potu asiatico aquoso corpora destruentes, voluere etiam

etiam asiaticis aromatibus eadem reparare; hinc in illorum materie medica tantus horum aromatum usus.

Hæc facit sitim &c.; si fumantur aromata diu, & sanguinem intrent multum, consumunt oleum blandum humanum, quo partes lubricantur (ejusque loco acredinem, ignem & siccitatem humoribus nostris inducunt.) Hinc aliud arcanum, quo Obesiores utuntur, quo nimiam pinguedinem solvant, addito aromatibus sale. Non refero hoc, quod laudem, sed ut monstrem modo, quid homines faciant (ut tandem sibi ipsis evadant noxii). Homini tamen leukophlegmatico, aquoso potest ex tali oleo aromatico & sale egregium solvens medicamentum parari.

Calorem, ardorem — — — *liquidi dissipationem*; ut dicta hucusque demonstrant.

Cardialgiam, ardorem stomachi. Ter jam vidimus nunc *cardialgiam*. Primum oriebatur ab infarctu ventriculi; cura huic evacuatio & abstinentia: secundo ab acido; cura absolvitur diluendo, absorbendo, ac salibus obpositis inmutando; compescendo quandoque narcoticis. Tertia nunc species ab acri oleo & sale aromatum mistis, & adurentibus villosam tunicam ventriculi (œsophagi & intestinorum) potu multo, diuturno, aquoso & nitroso solvenda.

Ergo uno audito nomine morbi, quanta in cura differentia! Est unus nomine morbus Cardialgia; sed revera morbi distincti, distincta methodo curandi: necdum finis datur; sequentur plures adhuc cardialgiarum species.

(Admittere hoc omnino HAENIUS debuit, etsi toties ad lectos Ægrorum & in familiari sermone edixerit, morbos non, ut Milites, in Ordines & Classes posse disponi; quod quidem exceptionem multam pati, ex SAUVAGESII, VOGELII, LINNÆI, SAGARI, CULLENI laboribus, tum ex ipsius

BOER.

BOERHAAVII, *cap. de Angina*, dispositione conficitur.)

Nauseam, ructus, vomitus. Forsitan cogitabitis, quæ fieri possit hoc, quum ad sedandas nauseas &c. hæc ipsa adhiberi passim soleant. Recte quidem, sed tantum in illis casibus, ubi debilitas causa ructuum est; non, ubi putrida materies: immo sumite aroma fortissimum, piper, vel quoddam ex aliis acribus, quæ ad nauseas curandas exhibentur; sumite raphanum rusticanum, vel cochleariam; adsumta hæc majori copia fient vomitoria.

(Fatendum tamen, aliam sane actionem in ventriculo exserere raphanum rusticanum, utut acrem abs dubio, quam quidem piper, aliudve aroma indicum; exigua sub mole actuosissimum.)

Videtis hinc denuo ineptitudinem remediorum sic dictorum *stomachicorum*, quæ ex calidis aromatibus composita ad omnem nauseam vomitumque adhibentur. Si enim a calidis adsumtis, si a bile putrida, si ab inflammatione vomitus oriatur; remedia dicta damnosa sunt. Mos tamen Empyricorum est, ut ea abs ullo facto discrimine exhibeant.

Febres. Sanguis sicciior (spissior) fit, quia aroma auget humorum velocitatem & dissipat liquida. Stimulus tamen acer aromaticus vasa incitat in frequentiore contractionem. Spissus humor capillaria non potest penetrare; nascitur obstructio. Stimulus pergit, cor inpellit in motus frequentiores: ergo nascitur febris.

Maciem, contracturam, & morbos inde pendent. Explicui Vobis paullo antea, aromata tollere obesitatem, inducere maciem. *Contracturæ* fiunt ad juncturas, quia omnia solida contrahuntur, liquida blanda expelluntur, consumuntur: ita, ut præcocem inducant rigiditatem similem.

Mor-

Morbos inde pendentes; v. c. strangurias, dysurias, hæmorrhoides &c. crassus, acer sanguis, in præcedentibus jam visus hæc facere: nam aquosa avolarunt, hinc per se acrior urina: stimulus permanens adest; unde abraditur mucus vesicæ & urethræ.

(Abusus, *Cl. ZIMMERMANN* ait, quem in Indiis faciunt nucum myristicarum saccharo conditarum, lethargos generat, speciemque quamdam rigiditatis & insensibilitatis. Optime dictum fuit, maximum bonum, quod facere queant aromata, esse, ut excitent adpetitum; maximum malum, ut insensiliter comburant intestina.)

§. 762. *Acrimonia tertio est Spirituosa &c.* Vinum & cerevisia & succi aliorum fructuum horræorum, & ipsum gratum & blandum saccharum, ubi primo fermentationem passa sunt, largiuntur demum, destillatione præmissa, spiritum volatilem, mobilissimum, ardentem, *v. BOERHAAVE, Elem. chem. proc. 48. &c.* cujus effectus in corpus humanum textus sequentibus exponit.

Producit sitim, temulentiam. Causam sitis sæpius vidimus ab acribus, sæpius ab inmeabilibus, sæpius a constrictione vasorum exhalantium, a defectu aquosorum: ita & hic oritur a stimulo alcoholis illo rapidissimo, adficiente nervos. Ita siquidem nobiscum comparatum est, ut tali stimulo præsentē sitis mox adsit, jubens potum aquosum, ne stimuli nimis noceant. Homo bene potus, antequam ebrietate capiatur, sitit valde; non a defectu liquidi, nam nimium hujus habet; sed ab aucta proportionē acrium stimulantium in ratione aquosorum, (& ab adstrictione osculorum exhalantium in ore, faucibus & adnexis). Aquosa multa bibendo, levem forte temulentiam nascentem adhuc evanescere coget, si non nimis se obpleverit. Dum autem ebrietate captus edormiverit vinum, pars quidem respirando

avolavit tanta, ut non posset temulentia continuari; sed tamen mansit tanta adhuc in humoribus, ut sequenti die excitet sitim inmanem (& cephalalgiam, & pulsum febrilem plane, & nauseam &c.)

Fibrarum constrictionem — — — *potus adsiduo auctioris* Adtendite, quæso, hic miseram sortem humanam! Homo debilem se sentit; vinum (adlaturus malo remedium) moderate bibit, vel spirituosum liquorem. Recreatum, ac renovatum quasi se sentit; & revera spiritus ille subtilissimus debilia vasa stimulat, humores rarefecit, & auxit vim circulationis. Cubitum dein pergit; expergefactus mane pulcram recreationem hesternam evanidam dolet. Repetit idem per duos, tres dies; at minus exhilaratum se demum (ab eadem vini dosi) deprehendit. Vasa enim sunt reddita debiliora, quum humores rarefacti jam aliquoties extenderint vasa, eorumque vires infregerint; nec egissent vasa in humores contentos, nisi stimulo adacta. Ubi jam sæpius evanuit vis alcoholis, vasa flaccidiora nunc quam olim, (quia toties dispanfa) non ita aguntur in reactionem ab eadem alcoholis copia, & qua olim, dum minus adhuc erant debilitata. Si igitur homo velit amœna illa, qua antea, recreatione gaudere, sane majori copia alcoholis indiget. Sumit nunc vinum copiosius; recreatur denuo. Prosequitur hoc negotium: semper experitur, se augere vini quantitatem debere; quum magis magisque extendendo vasa magis magisque infracta. Videtis, hic nasci inevitabilem fere, sed simul detestabilem, potus indies auctioris necessitatem: quam ad rem depinxit Poëta: „Inflent hesternæ venas, ut semper, Jacho.“ Unde &, ob vasorum turgescentiam ΒΑΚΧΟ adscripsit HOMERUS: πνεύμα Φυσώδης.

Inde debilitates — — — & *similia his mala.*
Nemo Vestrum erit, arbitror, qui non unico intuitu
mala

mala hæc omnia sequi videat ex prægressis. *Debilitas* exposita est, ut orta a continua distensione; quum &, prout vidimus, sensim humores inspissentur, deficit ille latex, qui vasa lateralìa minorum serierum (tenuior) subire debet: unde flaccescunt ac obliterantur; maxime, quum nutritio fiat per vasa minima; quo & accedit, sanguinem id ultimum subtile nutriendum non amplius parare.

Flatus, a debilibus intestinis, aërem intra se contentum non ultra moderantibus; hic flaccidis, ibi aëre quopiam stimulante contractis. Eo casu aër inter contracta loca retinetur, rarefcit, incalescit; expanditur intestinum, spasmoque soluto cum impetu ille exploditur.

Obstructiones; quia sensim coagulantur humores; contrahuntur, obliterantur vasa minora. Si parva est vis cordis in locum obstructum; manet obstructio: sed si a quacunque causa cor, vehementiorem in motum adactum, humores velocius projicit in locum obstructum; tunc nascitur febris, immo inflammatio.

Si sanguis non agitur velocius, sed ad loca obstructa continuo & sensim similis condensatus humor adpulerit, inegeritque; ita augebitur obstructio, ut *tumor* nascatur.

(Bene monuit HOFFMANNUS, ab spirituosissimis obstructiones, & concretiones polyposas, quæ magnorum morborum fomenta & crebriores causæ sunt, omnium aptissime produci. „Nihil familiarius est, ait, quam quod homines ex potu spiritus vini largiori, præsertim matutino tempore vacuo ventriculo hausto, in insanabiles viscerum corruptelas incurrant.“ — Descripsit *Cel. LUDWIG* in singulari Programmata casum, ubi ab spiritus vini frequentiori usu, & mors accersita, & ventriculus in substantiam vere coriaceam contractus, ac induratus fuit. —

PECQUETUS, celebre in Anatomicis nomen, eam
som-

somniavit hypothesein, digestionem, quin exercitio haberemus opus solo spiritu ardente posse perfici. Thesin suam strenue defendens, usus fuit vasculo spiritus ardentis: lucratus demum inde fuit, ut ventriculus & intestina eousque contraherentur, ut alimento omni denegaretur transitus morsque sequeretur; si aliam adhibuisset, minus pervicax, vivendi normam, adhucdum evitanda. — VAN SWIETEN in Fœmina spiritum vini perditæ amante, splen, pancreas, hepar, pulmones, glandulas omnes in callosam vix non duritiem densatas vidit — THIERRY, qui in eo erravit, quod liquores ardentes abs noxa in regionibus borealibus potari posse dixerit, bronchia ad $\frac{1}{3}$ sæpe in cadaveribus Potatorum strenuorum retrotracta deprehendit. — Homines tres a crapula ex vini spiritu pessime adfectos, duos alios mortuos abs multis ambagibus fuisse, *Cl. le FEBURE* retulit. Plures instantias in monumentis Prætorum, Observatorum, & in opere *Cl. ZIMMERMANN von der Erfahrung* &c. ubi de potulentis ut causa morborum remota agit, in Diario medico, &c. *Arzt*, *Cl. UNZER*, &c. reperire est.)

Humores condensati ab alkohole observantur ejus tenacitatis, ut, si diluere eos aquosis & saponaceis tentaveris, Æthiopem laves; quum nempe præterlabantur aquosa, nec humoribus commisceantur ob tenacitatem; (*) transfudabunt itaque illa ad latera, & vel penetrabunt in panniculum adiposum, efficientes tumores albos, *leukophlegmaticos* dictos; si tenuiores, *anasarcam*; sin vero penetraverint & transfudarint in cava corporis, producent *hydropes*. Atque sic, qui ab aquæ potu paventes, vinum ingurgitant, ipsa tamen, quam adeo oderant, aqua pereunt: digna peccati pœna!

(*) In experimentis etiam chemicis BOYLEI, BOERHAAVII, FREINDII, PITCARNII, SCHWENKII, HALLERI, MACQUERI, & PROPRIIS in parenchyma ductus ab ardenti spiritu sanguis. Venis injectum alcohol mortem adfert, & sanguis late coagulatus dein deprehenditur; uti patet ex tentaminibus *Ant. de HEYDE*, PETIT, FREIND, & SFRÖGEL apud *Inl. HALLERUM Elem. Physiol. L. 5. sect. 2. §. 27.*, tum & magni Viri propriis.)

Via hæc Miseri tales ad mortem tendunt, improvisam aliquando, aliquando lentam: ars enim, ut plurimum, nil subpeditare potest, nisi, quæ leniter pallient; quemque illa pristinæ reddat sanitati, rarissima avis est. — Vidi plures tales subito mori, alios lente, sed misere. Vidi plures, qui centies moniti de fragilitate suæ machinæ, tamen pergerent in abusu antiquo. Incrassati humores quandoque in motum cientur, & adiguntur in pulmonum vasa: vidi sic mori homines peripneumonicos & simul apoplecticos, ut momento fere raperentur. Vidi, cui incrassati humores in systemate venæ portarum putruerant; qui demum putridissimo vomitu intra paucas horas vitam terminaret. Sane multos novi, qui monita omnia salutaria ante spernentes subito mortui sunt.

Qui vero diu ægrotant, quantisne ærumnis trahunt stipatam vitam! Hydrops, v. c., quibus Tales laborant, non orta est a vitio peculiari, sed a corrupto corpore: etsi aqua educatur, pereunt cito, quod acris aqua destruxerit viscera, quæ jam non sustentata sensim tabescunt, & lacera fere fluctuant.

§. 763. 4to denique deprehenditur acrimonia fermentans &c. Ubi in cado mustum sollicitè clausum adservatur, & nunc maxime fermentante ac spumam agente hoc, per parvum cadi spiraculum homo vaporem naribus pulmonibusque adtraxerit fortiter, aut illico

mor-

mortuus cadit; aut, si remissius nonnihil halitum adtraxerit, apoplecticus amensve fit.

Experimenta cum animalibus instituta, & in *Commentariis Academiae del Cimento* relata, testantur, aviculam $\frac{1}{4}$ minuto horæ raptam ab his effluviis; muræ duobus solum in eo minutis vixisse. Deductum inde, verissimum esse, quod CAMERARIUS *Taurinensibus* in *Epist.* adfirmaverat, homines, simul atque cellam ingrediantur, vino fermentante repletam, statim corrui, & mori: esse tunc aërem inquinatum fermenti exhalationibus, quæ aërem factitium constituunt. Hic aër est illud *gas sylvestre* HELMONTII, qui Magistri PARACELSI exemplo mira indidit nomina rebus. Hinc clausa diu vina fermentantia, clausæ diu cerevisiæ fermentantes, laxato phialæ vel doliæ epistomio mox violenter exsiliunt.

(Quum pluribus Candidatis Medicis nota esse *subponam* egregia recentissimorum Physicorum, imprimis ANGLORUM & GALLORUM, observata circa genesin, indolem, ac effectus *aëris fixi*; prætereo hic ea, quæ alias lubenter adtulissem; nisi & operis limitibus forem circumscriptus. Aëris ex potulentis fermentantibus adscendente halitu infecti vires in sanitatem deleterias in singulari diatribe de aëris diversis corruptelis alia vice pluribus instantiis demonstrabo. Vires autem aëris fixi medicas quod adtinet, bene habentur expositæ in *Appendice ad tom. I. II. Sc.* Operis pulcerrimi *Inl. PRIESTLEY: Experiments and observations on different kinds of air Sc.* tum & in diversis Anglorum Gallorumque Diariis, Actisque scientiarum; legi etiam omnino mereatur *Cl. Joh. Frid. CORVINI Historia aëris factitii, pars physica, & pars medica, Argentorat. 1777.* edita. Commendare demum debeo opus recentissimum *Celeb. SIGAUD DE LA FOND Sc. Essai sur differen-*

tes especes d'air, qu'on désigne sous le nom d'air fixe, Paris 1779. &c., nitidissimum compendium inventorum nostri ævi elegantissimorum circa aërem tum fixum, tum alias aëris nuper detectas species. Memorat ibi Vir Cl., aërem fixum animanti respiranti omni respiratione deleterium, vires suas eo citius & manifestius exserere, quò majori, ut respirando vitam producat, aëris quantitate indiguerit: quod cum observatis Inl. PRIESTLEY omnino convenit. Ait hic op. cit. T. I. p. 36. „Insects and animals which breathe very little are stifled in fixed air, but are not soon quietly killed in it. Butterflies and flies of other kinds will generally become torpid, and seemingly dead, after being held a few minutes over the fermenting liquor; but they revive again after being brought into the fresh air.“ &c.

Quod si vero aër (fixus) sæpe dolia aut vasa, in quibus coërcetur, diffingat; quid efficiet in corpore humano, dum a calore grad. 94. 95. vehementer expanditur?

In *Actis Anglicanis* habetur historia Angli, qui cerevisiam fermentantem & lagena inclusam perditæ amans, sæpissime iliaco dolore correptus fuit, ac incassum adhibitis omnibus eadem nocte periit. Cl. DE ST. ANDRE deprehendit in cadavere intestina adeo inflata, ut fidem fere superet.

(Flatus ilei causam constituere posse, HIPPOCRATES jam adnotavit lib. de flat. c. 5. „Aliorum autem morborum, ait, quales sunt volvuli aut intestinorum convolutiones, aut tormina, aut alii inhærentes morbi, flatibus causam adscribendam, omnibus existimo notum esse. Vide & S. 3. *Epidem.* v. 75. : colicam sævam ex potu cerevisiæ fer-

men-

mentantis (*Beuteillenbier*), tum stranguriam pertinacem, ipse non una vice enatam vidi.)

Atque hucusque de iis acrimoniæ speciebus, quæ cum cibus potibusque intra corpus admittuntur. Nam quæ sequuntur in textu: *Hæc creat ructus* — — — *ileon*, & *talìa*, jam exposita habentur; quum natura hujus spiritus incarcerati, sive gas sylvestris semel intellecta, sponte hæc omnia intelligantur.

Si in machinam Boyleanam vinum, quod non amplius fermentat, inponitur; parum admodum aëris inde colligitur: ex vino autem fermentante tanta copia prodit, ut liquor veluti in sartagine ebulliat. Talis igitur materies producit spasmos in variis intestinorum locis; ita, ut aër interceptus ac rarefcens, neque, ubi exeat, viam nactus, comprimat omnia intestinorum vasa nervosque, atque etiam viscera partesque vicinas; quibus iter ad mortem panditur: vel spasmos violente referans, tumque & acrimonia & rarefactione agens, fusque deque omnia vertit, ac per vomitum, diarrhæam, dysenteriam, de corpore expellit; (quanta autem tum corpori, diu antea jam torto, vis denuo infertur!)

§. 764. *Viscositas autem nimia ciborum &c.* Viscosum dicitur, quod tam parum fluidum (nec tamen siccum, aut friabile) ut, dum extenditur, sinat se in filamenta duci. Habentequidem omnes sani homines lentorem quemdam, sive vim plasticam ad vitæ sanæ conservationem omnino requisitam; tum in corpore liquor adest unctuosus, qui articulis lubricandis inservit; mucus etiam naturalis, qui ventriculum, intestina &c. inungit, emollit, ac defendit: de hac viscositate naturali & necessaria hic non agitur, sed de illa, quam in nostris humoribus nimiam generant ingesta viscosa.

Primo hanc producunt *farinosa non fermentata*; nam scitis, quomodo farina subtilissima, amydon, aqua

subacta, det notissimum illud gluten Lotricum. Farinæ vero crudæ potissimum id faciunt. Si enim fermentatio accesserit, utut levis; frangitur illa tenacitas, ut in pane sit. Tamen Infantes, Puellæ, & sæpe etiam Adulti hæc farinosa non fermentata in placentas redacta, vel nodulos, perditæ amant. Pauperes plures inde fere vivunt & vitam otiosam aut sedentariam simul colentes, (quæ quidem in vilioris sortis hominibus omnino non frequenter adeo obtinet) pessime inde adficiuntur obstructionibus, ut mox videbimus.

2da classis viscositatis petitur ex *gelatinis animalium*: qua quidem in re Medici perpetuo belligerantur cum plerisque Matronis. Expertæ quippe vires juris carniū, hoc eo esse magis nutriendum credunt, quo spissius fuerit. Ergo quo homo debilior est, eo magis eum indigere nutriente, seu eo spissiori autumant jusculo. Quamobrem coqui talia jura curant, quæ in meram vertantur gelatinam: quo porro possint ea spissiora reddere, addunt animalium partes tenacissimas, gallos gallinaceos (& præcipue hic loci gallinas) veteres, pedes vitulinos, in quibus plurimæ partes tendineæ (& gluten verum subpeditantia integumenta). Hinc homines phthisicos, consumptos, atrophicos egregie restauratum iri firmiter persuasæ sunt. Ast totum, quod laudamus, bona earum voluntas est, præterea nil. Gluten enim primo obest, quia indomabile, (a viribus digestivis) & hinc creat anxietates pessimas; maxime ubi, cum novo chylo pulmonum in arteriolis hæret. Unde videtis, hos homines a pastu anhelare. Sed præterea obest magis, quam viscosum farinaceum, quia hærens indomabile hoc in corpore, brevi abit in spontaneam alkalinam corruptionem.

3tia classis continet *caseum* & *lactis coagula*; quæ copiose sumpta funestos edunt effectus, ut mox patebit. Observatum est in mortuorum Infantum ventriculis,

lis, maxime prope pylorum, hæsisse coagula lactis caseosa, quæ pylorum obstruerent penitus. Infantes hi, dum viverent, oculos aperientes, mire exterriti comparuerunt; vertigines, convulsionesque passi interierunt.

(Certum omnino est, ait CL. UNZER, *der Arzt*.

3. B. S. 309., maximam casei partem terream esse, ac indigestilem. Vasa, in quibus lac tractatur, sensim crusta lapidea terrea obducit, ac in ipso etiam corpore humano nonnunquam adeo induratur, ut terreas durasque referat massas. — Quum plerumque, VAN SWIETEN ait, *Comm. ad §. 1150.*, multo sale condire soleant caseos diu servandos; patet facile, quare illorum usus illis noceat, qui ad scorbutum inclinant alias etiam ob causas: immo quotidianis observatis constat, Scorbuticos omnium symptomatum augmentum percipere, simulac per paucos tantum dies tali caseo utuntur.)

His prægressis percipitis mecum, cur in textu dicatur: *fieri hinc pondus in stomacho*: quia revera compactum & ponderosum est omne id triplex glutinosum, & actione ventriculi subigi non potuit. Memineritis, dum aliquando fabas, pisas, aliave minus digestilia majori quantitate comedissetis, quanto pondere primis post pastum horis in ventriculo, quanta etiam anxietate in pulmonibus obpressi fueritis.

Flatus, ructus, acorem. Aër enim in ventriculo & intestinis semper præsens, ingestis continuo auctus, intercipitur, inviscatur hoc glutine, detentusque loco calido rarefcit, & ventrem in tumores agit: donec validiori actione muscutorum abdominalium & diaphragmatis interclusus expediatur, & flatibus prodeat.

Id equidem in omni viscoso, glutinoso fit; sed si homo acido laboret, & præcipue si ex vegetantibus non fermentatis ille aër prodeat, acorem mox, sive

dos ructus testatur, novumque acidum veteri addit materies sponte acescens. Sin vero hoc acido non laborans glutinosa ex animalibus parata magna quantitate sumsit, flatus ructusque edit plane alkalinos foetidosque.

Cruditatem; de qua superius jam actum. In tali dispositione glutinosa, viscosa, gluten indies accumulat, eoque repletur ventriculus cum intestinis. Hinc nova alimenta pituitosa crusta involvuntur, ut succus gastricus & entericus, qui omnino ad bonam digestionem requiruntur, per glutinosos hosce parietes penetrare nequeant. Nova itaque adsumta non assimilantur in naturam nostram, admistu inquilini humoris huc alioqui adpellentis. Cogitate præterea, quæso, instrumentum naturæ, quod tenacitatem alimentorum solvat, bilem esse, eamque (in Talibus) impediri multum, ne fluat ad intestina: præterea bilem quoque debilem Illis generari. Causam habebitis aliam, cur vetus gluten maneat, cur novum quotidie adcreseat.

Vasculorum tenuiorum in intestinis obstructions; ut jam partim dixi, quod glutinosus veluti paries intestinis obductus hæreat: sed simul vasa tenuia lactea & absorbentia hinc orificiis clauduntur suis; ita, ut parum admodum per eadem intret in massam humorum.

Hinc intestinorum inertiam; quia crusta tali vis peristaltica ventriculi & intestinorum admodum impeditur, ut actio in contenta sua sit admodum debilis, idque magis adhuc propter causam sequentem.

Abdominis infarcti tumorem, duritiem; quippe gluten infarcit magis magisque intestina & ventriculum; aer interceptus continuo rarefcit; quo efficitur id, ut totum abdomen agatur in tumorem conspicuum, formam hominis admodum mutantem; quumque copiosa, quæ id faciat, materies adsit, necesse est quoque, pro augmento ejus percipi duritiem. Dum enim gluten
hoc

hoc divisum dilutumque utcumque cum chylo mistum intrat in lactea, glandulas inprimis mesentericas, ad quas collectum hæret, tumidas reddit. Præterea, quum vasa exhalantia, & succum entericum parantia, crusta hac intestinorum glutinosa tecta exhalare non possint; glandulæ intestinorum tument, & omnia quoque tument vasa adpellentia ad cryptas has intestinales. Tertio demum loco ipsa tumbunt intestina a glutine, a flatibus, e. s. p.

Tum deinde ipsi sanguini — — — viscosis particulis: nam, quæ hucusque dicta, ea utique ostendunt, quid fiat, dum ad gradum provectum devenit malum. Interim tamen dum eousque nondum pervenit, viscosa possunt sanguini commisceri. Etsi enim orificia lacteorum obstant ingressui glutinosorum, quum tamen una particula glutinosa non est, sed plures simul unitæ; particulæ separatim ingressæ lactea possunt dein in vasis majoribus adunari, viscososque producere humores.

Hinc obstructions ad glandulas: ergo viscida intrarunt sanguinem, si has effecerint. Has autem in tali dispositione adesse, invictis concludimus experimentis. Hinc Anatome detexit toties mesenterii glandulas infarctas, & scirrhasas. Idem cernimus adeo frequenter ad glandulas parotides, submaxillares, sublinguales, thymum, colli totius: ipsum pancreas & reliquæ majores glandulæ immunes non manent.

(Glandulas meseraicas scirrhasas maximam partem illis esse, qui scrophulis laborant, frequens docuit anatome: unde patet, errare eos, qui Strumosis nonnisi colli glandulas infarctas autumant. Scrophulis obnoxios esse, qui victu grasso, farinaceo, non fermentato utuntur, *Inl.* HALLERUS recte observavit, *Elem. Physiol. T. I. p. 193.*, quod & de strumis verum deprehendi: vidi quoque, Puellis, pluribus scro-

phulis collum cinctis, dum victu glutinoso, pasta-
ceo domi alerentur; has sensim, abs remedio ad-
hibito, evanuisse, dum servitium ingressæ meliori
diæta victitarent. Vera hinc, hoc sensu, sunt, quæ
dixit MEAD, in libello *Monit. & Præcept. med.
de strumis agens.* „ Illud denique in hoc morbo,
quamvis pertinaci, notabile est, quod nonnunquam
per ætatis & habitus corporis mutationem, in Juve-
nibus præsertim, ita sponte sua desinat, ut integra
sanitas restituatur.“ — Menstruorum etiam fluxus
in nonnullis bonam adtulit crisin.)

Pallorem, inertiam, frigus, tumores. Aperte
hoc concinneque explicat *Inl. L. B. VAN SWIE-
TEN, Comment. ad §. 72. Aphorism.* (quem locum,
sat longum, ab HAENIO hic insertum, Tirones, qui
Sivieteniano opere aliundè carere nequeunt, ibidem
melius legent.)

Raro purgantibus auferimus viscositatem (corpori
jam firmiter inhærentem) hanc, natasque inde & obstru-
ctiones & tumores; ut quidem Practicorum mos est.
Sed incidentibus, bilis defectum vi saponacea, solven-
te subplentibus, subin (interpositis) purgantibus, & po-
tissimum frictionibus assiduïs, totius quidem cor-
poris, sed maxime abdominis (exercitio corporis,
equitatione, victu eupepto, molliori, minime visci-
do, aquarum, huic fini aptarum, usu. *Celeb. RUSSEL*
in pulcro opere: *on sea Water &c.* usum proficuum
aquæ marinæ exposuit; circa hoc negotium præter
Alios, qui rei hujus meminerunt, omnino consulendus.)

Purgantium usu id efficere fors licebit, ut viæ
primæ utcunque a glutine nimio expediantur; quo,
facto hoc, medicamenta melius lactea subire queant
vitiaque glandularum emendare.

*Sed & patet, quod frigida dicta potentia similia
faciant.* Vocamus potentia frigidum id, quod, sive
fit

fit calidum, five frigidum, tamen intra corpus humanum receptum, ibidemque mutatum, corpus nostrum frigidius facit. Omnia corpora in eodem aëre, eodem tempore, sita, æque calent, frigentve; five sit molliſſima pluma, aut lana, aut metallum, aut aqua, aut alcohol &c. Demonstrant thermometra iisdem adplicata æqualem calorem singulorum. Videmur tamen nobis rem aliter percipere. Si enim manum lanæ telæ inponamus, minus manum nostram frigere percipimus, quam si metallo polito. Ratio hæc est; manus lapidi & metallo inposita tangit simul & semel millenas forte metalli particulas; lanæ inposita vix viginti. Manus ergo calor, five ignis, agit in 1000 metalli partes, dum interea in 20 agit lanæ. Jam calor manus difficulter in motum ciebit solidas metalli particulas; tum lanæ particulæ illico ab illo calore agitantur, earumque motus diu durat: incalescit enim hoc modo lanæ atmosphæra, motu caloris nostri agitata: metalli autem partes non inde moventur, majoris indigæ caloris.

His præmissis dico: in rerum natura esse talia, quæ ad thermometron æque calida, quæ in cadavere æque inertia, nihilo secius ab humano corpore vivo adsumta, eive extrinsecus adplicata, corpori huic vel calorem quam antea majorem, vel frigus quam antea intensius, valeant conciliare.

Hac ratione piper, non calidius in aëre, quam cætera corpora in eodem aëre posita, in hominis viventis corpore calorem excitat. Est ergo *calidum potentia*.

Verum aqua, quæ calebat in aëre externo æque ac piper, intra corpus suscepta apta nata est frigescere totum corpus. Est ergo *frigida potentia*.

Sint jam duo homines, quorum pipere alterum, alterum aqua repleas. Prior calebit, ardebit, exuretur: alter sensim debilitabitur, flaccescet, tumebit, frigebit.

Immo

Immo, si aqua calida hominem hunc inpleveris, hanc inertiam, hoc frigus eo induces certius, tantoque citius; nam calida humida citius debilitant; ita, ut aqua actu calida tunc fiat potentia frigida.

(Hac occasione monuisse non oberit, nitrum exhibitum quidem ab omni retro tempore fuisse, ut æstum temperet, refrigeriumque adferat plus justo calidiori corpori. Nititur theoria experimento certo quidem, quo constat: aquam, in qua nitrum solvitur, reddi frigidiorē, quam antea fuerat; teste thermometro. Verumenimvero notandum fuisset, refrigerium hocce non nisi sub ipsa obtinere solutione: ea peracta laticem, nitrum solutum tenentem, sensim redire ad eundem cum alio, in eadem atmosphæra posito, caloris gradum. Quod si itaque nitrum in aqua antea solutum corpori ingero, ut semper ingeri solet; quantumne oriturum in corpore refrigerium licet sperare; finita jam extra corpus omni caloris diminutione; nec, causa illius sublata, jam oritura nova? Præterea æstuans insigniter corpus refrigerium illud cito sane superaret; adeo ut, si frigus nonnihil excedens in corpore excitare vellem; & majorem sane, quam vulgo exhibere solemus, & licet, nitri dosim exhibere, eamque frequentius repetere, &, quod ex dictis præcipuum est, nitri, non factam jam solutionem; sed pulverem potius, ut in ipso corpore fiat solutio eamque stipans refrigerium, oporteret propinare. Videntur itaque effectus boni, si qui nitri usum in æstus excessu sequuntur, non tam refrigerio, quod, una cum causa sua, extra corpus jam perfectum fuit, quam vi salinæ adtenuanti, solventi, incidenti nitri, aut aliis, mea pace incognitis adhucdum, rationibus adtribuendi. Certum præterea habeo, æstum corporis minui posse, eumque sequentia sympto-

parata leniri, codicari; quin ad hoc substatu, mercurium in thermometro, frigore excitato physico, deficiente, habeamus opus —)

Tum etiam, quod præ cæteris nocent quiescentibus corporibus. Dum salubri motu corpora exercentur, augetur solidorum in humores, humorum in vasa, humorum particularum inter sese, motus, adrius, adstrictus, solutio, secretio: hinc, quidquid cohaerescere cepisset, amovetur, solvitur. sed quiescat homo, tenacioribus alimentis continuo utens, cohaerebunt, obstruent omnia, quaecunque adstanta tenebra fuerint. Si moderatus se movisset, respiratio aëta, diaphragmatis & musculorum abdominalium actione recepta, omnia hæc viscera commovisset, agitasset, compressisset, iterum laxasset, inter sese mutuo adstrictisset; adeoque viscositatis prohibuisset adaccumulationem. Jam vero quiescit & quiescere pergit: obplebitur itaque viscositatibus, (infarctibus crudis) & lentum illud gluten, lubricandis articulis inserviens, ita adaccumulabitur, ut oriantur anchyloses.

Monitum hoc spectat ad homines ingeniosos, qui diu noctuque litteris inpalescunt; ad sexum amabilem, cui adeo adamata quies; ad Pueros etiam inertes; ad Omnes denique otiose vitæ, (aut artis, quam exercent, necessitate, vitæ sedentariæ) deductos.

Ex dictis autem sequens diætæ regula sequitur. Qui strenue laborant, his dura, tenebra, fortia alimenta exhibe, ne cito deficient, (& in his tamen moderamine quodam observato): his vero, qui vitam sedentariam agere vel volunt, vel debent, molliora, tenuiora.

(Interponantur saltem talia, ni ob rationes œconomicas ab Artificibus v. c. & Opificibus sedentariis suis Ministris semper exhiberi queant, una cum oleribus mollissimis, solventibus, fructibus coctis &c.

&c. aliis, vires digestivas validiores exigentibus. Certissimum omnino est, magnam partem morborum, quæ homines tales adfliguntur, diætæ incongruæ esse adscribendam: morbos etiam tales difficulter adeo sæpe curari, aut plane non emendari posse; quod Ægri diætam talem, quum sui juris non sint, vix mutare queant, hinc fomitem morborum nunquam non foveant.)

§. 765. *Nimia vero oleositas solida lubricat, laxat, debilitat.* Spectat doctrina BOERHAAVI hic maxime ad Eos, qui carnibus, juribusque ac piscibus pinguioribus abutuntur. Ut noxia viscositas nimia, ita & oleositas; quadantenus viscositate adhuc pejor: nam hæc solida *lubricat* &c. Inflexile corium in oleum ponite; flecti se patietur: oleum enim, utut videtur crassum corpus, tamen est subtilissimarum particularum; ita, ut penetret in meatus, qui aquæ sunt in pervii; ut in subposito antliæ pneumaticæ corio patet. Ergo partibus suis subtilibus insinuat se inter rerum elementa; ea a se invicem, suo interposito, segregat, elongat; mollioris fabricæ totam fibram reddit, adeoque debilitat. Medici, qui cœnobiis a Medicina sunt, fassi fuerunt, Religiosos, quibus est olei multus & quotidianus usus, magis esse herniæ obnoxios; (eosque, in genere, morbis a fibra rigida permanantibus minus laborare.)

Oscula minimorum vasculorum obstruit, sua viscositate; hinc introitum aquosorum impedit. Scitis antipathiam esse oleum inter & aquam, ut aqua per oleosa, & vicissim oleum per illam, non penetret. Ubi ergo aquosa, diluentia requiruntur in commodum partis, oleosa aditum obstitant omnem.

Miscelam humorum depravat; quia salina & aquosa cum cæteris probe misceri nequeunt. Acrida, nidorosa, urentia excitat. Scilicet, ubi blandum oleum
cor-

corrumpi cœperit, nil est, quod fœtorem majorem, (quod sæpenumero in putrefacto cerebro & oleo medullari expertus fui,) majorem etiam urentemque adeo excitet calorem; de quo partim jam actum, ubi de acrimonia oleosa aromatica erat sermo. Vitulina (& quævis alia recentissima) pinguedo blandissima est; at infusa, igneque agitata diu in sartagine, amburitur, nigrescit, amarescit, & nimium adsumta febrini pessimam excitat. Nil dulcius blandiusque butyro recenti, vel oleo, nunc presso, amygdalino: sin vero rancescant, ut cito fit, fauces adurunt, dolores colicos excitant, vomitus, diarrhæas, dysenterias; ut demum pro blando remedio fiant venenum acerrimum.

(Eo pejus tale in venenum mutatum oleum, quod visciditate sua firmitus adhæreat, irritet, stimulet, rodat, quod pingui indole aquam respuat, nec avelli hinc a parietibus internis facile queat. Patet hinc, olea omnia pressa, usui interno destinata, tum & cocta, & infusa, semper recentissime esse debere in officinis: nec domi etiam, ob male adplicatam œconomiam, adservanda, uti sæpius factum vidi, in futuros usus. Unguenta pariter non nimia parentur copia; nec per annos servantur; quum & hæc, ob rancidas demum, rodentissimas factas pinguedines ac olea innixa, non solum cutaneas adfectiones varias producere, sed & malum, cui adhibentur, dictam ob rationem longe pejus, quam unquam factum fuisset, reddere, resorptione demum, erisypelas, æstum, febrimque excitare queant. Ad hujuscemodi, etsi magni sane sint momenti, cautelas Chirurghi non satis semper adtendere solent: hinc vero nonnunquam morbus prior non solum non curatur, sed & exacerbatur, novisque aliis augetur. Quid acredo oleorum, externe corpori adplicatorum, generare queat mali, satis evincitur

analogicis instantiis, quas *Inl. VAN SWIETEN, Comment. T. II. p. 638. & 742., Edit. Lugd. Bat.* de oleis empyreumaticis guayaci, cornuque cervi adtulit. In determinatione hinc virium remediij cujusdem respiciendum semper cautissime est ad proprietates omnes reliquas, quas habet, vel habere potest; tum & ad omnes circumstantias resque externas, a quibus vires illæ mutari, intendi, infringi possint.)

Multis contingit, ut, postquam in mensa oleosa, pingua adsumserunt, 6, 7, 8 horis postea cardialgiam & ructus nidorosos experiantur, & etiam vomant (acerrima, palatum faucesque rodentia, dentesque stupefacientia). Ajunt sibi bilem adscendere & evomi: minime verum. Injiciant hanc materiem igni; deflagrabit: injicite bilem ipsam hominis igni; non inflammabitur, (nisi siccior evaporando facta): ergo non est bilis. Quin, si copia major, vel acrior bilis adfuisset, non rancida facta in ventriculo, aut intestinis, illa pingua fuissent; quum bilis functio sit, oleosa dividere, & aquæ reddere miscibilia. Est ergo rancidus ille ructus & vomitus potius bilis deficientis (aut inertis) quam abundantis, signum.

Cardialgiæ quinta species est hæc, a rancido oleo; curanda aquosis (bile ipsa) & saponaceis amaris, ut bilis in his hominibus augeatur (subpleatur a posterioribus) copia & acredo.

Tum sitim inmanem: magno hominis bono, ab una parte; quia, siti illa instigante, omnis illa acris materies abluitur aquosis: sed ab altera parte mali omninis; quum obstructa vasa minima per olei viscositatem aquosis transitum denegent.

Obstructiones, inflammationes. Oleosorum copia infarcti humores hincque lentescentes, vasa minima obstruere possunt. Oleum stagnans facile corrumpitur,

acre

acre fit, & sic, ut in acrimonia oleosa vidimus, fit pessima inflammatio.

Indigestiones viscerum, & mala inde orta, efficit. Oleosa enim nimium adsumta laxant viscera, debilitant. Ergo viscera illa non bene digerunt. Oleosa obstruant vasa succum entericum & gastricum exhalantia: digestio itaque vitiatur. Olea ambusta, corrupta chylum corrumpunt, cumque eo sanguinem intrant. Olea corrupta ventriculum excitant ad vomitum; intestina ad dysenterias.

Absolvissimus sic classem hanc causarum procatarticarum, nisi deberemus adhuc inter dissertationem de ingestis agere de tribus aliis rebus. Imo de aqua; quod BOERHAAVIUS ejus videatur oblitus esse: 2do de *vermibus*; quia origo eorum ingestis debetur; de quibus B. agit §. 792. & 3tio de *venenis & contagio*, quæ ingestis debentur; BOERHAAVIO §. 796. dicta.

(„ Prælegenda, adscripsit hic loci beatus HAENIUS in margine, HOFFMANNI *Obs. VII. ex l. I. obs. phys. chem.*; ubi pulcra de aquis.“ — Non requisitum credidi, ut eam hic denuo infererem.)

Primum quidem aquæ naturam expedit ex. Physicis & Chemicis petere. Rem totam complectitur B. *Element. Chem. c. de aqua.* „ Quum inter omnia corpora, ait, quæ homines quotidie conspiciunt, aqua communissima habeatur omnium, eaque sensibus assidue explorari atque ad pleraque opera adhiberi soleat; evenit, ut putaverit Unusquisque, se ejus naturam penitus perspexisse. Illi vero, qui sollicita cum cura ingenium ejus intelligere sategerunt, vix invenere ullam rem in rebus naturalibus, quæ difficilius cognoscitur. Cujus quidem difficultatis causa imprimis est, quod adeo difficulter queamus separare aquam a cæteris corporibus, aut cætera corpora ab aqua.“

Revera talis aqua pura difficulter obtinetur, quia aqua se cum tam multis aliis corporibus commiscet, & omnia corpora, etiam siccissima, aquam inter suas particulas reservant. Cornu cervi, per 50 annos in scriniis servatum, dum destillabatur a Chemico, aquæ admisionem testabatur. (Qualem instantiam & siccissimum omni nota, annosumque lignum v. c. guayacum subpeditât, in destillatoria analysi sat multam aquæ dosin fundens. In metallicis tamen substantiis aqua delitescens hactenus nondum detecta.)

Aqua autem, quando habetur quam purissima haberi possit, est „Liquor valde fluidus, inodorus, insipidus, pellucidus, excolor; qui in certo gradu frigoris in glaciem fragilem, duram, (*) vitream congelascit.“ Quo etiam est levior, eo melior; seu eo minus rebus aliis saturata est.

(*) Tanta vi repagula, quibus aqua in glaciem abiens continetur, dimovens, ut ex calculo, quem ACADEMICI FLORENTINI ex suis deduxerunt experimentis, æquet libras 27720. Monuit autem *Cel. BAUMÉ*, phænomenon hoc & alia non unice ab aëre, aqua glaciata intercepto, dependere; quum, si glacies acû terebretur, ut aëris prodeant bullulæ, aut nullus prodeat aër, aut non actuosus. Autumat insuper *BAUMÉ*, fore ut metalla ipsa in fluxum abeant, dummodo sufficiens frigoris gradus admoveri posset, qui tanto major esse deberet, quo difficilior funditur substantia metallica: ut adeo calor summus & frigus intensissimum eundem plane producerent effectum. Unde & glacies frigore multo majori adnoto, quam quod, ut congelascat, requiritur, denuo in liquidum reverteretur statum.

Pro usu diætetico notandum, aquam, & potus omnes, nunc ex glaciali in liquidum redeuntes statum, sanitati non esse proficuos: redire tamen, in-
pri-

primis in aqua, meliorem nonnihil conditionem, si aëri temperato aliquamdiu manserit exposita.)

HIPPOCRATES laudavit *lib. de aëre. aquis, & locis*, aquas coctū (ad ebulliendum) facillimas & citissimas: unde & in *Aphor. 5—26.* dixit: „Aqua, quæ cito calefit & cito refrigeratur, levissima.“ Etenim aqua sal gerens tardius ebullit, tardius refrigeratur, (quod ex majori densitate facile deducitur.) Ita & si quid habet pinguedinis aut bituminosi admistum: unde sapienter HIPPOCRATES a tardiori coctione, & refrigeratione aquarum concludebat ad gravitatem & impuritatem. (Nam, ut bene observat *Cl. de GORTER*, constat, quod ea corpora, quæ majorem habent superficiem cum eodem pondere, citius calorem & frigus inmutent & tradant ambientibus, quam quorum superficies est minor: ergo ad probandam levitatem sufficit citior communicatio caloris & frigoris, quum inde confiet, idem pondus in duobus diversis corporibus non habere eandem superficiem; quod autem corpus majori gaudet superficie, illud dicitur levius.)

Laudavit autem HIPPOCRATES aquas pluviales, quas dixit „levissimas esse, dulcissimas, pellucidissimas, easque ad medelam optimas.“

Differunt tamen multum pluviales aquæ pro locorum differentia, ex quibus diversæ naturæ vapores & exhalationes nascuntur, quæ in aëra sublatæ nubes formant, atque pluviae forma recidunt in terram. Hinc sapiens HIPPOCRATES cautela, olim jam a nobis animadversa, nata est; aquas loci, quem Aliquis medicinam facturum adgrediatur, examinandi.

Est autem aqua

1. *cælo delapsa*; forma *pluviae, nivis, grandinis, roris*;
2. *fontana*;
3. *fluviatilis*;

4. *putealis.*

5. *aqua lacuum, paludum;*

6. *aqua marina,*

1. *Aqua cælo decidua*, sicque excepta, scatet omnibus exhalationibus, vaporibus, salinis, seminibus plantarum, ovulis insectorum, quibus aer est inprægnatus. Sed talis aqua, in pluribus locis ex ædium & templorum tectis non in plateas, ut hic, sed in tubos longos fluit, qui secundum parietes ædium aquam illam ducunt in puteum magnum subterraneum, e quo antliæ ope in usum vocatur. Hinc sumit secum sordes tectorum, stercora animalium, præcipue si in vicinia sint columbæ multæ, insectaque in tectis hospitantia. Quare sæpe scatet vivis animalculis, antequam in usum vocetur, percolanda.

Scripserunt mihi amici Medici, in Hollandia frequentis colicæ Pictonum causam potissimum ab aqua pluviali deduci, magisque in ædibus novis quam in antiquis occurrere. Quippe plumbo copioso tecta ibi teguntur, ut aqua de cælo delapsa super plumbum cavum decurrens in excipulum plumbeum confluat, & per tubos, sive plumbeos, sive ex ferrea bractea (stanno plumbo misto inducta) fabrefacta in puteum colligatur. Plumbum novum ergo videtur quid habere, quod salibus variis, aqua contentis, solvatur. (*) In Styria in fodinis plumbi multum habetur arsenici flavi.

(*) Ratio sequens est: aqua pluvia plurimas secum vehit particulas terreas, una cum minutissimis sabuli granulis: sensim hæ depositæ plumbi laminas crusta firma terrea obducunt, cujus ope plumbum ab mensruis illis in aqua contentis defenditur: plumbum autem novum, hac lorica non tectum, utique plures moleculas mensruo objiciet. — Plumbum per se satis noxium est, & , quin ullum arsenicum accedat, sævissimas colicas, & reliqua nota mala produ-

ducere valet, ut ex historia colicæ Pictonum satis constat.)

2. *Aqua fontana* sæpe non est multo purior, quia nascitur ab eadem pluvia, nive, grandine, quæ secundum montes in terræ viscera penetrarunt (qua tamen admissa theoria, notabilis jam facta transcolatio aquæ). Tum transit per terras, quæ sæpe varii generis secum admissa corpora gerit, metalla, salia &c. Nonne fontium acidularum, ut vocant, id docet aqua?

Exhibet spadana aqua, non æque omnis, nam sunt ibi quinque fontes diversi; exhibet, inquam, chemice examinata, ochram, ferrum, æs, sulphur, vitriolum, nitrum, plumbum, cerussam.

(Consulenda circa aquarum mineralium examen opera egregia *Cl. Cl. Lucas, Venel, Wallerii, Marggrafii, Adami, Springsfeldii, Bergeri, Stæhlingii*, c. s. p. qui præter, ut ita dicam, innumeros Alios, tum speciales fontium medicatorum analyses, tum methodos examinandi illos universales ediderunt: insigne encomium promereri censeo præstans opus *Inl. Viri Lib. Bar. de Crantz: Gesundbrunnen der österreichischen Monarchie* &c. *Wien 1777. gr. 4.*)

Sunt fontes, quæ terræ multum secum vehunt, & aquas præbent, in quibus corpora injecta aut crusta lapidea circumdantur; aut terra illa subtilissima per poros ac inter fibras penetrante petrificata adparent: quælia & ex thermis carolibadensibus adferri magna copia solent.

Apud *Scheuchzerum* (& Itineratores plurimos alios) fontium & aquarum mira non exiguo numero legi possunt.

3. 5. *Aqua fluvialis* minus, *paludum* & *lacuum* plus, sæpe impura est; quia ventus tot in eam defert vege-

tabilia, pulveres, quisquillas; animalium præterea in illa sæpenumero hærent seminia (quin & animalia mortua integra eorumque partes): homines omnes suas impuritates & quisquillas, ut & alia animantia suas fæces ibidem deponunt; quæis demum piscium mortuorum accedit corruptio.

4. *Aqua putealis* aliquando satis pura habetur, plerumque autem minus pura est. Formantur putei magni, rotundi, profundi ex lateribus coctis, quolibet utuntur ad domuum exstructionem; positi autem illi ea ratione sunt, ut interstitia hiantia maneant inter singulos lateres, per quæ ex circumdante puteum terra aqua in puteum exstillare possit.

Aqua putealis plerumque habet id, quod SCHEUCHZERUS de binis Helvetorum fontibus narrat; legumina scilicet crassas pelles habentia in eadem cocta non mollescere; saponem etiam non bene solutum manere. Si legumina viridia in illa coquantur, magis lætiusque viridescunt. (Errore, ut videtur, calami HAENIUS pro instantia spinachiam posuit; de phaseolis virentibus res sæpius certa est, nam non ab omni aqua puteali viridescunt. Cæterum & olera viridiora inde facta fuisse, me observasse autumo; ut adeo, & in legumina & in olera, quæis adnumeranda spinachia, agere queat aqua talis. Decomponitur sæpius ab aqua puteali sapo: dum nempe selenitem vehit; cujus altera constitutiva pars, acidum vitriolicum, majori adfinitate jungitur cum sale alkalino saponis, quam quidem cum terra calcarea, cui in selenite prius nupserat.)

Potus Thee cum puteali aqua paratus gustu ingratus est, nisi aqua solito longius antea bulliverit: verum tunc potus idem visu ingratus est. Potus Coffeæ ex puteali gratior.

Plura ergo obposita habet putealis aqua dotibus, quibus aqua pluvialis gaudet: nam pluviali in aqua
fabæ

fabæ & pisa cocta tenerescunt, & sapo bene dissolvitur & solutio manet. Sed si aqua pluvia habeatur ex fusa de tectis nive, qualitates fere obtinet aquæ putealis; nam legumina non ita in illa mollescunt, & potus Thee cum illa paratus ingratus est, nisi aqua duplo plus ebullierit (in qua tamen re varia denuo obtinent discrimina.)

Dum fœminæ Batavæ bis in anno ædes totas repurgant, solent in magna siccitate ab hoc opere desistere: quia aqua pluvia multa tunc in cisternis non est: observant vitra ab aqua pluvia longe nitidiora & fieri, & diutius manere, quam ab aqua puteali.

In locis, ubi solum magis limosum quam arenosum est, aqua putealis nil valet, v. c. Amstelædami: solum ibi adeo limosum, ut omnia ædificia insistant palis ligneis crassis, magno labore primum terræ infixis. Curia, sive domus, ubi Magistratus congregari solet, 4000 ejusmodi palis innititur.

6. *Aqua marina* sal continet (commune, & magnesiæ) & bitumen, & quæ in eam invehunt flumina, corruptiones omnium putridorum piscium (aliorumque animalium), omnium marinarum plantarum putrescentium, millenorumque hominum, quotidie fere in ea vel mortuorum, vel a morte in eam ex navibus projectorum; præterea omnia, quæ per terræ motum, aut ignes subterraneos ex fundo maris in altum vehuntur. Videtur marina aqua dotes ubique communes habere; nam est unum tantum mare in toto orbe. Si enim videas chartas geographicas, vocari videmus mare mediterraneum, septentrionale, balticum &c.; sed sunt omnia illa maria tantum unum commune mare. Forte excipiendum foret mare caspicum in Asia, inter Persiam, Georgiam, & Tartariam; verum Itineratores credunt, hoc mare communicare in terræ visceribus cum sinu persico; quia invenerunt toties in sinu persico fo-

lia arborum, quæ non alio loco sitæ sunt, quam prope littora tot centenis milliaribus inde distantis maris caspici.

Aqua marina non caret omni usu in Medicina, agitque principiis forte minus cognitis: solvit alvum copiose, movetque urinas; obstructa blande referat.

(Videndum circa hanc rem imprimis antea jam adductum opus *Cl. RUSSEL on Sea water*. Monuisse hic non obeerit, facere nos posse, a mari licet remotissimos, aquam marinam artificialem, addendo determinatam dosin magnesiæ salisque communis aquæ sic dictæ, seu infusi potius, cedriæ: quin & eosdem, qui ab aqua marina prædicantur, nasci vidi effectus, ab usu ejusdem infusi, adsumpta simul omni altera die magnesiæ. Infarctus hac ratione curati fuerunt glandularum, aliis remediis diu incassum tentatis.)

Fœmina per 6 annos laboraverat variis iisque fœdissimis circa os & labia exanthematibus ac ulceribus. Opem medicam diu frustra expertæ *Cl. WINTER*, Professor Lugduno-Batavus, Principis Arausiæ Archiater suavit, ut quovis mane biberet aquam marinam ad unc. 12, 14, 16, quod consilium ubi multo tempore sequuta erat, integre curata est.

Anno 1753 contigit, ut vir ille famosissimus, Professor KÖNIG, notissimus nunc ob lites cum *Cl. Cl. MAUPERTUIS*, *EULER*, & tota *Societate Berolinensi*, habitans Hagæ-Batavorum, conquereretur eidem *Cl. WINTERO* intolerabilem per totum corpus pruritus, maxime ad anum, perinæum, scrotum. Multa interna externaque frustra *WINTERUS* adhibuit, ut & aquas selteranas copiosas; immo tandem terram foliatam tartari ad ʒij. iij. de die. Quum omnia non tantum non juvarent, sed eruditissimus Vir corpore superiori toto emaciaretur, abdomine autem immensum turgeret, viresque plane conciderent, flavo enascente colore; per
tres

tres septimanas quovis mane sumsit aquæ marinæ bonum haustum: inde sanitati eatenus restitutus est, ut summopere miratus fuerim, hominem postea cum *Cl. WINTERO* videns.

Videmus ex aquarum historia, aquas vere puras nullibi haberi, sed alias aliis adjunctis refertas esse. — In montibus quidem alpinis inventæ sunt casu a. 1240. thermæ prope Monasterium Fabariense Ord. Benedict., vocatum *das Kloster Pfeffers*, quod ibi a. C. 720. fundatum est. Ea aqua limpidissima est, colore, sapore, odore destituta; omnium palato ex æquo grata: interim tamen non ita pura est; quum ex una libra 51 grana partium alienarum extracta sint: inter heterogeneas illas partes inventum sulphur, aurum, aliaque. Vocantur thermæ illæ *favarienses*, *favariæ*, *favarianæ*, *favorinæ*, *piperinæ*, vulgo *Pfeffersbad*, *Pfefferwasser*. Fert transportationem per totam Germaniam usque in Hollandiam. Multas curationes aquæ huic adscribunt, quia puritate sua omnia vasa creditur penetrare. — *Vid. SCHEUCHZER It. alpin. secund. 1703. p. 85. seq.*

Quia cæteroqui aquæ passim omnes habentur impuræ; variis modis Varii conati sunt purificare illas, colando vel filtrando.

1) Sunt, qui plura vasa terrea, arenis plena, fundo aperta, (perforata, aut linteo grossiori obducta) alia super alia ponant; ita, ut aqua sic ex primo vase in omnia reliqua ad ultimum usque transiens, pura satis demum prodeat.

2) Lapidem pumicem adhibent alii, ut aquam percolent; etiâ redivit inde aqua purior.

(., Siculi, *HOFFMANNUS* ait, *Med. rat. systemat. T. I. l. 2. c. 6. §. 13. schol.* aquam palustrem per lapidem, qui *filtrum* dicitur, depurant; siqui-

dem ex poris hujus lapidei filtri aqua prodit limpi da, terreæ vero sordes in illo retinentur.“

Singularis methodus est, qua Ægypti incolæ, inprimis Káhirenses, utuntur ad purificandam aquam turbidam niloticam: pasta ex amygdalis vasa magna, in quibus aquam adservant, obliniunt, tumque aquam turbidam infundunt, quæ paucarum horarum intervallo limpida redditur. Visum quidem Nonnullis id fuit incredibile: ast fide dignissimorum Virorum testimo niis adeo confirmatum habetur, ut omnino injuriosus illis foret, qui factum, quod propriis oculis vide runt, negare vellet. Adducam hic binos solum præcipuos, *Cl. Cl. Pococke, & Niebuhr.* (*)

Cl. Weigel in *Observat. chem. mineralog. me thodum publici juris fecit, aquam destillatione reddendi purissimam: versam eam dedi in opusculo Sammlung nützl. und angen. Gegenstände 1c. Thl. I. S. 5. &, hocce anno, eandem denuo inseruit versioni Weigeliani libri, sub titulo: Chemisch-mineralogische Beobach tungen 1c. D. J. Th. Pyl, I. Thl. S. 81—84.)*

3) Li-

(*) Ait Pococke: - - - Afterwards the water becomes very red, and still more turbid, and then it begins to be whol some, and is drunk by the vulgar; but most people ha ve large jars, the insides of which they rub with poun ded almonds, that is, what remains after the oil is pres sed out, which causes the water to ferment and settle in four or five hours. *A Descript. of the East &c. vol. the first. Lond. 1743. fol. p. 200.*

Recentissimus & exactissimus Itinerator *Cl. Niebuhr* sic habet: Das Nilwasser ist immer etwas trübe: wenn man aber die großen Wassertöpfe (Bojanen, Osiarren) welche man fast in allen Häusern dieser Stadt findet, inwendig mit Man deln reibet, die auf eine gewisse Art zubereitet sind, so wird es in denselben in wenig Stunden klar, und man hält es für sehr leicht und gesund. *Reisebeschreibung nach Arabien u. s. w. Kopenhagen, 1774. 4. 1ster Thl. S. 131.*

3) LISTERUS & DESLANDES in *Act. Soc. reg. scient. Gall.* (Prior in *Philosophical Transactions &c.* Nro. 156. sub titulo: *a way of distilling sweet and fresh water from sea-water &c.*) conati sunt aquam marinam efficere potabilem, destillando illam cum alga, herba, quam mare in littora projicit, quamque Nautæ Batavi *Wier* vocant. Res foret maximi momenti, quum in longis navigationibus sæpe aqua deficiat, & si bibant Nautæ aquam marinam, plus sitiunt, & scorbuto muriatico eo citius laborant (*). Res tamen votis Physicorum aliorum non ita respondit, ut in longa navigatione usum inde capere Nautæ possent. (**)

(*) Quid in fovendo aut producendo scorbuto sal muriaticum possit v. in opere *Cel. Jam. LIND, a Treatise of the scurvy; Part. II. chap. I. the true causes of the disease, from observations made upon it, both at sea and land.* Ait ibi inter alia Vir illustis, enumeratis huc spectantibus rationibus nonnullis & experimentis — — — „ *From which I am convinced, that sea-salt, at least the drinking of salt-water, by no means disposes the constitution to this disease.*“ — — — „ *Some have thought they received benefit from salt-water.*“ Videatur tamen van SWIETEN, *Comment. ad §. II 50. pag. 597. Edit. Paris 1771.*

(**) Pauca sane ad notitiam *Cl. de HÆRN* pervenerunt Scriptores, qui de methodo egerunt aquam marinam reddendi potabilem: perfectiorem catalogum vide in *Cl. WEIGEL Physische Chemie T. I. §. 283.*

4) Aqua nunquam sit purior, quam ubi redacta est in vaporem: unde sæpe aqua pluvia cæteris purior; etsi originem debeat vaporibus ortis ex mari, fluminibus, lacubus, paludibus. Calor namque minimus vehit ex aqua vapores; salia quidem & alia hetero-

genea

genea elewantur quoque, sed non tam facile. (Vidit *Cel.* PALLAS rorem manifeste falsum in vicinia lacuum falsorum, prope fluvium *Jaik*: citissime rubiginosum ferrum reddit atmosphæra *Barbadensis*, & *sublinearis* alia, notante *Cl.* ELLIS; qui dixit equidem, ferrum in septemtrionalibus locis non adeo rubiginosum reddi, quum particulæ salinæ in auras ibi loci adscendere non æque facile possint: contrarium tamen expertus fuit *Cel.* HELL *Wardoëhusii*, v. *Inst. meas Chemicæ* §. 339. Plures ejusmodi instantias adferendi occasio erit in Opere, quod in commune, ni multum fallar, Medicæ artis Cultorum bonum suscepi; exhibente in compendio ea omnia, quæ in amplis, pretiosis, & diversis, non Cuivis notis, linguis exaratis, *Itineratorum celeberrimorum Relationibus* occurrunt, artis *Asclepiadeæ practicæ* inprimis, tum & *Pathologiæ generalis*, & *Rei diæticæ ac Materiæ medicæ* proferendis limitibus apta: operis hujus, quod Multi desiderarunt merito, Nemo adgressus fuit, volumen primum mox prælo committam.)

Ægyptii illam ob rationem Nili aquam sibi de nocte colligebant, antequam sol partem puriorem adtraheret in aëra. Nautæ vellera ovilla de nocte navibus circumponunt, quæ excipiant vapores e mari exhalantes: exprimunt dein ex illis aquam utcunque potabilem. Fuere Nautæ, qui, carentes aqua, marinam decoxerunt, ejusque vapores spongiis exceptos expresserunt, potabilem aliquatenus adquirentes hoc modo aquam.

5) Sunt, qui clarificare sese aquas posse dixerunt viscosis, lacte, vitello ovi &c. commistis, quæ intercipient fœces; fere ut Pharmacopœi clarificant suos syrupos. (Qua tamen methòdo nunquam purissima obtinebitur aqua: spectant huc & correctiones ab HORMANNO enumeratæ, ope additionis spiritus vini, succi citri, aceti, panis tostii, argillæ tostæ, cornu cervi usi &c.)

Feli-

Felices omnino, quibus bona aqua adest, quum vitam nostram sustentet;

(DEMOSTHENES, *Cel.* ZIMMERMANN ait, quem LONGINUS fulmini aut procellæ comparabat, non nisi aquam bibit. Quod aquam solum biberet, CÆSAREM aptum esse evertendæ Reipublicæ sobrietate sua, CATO dixit. TIRAQUELLUS, aquam unice bibens, quadraginta genuit liberos, quadraginta edidit libros. Græci ac Romani aquam pro remedio habuerunt panchresto. — Potum aquæ, qui antiquissimus, omnium primus & communissimus est, ad vitam & sanitatem tuendam commodissimum habendum esse dixit HOFFMANNUS, qui & bonam scripsit dissertationem *de aqua Medicina universalis*; v. quoque Ejusd. *T. II. opusc. Phys. med.* — Observatis constat, morbis ab acrimonia oriundis scorbuticis aquæ Potatores minus subjici: firmiores nitidioresque dentes, & oculorum acies huic causæ etiam passim tribuuntur; tenendum tamen ubique, nullam regulam esse sine exceptione; quod ad ipsa usque animalia verum est. HOFFMANNUS in laudes aquæ potus excurrans, observationem adduxit ex *Misc. Nat. curiosor. Dec. I. A. III Obs. XV.* de sene centum viginti annorum, vegeto adhuc, cui integra dentitio in senectute obtigit, neque aliam proferre potuit longævitatis causam, quam potum aquarum ex scopulis & fontibus vivis scaturientium, quibus a teneris delectatus fuerat. Ad dentitionem certe aquæ potus conferre nil potuit, quum germina dentium inde non producantur nova. Id autem vero videtur simillimum, fore ut tertia dentitio, vel integra, vel partialis saltem, sæpius observaretur, si plures homines ad seram valde ætatem frequentius pervenirent, viribus sufficientibus & gradu etiam quodam penetrabilitatis & elasticitatis gingivarum & alveo-

lorum simul instructi. Ratio, cur eam foveam sententiam, est, quod sæpius in maxillis Adultorum, per medium discissis, germina invenerim dentium plus minusve magna, quæ sane, positis illico dictis conditionibus, tertia dentitione prodire potuissent.

Adtulit *Cel. de HAEN* circa prærogativas aquæ magnum locum ex *BOERHAAVII Elem. Chem. T. I. p. 615. 616.* qui ex ipso fonte legi poterit.

Sequitur nunc in *TEXTU HAENIANO dissertatiuncula de vermibus*; hanc vero, quum una cum additamenti copiosis, libellum aliquot filerarum sola constituat, atque talibus insertis, opus hoc in iusto longè maiorem excresceret molem, seorsim edidi, una cum tractatu *de Ictero*, & ad hunc pertinentibus *adfectionibus felleis*. Lucratus inde fui inprimis, ut varia adferre in animadversionibus potuerim, utilia scitu, quæ alias reticere omnino debuissim: etsi quidem nunquam non meminisse debebam: *edere me librum, non componere*; tum, *scribere, ut aliquantulum prodessem TRIRONIBUS, non, ut erudirem SOPHOS.* —

Simili consilio & in subsequentiis utar, *si majores circa morbum quemdam occurrant diatribes.*)

Absoluta Historia vermium *Cel. de HAEN* pergit: *Venena, pestis, &c.* Transeo ad §. 796. ob rationes ante dictas, quum ad ingesta referantur. Tenendum, *venena & contagia* non omnes æqualiter adficere; immo esse, quæ venena huic homini sint, alteri autem salutaria.

(Multum quidem dependet in his a dosi & præparatione, quæ magnam partem venena in remedia mutant; tum & a singulari cujusvis hominis constitutione, compage debiliori aut firmiori, copia præsentis inprimis pituitæ &c.: interim tamen certissimum est, plurima dari quæ omnibus æque evadant periculosissima, & deleteria.)

Qua ratione illa agant, nos nescimus (in multis, non tamen in omnibus. — Ait in *Codice* HAENIUS, materiem hanc se jam exposuisse, sub titulo *de contagio*: nullibi tamen expositionem hanc in schedis inveni. In nosocomio etiam ad lectos Aegrorum circa contagium non diu moratus fuit; id imprimis diducens, nos plurima adhuc latere, quæ fiant; etsi, ea fieri, certissimum sit. — Circa CONTAGIUM adducere quidem possem ingentem numerum majorum minorumque omnis ævi librorum: ut vero candide loquar, qui mihi magis satisfecerit, novi *nullum*. Unde & rem hanc totam eo lubentius prætereo. — VENENORUM historiam nuper exacte persequutus est *Cel. GMELIN* in Operibus: *Abhandlung von giftigen Gewächsen in Deutschland* &c. Ulm 1775. gr. 8. — *Allgemeine Geschichte der Gifte*. Leipz. 1776. 8. — *Allgemeine Geschichte der Pflanzengifte*, Nürnberg. 1777. 8. — *Allgemeine Geschichte der mineralischen Gifte*. Nürnberg. 1777. 8. In hisce Tractatibus simul magnam laudare debeo *Cl. AUCTORIS cognitio nem litterariam* optimorum circa hocce objectum fontium: lectionem hinc illorum eo magis commendo. —)

Absoluta itaque prima classe causarum procatarcticarum, *de ingestis*, examinemus secundam *de gestis, motu & quiete*.

§. 766. *Motus nimius muscularis in toto corpore*, &c. Phænomena motus muscularis ex physiologicis nota. In quiete sanguis minus motus in venis (& in arteriis) ac veluti adgregatus: motus autem musculorum movet agitatque hoc totum adgregatum. Concipitur hinc facile, musculorum motum majorem ac perennio rem febrium causam dici posse. Revera ducit motus protractus magnusque musculorum in ipsam febrem ardentem, immo pestilentialem. Pedellus Leyden.

denſis pro DRELINCURTIO Profeſſore ita cucurrit, poſt abeuntem ſcapham, ut brevi moreretur.

(En exemplum unum inſtar omnium. „Adoleſcentem, HIPPOCRATES ait, *Epidem. III. Ægrot. VIII.*, qui decumbebat in Mendacium foro, febris corripuit ex laſſitudinibus & laboribus, ac curſibus inſolitatis. Prima die alvus turbata ex bilioſis, tenuibus, multis. Urinæ tenues ſubnigræ, non dormivit, ſiticuloſus. Secunda omnia exacerbata ſunt — — Mens turbata — — Tertia — — multa jaſtatio, desperatio, mente motus eſt. Extremitates lividæ, ac frigidæ: præcordii intensio ſubmollis utrinque. Quarta non dormivit. Malum in pejus procedebat. Septima mortuus: ætate circa vigefimum annum erat.“

Ante paucos annos in publicis relationibus accepimus hiftoriam Juvenis, qui ſummis æſtivis caloribus, velocitatem equi ſui demonſtraturus brevifſimo temporis intervallo locum milliaribus aliquot remotum petiit, & adtigit: ſimul vero in ardentifſimam febrim lapſus, cum non interrupto delirio, qua & eadem die veſperi raptus fuit.

Notum eſt, carnes ferarum, dum hæ currere coguntur tandiu, donec exanimes fere concidant; illico nonnunquam in ſummam abire corruptionem, ut ne canes quidem extremis labris eas tangant. — Patet hinc ſimul, carnem boum vel taurorum, qui, antequam occidantur, velocifſime canibus agitati fuerunt, tumque illico necati, omnino non ſalubrem eſſe: vidi talem carnem nigram fere, ſanguine cellulofam undique replente; ſapore ingratiſſimo, ſubalkalino, tum caro, tum inde paratum juſculum erat infectum. Quodſi nulla alia caro haberi queat, diſciſſa tuſione ac elotione a ſanguine, quantum fieri queat, liberetur, & aceto multo condiatur, ut ſaltem minus reddatur noxia.)

Fit in summo musculari motu liquidorum perspiratio continua, reliquorum adtritius, adtenuatio, exaltatio (oleosarum & salinarum partium; indoles evolvitur alkalina, febris mox nascitur ardentissima, cum ingenti cephalalgia, pleurodyne, inflammatione, mox febris putridissima,) error loci ubique, & gangrænosa putredo.

Sed si non ad summum gradum productus motus, tum fiunt in Textu descripta: *Hinc fluida & solida nimium adtrita dissolvuntur — — — in densitatem inflammatoriam mutantur*: bonus namque sanguis habet omnes suas particulas sphaericas. (quod antea examinatum) Post validos motus particulæ flocculentæ fiunt (oritur discrasia) seque per planas latasque contingunt superficies. Hinc diathesis inflammatoria intelligitur, adeo late patens in morbis inflammatoriis & aliis casibus.

Interim olea — — — exaltantur; ut explicui de acrimonia agens alkalina; unde non multum repetam.

Homo sanus in sua consueta tranquillitate, vel motu sedatiori, perspirat aqueum, vix in indusio visibilem humorem: idem currat valide, vel paullo strenuius laboret; advertet, aqueum non amplius in indusio humorem, sed flavum, utcunque olentem (alkalescentem) Si ulterius continuaverit; experietur materiei exhalantis foetorem ab oleis & salibus adtritius, & in levia saltem putredinis inchoamenta exaltatis.

(Salis crystallulos in indusiis hominum in fabricis vitriariis vidit magnus HALLERUS. In sudore cubulos salis marini detexit TRONCHIN. Dorsum manus in æstate manifeste salsum linguæ inprimit saporem; & excoriationes varias non solum ab adtritio, sed & a falso sudore rodente, nasci tenendum. Sudor multorum hominum adeo foetidus oleosis particulis debetur, acris mistis; etsi non ægrotent. Exercitio corporis violento ipse sanguis per poros

cutaneos transpirari potest, ut abs portento sanguineus oriatur sudor. Fit hoc imprimis, dum sanguinis aut aliunde laxior est compages, aut a varia causa, densioris alias, nunc laxior reddita; subcruentum talem sudorem refert egregius HUXHAM *of fevers*, p. 44. Pertinent huc, dum de resolutione sanguinis sermo est, & omnes illæ maculæ, & vibices, & ecchymoses, & exanthemata &c. livida, plumbea, subcærulescentia, nigricantia, tum hæmorrhagiæ &c. quæ sæpe adeo Practicis occurrunt; pestis consueti satellites, huic quidem non essentielles omnino, pessimi tamen nunquam non ominis; v. potissimum *Cel. HUXHAM of shore throat*, p. 60. *Ec. of fevers* p. 44.; WARREN *of the yellow fever* p. II. LININGS *Es. med. and philosoph. T. II. Art. 29.* HUCHES, *Nat. hist. of Barbados* p. 38. &c.; plures instantias v. apud HALLERUM *Elem. Physiol. Lib. V. sect. 2. §. 7.*

Crassa & tenacia olea — — — redduntur: omnia hæc, agens de alkalina acrimonia, explicui Vobis.

Omnium maxime bilis; ut ibidem ostendi; unde sæpe omnium destructio.

Medulla confumitur. Experimentum huc facit DUVERNEY, quo constat, boves tridui itinere, antequam Parisios advenissent, agitados, dum mactabantur; vix ossium exhibuisse medullam: alias autem, peracto itinere, quiete & bono pabulo refectos, medulla denuo abundasse. Oleosa scilicet in illis pinguedo mota est ac soluta, sanguini dein mista: loco talis olei flavus tenuis liquor in cellulas effusus deprehenditur, a sero bilioso (an constanti experimento, *biliosum* id semper est?) moto, agitato: unde Textus addit: *Cellulæ ichore replentur.*

Macies, a soluta nimium pinguedine oleosa & medullosa, acrimonia sua sanguinem solvente: unde
perit

perit corporis torositas, vasaque flaccescunt, quā motu continuato adtenuati humores perspirant, exsulant. Animadvertimus ex hac doctrina, optimum remedium ad solvendam nimiam pinguedinem esse motum moderatum, continuum.

(Legendus de methodo obesitatem nimiam curandi, *Cel. Malcolm FLEMING*; cujus libellum, in germanicum traductum, publici juris fecit *Cel. PLENCK*, sub titulo: *Malcolm Fleming, Ab. handl. von der übermässigen Fettigkeit* &c. Wien 1769. 8.

Rigescunt autem homines demum & animalia, diu protracto motu corporis nimio. Articuli senum carent sinegmate, tendines oleo: ergo hi rigidæ chordæ fiunt, illi anchyloses innobiles.

Hinc defatigatio — — — *gangræna*: omnia ex dictis fluunt. *Defatigatio*, a perditis viribus, ab inopia boni sanguinis pro spiritibus reparandis. *Dolor*, tum a deficiente sinegmate articulorum; tum a continuato motu & tensione reciproca fibrarum, partiumque nervosarum. *Inflammatio*, a sanguine tenso coriaceo, adacto in vasa minima, extendente illa, & motu a tergo pergente, in vasa tensa adsiduo arietante. *Subpuratio*, ab effuso liquore fracti vasis; nam humor non est ita blandus, ut resolvi queat: immo acrior plerumque est, quam ut in bonam subpurationem abeat; sed, ut bene Textus monet, in *gangrænam*, si in panniculo adiposo inflammatio fiat; in *sphacelum*, si omnes simul inficiat partes.

Hæmorrhagia, quæ in Plethoricis fit a bono sanguine superante vim vasorum resistentem: hic vero ab acrimonia, vasa corrodente. Concutiunt hæc acria, & præsertim mota, diffringunt suos carceres; unde mox qua data porta ruit vitalis humor.

Comprehenditis hinc originem & malignitatem hæmorrhagiæ in variolis per pulmones, (*) renes; ut & quam conclamatae ibi maculae purpureæ. A veneno varioloso sæpe intra triduum ita solutus cruor, ita adtenuatus, ut queat jam per vasa serosa, lymphatica, urinosa transsudare, vel eadem diffringere. Hinc a sanguine tali, cerebrum petente, brevi delirium; cerebri cerebellique destructio, mors.

(*) Vidi sic Puellam, irritabilissimo systemate nervoso alias præditam, octennem, plethoricam, pessimis, quas unquam vidi, per totum corpus variolis, in unicam fere confluentibus, testam; tribus integris ante mortem diebus sanguinem solutum, spumantem ore eructasse. Prædixi antea funestum eventum, & ut vena secaretur, tempore opportuno suasi. Renuit curam valetudinis illius Gerens; solo syrupo violarum cum spiritu vitrioli omnia mala præcaveri posse autumans. Dein vena secta ter: ast, rebus jam undique conclamatis. Emissus vena sanguis nec serum obtulit, nec insulam, nec choënam; sed fluidus, tenuis, multum spumofus ruberrimus altero adhuc die fuit.)

Mors subitanea: hoc jam ante dictum. Animalis motus, qualis nunc explicatus, facere potest tot concretiones phlogisticas, tantam phlogistici humoris acrimoniam, tantos errores loci in omnibus fere vatorum seriebus, ut homo, veluti peste aut fulmine tactus, procumbat humi. Innumeri equi, prius in stabulo molliter nutriti, tum cita belli expeditione remotius acti, hac ipsa de causa, his ipsis symptomatibus intereunt. Ruyschius ait, se vidisse equi ita mortui in abdomine plures fusi olei libras effusas.

§. 767. *Si autem acciderit Cacoehymicis — subito lethalis.* Patet ex dictis. Homo melancholicus, dives, sed avarus, pertinaxque, pedes ivit
Leyda

Leyda Hagam Batavorum trium horarum itinere. Æstus erat: subsistere in via, vellet nollet, debuit. Jam fere expiraturus meminit pomorum aurantiorum, quæ in veste gerebat: his recreatus ægre domum reverti potuit. Alter similis homo, etiam pedestri itinere mortuus, vasa circa hepar fracta exhibuit, effusosque humores.

Ponite hominem, cujus aut pulmonem aut hepar tabes lenta erosit; ita, ut in summa quiete vasa vix sustineant suos humores: hunc, inquam, ponite cursu velociori agitari. Nonne semilaceris vasis solutis sanguis ad mortem effluet usque? Vel motui ineptum, inque seipsum concidens viscus, non circuitum sanguinis sistet?

Regulam hinc petant juniores Medici, sententiam rogati de itinere suscipiendo. Si enim non apte interstinguant hominem ex corruptis visceribus debilem ab homine præ nimia solidorum flacciditate, & sanguinis nimia tenuitate, aut ad spiritus generandos ineptitudine, infirmo; committere poterunt enormes errores: quum Postremis his motus salutifer; Prioribus perniciosissimus sit.

Multi debiles homines mortem sibi consciverunt, dum vel proprio consilio, vel Medico suadente, equitatione, ad debilitates curandas a SYDENHAMO adeo celebrata, uterentur; non distinguentes cum SYDENHAMO, an viscera ferendo essent.

(Notandum etiam est, corporis exercitium non adeo magnum, plurimisque minime nocuum, male nonnunquam adficere posse homines, qui antea vix non semper otio diffluere consueverunt, vix pedibus, aut lectica semper, usi, aut curru vecti. Talibus a motu, qui Alteri vix pulsum mutat, jam velox pulsus, respirium difficile, rubor genarum. Hinc Medicus junior semper adtendat, cui hoc vel illud remedium commendet, quibus sub circumstan-

tiis, & quo tempore; non solum anni, sed & diei: quum motus major v. c. post adsumtos paullo ante cibos nunquam non noceat. Hæc vero nonnunquam & Ægri, & Medici negligunt; termino generico injungentes corporis motum.)

§. 768. *Vigilia nimia consumit spiritus, nulla arte reparandos.* Profecto alterna requie carere non possumus: nam homo semper consumit spiritus; non tantum, quando laborat; sed &, dum tacitus chartis inpallescit. Quis enim, amabo Vos, truncum corporis erectum servaretis; quæ collum & caput? Nimia ergo vigilia turbat necessario functiones animales, dein reliquas. Fit perturbatio gratæ illius animositatis, seu gaudii illius, quod nascitur ex eo, quod spiritus animalitati inservientes apti inveniantur replendis nervis. Menti inde magna hilaritas, quam nemo melius æstimare novèrit, quam qui ea carere incœperit: ea enim deficiente, tristitia nascitur, & tædium, & animi quasi ægritudo & somni amor. (Bene hinc dixit HIPPOCRATES, *Epidem. sect. 4.* „labor articulis & carnibus cibus est, somnus visceribus.“)

Si conemur hanc inertiam, hanc tristitiam, hunc defectum vel cibo, vel meri recreare haustu, frustra erimus. Experiamini, si lubet, num fello Oratori, sustinendis membris jam inepto, vires animales lauto prandio aut vino restaurare possitis? Nequaquam: namque nervi non accipiunt amplius a cerebro tam copiosum, tamque fortem, spirituum influxum, qualis requireretur, ut hominis illius organa, sensibus & motibus destinata, actiones suas & læte & expedite exerceant. Quid ita? Deperdita sunt talia, quæ non nisi magno molimine longoque reparanda erunt. Credibile quippe ex analogia, tenuissima illa vasa cerebri pro tempore vix extensa conlabi; vel etiam crassiori & depauperato a spiritibus sanguine corticem cerebri, proin-

proindeque & cerebrum ipsum, comprimi, compressione spirituum carere transfluxu. — Olim hanc rem in me expertus fui, dum potu Thee aut Coffeæ, jureve carniū, in seras noctes vigilias aliquando protrahere vellem, labantia membra animosus Juvenis ad officium cogerem; consuetudinem multum dormiendi iteratis vigiliis vincendam ratus. Somno submergebar invitus: magno quidem meo bono; ut mox videbimus.

Idem observamus in Ægrorum, quibus adsumus, Necessariis, dum Ægrotantis Amici curam alacriter in se suscipientes, imperare somno se posse autumant, & sufficere bonis alimentis, vinoque corroborante vires deperditas subplere. Vel vincuntur a somno, vel tandem ægrotant; ut pro uno Ægro jam habeamus plures. Quare bene Textus addit: hosce spiritus *nulla arte, nisi somno, reparandos.*

Exsiccat reliqua — — — auget acre. In somno quippe silent sensus interni externique; silent motus voluntarii; muscoli labascunt; omnes effectus corporei, & mentis adfectiones, quæ ex sensuum & motuum illorum actione sequuntur, cessant. Spiritus ergo vix fluunt. Ergo spiritus minus consumuntur. Ergo solidi villi & fibræ, in nervis & musculis vix mutantur; non destruuntur, æquilibrium in omnibus obtinet. Nec varietas pressionis in vasis, nec velocitatis diversitas in humoribus, hic locum habet.

Interim in somno augetur motus cordis, pulmonum, arteriarum, & viscerum, nullis Vigilantis motibus turbatus; quo fiunt ea, quæ BOERHAAVIUS §. 597. n. I. &c.

Habita formataque idæa somni eorumque quæ in somno contingunt, obponite eam Vigilantis actionibus: nonne capitis evidenter, cur vigiliæ nimix adeo no-

xiæ? Nonne etiam ex hac ipsa idæa yidetis, somnum nimium obesse? Si enim homo pergat dormire, dum debita refectio facta est, tunc somnus, qui deperdita reparavit, in descripto illo tum solidorum statu, consumit volatilia; inspissat sensim reliqua; ea in vasa lateralialia adgregat, vix movet; figit excrementa; adgravat cerebrum; caput replet; sensus motusque hebetat; tandem vigilias, omnesque nimiarum vigiliarum effectus producit: humores nempe corrumpuntur, acres fiunt; stimulant tenella vasa, & sic vigilare cogitur homo,

(Leges præscripsit somno utendi PLATO, l. 7. de Legibus, rationibus medicis omnino nixas. „ Qui vitæ, ait, ac sapientiæ curam gerit, plurimo tempore vigilet; id solum providens & observans, ut somnum tantum capiat, quantum ad sanitatem pertinet; ad cujus conservationem non multo somno opus est, si modo recte fuerit constitutus.)

Recapitulemus igitur Textum parumper: *Vigilia nimia* — — — *exsiccat reliqua*; tenuioribus dissipatis. *Adterit solida* — — — *cerebri*; continuata actione; quum omnia hæc alterna requie ad integritatem suam conservandam indigeant: qui adtritum, si in omnibus fiat, quid non efficiet in tenello cerebro?

Auget acre; quia tenuiora ac blandiora continuo dissipantur, actioneque assidua reliqua figuntur, adtenuantur, exaltantur.

Cochiones nutritionesque impedit; quia functiones peregrina mutandi in inquilina, functiones nutriendi per ultimo elaboratos humores solida, indigent copia assiduo nova ultimæ tenuitatis humorum.

Bilem exasperat; certum enim, dum omnes humores blandiori sua parte orbantur, eorumque interea acriora adtenuantur & exaltantur; bilem maxime tum
actio-

acriorem fieri debere; quæ majori olei ac salis copia constat.

Hinc productio maciei; 1) quia corpus amittit, nec refici potest; 2) quia acria illa dissolvunt & adtenuant pinguitudinem.

Febrium, deliriorum: acer enim sanguis, continuo motus, agit violentius in solida; hæc reagent fortius, quia stimulantur; nascitur hinc circulatio major. validior. Sed solida non nutrita debilitantur & defectu nutrimenti, & continua reactione in fluida. Hinc incipiunt fieri obstructions: dum interim sanguis acer, cor irritans, illud in celeriores motum urget. Hinc *febris* nata intelligitur. Quum autem talis sanguis febris accensa ad cerebrum adpellit, pro spiritibus reparandis nil habet, & acrimonia sua cortice cerebri excepta, mire movet & turbat omnia; unde *delirium*.

(Phrenesin ipsamque maniam a vigiliis nimis nasci posse, non uno tristi constitit exemplo. HIPPOCRATES jam dixit *Coac. Prænot.* 497., „Pessimum autem est, non dormire, neque die, neque nocte; aut enim præ dolore & afflictione vigilarit, aut ab hoc signo delirabit.“ V. circa hæc *Cel. ZIMMERMANN*, von der *Erfahrung* 1c. de 'vigiliis nimis ut causa morbi remota agens. *Inl. VAN SWIETEN*, *Comment. ad §. 708. Sc.*)

Bilis atræ generatio, agitatio, evacuatio. Bilis atra duplici modo intelligitur: vel ea, quæ generatur in bilioso systemate; vel quæ in ejus hospitatur vicinia. Quomodo bilis inspissetur & atra fiat, aquosis avolantibus, mox explicatum fuit. Alia illa atra bilis dicitur materies quæ continet in se novam pro conficienda bile materiem, comprehenditque totum illud circulationis systema venæ portarum, in quo tardiores

circulationem nostis, quod sanguis ibidem certo quodam modo bis arteriosus, bis fieri debeat venosus. Stagnat itaque ibidem diutius, amittendoque subtiliorem sui partem, primo spissior fit, deinde in lentam disponitur corruptionem; vocatur tum bilis atra. Ubi vigiliæ nimix excoluntur, nascitur bilis talis atræ dictæ *agitatio* &c. Acris enim facta materies assiduo stimulat sua vasa; hæc suscitantur inde in reactionem validiorem, atra bilis movetur versus hepar, & ex hepate intestina & ventriculum subire potest, vel in hepate intrare venæ cavæ ramulos; inde per venam cavam adduci ad cor, & cerebrum.

Verum quidem, in multis atrabiliariis hominibus viscera & vasa nimium rigida, minus mobilia esse; unde conqueruntur de molesto pondere abdominis; quum humores vix propellantur: at stimulus perpetuus atque validus id efficit, quod robur auctum: unde continuo stimolata promovent contentos humores.

Hinc malum, olim abdomini proprium, jam mire inmutat humores omnes, præcipue, quum cerebrum petit.

Tristitia tunc nascitur, & *phantasia depravata*, & inquietudo perpetua. Hilaritas animi conciliatur ab expedita facultate, qua animus corpore suo utitur facile, jucunde, constanter. Illa hilaritas cito adeo mutatur, ut vix credibile sit. Homo rebus suis contentus, hilaris, nullius mali conscius, a quacunque causa habeat perspirationem impeditam; mox ubi sentit membra gravia, lassæ, hilaritate caret, ac morositate & mœrore adfectum se, velit nolit, percipit. Sic monetur hac tristitia homo, ut confugiat ad medelam ejus, quam experitur, molestiæ.

Ubi ergo cerebrum atra illa bile obpletur, materiem certe spiritibus parandis ineptam habet, tenella
sua

fua vascula, in quibus tardus motus, vel obstruentem, vel erodentem. Ita pars cerebri inepta, ab obstru-
ctione; pars agitata, rodente illa acrimonia, efficit,
ut idææ legitime nequeant menti repræsentari, & ut
mens inveniat inepta ad actiones instrumenta. Hinc
non ultra sapienter de rebus homo cogitare potest, &
fit quod Textus dicit, *Phantasia depravata*; qualem
in summis Melancholicis atrabiliariis observamus.

(Præter ea quæ circa melancholicos adfectus in
Comment. Inl. VAN SWIETEN citatisque ibi Aucto-
ribus habentur; legendum omnino opus præstans
*Cel. LORRY, de Melancholia & morbis melancholi-
cis. T. II. Paris 1765.*)

Sequitur hunc statum inquietudo perpetua. Sen-
tiunt enim Ægri, non bene secum agi; vellent per
intervalla statum hunc permutare; nec tamen bene ca-
piunt, unde, & quomodo hoc ingratum ortum sit, quia
mens laborat, vel mentis domicilium: mutant inde per-
petuo situm corporis, situm loci, alimenti naturam:
omni momento petunt aliud medicamen, quum præcc-
dens displiceat: uno verbo, nil tam constans in illis,
quam perpetua inconstantia.

Hæc una via est, quam bilis atra capit: sed dixi
etiam, posse eam intestina petere, & aut vomitu aut
alvo exire. Dum enim mota ex systemate venæ por-
tarum ingreditur, potest per fistulas biliferas ad ductum
communem, potest ex cavo hepate per vasa a VER-
HEYENIO & PERALTO detecta (de quibus autem vi-
deantur *Elem. Physiol. HALLERI, cap. de Hepate*) in
ipsam vesicam fellis penetrare, inde per ductum com-
munem in intestina pergere, &, si juga valvulosa je-
juni obsint, per ventriculum, si non obsint, per re-
ctum exire.

Tunc autem oriuntur pessimi vomitus ac dysenteriae. Hi sunt illi vomitus, de quibus egi in *cap. de acida temperie*; ubi ex HIPPOCRATE, &c. vidimus, aliquando vomitu reddi materiem cum terra fermentantem; acido praesente temperamento; aut materiem omnium putridissimam, ut a foetore Æger & Adstantes animo linquantur.

Visa tamen sunt exempla hominum curatorum, post hosce putridissimos alkalinos vomitus, usu creberrimo copiosissimoque fructuum horraëorum. Medicum Lugdunensem ab atra bile BOERHAAVIUS unice curavit cerasis. Nolebat miser Homo quidquam sumere, quod foret oblatum; sed, si quid posset furari. Jubente BOERHAAVIO relictæ quotidie corbes plenæ cerasis prope ejus cubiculum; quæ ille furatus copiosam adeo in diarrhæam incidit, ut posthac bilis atra curatus videretur. Scio talia plura exempla in Atrabiliariis.

(Ego autem alia scio, ubi materies atrabiliaria largo usu succorum solventissimorum vegetabilium & olerum fuit optime debellata; ubi subin ne salibus quidem illis adtenuantibus, reserantibus quidquam potuit effici. Nota est methodus, qua AUGUSTUM Archiater MUSA restituit. — Excurrere hic *Cal. DE HAEN* placuit in expositionem Aphorismorum HIPPOCRATIS 3—14., 3—20., 4—9, 22., 23., 25., 6—11., 6—23. 7—40., 7—68. — Quum autem *Commentarii in Aphorismos Hippocraticos* aliunde sufficientes habeantur; hinc ex omnibus illis ea tantum hic selegi, in compendium redacta, quæ Tirones Medicos nosse oportere censui.)

Dum æstas præcedens sicca fuit, & aquilonia, seu calida, corpora aliunde sicca magis exsiccabuntur: quum & humores stagnantes cito putrescant; hinc disponuntur ad atram bilem putridam. Si jam autumnus per-

pergat eadem temperie, nascetur his ipsis vera atrabilis.

Ait Hipp. *Aph.* 3—20. „ Vere insanix & melancholix,“ quia hyemali quiete omnia compacta sunt; vere solvuntur concreta; quum autem a quiete sensim humores ad corruptionem dispositi erant, jamque verno tepore plus solvantur, agitante inprimis eos calore; metus est, ne mota materies producat symptomata atrabilis.

Ait & HIPPOCRATES 6—II. „ Melancholicis & Nephriticis hæmorrhoides supervenientes, bonum.“ — Hæmorrhoidalia vasa non omnia immediate communicant cum systemate venæ portarum; sed quædam etiam mediate, & remote. Sunt enim arteriæ venæque hæmorrhoidales cum iliacis communicantes, quæ dum fluerent, totum potius systema arteriosum totius corporis evacuarent, quam quidem systema venæ portarum: licet tandem aliquis effectus inde redundaret in hoc systema, quia minus sanguinis accipit, ablata copia sanguinis universi corporis per arterias hæmorrhoidales.

Adsunt autem præterea arteriæ venæque hæmorrhoidales, ortæ a vasis mesentericis, adeoque ab ipso hoc venæ portarum systemate, vera sede atrabilis: unde vasa hæc aperta ipsum peccantem humorem evacuant; quod facere vasa illa, ex iliacis orta, non potuerunt.

Quodsi hinc hæmorrhoides fluant ex vasis ortis a mesentericis; directe evacuant atram bilem: ergo summæ utilitatis in Atrabiliariis. Sed si ex his ipsis vasis fluant in homine non atrabiliario, sed nephritico; parum juvabunt, quum non directe inde evacuetur systema iliacum, sed systema venæ portarum. Mediate aliquantum poterunt prodesse, quod systema venæ por-

tarum, sanguine evacuatum, jam plus poterit locare intra sese humorum, adeoque systema renale minus sanguine comprimetur: uti antea dictum, posse aliquando systema venæ portarum evacuatione iliacarum levare.

Dum vero hæmorrhoides oriantur ex vasis systematis iliaci, directe a sanguine vacuabuntur vasa renalia, & habebit homo nephriticus levamen insigne. Melancholicus autem minus inde levabitur, quia manet atra bilis inclusa; non minuitur ejus copia, sed demitur tantum aliquid de tota massa humorum.

Immo, si Atrabiliarius debilis sit, fluor talis sanguinis ex iliacis nocere ipsi potest, demendo vires: dum bonis depauperatur humoribus, pravis succis onustis gemet.

Habetis nunc, quæ adferre queatis, dum Ægri Vos interrogant, cur nullum Aliqui ab hæmorrhoidibus sentiant levamen? e. f. p. — A priori quidem, vel ipso sanguine fluente hæc nescimus; sed ex effectibus possumus judicare, an per vasa illa, morbo propria, sanguis effluerit.

§. 769. *Quies nimia muscutorum in toto &c.* Ut bene capiamus, quid nimia quies faciat, multum juvat recordari, quæ effecerit paullo ante expositus nimius motus.

A nimia quiete fibras reddi motui ineptiores, experimur in nobis, dum, a longo tempore quieti, tandem ad motum, v. c. ad iter pedestre, nos accingimus. Nonne videmus equos, dudum in stabulo quietos, motui ineptiores esse, dum nunc ad iter illis usuri sumus. Musculi omnes, si elementa a contactu mutuo continuo non removeantur, augent contactus illos, & adcurtantur.

Hac ex causa post fracturas sæpius motus membri difficillimus, aut plane impossibilis, veraque anchylosis, vitio Chirurghi, dum v. c. per 5 aut 6 septimanas brachium anguli in formam cum humero directum pectori adnexum tenuit. In Talibus non solum ab adcurtatione fibrarum anchylosis, sed & in ipso articulo partes sic distentæ ab una parte, compressæ ab interna, colligunt omne illud articularum smegma, quod non dissipatur, sed adcumulatum concrescit.

Minuit velocitatem in omnibus humoribus. Videmus enim, circulum humorum rite peragi Imo arteriarum renixu & motu in humores a corde projectos; 2do validiori & laudabili musculorum actione. Sic conservatur sanitas. At vero qui nimio otio indulget, illi tantum peragitur circulatio motu arteriarum & cordis, non vero augetur suslineturque motu musculari.

Musculi enim dum movent sese, primo sanguinem ad se venientem ex corde sistunt; tum sanguinem suum venosum expellunt versus cor: momento postea, dum flaccescit musculus, iterum admittit sanguinem in arteriam suam, pellitque in venam: dum contractionem repetit, eadem iterum phænomena.

Verum, musculus agens premit sanguinem venosum partium vicinarum versus cor, sicque accelerat etiam motum sanguinis.

Musculi tandem agentes & turgentes uno momento, laxati altero, arteriis vicinis & circumjacentibus varios motus imprimunt, quibus acceleratur sanguinis arteriosi fluor versus venas.

Homo quiescens caret omnibus his adminiculis, & habet tantum motum lentiores a cordis impulsu, & vasorum renixu.

Hinc

Hinc concretio &c. Si dixero Vobis, nostra fluida solida potius quam fluida esse, ne miremini; res enim sic se habet. Liquida sunt tantum ab adritu; quo silente, solidescunt. Sunt ergo solida, quæ veluti in molendino illo circulationis adteruntur, & conmoluntur, ut fluida videantur. Dubitatis? Videte, quæso, quod aliquando præsens vidi, exsiliens de naribus sani hominis arteriosum sanguinem: mox fere ubi patinam tetigit, solidescit; concretione, a phlogistica omnino diversa. Deficiat ergo motus corporis, desinant humores circulatione perpetua trituri; certe magis magisque accedent ad naturam solidi, crescent, inspissabuntur, inertes omnino fient ad vasa minima subeunda. Vitiatur inde secretio spirituum, una cum reliquis omnibus excretionibus.

Cellularum repletio — — — ἀναστροφή. Vidimus circulum sanguinis duplici ratione peragi: primo per motum cordis & arteriarum; secundo per motum muscutorum, priori additum. Hoc ultimum si desit, & a circulatione debiliore humores inertes ac ipsi facti sint, per sola rubra vasa fere circulatio peragitur. Serum quidem pelletur in serosas arterias; indigebat autem motu corporis, ut ex arteriis serosis in venas serosas abiret. Lympha quidem intrabit arterias lymphaticas; indigebat autem denuo motu corporis muscolari, ut penetrare suas in venas posset. Idem vitium in reliquis vasorum seriebus contingit.

Ergo liquidissima humorum transibunt quidem ordine suo in sua vasa; sed non propulsa, ibidem inertia hærebunt, adcumulabuntur, nec fere quidquam ad sanguinem redibit. Sanguis ergo ruber magis magisque crassescet, ac inspissescet.

Unde fiet cellularum repletio &c. Cellulæ enim medullofæ in ossibus, cellulæ membranæ cellularis,

ac adiposæ, lateralibus vasis adpensæ & ad eadem patulæ, patent continuo. Hinc oleum sanguinis assiduo a quiescentibus humoribus in iisdem colligitur & accumulatur; præsertim quum motus muscularis quiescat, quæ oleum per sanguinem melius distribuisset & cellulas sua actione perpetuo evacuasset, mutata etiam illarum figura minus aptas reddidisset ad olea copiose adeo excipiunda. Patet hinc sponte, animal quiescens fieri debere (plerumque) obesum.

Fit jam hoc in corpore, quod abundat oleo illo blando: quid autem fiet a nimia quiete homini, cui vel idiosyncrasia, vel vitio quopiam, sanguis factus acrior, oleum acrius, tenuius; ita ut oleum fere in illo deficiat? Pro oleo limpidior jam humorum, sive aquosa magis, pars per lateralia vasa, defectu motus non propulsa, intrabit cellulas, efficietque veram leu-kophlegmatiam.

Quid inde? *frigus*: circulatio enim, olim parva, jam adhuc minor est, cellulæ sive oleo, sive aqua repletæ; prement vasa majora, eaque compressione sanguinis tardio-rem reddunt per vasa motum. Hinc deficit ille bonus adtrit, qui debitum calorem fecerat: ergo tales homines frigebunt.

Torpor inde &c.; quia circulus humorum iners fit & quasi sepultus intra illud sive oleosum, sive aquosum, tegmen. Pauci separantur a tali sanguine intra cerebrum spiritus; inmo a crassiori cruore cortex cerebri obruitur fere, ut vix secernat spiritus. Quæ cerebri conditio ubi ita augetur, ut fere nulli spiritus medullam moveant, eandemque permeent, fit cerebrum propemodum moles iners, qua anima amplius uti nequit. Fit tunc illa ἀναισθησία, immobilitas, indifferen-tia, fatuitas. Visus est Medicus Lugduni-Batavorum,

qui ex perpetua quiescendi & dormiendi consuetudine fatuus, in publico adhuc foro periit.

(Accidit hominibus, qui lecto ac sedili adeo adfixi sunt, ut vix pedibus utantur, (p. 277.) ut sensim corpore vegetantes, mente moriantur; flaccescunt solida, iners fit vasorum robur; viscida, glutinosa magis magisque illis redduntur fluida; subprimitur illud æthereum, quod HIPPOCRATES non inepte *ὄρεμν*, *inpetum faciens* vocavit; quum hujus inprimis ope machina reliqua in motum deducatur, in eo conservetur. Fit in ejusmodi Inertibus, quibus anima unice pro sale est, ne putrescant, idem fere quod in opii Liguritoribus: indifferentes ad omnia, morosi, taciturni numerum augment Mortalium: atque hoc vix non omne est, quod Societati præstent.)

Unde ergo otii & vitæ sedentariæ effectus cognoscuntur. Non vultis, ut hæc Vobis explicem multis, quum hucusque dictis demonstretur. Verbulum addam. Multi, mente valentes, cerebrum ita exercent, omnem corporis curam ita abdicant, ut corpus demum fiat iners, hebes, ineptum plane animi domicilium. Infiniti alii, qui meris modo corporis exercitiis utuntur, percipientem cerebri partem vix movent, (vix ea utuntur,) adeoque ignorant fere delicias mentis, quibus gaudent Sapientes: minus tamen periculum in hos redundat ex illa *ἀναδιανοία*. Videtis autem utriusque hujus generis hominum commoda & incommoda. Qui recte sapit, (& cui ob vitæ genus, seu status, quem in cœtu omnium obtinet, id integrum est,) conetur commoda utriusque sibi conciliare, evitare incommoda. Id fit mentis meditationibus interpolando corporis motitationes.

(Legendum circa hunc titulum elegans ac rem vix non omnem absolvens opusculum *Cel. TISSOT : de la santé des gens de lettres*; tum & aliud, varia sub

sub ratione huc spectans, *Cl. LANGHANS*: von den Krankheiten des Hofes und der Weltleute; & *TIS-SOT*, *Essai sur les maladies des gens du monde* &c.: queis, ut alia taceam, jungantur, quæ *Cl. ZIMMERMANN* in opere: von der Erfahrung ic. circa eandem rem commentatus est. — Verissime depinxit Litteratorum conditionem, cujus merita æstimabunt Nepotes, *ROUSSEAU*: „*Les gens de lettres sont de tous les hommes ceux qui vivent le plus assis, pensent le plus, & sont par-là les plus malades & les plus malheureux de tous les hommes.*“ *Traité de l'expérience* &c. par *M. ZIMMERMANN*; trad. par *Mr. LE FEBURE* &c. *T. III. p. 146.* Evidentiſſime in nunc adducto opere demonstratum habetur, quid vita sedentaria in ipsorum Rusticorum robustissima corpora possit.)

§. 770. *Somnus nimius volatilia consumit* &c. Plurima jam exposui de vigiliis agens §. 768. Ex iis enim patuit, volatilia consumi, quia homo duplo plus perspirat in nimio somno, quam perspirasset vigil. Volatilioribus autem perditis, necesse est, massam remanentem inspissari. Sed simul vidimus, in somno vasa lateralia obpleri, ac fere ad quietem redigi. Videtur in somno sanguis venosus in cerebri sinibus fere quiescere; arteriosus non multum moveri, sicque incubatus (decubitus seu congestio) quasi fieri ad cerebri corticem. Ubi homo ille evigilare incœperit, principio vix potest excutere torporem, adeo omnia in quiete fuerunt: caput grave sentit, quum sanguis adeo copiosus in cerebro & ventriculis hujus hæreat; donec tarde motis arteriis suis redditus fuerit vigor. In toto reliquo corpore sanguis reliquus adgregatur in venis, & pingue oleosum ab arteriis secernitur in vesiculas sive folliculos laterales; ita, ut tandem merus

fiat rubri sanguinis transitus, reliquis seriebus quiescentibus.

(Sublata plurimum in Dormientibus sensatio.) Hinc fit, ut homo dormiens triplo copiosorem urinam colligat in vesica & triplo diutius servet citra molestiam, quam servasset Vigil. Si jam Talis magis magisque somno indulserit, excrementa diutius in intestinis manere consueſcunt, solentque mora exſiccari; quum omne humidum adhuc per vasa absorbentia, & forte per pauca coli lactea, absorbeatur. Ergo *somnus nimius figit excrementa.*

(Diapnoë autem insensibilis in legitimo somno adeo procedit, „ut, notante SANCTORIO, *Seſſ.*

4. *Aph.* I. septem horis quinquaginta uncia cocti perſpirabilis in robusto homine exhalent.“)

Sed, *adgravat cerebrum, caput replet &c.*; nam, ut dixi, contemplatione fabricæ cerebri humani brutorumque; contemplatione præterea somni, credere cogimur, sanguinis circulum non fieri in somno nisi in pia matre & maximis corticis cerebri vasis; reliquum vero corticem veluti quiescere, & sanguinem, brevissima circulatione peracta, in sinus refundi. Hinc videtur cerebrum quasi conlapsum esse in somno, atque tunc somnus oriri, ubi cerebri cortex adeo comprimitur, ut cavitas in corticis vasis thlipsi quasi deficiat: sive ea compressio fiat eo, quod ventriculi cerebri repleantur, turgeantve lymphæ; sive quod arteriæ piæ matris corticem adprimant medullæ; sive ab ipsius cerebri conlapsu. (Disquirant thesin hanc Physiologi. — Verissimum autem, a nimio somno torporem, stupiditatem ingenii creari, foveri, augeri.)

Ergo necessario in tali statu secretionem spirituum cessante (aut lente procedente) hebetudo nascitur ad sensum motumque, eaque hebetudo perennat, si homo consuevit nimio somno indulgere; atque reliqua fere omnia

omnia jam dicta §. 769. procreat: etenim tunc nascuntur obesitas, leukophlegmatia, ἀναισθησία, frigus, torpor; ut mox in defectu motus explicui. Nam & ex somno nimio, & ex nimia quiete muscularis motus, idem status, sive conditio cerebri, nascitur; nascuntur iidem ex utraque effectus.

Hinc simul iis maxime nocere Ἔc. Loquimur de flatu naturali; alioqui dicere Quis posset, somnolentiam diuturnam aliquando nihil mali habere in cerebri inflammationibus & obstructionibus. Cæteroqui, quo Quis longiori somno adsueverit, eo magis noxium illi est; nam causæ enarratorum malorum augentur continuo. Vidi hoc toties in hominibus, qui multam vim pecuniarum summis laboribus & vigiliis sibi comparaverunt, tandemque toties desideratæ quieti otiosæ se totos dederunt. — — — Cauti sint tales homines, si veram ament vitæ dulcedinem, ut lente ac prudenter de somno suo (cui illam adepti quietem, adeo sese dare solent, & ob quem ipsum duplo citius senes & hebetes fiunt) quidquam abscindant; ut sic, citra subitam mutationem, vitam demum ducant & sanitati & longævitati magis conducibilem.

Alia autem via ineunda Illis, qui gaudent summa alacritate ingenii, & vivacitate; qui, citra vix notabilem defatigationem serioribus meditationibus medias queant impendere noctes. Visa sunt hac ratione perdita optima ingenia, quæ in juventute gravioribus negotiis admota, hæcque ad stuporem exsequeuta, in agrypnian, sive dormiendi inpotentiam, inciderunt, perpeßique sunt, quæ de vigiliarum niuiarum dicta sunt effectibus. Magnus Mathematicus, hac ratione perditus, tandem, post longas ærumnas, peregrinatione restitutus est.

(Videnda hic ea, quæ *Cel. TISSOT & ZIMMERMANN, l. c.*, adnotarunt. Hanc ob rationem

Vivis erepti, aut, vivo licet corpore, Mortuis redditī similes, homines celeberrimi, tum nostri, tum dudum elapsi ævi. *Egregius* BAYLE, ZIMMERMANN ait, ventriculi ardore, quem studio nimio debebat, demum necatus: quo morbo laborabat olim, præter mille alios, *PLINIUS major*, cui natura stomachum invalidum & angustum, & frequenter intus æstuantem fuisse, *PLINIUS junior* retulit. Ob hanc causam *EPICURUS*, sub vitæ finem, nec vestes perferre, nec lecto amplius exire, nec lumen ignemve adspicere potuit. Hanc ob causam Vir stupendæ diligentiae *SWAMMERDAM*, non solum melancholicus & morosus maxime, sed & mente motus fuit, ut quæ ingenti labore composuerat, pretiosis inventis referta, flammis demum dicaret scripta: &c.

Studium intensum nimis aliunde magna satis, ex dictis, morborum innumerorum causa est; inprimis dum ab homine debiliore nervorum viscerumque compage donato exercetur: etsi quidem robustissimum Quemvis frangat. Sæpenumero autem *Litteratorum carcinoma* quædam, ut voce utar, qua *AUGUSTUS* dissolutam adpellavit Filiam, quasi non sufficientibus laborarent malis malorumque fontibus, aliis adhuc delectantur rebus, quæ sua natura jam, quin ullis aliis morborum fomitibus accedant parasyticæ, recta ducunt ad interitum. *Excultam nimis* hic intelligo & sædam *Venerem*. Non civica, ex quercus foliis, sed aurea *Cel. TISSOT* debetur corona, pro diatribe: *sur l'Onanisme*; qua verissima adeo, & convincenti vel Stupidissimum ratione demonstrantur, quæ ex illa seminis excretionē nascantur pessima & Auctores suos acerbissime sane castigantia mala. Omittendum hic etiam minime erit opus *Cel. BÖRNER*, *praktisches Werk von der Onanie*, multo præstantius anglico illo majori opere, de *Onania* edito.)

Ex iis, quæ de somno dicta hucusque sunt, ac de cerebri in somno protracto magis conditione, patet, quam parum differant illa a vera apoplexia. Fergat modo ille status; erit vera apoplexia.

(Observasse sane per multos annos me crediderim examine necrologiorum, apoplexia, morbisque soporosis, pituitosis ac nervosis, plures multo homines necari divites, nobiles, commodoque vivendi genere utentes, quam quidem, laboribus corporeis magis deditos. Ne tamen quis obponat, quod nunquam negaverim, & ex nunc dictis hominibus multos illis morbis adfici, necari.)

Absolutis his ducimur ad *adfectus animi*.

§. 771. *Adfectus animi violenti, aut diu permanentes* &c. Vera adeo hæc, ut argumenta demonstrantia ingens replerent volumen. Hinc metuo, ne hic longius, quam temporis angustia patiantur, excurram. Rem ipsam dicam; silentio plura suppressurus.

(Dolendum autem, ex omnibus illis, quæ *Cel. de Haen* hic adtulit, pauca me hic Lectoribus exhibere posse; nam vix non totum absolvitur, primum, ampla disquisitione grammatica significationis *Impetum facientis, Hippocratici*; tum sequuntur theses metaphysicæ, in quibus demonstratur, v. c., nam cur omnes describerem? hominem habere in se facultatem percipiendi idæas aliquas; has idæas varias esse, prout varii affecti fuerint nervi; esse in homine sano facultatem vividissime percipiendi novas affectiones sui ipsius, occasione mutatorum nervorum; sano homini oriri ex tribus dictis conditionibus animi affectus &c. Adferuntur hic copiosi *versus Virgiliani & Horatiani*, adferuntur & excursiones theologicæ, asceticæ, textusque Sacrorum Codicum &c. Pro certo vero habens, his omnibus Tirones Medicos pa-

rum juvari, Metaphysices præcepta dudum inbutos, ac si tamen ea penitus nosse velint, ex aliis fontibus hausturos, subprimere utique illa debui. Adferam nunc solum inde selecta, quæ paragraphi hujus expositionem medicam propius concernunt, sub forma fragmentorum, Auctoris, ubi fieri poterit, verbis.)

A principio ignoto nobis, HAENIUS ait, quod HIPPOCRATI τὸ ἐνοχμεν, nec nisi effectibus cognito, pendent morbi, quos ab omni ævo hucusque Medicina infausissimo successu tractavit, deploravit, desperabunda sæpius relinquere debuit: morbi, inquam, qui cruces Medicis perpetuas fixere. Quid enim morbis hisce incomprehensibilius? Est homo gaudens, fruens omni beatitudine humana, cui aliquid ingrati accadat: ex illa tam parva re, quam Vir sapiens contemnit, ille ita mutatur, ut vivere ipsum tædeat; immo, ut posthabitis religione, blanda uxore, chara prole, in media beatitudine ac felicitate abeat, se laqueo suspensurus, aut lethalibus submersurus undis.

Quidcunque cogitante nunc homine illico mutantur ejus idææ, si contigerit mutatio nervi.

Exempla prostant, homines, certo anni tempore dolorem v. c. in pede sentire consuetos; ablato dein licet pede eundem sensisse dolorem; idque non brevi post, sed elapsis a jactura pedis viginti pluribusve annis. Ablata fuerunt Heroi in prælio navali ambo crura; testatus fuit, juravit vir fide dignissimus, se deinde verrucarum ad mutatam tempestatem, dolores æque vivide percipere, quam duni utroque gaudebat crure. Apud HILDANUM aliosque Auctores legitur, nullum malum dolorificum olim adfuisse, quod aliquando in quibusdam hominibus, exstirpata parte, non doluerit; æque, ac si pars non fuisset amputata. Quid illud est, quod in nervo illō efficiat id, ut doloris per-

perceptio maneat in mente, quamvis parte, olim sede doloris, ablata? Et si in nervo non est, quid demum est?

Dormiens homo (somnia occupatus) vestem v. c. rubram vividissime percipit; etsi nervus opticus nullatenus in medullari sua expansione excipiat actionem talis rei: homo habet in intimo fundo mentis mutationem rerum, quas non videt extra se. Videmus hinc, æque posse in primo originali loco cerebri esse imagines inpressas, veluti alter (adficitur) ab objectis extra se? Hinc non est, cur ridiculi adeo nobis videantur Melancholici, querentes de dolore pertinaci in loco, in quo novimus adesse prorsum nihil, quod doloris sensum in nervo possit excitare.

An ergo in illo ultimo Percipiente posset hære talis flexilitas percipiendi, qualis olim fuerat ab illo nervo adfecto? Certum enim illico, homines per annos integros queri jam de hoc jam de illo malo, licet nulla causa eorum physica detegi possit. Ubinam sunt jam, ait hic HAENIUS, Qui dicunt, animam doloris sensu adfligi, citra commercium corporeum, non posse?

(Ut HAENIUS probaret, hominem habere facultatem, motum ciendi, augendi, continuandi, sistendi, renovandi tam magnam, ut nequeat subputari; quod PARACELsus dixit, oriri a vi imaginationis; Aliis adferentibus animam hominis; HIPPOCR. τὸ ἐνοεμεν; adfert sequentem instantiam, quam ideo hic infero, ut pateat, quantum motus nimius corpori adferre queat malorum. Sententia lata erat de decollando Edinburgi Duce ARGILY. Veniam pro illo Londini petierunt a Rege Quidam. Die interim præfinita a Rege, quo Dux plecteretur Edinburgi, jam accedente, simulabat Rex clementiam, &, petentibus Amicis, tandem

veniam Reo dedit; probe gnarus, veniæ litteras ante præfinitum fatalem diem, a nullo Cursore, aut Veredario Edinburgum posse adferri. Curfor interrim Ducis, Heri amantissimus ac fidelissimus, Londini eo tempore degens, cursu iter perfecit horarum 85; noctes diesque currens indefinenter, per vias ex venatu sibi per totum regnum notiores, proximas; nec somnum interea temporis nec requiem capiens; sugens pro nutrimento vinum, acetum, aquam, jus carniū; quæ nuiimenta contenta erant in animalium intestinis, quæ circum corpus suum convoluta gerebat, ori ea uno extremo admovens inter currendum. Vix non incredibili hocce cursu Edinburgum tandem venit, antequam fatalis alioqui Hero suo hora integre elapsa esset. Nec equus sane, nec cervus, nec avis ipsum continuato tempore tanto imitari potest: servavit Ducem; pedes autem ambos gangræna ipse amisit. „Videtis, historiæ huic subdidit HÆNIUS, quam vehementer subitoque ac diu motus ille ab *enormunte* queat multiplicari. “ Quæ quidem observatio rei exponendæ, seu potius expositionem non requirenti, parum confert.

Est, ex observatis omnibus in cerebro locus quidam, ad quem nervi omnes moventes arbitrarii & sentientes adpellunt, & a quo per eosdem nervos τὸ ἐνοεµὲν agat ad extrema usque corporis loca. Vocamus illum locum αἰσθητερίον καθολικόν, *sensorium commune*. — Adfectiones ope nervorum habemus inde multas, miras, inevitabiles, insuperabiles; ita, ut, velimus, nolimus, sensorii communis ope agamur in motus varios, certoque quasi mensuratos, ad objectam rem, idque per varios sensus.

Nar-

Narrat sic ZONARAS, THEODOSIUM *magnum*, summis bellis implicatum, tributa undique collegisse: Antiochenos autem, tumultu facto, tributa negasse, & Imperatoris abjecisse statuas. Tacuit malo omine Imperator. Antiocheni merito sibi augurabantur summam cladem: Legatos mittunt. Non respondet THEODOSIUS. In motum pro Antiochenis se vertit imperium totum; manet immobilis, inexorabilis Imperator. Primus ex Ministris excogitat quidquam pro Antiochenis. Consueverant THEODOSII ad mensam cantare symphoniaci Pueri. Curat ille a summo Musices Artifice melos componi adeo flebile, ut nil flebilius. Exercentur in eo Pueri; cantant ad mensam Imperatoris: rapitur hic, inscius, veluti in ecstasim, rigatque poculum suum lacrymis, ignarus adhuc, quid significaret; donec, Pueris ad maximum planctum progressis, lacrymas ultra nequiret cohibere, & interrogaret, quid demum Pueri cantarent? Ajunt esse supplicem libellum, pro vita redimenda Populi Antiocheni. Condonavit mox Imperator, qui raro alias condonabat, Antiochenis.

Ut auditu, ita & visu abripimur adfectionibus; quod indies evenit Spectantibus comœdias, aut tragœdias.

Adfectus illi dicti *τε ενομενλος* aliquando tam vividam idæam in sensorio communi faciunt, ut illud vitient, &, si dicere fas est, luxent; in longam sæpe diem, immo in totam vitam.

Vindictam Iratus exsequi non potest: iram alta mente repositam tenet, tabescitque corpore non tantum, sed & mente; adeo, ut brevi consumtus pereat, vel maneat amens. Quid de amore loquar, adfectu illo, quo violentior nullus? Amor sane homines adeo fascinat, ut reliqua omnia flocci faciant,

cient, dummodo re amata potiri queant; qua si denuo eos privari contingat, sensorium commune hac una jactura ita occupatur, ut ad omnia reliqua prorsus stupidus, & sæpe delirus homo fiat. Ergastula (in quibus includuntur Amentes) Tales plures intra suos recondunt parietes.

Summus terror, ingens timor, apoplexiam fecit, totius sensorii communis ineptitudinem induxit; vel parapoplexiam, vel paralyfin, vel paraplegiam! Exempla apud Auctores passim prostant. Convulsiones & epilepsiæ a nulla re frequentius oriuntur, quam a terrore ac timore; &, quod miremini, in horum hominum denatorum cadaveribus inventum nil, quod foret inmutatum: tanta hic rerum subtilitas! (Videndus hic inprimis *Cel. TISSOT, Traité de l'épilepsie*, quo vix non omnia, quæ de hoc morbo adferri queunt necessaria & pulcra, comprehenduntur: jungenda his, quæ *Inl. VAN SWIETEN* ad cap. de epilepsia, apoplexia, melancholia &c. fuit commentatus.)

Immo hinc sæpe, prosequitur HAENIUS, cujus nunc in ordine refero verba, subitanea subsequitur mors. Apud ATHENÆUM, VALERIUM MAXIMUM, PLINIUM &c. sylvam exemplorum reperturi estis. Ipsi Spartanorum fortissimi duo Viri subito enecti fuerunt gaudio.

T. LIVIUS *Lib. 22.* refert binas foeminas, quæ in clade Cannensi filios suos periisse credebant, inopinato eorum reditu percussas adeo fuisse, ut mortuæ conciderent. A. GELLIUS de PHILIPPIDE, Victore renuntiato, idem narrat.

In familia Batava spectabili, sed dejecta fortunæ bonis, contigit, ut Filius generosus, spe erigendi familiam, Indias nostras orientales peteret. Fortuna secunda opes adquisivit litterasque tum misit, quæ Sororem

rem in Hollandia relictam, ut opes suas contemplaretur, iisque frueretur, invitarent. Proxima navi illa adpulit, moxque, mundo muliebri, quem magnificentissimum Frater parari curaverat, Fratrisque opulentia conspectis, voce præcluditur, mortua concidit.

Sæpius quidem a subito gaudio, quam a mœrore subitaneo magnoque & tristitia mors nata est; quandoque tamen & hos animi adfectus excepit.

In *Historia familiæ* DE MONTPENSIER habetur, Filium ad tumulum paternum, ut mœrorem expleret, accedentem, animam inter lacrymas reddidisse.

MARCELLUS DONATUS p. 187., *Edit. Ital.*, narrat historiam pauperis Lanificis, qui uxoratus, proleque oneratus perditæ amavit Meretriculam. Locī Episcopus adulterinum commercium vetat. Meretrix, Episcopum verita, repellit Lanificem; qui mox, extensis brachiis, sublati oculis, ejulatu magno edito, efflavit animam.

Sed præter mortem faciunt animi adfectus alios etiam effectus subitaneos.

THUANUS & MEZERAY, Galli Historiographi, ut verissimam sequentem retulerunt historiam. — *Joannes Pictaviensis Comes de ST. VALLIER*, conjurationis in Henricum II. Galliæ Regem reus, morti damnatur. Ea nocte ita incanuit, ut Custodes mane crediderint, alium se videre Captivum. DIANA, ejus Filia, Valentinensis Ducissa, & adulterino thoro Regi juncta, vitam Patri deprecatur. Nuntiatur veniã. Vixit per annos, nunquam curandus a febre, quam eadem nocte, una cum cānitie, metus mortis induxerat. Unde Galli habebant eo tempore in proverbio, loquentes de febre pertinacissima, *la fièvre de ST. VALLIER*.

Jul. Cæs. SCALIGER narrat in *Exercitat. contra CARDANUM, Francisco GONZAGÆ*, Mantuano Principi, nuntiatum esse, Adfinem suum in portu Tergestino captivum, quod conjurationis in Principem reus ageretur, una nocte canum esse factum; productum de carcere hominem revera sic adparuisse.

LEVINUS LEMNIUS communicat nobis in *Traß. de Complexione c. 2. p. 100.* historiam sui temporis sequentem. Juvenis nobilis, Imperatoris aulam stupro sædaque libidine contaminans, ducitur in carcerem mortique damnatur, pro more aulico temporum illorum. Morte in alteram diem indicta, ducitur die sequenti ad tribunal, in quo ipse præsens Imperator. Hominem omnes obstupescunt facie squalidum, barba capillisque canum. Primo suspicantur, alium esse; dein fuco alicujus liquoris ementitiam adulteratamque esse canitiem. Nil porro horum: metus instantis mortis una nocte hominem sic adfecerat. Quod ubi compertum omnibus argumentis, Imperator nobilem Juvenem absolvit; sat poenarum illum dedisse ratus.

Animadvertit idem LEMNIUS, subitam canitiem sæpius observari in Militibus & Nautis, quibus toties imminentis quasi mortis imago ante oculos obversetur.

Albertus CRANTZIUS lib. 9. Metrop. „UBI-PERTUS, ait, necdum Professus, nec Capitularis, a Fratribus in Episcopum Ratzeburgensem electus, quum propter annos dispensatione opus esset, Romam petiit: sed repulsam a Pontifice passus, proxima nocte incanuit, ut postero die a Pontifice non putaretur is, qui pridie confirmationem petiisset. Ergo jussit eum in Episcopum consecrari, quem evidenti signo Deus probasset.“

Plura vide apud ADRIANUM JUNIUM, PAUL. ZACCHIAM, LEMNIUM, M. DONATUM, KERKRINGIUM

etiam Alioque, maxime apud GERMANNUM in eruditio opere magno, cui titulus: *De miraculis Mortuorum*, nam si omnia recensere vellem exempla, infinitus forem.

(Demonstramus Hæc utrumque, quæ polleat suum τὸ ἐνστικτὸν in homines; adfert meditationem, quomodo egredi ex Matre in factum. Invenitur accubans, & sile, more solito, in Physico, „ Qui, quod non capiam, quæ ratione aliqua res fiat, non ipsam negant, & tamen obstruunt, sicut in veritatem ubique impingunt.“ Attentionem den Matris imaginantis gravida in factum statum, utas pro recte ponit: *Mutatio fit nonnunquam tanta in illo sensorio communis affecto, ut effectus inde nati non tantum agant in illo corpore, sed etiam in corpus aliud: ut agant a Matre in fœtum, quem gestat utero; vel in Puerum, quem lacte alit.*

Postremum, ut, infinitis exemplis patet; a Nutrice v. c. nata redditur infans, quem lactis, epilepticus. Prius vero majores parit difficultates; hinc facta adferenda sunt indubitata.

Canones tum adfert sequentes, quor, una cum adnexis historiis, & imprimis ob hæc, immutatos adfero; cû, fateor, diutius dubitas, an adferrem, vel subprimerem; ob rationes fors non adeo obvias.)

1) Gravidarum idæ si solitæ sint, easdem non adficiunt: idæ insolitæ vel non adficiunt, vel adficiunt. Nascuntur idæ hæc visu, auditu, imaginatione sola, adpetitu. Omnia hæc adtentus vidi.

Adpetitu quæ sunt idæ, mirabili, insolito, immo nefando, in morigera formis, &c. sedantur ut plurimum ratione, religione; quæ sæpe vincunt innatum furiosi sensorii communis adpetitum (singularis sane phrasis! quum *sensorium commune*, qualecunque & ubicunque demum illud admittatur, seu pars physica totius

totius machinæ, parum adeo *adpetere*, aut *aversari* quid queat, quam splen, aut hepar. Invectus acer, be fuit HAENIUS in HELMONTIUM, quod adsumferit in corpore *Archæum*. An vero multum ab illo differt, dum introducit vim *furiosi sensorii communis*, & τὸ ἐνογεῖν/ος ?)

Abutuntur vastræ Mulieres credulitate Maritorum hoc respectu sæpe. Cæterum in Gravidis, quibus & rationis & religionis contemptus moris est, (*) furor adpetitus denegati crescit; ut diu noctuque, per fas & nefas, explere illum gestiant; adeo, ut adpetitus mordendi humanas carnes ipsas debuerit expleri, & nī expleatur, Infans læsus esset (!); sed his tetrīs non inmorabor.

(*) Ascetica denuo, non medica, observatio ! Notissimum utique Omnibus est, qui Asclepiadeam norunt penitus artem, qualia in Melancholicis, Hypochondriacis, catameniorum stasi, aut arhythmia laborantibus Puellis ac Mulieribus oriantur symptomata, quibus domandis non raro omnia artis præsidia adferimus incassum. Quis vero credat, omnia illa præcaveri, curari potuisse, dummodo Ægri rationi magis fuissent obsequiosi, magisque religiosi ? Inciderunt Puellæ, & Mulieres Maritis junctæ, & Viduæ, alias nunquam non prudentissimæ, & ad excessum fere, ut ita dicam, piæ; inciderunt, inquam, in terribilem illum morbum, *hysteromaniam*; de quo videndus egregius BIENVILLE, *sur la Nymphomanie* &c. An adferre Quis, expositurus causam mali, deberet, fore, ut calamitatem hanc effugissent, dummodo rationi magis fuissent obsequiosæ, magisque piæ ? Quam parum Philanthropian & artem medendi spirat, Miserarum illarum sortem a nequitia & malignitate, & rationis religionisque contemptu illis familiari derivare vel-
le ?

le? Admittere omnino mox HAENIUS debuit, dari casus, ubi Sapientissimi fiant amentes; ubi ergo impossibile fit, ratione uti, ne perdat ratio.)

Quæ vero visu, auditu, imaginatione, maxime in somno, bonis & moderatis Gravidis nascuntur idææ, nolentibus illis, immo reluctantibus; hæ sæpenumero effectus suos in foetus exserunt. Quidquid enim agant, ut vividam idææ inpressionem mitigent, ne foetui noceat; fortior hac reluctance idæa notas inprimit Infanti.

2) Observamus in praxi semper idæas has, non ut alias, sed more prorsum insolito, Mulierem adfuisse: si vero non plane insolito, vix inde labes.

3) Ex omnibus Mulieribus, quibus tale quid contigit, intellexi semper, mox hanc idæam concomitatum fuisse horrorem frigidum, mutantem corpus totum: uti horror solet percipi ab homine, cui aliquid insoliti in corpore fit; uti contingit, dum hominem quassat quartana; quando invasura pestis est; quando febrilis materies circa crisin movenda; e. s. p.

4) In omnibus, quotquot indagare potui, casibus, intellexi, Prægnantes tunc temporis habuisse spontaneum quemdam motum, brachii, manus, digiti; ita quidem, ut, si idæa vivide adfecisset; si horror inde subsequutus esset, nec ipsæ membra movissent, foetus nullo modo læsus esset; nisi forte a visu Epileptici: sin vero post horrorem movissent partem corporis, adplicando eam ad alium locum, quasdam notas accepisse Infantem, eo propemodum loco sui corporis, quem in sese Mater gravida post terrorem tetigisset.

Hinc sapientes Matronæ, si adsint dum gravida Mulier subito terretur, prudenter ejus manusprehendunt, ne quam tangat corporis partem. Est enim consuetudo, non tantum Mulierum, sed etiam Viro-

rum frequentior, quam putemus forte, tangendi ea occasione partem quamdam corporis. Videntes Hominem, cui ambo oculi ita inflammati, ut sanguine & igne veluti suffusi videantur, mox inscii fricamus oculos nostros. Si brachium v. g. fractum est homini, Qui circumstant conmisericordes, inscii habent sæpe manum suo brachio adplicatam: qui adtentus est, videt hæc. Intelligimus hinc, quam facile contingat, ut Gravida videns rem horridam, sibi alicubi manum adplicet.

5) Si omnia hæc prægressa sunt, Infans, dum in lucem editur, gerit stigma inpressum sui corporis eo loco, quem Prægnans in suo corpore tetigerat: unde Infans unus hoc loco, alius alio; prout Mater aliam atque aliam tetigisset corporis partem.

6) Voluntas hic nil valet. Multæ sceleratæ Mulieres quam vellent monstra parere, ut stipem largiorem acciperent; nec possunt! quam obnituntur sæpe & obluçantur bonæ Fœminæ, & quasi contramuniunt sese aliis idæis, & tamen hæc infortunia dolent!

Hæc sunt, quæ ex Mulieribus boni iudicii Practici, quæque Ego, potuimus colligere.

Vidi Fœminam, quæ sordidum linteamen lotura in fossam descenderat, quumque adtrahens linteamina simul ranam saltantem elevaret, mox manu faciem, ne rana infiliret, muniverat: pariens edidit Infantem, quem viventem non sine maximo horrore vidi, ranam ore naribusque referentem: sed brevi moriebatur.

Vidi Puellam, cui magna plaga ad genam, referens pellem murinam, nulla arte, aut rasura delendam. Lacrymis perfusa Mater narravit, ab infiliente mure sese perterritam fuisse tempore graviditatis, eique faciei parti manum adplicuisse.

Dixi alia occasione, vidisse me propriis oculis Infantem, qui $25\frac{1}{2}$ horis vixerit sine ullo omnino cerebro; sine olla cranii. Causa manifestissima sequens erat.

Gravida Mater 10 circiter septimanis, auditu rumore in platæa, prospicit per fenestram, videtque duos Milites, dejectis in terram capillitiis, nudo capite pugnantes; ita quidem, ut stricto gladio alter alterius capiti vulnus infligeret, & tota pars superior capitis cruenta videretur. Vividissimam idæam horror, ad tactus sequebantur; & hinc illæ lacrymæ! Olla cranii erat veluti serra divisa in Infante, de cerebro nil videbatur superesse: membrana tantum ruberrima laxissima cranii basin tegebat. Partus hic contigit 16. Febr. 1738.

STALPART VAN DER WIEL, *Cent. I. n. 2. Observat.* similem fere historiam, propriis oculis visam, refert: Infantis hujus Mater casu cranium læserat sexto graviditatis mense.

In *Miscell. Med. Phys. ann. 3. Obs. 129.* refertur, Mulierem prægnantem medio gestationis tempore vidisse Rusticum vulnerato cruentoque capite jacentem: enixam tum fuisse Infantem 16 horis viventem; pro cerebro hydatides habentem.

Magnus BOERHAAVE tot similes casus in sua vita visos narrabat nobis, ut recensens illos longus forem. Addam hunc unicum.

In loco suo natali Voorhout, prope Leydam, Rusticus erat totus, si quis unquam, quadratus: horrendum autem, hominis genas, frontem, aures, parotides, collum, maxillam intueri: adeo partes has omnes velabat tegumen atrum, tuberosum, non tamen exulceratum. Causa hæc fuit. Mater ejus, jam 20 Liberorum felicissima Parens, tandem, hoc Infante gravida, adstat Rusticis, qui in usum domesticum vac-

cam macſtantem exenterarent. Ut Ruſtici, dum jocantur, ſemper, aſinorum inſtar, vel feriunt, vel ſcalpunt, vel mordent, ita unus, joci ergo, magnum illud vaccæ hepar injicit (Fœminæ). ac infligit in latus capitis collique: hinc iisdem in locis horridum adeo Infantem peperit.

HELMONTIUS p. 478. narrat caſum, ubi Infans natus ſine brachio; quod Mater prægnans vidiffet Militem alterum alteri brachium amputaſſe.

MALEBRANCHE in libro ſuo *de Inquiſitione veritatis*; T. I. l. 2. ſ. 3. ſic ait: „7 vel 8 anni excurrerunt, quum in noſocomio Incurabilium Juvenis cerneretur, natus amens; ſed membra fractus præciſe iis in locis, ubi Homicidis ſolent Carnifices in cruce quatuor artus confringere veſte ferro. Annos propemodum 20 miſer vixit, ſic adfectus, multis conſpectus ab hominibus, ab ipſa Regina Matre viſus non modo, ſed & examinatus, tactus, palpatus in quatuor dictis fracturarum locis. Calamitatum unica cauſa, quod Mater, inaudiens ſclerato homini in cruce artus frangendos eſſe, temperare ſibi non potuerit, id contuendi curioſitate, dum hoc Infante gravida eſſet.

Vidit & BOERHAAVIUS ſequentem caſum: Nobilis Domina, pulcerrimorum Infantum Mater, ſedet ante fenestram, 8 menſes gravida, dum Mendicus homo, labio leporino difformis, ſtipem petiturus caput erigit ante fenestram. Faſſa eſt, ſe vividiffime adfectam fuiſſe, inhoruiſſe, manum labio admoviſſe. Infantem peperit, unde omnes horrent. Vocatus BOERHAAVIUS, videt labium fiſſum, & cum fiſſo palato oſſeo cruentum. Curavit ille, ope chirurgica hanc difformitatem auferri.

Idem Vir præſtantiffimus vidit Lugduni - Batavorum Dominam, quæ, in horto ſub moro ambulans,
mori

mori capta amore, petit sibi moros dari. Forte sibi in altum respicienti morus cadit in nasum; terretur, fricat nasum, & mundificat. Edidit dein Puellam misere rubicundam naso, & defœdatam in circuitu. Quum annum nata esset, curavit BOERHAAVIUS multo aceto, sale ammoniaco, aliisque penetrantibus remediis fricari locum, qui desquamando sic præterpropter curatus est.

Princeps Fœmina gravida, viso Æthiope, nigrum parit Infantem; ut suspicione inmerita laboraret optima Princeps adulterii.

J. SWAMMERDAMIUS in *Notis ad Prodromum* VAN HORNE scribit, Fœminam ultrajectinam sibi notam ab Æthiope in graviditate viso maxime perterritam, metuentemque forte, ne nigrum Infantem pareret, cogitasse, quod aqua calida omnem auferret nigredinem; illico hinc curasse se calida lavari a capite ad calcem usque: Infantem denuum fuisse enixam, habentem omnes dentes; ubique candidum, nisi iis in locis, qui tam bene loti non fuerant, v. g. inter digitos manuum pedumque, ac in quibusdam aliis absconditis corporis locis, ab aqua minus tactis, ubi Infans nigrescebat. — Ex hoc exemplo facile suadere possemus Mulieri gravidæ, ut, terrore concepto ab Æthiope viso, probe se per totum corpus lavari curet: quum obesse id non possit, & hoc in casu profuisse SWAMMERDAMIUS, homo sane probus & veridicus, testetur.

Suffecerit, indubitata adtulisse testimonia; nam omnia adferre volenti tempus deficeret.

Comprehendere igitur incipimus, nullum esse morbum a levissimo in gravissimum, quin & in ipsam mortem usque, qui non progignatur ab animi adfectionibus; adeo, ut in corporibus diathesin non habentibus, animi adfectus non tantum fungantur mune-

re causæ excitantis, sed causæ completæ & proximæ; uti v. c. a lætitia factum, hominem robustissimum occidente.

(Plurima sane adferri potuissent, actionem animi pathematum concernentia. Commendare hic debeo, præter copiosissima bona, in Pathologorum, Practicorum, & Observatorum scriptis dispersa, *Cl. ZÜCKERT, von den Leidenschaften*. Adtentionem etiam meretur *Cel. John LEAKE, of the Influence of the Passions on the body and mind*; quæ dissertatio sectionem *XIV.* constituit operis præstantis: *Medical Instructions toward the Prevention and Cure of chronic or slow diseases peculiar to Women*. London 1777. Non inepte Auctor animi motus ad duo summa Passionum revocavit capita: „*The human Mind*, ait, *is principally actuated by two sorts of Passions; the one elevates, winds up the spring of the Nerves, and as it were lifts it above itself; such are the effects of Hope and immoderate Joy. The other, as Fear and Sorrow, sink it below its natural standard. Most of the subordinate Passions appear to be compounded of those, &c.*)

(Ingentem vim historiarum de actione imaginantis Matris in foetum SCHURIGIUS congeffit.)

Sequitur jam classis tertia causarum procatarecticarum, de *Excretis, & Retentis*.

§. 772. *Salivæ excretio nimia turbat coctionem primam, hinc & sequentes*. Saliva in ore secernitur, non excernitur. Saliva nullo modo excrementum est. Bene advertit DRELINCURTIVS, salivam deglutitam, denuo sanguini mistam, e quo secreta fuerat, optimam reddi, & in perfectum menstruum elaborari. Est liquor humano corpori saluberrimus, qui deglutitus inanem ventriculum repurgat; qui cibis inter masticationem & deglutitionem admistus, vi saponacea sua,

in

in Chemia demonstrata, quævis tenacia solvit, mucum detergit, coctionis vero tempore digestionem, crudorumque assimilationem juvat. Quo humore deficiente, ventriculus privatur eo menstruo, quo, ut liquore maxime animali & vi saponacea prædito, indigebat, ad solutionem alimentorum atque ad inchoamentum assimilationis eorundem in naturam humoris inquilini. Videndus hic PEYERI de *Ruminatione Tractatus*. Deprehendimus primam coctionem hinc vitari: vitata illa, simul & secunda vitietur necesse est; quum secunda nil a prima excipiat, nisi minus coctum.

Velitis, quæso, adtendere ad hanc explicationem morborum *salivæ* excretionis nimiae vel parciore; nam tunc simul capietis in antecessum explicationem morborum a nimia vel nimis parca excretionem *succi pancreatici*.

Profert sitim &c.; quia est humor a sanguine arterioso secretus, cibisque coquendis destinatus. Seccernitur quidem assiduo; sed tempore manducationis & deglutitionis intra os effunditur, actione maxillarum, buccarum, linguae &c. Contingunt autem morbi, in quibus maxima ejus copia ore continuo effluit, præ nimia excretoriorum ductuum laxitate. Sed plerumque vitio hominum nimium excernitur. Nationes septentrionales, fistula tabaci fumum tota die haurientes, excernunt, exspuuntque salivæ copiam maximam. Id enim solenne in omnibus excretionibus, ut, quo frequentior, eo quævis uberior. Quo nutrix mammam crebrius Alumno porrigit, eo copiosius lac habet, ad certam scilicet quandam mensuram. Quo quis nares pulvere tabaci plus frequentiusque irritat, eo plus liquidi mucique excernit. Ita & de saliva verum. At qui tabaco salivæ rivulos diu exhausserunt, tandem incipiunt parciolem habere, denique deficientem.

(Salivæ uncias duodecim, HALLERUS ait, *Not. ad BOERHAAVE Prælect. academ. Sc. T. I. p. 152.*, intra diem naturalem in homine secerni putat NUCKIUS, *Sialog. p. 30.* Ea copia non excernitur in sano homine, neque per alvum egeritur, & urina fere ex potu generatur. Major ergo pars salivæ videtur resorberi.)

Duo hinc maxima vitia oriuntur: 1) quod alimenta tenaciora jam careant pulcherrimo solvente menstruo, adeoque ventriculū gravent. Ventriculus minus digesta illa dat intestinis; quæ ulteriorem eorumdem elaborationem quoque ægrius hac de causa perficiunt. Sed 2) sanguis ipse orbatur parte quadam subtili, fluida.

Solebat B. narrare, accepisse se ab egregio Medico PHILIPPEAUX sequentem historiam. Princeps erat in aula gallica, graveolenti ore toti aulæ ingratus. Medici pastillos excogitaverunt ex mastiche cum gratis aromatibus, quas Princeps assiduo ore volvens ejusdem emendabat fœtorem. Res hæc ubi optatos habuit successus, aulam totam animavit, ut sexus utriusque homines amœnos hosce pastillos ore semper volverent. In principio omnia pulcra. Sensim vero exsiccabantur corpora, humores inspissabantur, viscera abdominalia infarciebantur, morbique succedebant hypochondriaci, melancholiæ, miræque phantasiæ. Re examinata & cognita, pastilli ex aula exfulare jussi sunt. Fuere tamen a morbis immunes, qui flacidi, mucosi, aquosi temperamenti erant; quod idem in Batavis mucosis toties etiam observavi.

Notandum enim, salivam tandem desinere in his hominibus, etiamsi pergant haurire fumum tabaci, aut pastillis, uti in aula gallica, pergant uti. Sanguis quasi exhaustus illo humore videtur.

Sunt

Sunt tamen inter hos Fumigatores, qui vix expuant salivam, aut vix excernant; his minus siccitatis adferre potest.

Intelligitis hinc, hominibus pituitosis, aquosis, humidis, prodesse fumum tabaci posse; quia multum salivæ expuentes, simul naturam eo veluti advocant, ut illa aquosiori parte hac via expediat sese, ac exoneret.

(Excurrit hic loci, quum tabaci mentio injecta fuerit, HAENIUS more solito in *Anecdota*, herbam hanc concernentia; digna mihi videbantur scitu, ut Operi infererentur; etsi quidem præsentem Textum non inlustrant.)

De tabaco, ait, hic directe non ago; herba, quam ex Indiis occidentalibus adlatam *Johannes NICOT*, Legatus Regis Galliae FRANCISCI II. apud SEBASTIANUM Lusitaniæ Regem, ex Lusitania in Galliam duxit anno 1560., hinc ante 200 circiter annos. Unde & mox *Nicotiana* dicta. Brevi usque ejus fuit creberrimus, idque etiam in Medicina. Nihil enim in novo mundo detegebatur, quod Europæi non putarent, Medicinæ conducere. Quum & citra fundamentum adhiberent Medici, ortæ sunt disputationes, dissensiones, litigia, bella maxima inter Principes artis, quorum nemo fere capiebat bene, quid defenderet, aut quid obpugnaret: maxime dum Chemici mira arte inde prædicarent.

Sed non Medici tantum, verum ipsi Principes liti huic se immiscuerunt. Russorum Cæsar *Michaël FEDOROWITZ* (1634.), quum imprudentia Fumantium fistula tabacum ingens incendium ortum fuisset, edicto usum tabaci prohibuit per totum imperium, pœna 1) flagellationis, 2) jacturæ nasi, 3) vitæ.

Turcarum Imperator AMURATH exemplum hoc brevi sequutus est; prohibens usum tabaci sub pœna

dorsi dedolandi bonis fustibus, ut Turcarum mos est. (1610. usus tabaci Constantinopoli primum innotuit: Turca tum per urbem circumductus, fistula tabacaria per nasum trajecta, ut hujus exemplo reliqui abstererentur.) Prohibuit tum & *Schaah* ΣΟΦΗ, Persarum Rex, tabaci fumigationem.

JACOBUS I., Angliæ Rex, evulgavit tractatum (quem *Misocapnon*, seu *inimicum fumi* inscripsit) de noxis tabaci. CHRISTIANUS IV., Daniæ Rex, jussit Medicum suum SIMONEM PAULI adversus immoderatum tabaci usum edere dissertationem. (*)

(1670. Quî tabaci fumo usus fuisset, coronatum aureum, eine Krone Gold, solvere tenebatur in Helvetiæ ditione Glarensi.)

26. Mart. 1699. Parisiis *Claudius* BERGER primo publice disputavit contra usum tabaci, cum hacce conclusione: *Ergo ex frequenti tabaci usu vitæ summa brevior.* Regius Medicus FAGOT præsidere debebat huic disputationi; sed negotiis impeditus præsidium alii Medico obtulit, quî mirum in modum, & argumentis altissima voce prolatis Defendentem juvabat, ut omnes homines deterreret a frequenti tabaci usu. Ex multitudine tamen ingenti Auditorum nemo pathetica hac oratione movebatur; nam ne momento quidem pax erat inter Præsidis nasum & pixidem tabaci.

Usus tamen tabaci, tam ore, quam naribus excepti, ut olim, ita & posthac fuit communissimus; ut homines sint infiniti, qui eo vix per momentum

ca-

(*) V. *Sim. PAULI, de usu & abusu Tabaci & Thee, Argent. 1681.*

carere queant. Dudum erat, nempe longe ante medium prioris sæculi (1614.), quod URBANUS VIII. Papa interdiceret ejus usum in templis; adeo, ut, Qui ultra in templo eo uterentur, ipso facto essent excommunicati (motus inprimis ad edendam hanc sententiam, quod nonnulli Ecclesiastici sub celebratione Missæ eo abstinere non possent.) Diu tamen non videtur lex hæc obtinuisse, nam CLEMENS XI. initio hujus sæculi sub pœna excommunicationis denuo interdixit ejus usum in templo B. PETRI *Apostoli*.

(Idem plane interdictum edidit 1690. INNOCENTIUS XII. Revocavit tamen sententiam hanc BENEDICTUS XIII. 1724; ipse tabaco plurimum utens. *V. Cel. BALDINGER, Magazin für Arznei, 1777. P. 8. p. 748.*)

Atque hæc de origine & frequenti usu tabaci. — In genere dico, esse hyosciami forte genus, nervos non-Adsuëtorum vehementer turbans, sed Adsuëtos ita incantans, ut, si careant, æque langueant, quam Thraces sine opio. Vires porro tabaci penitus non sunt cognitæ omnes; nam habet aliquid, quod in non Adsuëtis nervos quidem turbet, in Adsuëtis vero nervos pacet. Norunt Milites sensationem ventriculi ad adpetitum excitantem, masticato tabaco sedare, dum alimenti & potulenti penuria in castris est. Itineratores testantur, in Caravanis Asiaticis hoc famem sitimque sedari, tam hominum, quam camelorum. Immo, quod aliquid habeat, quo spasmiis proffit (narcoticum) ex usu fumi ejus in asthmate spasmodico manifestum est. Memini egregii effectus ejus in asthmatica Muliere, ab infantia incurabili, jamque annu-
l. Ridens narrabam ipsi, Molitoris Uxorem fumo tabaci continuato quotidie, jam asthmate liberatam esse. Illa mox vim sibi fecit, ut fumo huic adsuesceret: adsuevit, ingentesque posthac ob hanc
histo-

historiam narratam egit gratias; quum leviores saltem pateretur insultus.

Unde & Auctores folia tabaci indunt anodynis cataplasmatibus. An vi anodyna fumus ille etiam solveret ileum? Fumus ejus salutifer inventus est in Belgio tempore pestis: immo observarunt, apud Mercatores tabaci pestem minus grassari. Hinc eruditissimus HARTSOEKERUS suam de peste sententiam confirmatam clamabat palam. Causam enim pestis animalculis, sive eorum ovulis adscribens, agebat, infusum, vel decoctum tabaci necare pediculos & animalcula omnia cutanea, hominum, pecorum, canum, felium, psittacorum, & similiter prodesse tempore pestis: hinc se concludere, pestem talibus animalculis debere originem.

(Ast diversa multum, circa usum nicotianæ prophylacticum in peste, loquuntur *Cel. DE MERTENS* Observata. „Eximias virtutes; ait *Inl. VIR*, cujus integrum locum ex egregio tractatu *Observation. medicar. de febribus putridis, de peste &c. p. 184.* consulto hic adfero, adversus contagium pestilens *DIEMERBROECKIUS* fumo tabaci tribuit, & post illum alii Auctores, adeo, ut generalis opinio evaserit, hunc fumum illud arcere. Scimus tamen Turcas continuo fistulam, qua fumum tabaci hauriunt, in ore tenere, & pestem nihilominus apud eosdem quotannis multos trucidare. Hæc consideratio non potest præjudicium tollere: adeo difficile est, receptam opinionem, quamquam falsissimam, ex hominum mentibus evellere! Dum pestis Moscuæ caput extollebat, multi Nobiles Russi, omnesque Extranei, in fumo tabaci, ut sacra anchora, omnem spem ponebant. Qui illi adsueterant, sæpius fistulam sugebant, Alii paullatim ad-

sue-

sueverunt; usque dum Plures viderint ex infima Extraneorum gente peste sublatos, quibus hujus fistulæ usus maxime familiaris erat. Orphanotrophii caminorum Scoparius, qui olim miles castra Borussia sequutus fuerat, fumum nicotianæ in tantis deliciis habebat, ut illum a summo mane ad vesperam quotidie hauriret; hincque se contagio inpenetrabilem jactabat. Mense Septembri cautelas adhuc spernens, nocturno tempore sepem transcendit, Uxorem in alia urbis parte habitantem, Amicosque invisurus. Cephalalgia subito correptus, incœpit vomere; altera die bubones sub axilla & in inguine adparuerunt cum summa virium prostratione, & notabili febris, spatioque quadraginta octo horarum, mortuus est: paullo post illum sequutus est Puer duodecim annorum, ipsi famulans, qui magnum bubonem flaccidum sub axilla gerebat.)

Concludamus ex omnibus antedictis, abusum tabaci nocere, ob copiam ingentem muci & tenuioris humoris, quam ex naribus, & per fauces possicas, continuo educit: nocere etiam quam maxime, ob jacturam ingentem bonæ salivæ, quæ haustu continuo fumi tabaci ore elicitur.

(Patet hinc, in Turcis statum illum indifferentiæ, & ἀναισθησίαν binis inprimis ex causis oriri posse, primum ab opio, narcoticorum & stupefacientium omnium facile Principe; tum a salivæ spuatione inmodica; una cum priori melancholicarum affectionum genesis perficiente: accedunt huc & ex-culta nimium Cypriæ sacra, & frequens balneorum usus, laxans, debilitans. —)

Eodem modo homines, qui fumo tabaci minime utentes continuo pessimoque & indecoro modo salivam exspuunt, nocent sibi quam maxime. HIPPOCRATES solebat Sputatores illos vocare, vel futuros, vel jam actus,

actu, Hypochondriacos. Præcedentia dicta hujus explicant rationem. Qui nempe multum salivæ excernunt, hi exsiccant reliquam humorum massam, & inspissatis humoribus fiunt Melancholici, Atrabiliarii; quemadmodum illi pastillorum Masticatores in aula gallica.

Qui vero Melancholicorum adhuc salivæ Sputatores sunt, ii manifesto ingentes habent obstructions. Ratio patet. Pancreas maximam copiam humoris salivalis parat pro digestionem. Si Melancholici habeant pancreas etiam obstructum, eo abundantius humor ille salivalis a sanguine separatur per glandulas oris; donec sanguis, sensim spissior, non amplius illam materiem in ore secernat.

Tandem Melancholici habent aliquando vitium, quod quidem & in Aliis, non melancholicis hominibus subinde adest; ut succus pancreaticus obfendat viam magis inpeditam, ob juga valvulosa, ad intestina, utque sic facilius subeat ventriculum. Hinc copiosius ille adfluens sæpenumero plenis regurgitat buccis. His Ultimis sæpe jungitur nausea, sæpe etiam amaror; quia & bilis descendere inpeditur.

Si autem non excernitur in os, aut longe parcius solito; inpedi tum ciborum manducationem; ut mox dixi, dum salivæ usum necessitatemque exposui.

Saporem; quia habet saliva sal penetrans, ammoniaci simile (acido specificante diversum); quod alimentis potulentisque mistum, papillas nervosas in lingua & buccis, gustus organa, adficit, stimulat, erigit; ut sese particulis sapidis adplicent. Hunc defectum Omnes experimur, dum post iter magnum, vel toleratam sitim, aliquid comedimus. Ligni instar mihi sapit hoc, dicimus; quia os tum exsiccatum est. Sed ubi multo potu os probe collutum est, & sanguis ficcior novis liquidis mistus, redeunt rivuli salivæ,

rena-

renascitur sapor. Adde, quod exsiccato ore si tamen pergas manducare, quasi exsugantur ductus excretorii salivalium glandularum: motu etiam maxillarum & linguæ continuo glandulæ ad actionem & propulsionem incitantur.

Deglutitionem; quia mansa non diluuntur; hinc homo offas duriores non sine labore deglutit.

Digestionem; quia caret ventriculus illo menstruo omnia macerante, solvente, dividente, diluente.

Augetque simul sitim. Salivæ adfluxus perpetuo madefacit partes nervosas & papillas oris, linguæ, gutturis, œsophagi. Ea deficiente illæ partes fiunt siccæ ab acri (*) continuo præterlabente. Quin & ipse sanguis aquosiori sua parte carens, non ultra, vel non ita ut antea, irrorat vapore aquoso os, orisque vicina: ergo siccitas nascitur; una ex sitis causis.

(Qui per religionem, BOERHAAVIUS ait, *Comment. in Inslit. p. 143.*, diuturna jejunia observare tenentur, iis olet anima, & saliva exspuitur fœtida, acris, gingivas erodens. Adfert in hunc locum *Inl. HALLERUS* exemplum *Cel. TSCHIRNHAUSEN*, qui, postquam ad tertium diem cibo abstinerat, observavit dentes sibi vacillasse, os universum acri saliva inundatum fuisse, &, quum manderet, os acriter doluisse. *Medic. ment. & corpor. p. 23.*)

Qui curam luis venereæ exercent, animadvertunt, homines, qui salivationem aliquoties passi sunt, fieri melancholicos. Una nempe causa (nam plures sunt) esse potest siccitas & spissitudo, ad quam post tantam jacturam liquidorum redacti sunt.

Antequam hanc de saliva doctrinam relinquam, referam ex RUYSCHIO *Advers. anat. dec. 2. n. 5.* locum, qui dicta hucusque pulcris confirmat exemplis.

Puellæ duodecim annorum ulcere proserpente excisum erat labium inferius magnam partem, perque ulcus patens effluebat continuo saliva: unde Ægra cogebatur linteo admoto salivam excipere, vel retinere. Tandem Chirurgus *celeberr.* VERDUIN margines induratos sic abscidit, ut crudi sanguine manarent, quali modo in curando labio leporino fit; dein trajectis binis per labium acubus, vulneris crepidines ad se invicem adduxit, filamentisque firmavit; ita, ut intra 6 dies Puella integre curata cerneretur.

Animadvertit autem RUYSCHIVS, quo tempore durabat salivæ effluxus, Puellam corpus habuisse tenuius exiliusque, quam ætas duodecim annorum postulasset; curato ulcere omnem in modum ad stuporem usque excrevisse. „Quam errant igitur, inquit, qui salivam pro recremento noxiæ habentes, eam abjiciunt, eoque pulcrius valere putant homines, quo frequentius ea corpus exonerant; eum in finem sialogoga adhibentes, & offas tenaces manducantes! Ego contra sæpe vidi, ex defectu hujus humoris cibi fastidia oriri. Quare & soleo suadere Iis, qui ab acutis convalescunt, quibusque frequentius saliva in os adfluit, hanc deglutire velint. Quin etiam in diuturnis sæpe adfectionibus incidit salivæ adfluxus ingens; quam ubi exspuunt, labuntur in deteriora Ægroti; qui, si tridui spatio patienter hanc absorbent, sanantur felicissime.“

Matronæ demum adfert RUYSCHIVS exemplum, quam extrema macie consumptam Medici desperabundam reliquerant: dum RUYSCHIVS in causas inquirebat, vidit continuo sputantem. Suasit, ut deglutiret salivam; abhorret, renuit illa. Instat RUYSCHIVS; obedit Fœmina. Curatur integre a suo morbo. Testatur RUYSCHIVS, talia sæpenumero se observasse;

præ-

præcipue in fine morborum: cautelæ debitæ defectu hæc fieri lethalia.

Sed ne abutamini hac observatione. Fui in consultatione, ubi Princeps junior phthificus fiebat; tussi continua laborans, & abscessu nondum rupto magnam copiam glutinis tenuioris excernens. Suasit Medicorum unus, ut deglutiret omnia, non esse phthisin. Ast brevi pus succedens ostendit, quam male auguratus fuisset, sanitatem adfore deglutitis sputis: peribat phthisi Princeps.

(Hæc HAENIUS. — Salivæ nimium effluentis mala exposuit BAGLIVIVS; magnam etiam copiam exemplorum salivationem nimium excipientium symptomatum collegit SCHURIGIVS *Sialag. p. 77. Sc.* „ Postquam densis aphthis omnes oris interni partes diu tectæ fuerunt, VAN SWIETEN ait; *T. I. p. 586. Edit. Paris.*, his postea deciduis, incredibilis copia salivæ exit per dilatata vasa. Nisi idoneis auxiliis tollatur inmodicum illud salivæ profluvium, exhausti sæpe pereunt, vel postea diuturnis morbis conflictantur; dum tenuissima parte sanguinis sic deperdita difficillimæ obstructions nascuntur. “ Monet quidem VAN SWIETEN, non obflare hic phænomenon salivationis mercurialis, quum in ea non sola saliva excernatur, sed omnes humores vi mercurii resolvantur. — Vidimus tamen paullo antea, ob hanc causam salivationem sæpius Expertos, factos fuisse Melancholicos &c.

Refertur in *Mem. de l'Acad. des Scienc. 1719. p. 452.* historia Militis, cui unius parotidis ductus dissectus fuit, vulnusque postea pro parte coaluit, ita, ut saliva secreta non in os, sed extrorsum per fistulosam aperturam deplueret in genam. Brevis prandii tempore plura linteamina madebant effluente saliva.

Mala, quod attinet salivæ subpressionem sequentia, præter antea dicta, videri poterunt *Comment. Int.* VAN SWIETEN ad *Aph.* 1060.; ubi recte monetur, ab hac sola causa turbari posse omnes enkephali functiones, adeoque & paralyfin produci.

„ In variolis, ait, *T. II. p.* 81. & imprimis in confluentibus, sæpe ingens salivatio ex orci faucibus homines eripuit; qua subpressa, a quacunque demum causa, omnia symptomata augebantur inmaniter, & sæpe mors subita sequebatur. “

Sequitur in textu nunc *historia morborum, bilis secretionem & excretionem, a lege naturali æconomiae humanæ recedentem sequentium*: eam vero ob adlatas antea rationes, seorsim, uti *HISTORIAM VERMIUM*, pluribus additamentis auctam, edidi. —

§. 774. *Lympha pancreatis & intestinorum, si nimia copia depellitur in intestina, producit mala similia, ac saliva sic peccans (§. 772).* Pancreas glandula est, cujus magnitudo in Variis ita variat, ut exacta ejus figura dari nequeat; immo neque in omni cadavere situs æque convenit, ut non aliquando altior, demissiorve, dexterior vel sinisterior sita sit. Plerumque sequenti modo se habet. Major sedes pancreatis est pone superiorem sedem ventriculi, ab ipso liene, cui ope omenti nectitur, transversim veniens, ut media sedes sit maxime anterior usque ad duodenum: ubi illud a ventriculo descendit ante duodenum aliquando deducitur; hætenus continuo crassior, quo dexterior est. Ex ea vero sede, qua admovetur duodeno, deorsum educitur secundum duodenum, in productionem aliquot quandoque unciarum, quam *parvum pancreas* vocat WINSLOW, depinxit EUSTACHIUS. Tegitur in universum ventriculo; & cellulosa fabrica mesocoli, una cum duodeno obducitur: ita, ut mesocolum & supra & infra sese habeat. EUSTACHIUS videtur pan-

creas

creas iusto brevius pinxisse. Glandula conglomerata est, ex sanguine cœliaco secernens humorem, ac evacuans ope multorum ductuum, in unum communem (*Wirfungianum*) abeuntium, qui demum in duodenum terminatur. (Meliolem circa formam, situm, fabricam, & usum pancreatis, tum in homine, tum in animalibus, consulere fontem nequeo, quam *magni HALLERI Elementa Physiologiæ*, æternitati sacra: hæc siquidem prætereunda omnino hic sunt additamenta).

Liquor ille pancreaticus, aut lymphæ pancreaticæ, insipida fere, BOERHAAVIUS ait, *Instit. §. 101.*, vel subsalsa, a sale humano, ad ammoniacum accedente (tum & a sale muriatico, quod una cum cibis non exigua dosi quotidie ingerimus: sapor, BOERHAAVIUS jam dixit, *Prælect. in Instit. T. I. p. 374.* adeo dulcis pancreatis est, & blandus, ut ab Italis referatur inter cupedines & vocetur *bocca saporita*. Et siquidem aliquando salus sapor in homine appareat, oritur is omnino a sale marino, quo copiose nutrimur: id enim quotidie ad semiunciam adsumimus, neque unquam mutatur in nostram naturam; nam ex urina per integros sex annos æque perfectum omni dote sal marinum educitur. — Interrogavit quidem in adjecta nota HALLERUS, quare non a sale humano, quod, ad fine sali ammoniaci, in sanguine & omnibus humoribus nostris abundat? facile vero patet; utrumque fontem saporis junctim tuto adsumi posse).

Limpida est, copiosa; ita, ut experimento difficili in aperto cane molosso facto, intra octo horas uncia integra exierit; ut videre potestis apud DE GRAAFIUM. (In SCHUYLI tentamine copia multo major secreta; unciae nempe duæ intra trihorium, v. DE GRAAF. *de succ. pancreat. op. p. 421*).

Sed variant omnia experimenta circa quantitatem dato tempore effluentis succi pancreatici, eo, quod vulnere facto irritatio sequatur, quæ humores undique veluti advocet in locum læsum. Qui vellet quantitatem humoris oculi, seu glandulæ innominatæ GALENI subputare ex quantitate, quæ oculo a sabulo irritato prodit, crassissimum erraret errorem, nam jam natura eo versus fluvium humorum determinat, quo acre abluatur.

(Sequitur ex verissima hac observatione alia, non minus certa, attamen passim neglecta. Sequelæ nimirum, quæ ex subjecto analysi chemicæ humore, tali methodo violenta, certe præternaturali, collecto, circa principiorum constitutivorum tum quantitatem, tum crasim, tum indolem deducuntur, nunquam non fallunt magis minusve, prout a naturali secretionis ac excretionis norma remotior fuit encheiresis, qua obtenta fuit humoris examini dicati dosis. Instantiam manifestissimam subpeditat v. c. bilis, quæ terrore, gyratione corporis, lapsu &c. momento redditur emesique rejicitur æruginosa, qualis antea non fuerat, in ventriculo ne quidem præsens: tum saliva, dilutior multo, aquosior, dum ore hiante, diductisque, bacilli ope, maxillis non interrupto stillicidio in subpositum vasculum effluere cogitur; phlegmatica & inerti ejus crasi tanto magis incrementum, quo diutius productum fuerit experimentum. Calculus itaque, tum circa quantitatem quum indolem elementarem humorum corporis animalis ex ejusmodi tentaminibus petitus ac demonstratus, pro certissimo & extra omnem plane controversiam posito habendus nequaquam erit.

Ex pondere autem pancreatis, minimum uncias quinque adæquante, quum pondus glandularum salivarium omnium ad summum drachmarum septemdecim sit; tum & ex adsumto, ac ex tentaminibus (de quibus
tamen

tamen denuo illico dicta partim valent) deducto calculo, vi cuius intra decursum horarum viginti quatuor una libra salivæ minimum secernitur; comparatione tum facta & ponderis magnitudinisque majoris pancreatis, & agentium in hoc ipsum vix non continuo virium præli totius interni externique abdominalis, deduxerunt demum Physiologi, quantitatem lymphæ pancreaticæ intra idem datum tempus secretæ ad minimum æquaturam esse libras tres; quum interea temporis nonnisi una libra stillet salivalis laticis.

Demonstrationem hanc sane ἐναργῶς factam crediderunt: sic MARHERRUS v. c. nuper scripserat, *Prælect. in H. BOERHAAVE Instit. Medic. T. I. p. 449.* „ — — unde certissime concludi potest, positis temporibus iisdem, secretionem triplo saltem majorem fieri in pancreas, quam in organis salivæ. “ Sententiam hanc excerptit ex BOERHAAVIANIS in *Institut. Med. Commentariis*, ubi p. 376. vix non iisdem verbis idem legitur. — Verum enimvero demonstravit *Celeb. Theophile DE BORDEU* in tractatu: *Recherches anatomiques sur la position des glandes & sur leur action*, Paris 1751., multum abesse, quin theoria illa agentis in pancreas præli abdominalis firmissimo nitatur talo. Examinans exactius, p. 208. quæstionem: utrum pancreas compressione indigeat, quo contentum dimittere queat humorem, orditur primum a pressu, quem in pancreas exerere, ex adsumtis a BOERHAAVIO, SENACO, Aliisque pluribus, deberet ventriculus; monens, adtendendum vel id unice fuisse, ventriculum, qui non nisi dum repletus est, agere in pancreas adseritur, secretionem hanc frustra omnino excitaturum fuisse; videri autem lympham pancreaticam fluere solum, majori saltem copia, una cum bile, quæ duodeno infunditur præsertim, dum intestinum plenum est, aut ventriculus nunc

vacuatur; ut adeo copiosa fiat secretio, dum in pancreas minimum agit ventriculus. — 2) Ventriculus, quomocunque spectatus, non videtur sat soliditatis possidere, ut comprimere queat corpus adeo compactum, quale pancreas est, ventriculo, etsi repletissimo, nunquam non durius, si mutuam in sese amborum horum viscerum adsumere vellemus actionem. —

Sed præterea sententia illa plurimum deperdit ponderis, si paullo exactius cum demonstratis anatomicis conferatur. Possibile siquidem non videtur, ventriculum inniti pancreati, quum primo lamina superior mesocoli fundum sustinere debeat ventriculi, cavereque ne versus rachidem queat retrocedere. — Quo dein ventriculus est magis repletus, eo & magis procedit a pancreate; propositio hæc, utut paradoxa primo loco videatur, innititur tamen observato *Cel. Winslowi*, quod & repetere Quivis poterit; ventriculus siquidem dum cibis repletur, situm priorem mutat; curvatura inferior vix non evadit anterior, curvatura autem minor postrosum recedit, ac pancreati eo magis e diametro obponitur, quo refertus mage fuerit ventriculus: curvatura hæc jam species est excisuræ, quæ spatium liberum relinquere debet pancreati: verbo: ventriculus, dum repletur, a vertebis recedit, hinc comprimere nequit pancreas. — — Alia ratio evincens, ventriculum non comprimere pancreas, est sequens: in omni casu, quemcunque demum adsumere velimus, pancreas admovebitur rachidi, pressionem eludens; arteria cui adfixum est, efficere quidem valet, ut nunquam non contremiscat (*tremblotter*), attamen non eatenus illud sustinebit, quatenus requisitum foret.

foret ad hoc, ut posset comprimi; potius ipsa inde compressionem experiretur.

A ventriculo itaque pancreas compressionem nullam experietur, cinctum quodammodo ac munitum duodeno, quod pressui multo minus abs detrimento posset resistere. Quodsi Quis dicat, obnoxium esse concussibus diaphragmatis musculorumque abdominalium, inficias minime ibimus, **Auctor** ait, viscera omnia revera concuti & agitari; interim tamen compressiones hæ minime tales sunt, quales adsumserunt sub vocis, hujus significatu Physiologi. Dictum siquidem fuit, glandulas salivales inhærere vero prælo aut torculari: disquirendum, qualenam torcular sit, cui inhæret pancreas.

Primum jam, si ratiocinium a parotide deducere velimus, singulare videtur, pancreas parvis adeo causis emulgentibus v. c. ventriculo prementi &c., obnoxium subponi, dum multo minor parotis musculis validis robustisque intercepta ac expressa dicitur.

Mirum sane, ratiocinium hoc ipsum Physiologorum non excitasse adtentionem: anne siquidem concussus motusve partium incurrentium in sese invicem, quorum etiam effectum eludit glandula libere fluctuans ac mobilis, comparari queunt cum compressionibus, quas parotis experiri adsumitur.

Permista fuerunt invicem res binæ, multum tamen a sese diversæ, dum concussus æquiparati fuerunt compressionibus: levius tamen diversitatem patefaciet examen, dummodo mente instituat a præconcepta jam sententia plane inmundi.

Addenda his minime negligenda observatio, diaphragma musculosque abdominales non agere in pancreas, nisi viscera mutuo sibi admovendo: jam plurima molliora sunt glandulis; raro etiam dia-

phragma musculique uno eodemque tempore simul agunt; demum constabit exactius Adtendenti, motus viscerum omnium, sibi invicem adpressorum, non eum versus locum dirigi, quem occupat pancreas. Spatium illud ipsum sæpius repletum est pinguedine atque liberrimum (ab adcumbentibus aliis) abs dubio, ut videtur, ne pancreati fiat impedimentum, ac ut nervi, vena portæ, aliaque viscera cavo huic inhærentia, immunia sint a compressionibus, quibus aliter turbari potuissent.

Vicinia cordis, cujus meminit BOERHAAVIUS, Commentatoribus suis peculiarem adtentionem promereri non fuit visâ; ac reipsa glandulæ salivales, aliæque per collum distributæ, æque, vel magis adhuc, vicinæ cordi sunt: vicinia hac vero nonnisi conficitur, citiori forsitan torrente rapi sanguinem per præcipua horum organorum vasa: totum tamen dependet demum, ab ampliori angustiorique diametro vasorum horum viscerum, quorum compactior fabrica sanguinem commodissime poterit subflaminare, ejusque inutilem reddere inpetum. An vero velocitas hæc directionis humorum versus viscus quodpiam non aperte indicat, abs intermissione illud agere debere? (*)

Præ-

(*) Adnotavit etiam optime *Inl. HALLERUS, Elem. Physiol. T. VI. L. XXII. §. I.*, ventriculum repletum removeri a pancreate, huicque arcum obvertere minorem. Patet jam ex hactenus adlatis omnibus, quid statuendum sit de thesi *Marherriana l. c. p. 448.*: „cæterum tota hæc glandula, utcunque libere pendula, alternam diaphragmatis & musculorum abdominalium

Præterire hic debeo, limitibus circumscriptus operis, instantias, quas in confirmationem nunc expositæ sententiæ ex *Zootomicis Cel. de BORDEU* repetiit; v. *Recherches anatomiques* §. LX. pag. 217. — Prosequitur nunc HAENIUS dotes succi pancreatici ex BOERHAAVIO huc transcriptas, una cum enarratione litium circa naturam illius olim a SYLVIO, VAN HORNIO, SCHUYLIO, DE GRAAFIO &c. &c. excitatarum. Hæc vero, quum Physiologiam utique mage concernant, ac aliunde copiosissima adhuc restent, Pathologiæ magis propria, hic omittenda censui. Sufficiat in scopum Pathologicum notasse *Sylvianæ* sententiæ Sequaces mirum in modum contorsisse sua experimenta, ut hypothesin de succi pancreatici aciditate bilisque alkalina indole quadrarent: & forte aliquando, HAENIUS ait, imprudentiori encheiresi chylum acefcentem, pro succo pancreatico consideraverunt. Quidquid sit, pessime egerunt; misera gente humana inde pœnas luente: quum SYLVIANI acidum succum hunc pancreaticum, tanquam fecundissimam morborum parentem incusantes, antacidis, alkalicis, exsiccantibus; inflammantibus, Materiem medicam onerarent, masculam HIPPOCRATIS doctrinam obscurarent.

X 5

Ta-

lium pressionem perpetuo experitur, & a ventriculo, post pastum tumente, quasi emulgetur, ut recte illo tempore, quo major succi pancreatici necessitas est, idem majori copia exprimatur. “

Tamen , utut mordicus hypothesin tuebantur Sylviani, & calidissimis rebus corpora inplebantur; subinde contrariis experimentis fere Convicti impossibilitatis defendendi systematis, alias cogebantur medendi inire vias. Videte, pergit HAENIUS, ipsum SYLVIVM, ipsum illum ingentem & universalem salis volatilis oleosi Præconem; qua, putatis, munivit se antidoto in peste? an alkalino sale? immo copiosissimo aceto.

Inter SYLVII Adversarios erant quidam mediocres Physiologi, qui etiam aliquid mussitare gestiebant, magnorum Virorum instar: nedum acidum esse succum pancreaticum, sed revera alkalinum statuentes. Præter veritatem loquuti sunt, sive quod ex præjudicata opinione id omne alkalinum esse statuerent, quod non esset acidum, ut Pluribus vitium fuit; sive quod succum pancreaticum nimis diu servassent, ita, ut demum examinantes invenirent alkalinum.

Genium & usum liquoris pancreatici exposuit BOERHAAVIUS *Inslit. med. §. IOI.*; unde & HAENIUS illa suis Commentariis iisdem verbis inseruit.

En Vobis idæam succi pancreatici, descriptioni *Boerhaavianæ* succi hujus subjungit, cui similis lympa perpluit in intestina ex horum glandulis. Qui junctus liquor, si copiosius excernatur, adeo, ut pancreas & intestinales glandulæ non amplius talem materiem a sanguine excipiant, eo, quod non amplius cum chylo ad sanguinem deferatur; tunc fiunt illa eadem mala, sed majora, quæ salivæ oris nimiam excretionem sequebantur. Est enim liquor salivæ simillimus ortu, a sanguine puro coeliaco, fere, ut illa a carotidibus; secretus etiam simillimis vasis, quum glandulis conglomeratis; simillimus dotibus, ut sensus nostri, & maxime Chemia,
evin-

evincunt. At vero, quia copia horum humorum major, quam copia salivæ est, ideo nimia earum evacuatione mala sequuntur tetriora.

Quo autem tempore fiunt illæ nimiae evacuationes, oriuntur *diarrhææ serosæ inprimis*, coloris cinerei, quæ hominem adeo debilitant, ut jam ab initio morbi sit viribus projectus totus).

Unde summæ debilitates, animi deliquia, siccitates, sitis, febris hectica, marasmus. Hæc omnia intelligimus, si consideremus, digestionem ultra jam non rite peragi, deficiente hoc menstruo; chylum proinde imperfectum dari sanguini; sanguinem maxime carere inquilino humore, quem toties cohobare solebat secernendo, & assiduo cum novo chylo recipiendo: si simul consideremus laxitatem hinc nasci venarum & arteriarum mesentericarum & celiacarum, tum etiam intestinorum atoniam ab continua hac inundatione, patebit, effici demum id, ut liquida per ora laxa, per tubum laxum, mox ad rectum intestinum adpellant.

Quia jam tot æumnæ sequuntur ex nimia humoris deperditione, agnoscere cogimur ejus præstantiam; qui ubi vel incipit modo nimis effluere de corpore per diarrhæam illam albam, mox tantas debilitates, animi deliquia & exsiccationes producit.

At vero, *si non fluit in intestina, vel parcissime, tum facit moles in intestinis crassas, compactas.* Hic textus loquitur de eo casu, ubi primo post nimiam evacuationem deficit fere; secundo, ubi non evacuato nimium hoc humore, vitium oritur in ipsis glandulis, quo non conficiatur; vel in ductibus, quo transfluere ad intestina nequeat. Ut enim aliæ partes glandulosæ, ita & hæ glandulæ intestinales, & maxime pancreas, possunt inflammari, obstrui, scirrhescere; cujus rei tristissima exempla sæpe vidi. (*) Intelligitis tunc, his liquidis non adfusus alimenta sicciora non dilui;

lui; adeoque, absorpta adhuc parte eorum subtiliori in lactea, reliquam massam compingi oportere, & in intestinis retardari.

(*) Inlustris Historicus THUANUS, referente RIOLANO, scirrho pancreatis adfectus erat; qui quatuor postremis vitæ annis inprimis non interruptum gravitatis oppressioisque sensum circa regionem ventriculi excitabat, inprimis corpore erecto, aut sub incessu: hypochondria tamen nec dura erant, nec tumentia: extispicium pancreas exhibuit spleni magnitudine analogum, ex integro scirrhusum, ac refertum magna copia globulorum, ovæ columbina vix non referentium.

Signa pancreatis adfecti, præter sensationem ponderis ventriculo incumbentis, quin durities aut tumor occupet hypochondria, adduxit *Cel. JAMES, Diss. univ. de Medecine T. V. p. 328., Edit. Cel. DIDEROT, EIDOUS, & TOUSSAINT,* gastralgiam, aliaque incommoda, ex vicinia partis morbosæ prognatura, cum dyspnoea, ex compressione diaphragmatis oriunda. His ex indiciis prædixit, scirrho pancreatis laborare Virum quemdam Nobilem, nec suspicionem fefellit eventus. Quum Æger foret macilentissimus, manus admota lateribus epigastrii percepit duritiem quamdam, qua digitis compressa sequebatur enormis dolor interaneus. Notat simul, Scorbuticos pancreatis tumoribus plurimum esse obnoxios: adduxerunt etiam EUGALENUS, SENNERTUS, aliisque Auctores, qui de scorbutico egerunt, signa paullo antea adlata, ceu signa pathognomica morbi nunc dicti.

In genere tenendum, pancreas obnoxium esse iisdem maximam partem morbis, quibus adficitur mesenterium, aliudve viscus quodvis, glandulari fabrica compositum.

Hinc,

Hinc, præsertim si & alia simul concurrant indicia, quibus prodatur latens dispositio ad morbos scrophulosos, scirrhositatesque una cum sensu gravativo chronico circa ventriculum, dyspnœa, gastrodynia, inprimis post adsumtos cibos, anxietate &c. recurrendum ad solventissima obstructionum remedia, extractum cicutæ, vinum oxymelive squilliticum, cum interpolatis eccoproticis, victuque maxime eupepto, blando, minimum flatulento, pastaceo, glutinoso, obstipante. Vidi plures Scrophulosos, qui simul de angustia & specie cardiogni post pastum, uti & præsentē, tempore intermedio, pressionis sensu in epigastrio querebantur: quæ symptomata in Nonnullis emendata fuerunt, prout dispellebantur suis remediis scrophulæ: an non obstructiones levioresque scirrhos pancreatis malis præbuisse ortum, adsumere licet?)

Hinc pondus, quia fæces accumulantur, nec excernuntur. (Tum & a mole ipsa adaucta, si pancreas simul tumeat; uti in corpore tumuerat THUANI.)

Repletionem, ita ut homo agilitatem suam amittat, & de Sarcina adsidua conqueratur. Mechanice enim indies augetur pondus; molem intestinorum ac totum mesenterium trahens, musculisque abdominalibus ac dorso adprimens. (Quorsum denuo concurrere multum poterit, si una tumeat, pancreas).

Tormina; ubi inter has compactas fæces aër interceptus rarefcit, expanduntur intestina, dolentque; immo tota moles intestinorum extenditur, & quasi inter duo præla hæret pressa; hinc fæcibus internis, illinc dorso & musculis abdominalibus. Unde tota intestinorum moles continuo, tam circumjacentibus partibus, quam sibi invicem, adfricatur. Ergo sequuntur tormina, dolores. Adde, quod acrior indies fiat contenta materies & bilis acredo jam hoc succo pancrea-

creatico non mitigetur : inde a stimulo bilis acrioris alia causa torminum.

Volvulum, sive intestini susceptionem. RUY-SCHIVS suis frequentissimis dissectionibus edoctus, nos etiam vere docuit, quid volvulus esset. Olim putabant, intestinum verti volvique, seu intorqueri, hincque sibi ipsi viam præcludere. Demonstravit RUY-SCHIVS, id semel quidem iterumque se vidisse, non tamen simpliciter ortum, ut putabant, sed soluto prius intestino a putrefacto mesenterio. *vid. RUYSCH. Observ. anat. chirurg. 91. p. 84.* Sed mors tum æque videtur orta a putrefacto mesenterio, quam ab inverso contortoque intestino ; quum ex eodem RUYSCHIO noverimus, adeo lethalia esse mesenterii vulnera.

Cæterum, his paucis casibus exceptis, toties Ille secum advertit, & publice demonstravit, tunc fieri hos vulvulos, seu potius interceptiones, quando intestinum spasmo contractum, hinc angustatum, in contiguam ejusdem intestini partem ingreditur, idque sæpe ad notabilem longitudinem.

Cel. VELSEN, Amicus integerrimus, cujus Dissertationem *Inl. VAN SWIETEN* ad §. 960. laudavit, in cadaveribus toties hanc susceptionem invenit & demonstravit, ut pateat, malum frequentissimum esse. Anno 1753. Puellæ cadaver incidens, aliud quærens, casu detexit tres ejusmodi susceptiones; quas non quærebat, quum Puella non a symptomatibus volvuli, sive susceptionis, mortua esset. Credibile, brevi ante mortem a convulsionibus has susceptiones ortas fuisse. Sed de his pluribus, ubi de *Ileo* agam.

Talem ergo volvulum, sive introsusceptionem oriri in intestinis posse, dum sicca, copiosa, compacta materia turgent, Quis non videt?

Oritur etiam *fritis*, quia intestina arescentia naturali instinctu humectationem quasi petunt; tum, quia
acria

acria alimentorum, bilis, in chylo non satis diluta, soluta, intrant sanguinem.

Febris, ab irritatione eorundem acriorum, jam non dilutorum, & ab vasorum in abdomine compressione: nam dum sanguis fluere nequit per omnia illa compressa vasa, per pauciora currit copia idem celerius.

Alvus dura; dictum.

Tumores totius abdominis; tumores in intestinis crassis; tumores in recto ab hæmorrhoidibus, quas mox exponam.

§. 775. *Sanguinis nimia excretio, sive per anastomosisin ex hepate, intestinis, renibus, utero, pulmonibus, naribus, ventriculo fiat; sive per diairesin, diapedesin, aut vulnera.* Ad §. 707. hæc nomina explicui, unde repetere non est necesse; adjeci & *diabrosin*.

Ex hepate fieri posse, docet fabrica partis; revera fieri, demonstrant exempla. In hepate habentur extremitates arteriæ hepaticæ, extremitates venæ portarum, initia venarum hepaticarum correspondentium venæ portarum, initia venarum hepaticarum correspondentium arter. hepat., initia fistular. biliarium. Si ergo dilatatio a debiliore compage fiat ad fines venæ portarum & ad initia fistularum biliarium, & aliqua quacunq; causa vis sanguinis a corde augeatur; potest sanguis urgeri ex vena portarum in has fistulas, inde in porum biliarem, inde in ductum communem & intestina. Est ergo per anastomosisin, sive dilatata cavitatis ora (facta sanguinis emissio.)

Ex intestinis novimus itidem nasci posse talem evacuationem per anastomosisin. Arteriæ enim mesentericæ, ubi ad venas mesentericas, vel versus hepar, impedimentum nascitur, possunt sanguinem suum pellere in lateralia vasa, perque eorum, mere alias ex-
halau-

halantium, ora effundere in intestinorum cava, atque viam hanc ita adfectare, ut, si obturata sit per artem, tetriora, aliorum verso sanguine, mala producant. Exempla præbent vomitus sanguinis periodici, narium hæmorrhagiæ periodicæ, alvus sanguinea periodica, (tum ipsa menorrhagia & hæmorrhoidalis fluxus,) quæ, si claudatur via adstringentibus &c., mala creant pulmone vel cerebro sæpe: unde, Qui curare enata mala velit, substituatur evacuationes in alia loco; v. g. largiorem curet mensium fluxum, largiores hæmorrhoides; vel saltem v. f., & sanguinem conpingat; dein vasa roboret cortice peruviano, ac exercitio corporis, ne fiat plethora.

Ex renibus, ubi concurrunt extremitates arteriæ renalis, initia venæ renalis, initia *Bellinianarum* fistularum. Si resistantia sit ad venas renales, vel si laxitas nunc dictarum fistularum, tunc sanguis a quacunque causa violentius actus fistulas has per anastomosis subire potest; ita, ut pro urina merus sanguis prodeat.

(Hæmaturia exempla in Practicorum & Observatorum scriptis passim reperias. Adfectionis autem hujus plures occurrunt varietates, tum ratione causæ excitantis, tum sedis, tum & indolis, imprimis respectu ad durationem sumto; quod quidem ingentem adfert in methodo medendi diversitatem. Adducere juvat condimenti instar sterilioris explicationis, ac per transennam, unum alterumve observatum, quin Nosologiæ specialis nimium subeam pomaria. Frequentissima est hæmaturia a calculo viis urinariis, renibus, in tacto, moto; præsertim dum corpus unctione in rheda per plateam lithostratam concutitur. Præcavere tuto solebat speciem hanc magnus SYDENHAMUS & podagra & calculo adfectus ipse, ea ratione, ut non prius rhedam ingre-

ingrederetur, ad longius intervallum vehendus, quam ingesto haustulo cerevisiæ tenuis paullo liberaliori, eundem pariter iterans ante regressum domum versus, si forte alicubi diutius foret commoratus; quo pacto semper a mictu sanguineo satis erat præcautum. *vid. Thom. SYDENHAM, de mictu sanguin. a calc. renib. in pacto. Op. T. I. p. 442. —*

Refert RAMAZZINI ex ipsorum Cantorum confessione, sanguinem illorum, adeo nonnunquam incallescere, ut finito dramate scæna exeuntes, urinam reddant cruentam: notandum vero simul, Musicos haud raro Thyrsigeri muneribus nimium non nihil indulgere; ut adeo non soli cantui hæmaturiam referre debeant in acceptis. — BOERHAAVIUS mictum cruentum in Infantibus vidit, ortum ab adstrictione nimia fasciarum; ac vestium: qua occasione simul non oberit animadvertissè, convulsiones tenellorum Infantum haud raro huic unice causæ ortum debere. — Hæmaturix menstrualis instantias collegit, præter alios Observatores; SCHURIGIUS. In foeminis quoque annosioribus; quando menstrua cessat purgatio, HOFFMANNUS ait; *Med. rat. Syst. T. III. c. 9. §. 3.*, cruenta non raro oboritur mictio; ita prorsus, ut exempla proflent; ubi singulis mensium periodis cum urina, sanguis partim fluidus, partim grumosus, redditus fuit; & §: 7. Nonnullos post sexagesimum annum mictio cruenta; vel inconspicibilis mensium fluxus, qui demum in hecticum calorem concessit, infestavit. — Hæmorrhoidum vices obiisse hæmaturiam; pariter constat observatis certissimis: vidi, HEURNIUS ait; *Comment. in Aph. HIPPOCRAT. 46.* Qui, cum hæmorrhoidibus tentari solebant, cum urina sanguinem effundebant certis spatiis, sine noxâ.

HILDANUS etiam evacuationem similem sanguineam observavit in Sene. *v. Cent. II. Observ. II.* — Mictum cruentum a cantharidum in corpus actione nasci, obvium est. — In variolis sub initio morbi, sæpe nullis, vel paucis hætenus erumpentibus pustulis, plerisque adhuc latitantibus, prodit & Ægrum ante plenam eruptionem e medio tollit, observante jam SYDENHAMO, Qui & optime monuit, provocari illum a lecti sæpe calore, si Ægri, præsertim juniores, cito nimis ei adfigantur. In *Dissertatione etiam epistolari ad Gulielmum COLE Op, T. I. p. 237.* ait: maculæ purpureæ & mictus cruentus, ni fallor, ortum ducunt ab æstu & furore, in quem agitur sanguis a ferventibus & spirituosius particulis, a quibus exagitatus atque insigniter adtenuatus, vasorum claustra diffringit, nunc in mictu sanguineo, quoties in renes irruit, - - Unde totidem quasi sphaceli oboriuntur iis in partibus, in quibus extravasatus sanguis coagulatur. Atque, ut præcaveri facile poterant duo hæc symptomata primis morbi diebus, quibus plerumque emicant, regimine & diæta in frigidum vergentibus; ita, ubi jam actu comparuerint, pariter operam ludet, Qui iisdem mederi conabitur, Ægrum lecto includendo & cardiaca exhibendo, ac luderet Anicula, quæ nimiam aquæ in olla ebullitionem, igni fomitem subministrando, subflaminare satagat. Hæc SYDENHAMUS, aptissima utique, ni me omnia fallant, refutandæ absurdæ illi ac damnosæ theoriæ: in variolis aliisque morbis exanthematicis primas tenere methodum excalescentem, pellentem; qua id sane lucratur, ut non solum Æger ipse, si non plane occumbat, dirissimo tamen morbo obprimatur, sed & Atmosphæra halitibus corruptis maxime, ac pestiferis ab æstuante, ac humoribus putridis repleto corpore
adscen-

adscendentibus inficiatur, contagium in Adstantes opem laturos disseminetur, morbusque inepta mendendi ratione reddatur pejor, quam fors unquam factus fuisset indole propria, sed tractatus concinnus.

Prætereo hic alias multas hæmaturię species, plus minusve huc spectantes; id unice adjiciens, distinguendum adhuc esse, dum lotium sanguinolentum prodit, utrum ex ipso urethrę canale, an vero ex præputio sanguis prodeat: qui quidem adfectus rarior est, præter alios tamen Observatores ab HOFFMANNO binis vicibus observatus in Plethoricis, ac senio jam Proximis; his, ut simul addit, notis a mictu cruento dignoscendus, quod guttatim sillet sanguis, & quidem continuo; etiam si urina non reddatur, quum in mictu cruento nunquam, nisi simul cum urina, sanguis proliciatur.)

Ex utero per menses aut lochia: nam etiam per anastomofin hæc videntur fieri.

Hæmorrhagia narium & hæmorrhoidon ex arteriæ oris dilatatis, si non semper, sæpe tamen oritur.

(Huc revocandæ etiam rariores aliæ sanguinis excretiones; quarum instantias aliquas non überit adduxisse, ut facti saltem possibilitas demonstretur *Tironibus*, quibus minor adhuc suppellæx libraria, & nondum

Lectæ potenter erit res.

Lacrymæ sanguineæ tum a ménostasi, tum a summo sanguinis ad enkephalon adpulsu in phrenitide &c. fuerunt observatæ. — Ex *auribus* menstruum sanguinem fluere vidit HORSTIUS. — Ex *gingivis & alveolo dentis* criticam hæmorrhagiam adnotavit HOLLERIUS, ac I. RHODIUS. *Hæmatemesin* emenagogam Auctores, qui de morbis Fœminarum egerunt, ac Observatores copiose prodiderunt

derunt scriptis; v. & HIPPOCRAT. *lib. I. de morb. §. 32.* — *Lac roseum*, ab intermissis utique sphæ-
rulis, seu moleculis potius, sanguineis, adnotavit
Cl. VIGER in peculiari diatribe, v. & *Examen
meum chemicum lactis.* — *Sudoris sanguinei* alia
occasione in hocce opere jam facta mentio, ut re-
petitio foret supervacua; &c. &c. Videatur inpri-
mis Martini SCHURIGII *Parthenologia*, & *Hæma-
tologia*, ubi magnus huc pertinentium observato-
rum collectus habetur numerus.) vi

Omnes illæ evacuationes, quarum aliæ naturales,
aliæ præternaturales, aliæ demum (olim) præternatu-
rales; quæ tempore naturales quasi fiunt, si ex ana-
stomosi oriantur, nec nimium durent, sæpe nil habent
discriminis; uti nec illæ, quæ fiunt per rexin, aut
diapedesin: verum, si non a vi sola inpetus cruoris,
nec a sola debilitate vasorum; sed ab acrimonia, va-
sa tenella rodente, consumenteque oriantur; tunc ple-
rumque res videtur conclamata. Diabroseos effectus ex-
positi fuerunt ad §. 707.

Est vero hic observandum:

1) Supponimus, menstruam uteri evacuationem
probabiliter fieri per anastomosi, uti fiunt illæ expo-
sitæ per hepar, intestina, renes. Differentia magna
hæc interest, quod evacuatio sanguinis ex hepato, in-
testinis, renibus, sit prorsum præternaturalis, anasto-
mosis arte plerumque curanda; illa vero, quæ in ute-
ro fit, dicenda sit plane naturalis, ex quo ad sui in-
crementi apicem corpus muliebre cœperit pervenire,

2) Quod vasa ipsa in Muliere, quæ jam præ æta-
te sit caritura mensuris, videantur hanc anastomosi
tollere; ex majore rigiditate, quam muliebre corpus,
olim molle, & laxum, solet sensim acquirere, ubi
ad quinquagesimum annum adpropinquat.

Neque

Neque enim copia sanguinis inminuta, adeoque minus dilatans vasa, causa dici potest; quum cessantibus mensibus, copia aucta ita deprehendatur sanguis, ut pessima mala faciat, si aliæ evacuationes non substituantur; principio respondentes copię mensium, dein sensim minuendæ, ne frequentiori evacuatione arteriæ adhuc plus impleantur; ut in plethora fieri evici.

Quæcunque vero evacuationes sanguinis ex his recensitis oriuntur, a quacunque causa, si nimium cruorem profundunt, noxiæ sunt, ac perniciosæ, quum vitalem animalis laticem, prodigant. Nam *tollunt vires, minunt spiritus*. Tollit vires evacuatio nimia sanguinis; quæ vires debita sanguinis copia, cum vasorum vi perfectum servante æquilibrium, sustineri debebant: minuta hacce copia aufertur hoc æquilibrium, vasa arteriosa angustant se magis; quia jam statum naturalem adipiscuntur, & naturalem suam contractionem adflectant; quum prius essent a distendente sanguine in statu violento, ut toties in solidis consideravimus. Hinc profundunt adhuc magis liquores contentos per vias apertas; donec, ad minimam suam contractionem devenientia, relinquunt copiam tam parvam humorum, ut illa non sufficiat ad vasa debite explenda; non sufficiat ad quantitatem requisitam mittendam in encephalon, qua iuxta *spirituum* copia pro nervis pararetur.

Destruit omnes actiones, naturales, vitales, animales: quæ, ut rite, facile, constanterque peragerentur, requirebant debitam humorum copiam ad vasa, quæ eo serviant, explenda, debitamque humorum ad cerebrum cerebellumque adpressionem (adpulsionem), qua & nova & assidua secretio spirituum fieret.

Accumulatæ cruda, aquosa, pallida, frigida: quum enim sanguis & spiritus deficiant, solida omnia flaccescunt, debilitantur, de sua vi contractili multum amittunt, adeoque ipsæ arteriæ dum non amplius se contrahunt, dum non nutriuntur, dum influxu spirituum in suis villis nervosis carent, penitus flaccescunt: ergo sunt in illo corpore pauca fluida, solida debilia; fluidumque, quod superest, vix a flaccidis vasis attingitur, vix conteritur, non compingitur, sed globuli ejus fiunt laxiores, dissilientes in serosos, serosi in lymphaticos &c.

(Ex legibus scilicet compactionis reciproca globulorum in globulos: hæc omnia abs additamentis dimittere malui, quum in Physiologiæ nimium excurrendum fuisset ambitum.)

Nova porro alimenta, quæ cruda sanguini adfunduntur, etiam hac debili vasorum vi non mutantur in inquilina) tum etiam non inveniunt sufficientem copiam bonorum humorum, quorum commistione in humores coctos facile mutantur; unde itaque *cruda* manent.

Dispositio aquosa; quia nova adsumta in bonos globulos sphaericos mutari non possunt, quæ origo præcipua humorum aquosorum.

Pallida fiant omnia, necesse est, quum materies cruda, aquosa, iners vasa tantum extendat, rubra vix adsit.

Frigida quoque omnia fiunt; quum calor ab adritu boni copiosique sanguinis cum vasis, & adritu inter suas bonas particulas globosas.

Producunt leukophlegmatiam & hydropem, quem toties jam explicui esse tumorem aquosum panniculi adiposi, ortum a sanguine aquoso nimis secreto, vel exhalante, nec resorpto in panniculo adiposo, vel in cavis corporis.

Laxitatem in omnibus vasis; in arteriis autem capacitatem; ut toties vidimus, & adhuc mox: capax ergo quum sit arteria & simul debilis, locat, continet in se liquida cruda, aquosa, inertia; non conpingit ea, nec nisi ægerrime propellit. Hinc languet totus humorum circulus. Unico verbo singula recapitulabo. Viscerum bona actio tota peragitur, quando liquida bona vi cordis pressa, arterias dilatant, arteriæque suo robore & elasticitate reagentes, humores, quibus distendebantur, propellunt. Quo jam deniores sunt humores, scilicet quantum id sanitas permittit; nam possetis dicere, quod sanguis nimium densus tandem motui excipiendo & continuando ineptus fiat; id verum, sed loquimur hic de densitate laudabili; quo jam, inquam, densiores sunt humores, quo & robustiora vasa, eo diutius motum inpressum conservant. Est enim in Mathematicis demonstratum, corpora, quo densiora & solidiora, eo diutius servare inpressos motus.

Comparetur cum hocce statu, is, qui supra recensitus est; sponte liquebit, quam & debilis & vitiosus debeat sanguinis circuitus esse.

Et, quod forte mirabimini, aliquando etiam in his debilibus corporibus, sanguine bono carentibus, oriuntur febres, quas, emendata non prius debilitate, difficulter superamus. Humores quippe crudi, non commisti, crassi, non adtenuati, non adsimilati, parvam vim arteriarum experti in minimis canalibus hærent, obstruunt eosdem; ergo, si sanguis per plures arterias obstructas penetrare non potest, minuitur spatium circulationis; interea cor copia majori humorum irritabitur in frequentiores ictus, & nasci oportebit hac ratione febres. Experimento *Loweriano* clare patet dictorum veritas; vidit enim in homine, qui

ingentem hæmorrhagiam narium passus erat, jus car-nium visibiliter per nares exire.

Cruor autem per hæmorrhoidalia vasa, aut naturalia Mulierum, vel & per alia minus consueta loca, dudum jam & periodice evacuari solitus, interceptus nunc, facit topicas dirasque inflammationes, circulationis suffocationes, febres — — — : hæmorrhagias. Ad §. 707. horum pleraque explicui; maxime vero in matutinis lectionibus agens de morbis capitis: toties etiam data occasione vidimus, nullum morbum inflammatorium esse, quin ex hac causa proegumena nasci queat, si alia causa excitans accedat. Vidimus præterea toties, quam miras vias quærat sibi sanguis periodice evacuari solitus per menses in Fœminis, jam interceptus, nuncque exiens per nares, oculos, aures, digitos, &c., (quorum exemplorum nonnulla etiam paullo ante adduxi.)

§. 776—777. *Seminis excretio nimia facit lassitudinem, debilitatem, immobilitatem, convulsionem.* Ex HIPPOCRATE & ARETÆO liquet, frequentem in Asia morbum fuisse, quo liquor prostaticus & semen sponte copioseque profluerent; unde hæc orirentur symptomata. Dari tamen & nunc quandoque, *venere-randus* PRÆCEPTOR sua praxi detexit, detegunt & Practici passim.

Gonorrhœa simplex, gonorrhœa Veterum hæc vocatur. ARETÆUS graphice describit hunc morbum, *lib. 2. de caus. morb. diuturnor.* „Lethale quidem non est, ait, scilicet non est acutus morbus, cito occidens, fluxus seminis, gonorrhœa, genituræ profluvium; injucunda tamen est, & auditu turpis affectio. Nam si intemperies, si resolutio & humida occupat & genitalia membra, ut a frigidis contingere solet, profluit semen; neque ipsum vel in somnis cohibere possumus. Verum si quis dormiat, seu invigilet,

gilet, continens profusio est, neque id, quod fit, semen percipitur. “

„ Ægrotant quoque ex tali morbo Mulieres, sed partibus illis prurientibus & cum voluptate Nonnullis genitura profunditur; quin etiam virilem coitum impudenter adpetunt: Viri autem nequaquam pruriunt; nam quod effluit, humidum, tenue, frigidumque est, sine colore, infœcundum. Quomodo enim genitale semen, refrigerata natura, emiserit? “

„ Quodsi Juvenes hoc vitio laborent, omnes senilem corporis habitum induant, necesse est: quippe qui segnes fiant, resoluti, exanimes, torpentes, hebetes, inbecilli, recurvi, ignavi, pallentes, albidii, effœminati, a cibis abhorrentes, frigidi, membris graves, & stupidi, cruribus impotentes, & ad omnia remissi & languidi. Multis sane id genus ægrotaſio, ad nervorum resolutionem (παράλυσιν), viam stravit. Quomodo enim nervorum facultas non adſciatur, quum natura, ad vitæ generationem faciens, refrigerata sit? Atqui & genitura, vitalitatem inpartiens, nos Viros effecit, calidos, articulatos, hirsutos, vocales, animosos, ad intelligendum operandumque volentes; id Viri testantur. Contra vero, Quibus non inest vitalis genitura, rugosi sunt, debiles, acutæ vocis, glabri, inberbes, effœminati; Eunuchi id manifestant. “

Miramini mecum magnum in dicendo ARÆTÆUM facundissimumque & adcuratissimum Scriptorem explicantem profluvium ex genitalibus, citra ullam veneream labem, plurimorum morborum, quos Textus noster recenset, fœcundum. De gonorrhœa virulenta (*) in omnibus his ne cogitatur quidem, quum is non genitilis humor sit, sed vere purulentus Humor proſtatarum, æque ac semen, dum excernitur multum, quoque debilitat, estque etiam hujus profluvii involuntarii materies. — ARÆTÆUS itaque loquitur tan-

tum de simplici gonorrhœa, ex paralyſi partium unice nata, & non de ſeminis quacunque nimia profuſione; quod adparet, ſi adtente conſideremus verba, quæ ſub initium loci adducti poſuit, (quorum repetitionem hic non requiſitam credidi). — Venus frequens duxit ſæpe homines in tale involuntarium profluvium. Fuisse, Qui Veneri & frequenti & profuſæ per annos impune litantes, calidiſſimisque ſtimulantibus, quo eſſent potentiores, naturam incitantes, tandem in hunc morbum, licet præmoniti toties, inciderunt. Leones, tauri, tygrides, feles, aliaque animalia mox a plena Venere fere immobilia hærent, vimque ſibi inferri patiuntur, quam alioqui minime paterentur. Unde, Qui & frequentiffime & fervidiſſime id exercent negotii, ſæpe hanc ſibi contrahunt debilitatem, plerumque inſanabilem fere.

(Lis nuperrime nata fuit, utrum virus, aut miasma gonorrhœicum ſit venereæ indolis, an ſit peculiare ac ſui generis, quod vulgarem luem non excitet, ſed alios morbos, mercurio non domandos.

Argumenta pro hac ſententia nuper adtulit *Cel. Andrew DUNCAN* in opere: *Medical Cases, ſelected from the Records of the public diſpenſary at Edinburgh; with remarks and obſervations; being the ſubſtance of eaſe lectures, delivered during the years 1776—1776. &c.*

Rationibus *Duncanianis* adjungendæ etiam illæ ſunt, quas propoſuit *Cel. TONE* in opusculo: *Nothige Erinnerungen für Aerzte und Kranke, die den Tripper heilen wollen, Kopenhagen 1777.* Lectores ad libellum hunc ipſum, aliunde non magni veneuntis, & germanico idiomate ſcriptum, ablegare debeo, ne hic amplior juſto fiat digreſſio.

Obpositum autem *Todianæ*, atque nunc necessaria sequela *Duncanianæ*, sententiæ tenuit *Cel. Richter*, in opere periodico: *chirurgische Bibliothek*, 3. Band, 3. St. S. 505. Maximi momenti dubia hæc, ut ea vocat *Cel. Plenck*, l. c. p. 30. pariter ex fonte haurienda suadeo. — Inferere denum, quum brevissimus sit, & huc faciat, hic non oberit locum ex *libello Plenckiano*, de *morbis venereis*, p. 30. „Quamvis me inbecillem nimis sentiam, ait, ut litem de gonorrhœæ indole venerea, tantos inter viros agitatam, etiam meam faciam; veritatis amore tamen confiteri cogor, me dubium hæere de amplectenda *Illustris Todii* sententia. Ex primariis *Cel. Todii* argumentis, cur gonorrhœa morbus venereus non sit, est observatio, quod gonorrhœa sine mercurio curetur, ac quod mercurius hunc morbum non curet. Ad primum argumentum respondeo, virus venereum ex nulla corporis parte adeo facile sine mercurio eliminari posse, quam ex urethra & vaginæ cavo; ideo sæpe gonorrhœam sine mercurio penitus curari. Quod usum mercurii in gonorrhœa adtinet, fide honesti viri adfirmare possum, me injectionibus mercurialibus multas gonorrhœas & leucorrhœas curasse. Interim alia sunt argumenta, quibus respondere nequeo; v. gr. cur gonorrhœa in Otoheita nondum observetur, licet lues venerea ibi jam Multos adficiat? v. *Tode Medicinischchirurgische Bibliothek*, 7. B. I. St. S. 31. “ Hæc *Cel. Plenck*.

Monenda hæc erant saltem, ne Tirones bellum hoc & productas ex utraque parte copias nescirent ex integro; ipsam autem Dimicantium hic sistere nequeo pugnam; sufficere ratus, indicasse Martium, in quo Luctantes spectari possent, campum:
hinc

hinc vero supersedere & potero & debebo ampliori propriæ meæ circa hæc sententiæ expositione.

Gonorrhœa vero, si vim vocis latiori sensu, uti hactenus factum fuit, extendere velimus, distinguendam censeo a) in *VENEREAM*, seu a causa venerea ortam; b) in *NON VENEREAM*; quæ denuo subdividenda est in *atonicam*, a relaxatione vasorum continentium oriundam; *polygonorrhœicam*, natam a nimia copia liquoris genitalis, concurrente maximam partem habitu corporis plethorico, polychymico, polysarco; *symptomaticam*, quæ a causa sua speciali, non venerea, adeo dependet, ut morbum principem non constituat; sic v. c. multis Epilepticis genituræ accidit profluvium, a convulsione spasmodica, vel &, finitis spasmodis, a summa atonia, vasorum spermatophororum, unice repetendum; sic & ab esu solani esculenti, tum ab apio, pro acetario adhibito, sæpius veri feminis excretionem nasci vidi: *coryzorrhœicam*, quam hac voce insignio, quum aliam aptiorem ignorem; sub hac intelligo eam speciem, quæ ex peculiari sibi viru orta, contagiosa quidem est, a venereis tamen diversos effectus excitat. Licet species hæc abs hydrargyri auxilio fors curari possit, nondum tamen hucusque vidi, hydrargyro eam reddi pejorem: nec *veneream veram ex hac vera*, quantumvis neglecta, aut producta, *metamorphosi sola* ulla propullulare unquam posse crediderim. In universum eo imprimis peccatum reor, quod *Auctores Siphyllographi*, idæis suis præoccupati, non satis distinxerint inter symptomata & effectus, gonorrhœæ varias adductas species comitantes; alias quippe discrimina, ipsi rerum naturæ inhærentia, non tamdiu prætervidissent. *Pollutiones* autem, quæ studio non procurantur nefando,

do, jam ad gonorrhœam veneream, ubi tamen verum semen non prodit, jam ad non veneream atonicam, jam ad polygonorrhœicam, aut coryzorrhœicam, tum & ad mentis, lasciva phantasmata fingentis per somnia, imperium in machinam poterunt reduci. — *Complicata* est, quæ cum alio morbo jungitur, non tamen ea ratione, ut ceu symptoma accedat: unde a *symptomata* diversa. — *Simplex* pura recensque est, *habitualis* diu durat.

Præterea tenendum erit, utut vocis vi grammatica per *gonorrhœam* designetur *effluxus*, aut *profluvium seminis*, seu *genituræ*; nam γονή *semen*, seu *genituram* denotat, ἔξω *fluo*, unde & hoc malo Detenti γονόξ ἔξωσι fuerunt dicti; multum tamen abesse, quin in omni gonorrhœa verum genitale proliferumque expellatur liquidum. *Vera* itaque gonorrhœa aderit in atonica, polygonorrhœica, & symptomatica, si cætera corpus labe venerea inquinatum non fuerit: in pollutionibus diversimode rem se habere ex illico dictis patuit; in diversis speciebus varia copia & qualitate semen admiscetur. Usu etiam, ast minus proprie, receptum est, ut gonorrhœæ vox dicetur longius producto liquidi effluxui; unde accessoriaræ illæ excretiones, aut symptomaticæ, etsi veri seminis, jacturæ, minus gonorrhœæ in censum hætenus fuerunt receptæ.

Prout materies gonorrhœica ex ipsa urethræ canali, aut ex poris excretoriis glandis provenit, *gonorrhœa urethralis*, aut *balanistica* est.

In gonorrhœa itaque venerea, stillicidium adest non seminalis puri laticis, sed muci subpurulenti ex urethra, aut balano penis: quum in gonorrhœa venerea mucus maximam partem urethræ expellatur, (utut non negarim, jam & veri seminis quid admisceri), pro improprie hucusque huic malo dicato verbo gonorrhœæ

rhœæ substitui posse novum *leucorrhœæ-virilis*, seu *fluoris albi Virorum*, bene monuit *Cel. TODE* in libello: *Vom Tripper*, in *Ansehung seiner Natur und Geschichte*.

Cel. PLENCK bene definivit humorem, qui in gonorrhœa (venerea; idem & in coryzorrhœica valet), effluit, neque *semen*, (v. tamen, quæ illico dixi), neque verum *pus* esse, sed mucum glandularum mucipararum, viru venereo in humorem acrem, flavo-viridescentem, Mulierem sanam leucorrhœa venerea sub obitu inficientem, mutatum: causam vero proximam gonorrhœæ, neque *ulcus urethræ* esse, ex eo conticitur, quod rarissime ulcus cum gonorrhœa in urethra inveniatur per extispicia.

Videantur, quæ circa hæc *PLENCKIUS* tum ex propria, tum ex nupera *Inl. Viri STOLLII* Observatione adnotavit.

Notandum hic omnino duco, juncturum me, invitum equidem, per decursum operis hujus reliquum, additamenta rariora longe, quam quidem hucusque factum fuerat. Placuit siquidem *Domino BIBLIOPOLÆ, Haenianum Codicem* paucioribus, si ulla ratione fieri queat, complecti voluminibus. Quod si vero, uti quidem olim constitueram, vel recentiora saltem data occasione inferere vellem, aut notatu omni sub sensu dignissima, observata, tentamina, longius omnino excurrerent operis termini, quam nunc, dictas ob rationes extendere eos licet, aut consultum est. — Non tamen omnes prorsum subprimam observatiunculas, brachylogas, aphoristicas, aut suas ob rationes non evitandas. Amplio.

pliores autem, quas alias adjecissem commentarios, in aliam interea reservo, qua Publico dari queant, occasionem.

Id verò spondeo, ex *Haenianis* omisurum esse ea omnia, quæ BEATUS VIR, salubri quidem consilio, passim inniscuit, Theologicam tamen magis, aut Asceticam, quam Medicam, doctrinam concernentia; quem Ejus morem fuisse norunt Omnes, qui mecum per plures annos Prælectiones tum Pathologicas, tum Practicas frequentarunt. — Inveni etiam in codice sæpius manca, truncata in *Boerhaavianum* Textum observata: ea, si fieri poterat, restitui, subplevi, emendavi; aut, conclamatis omnibus, omisi ex integro. — Repetitiones copiosas ad minorem reduxi numerum. — Asiaticum hinc inde dicendi genus, omissa, quod sub fide honesti Viri fateor, nulla re, vel minimum essentiali, laconicum nonnihil reddidi. — Suis demum quæque locis errabunda, ac palantia restitui. —

Hæc factorum rationem continent, atque pro omni reliquo operis decursu dicta sint. —

Redeamus nunc ad *textum Haenianum*.

Vidimus igitur ex dictis hucusque, cur B. di-
gat, nimiam feminis excretionem producere *lassitudi-
nem, debilitatem*.

Medicorum est ad hæc cogitare. Recens matrimonio Juncti, Juvenes pessima onania semen profundentes, incidunt in febrim hecticam & marasmoden; frustra Medicus est, & perdit hominem, nisi ad hæc adtentus sit. In praxi videbitis quandoque hoc. Viduæ 40. & ultra annorum, nubunt Juveni 20. 25. annorum. Paullo post peractum connubium Medicus vocatur ad pessimam Anginam Mariti curandam. Si venæsectione & purgantibus agis, forte necabis: causa est furibunda Uxor, quæ nullam quietem juniori Athletæ concessit, eumque emunxit totum. Abstinencia primo summa a Venere, replentibus alimentis & quiete primo refocillandus, dein ad sobrium Matrimonii usum ambo adhortandi.

Sed facit etiam *immobilitatem*, *convulsionem*, *inaciem*, *siccitatem*, ita, ut tandem penitus obrigescant. Est sane ex optimis nostris humoribus semen, bonus quoque prostaticus humor; qui liquores in valida natura, more reliquarum secretionum, eo copiosiores secernuntur, quo excernuntur profusiores. Unde tandem sanguis debet necessario fieri siccior, debilior. Tum etiam remedia, sive auxilia calidissima, quibus naturæ vim inferunt, vehementer sanguinem exsiccant. Adde vehementes illas sanguinis agitationes sine debita requie fere continuas. Hinc blanda de sanguine auferuntur, reliqua massa compingitur, & tamen assiduo incenditur: unde totum corpus necesse est siccare, & immobile fieri.

Membranarum cerebri dolores, *calores*; eadem de causa: a siccitate nempe universali angustantur & obrigescant vasa omnia nervique; quid miri igitur, quod sanguis corde pulsus in rigida vasa duræ & piæ matris dolores caloresque excitet? Maxime, si adhuc sanguis idem fiat tempore acrior, ut semper fit.

Sensuum, maxime visus hebetudinem. Sensus peraguntur nervorum aptitudine ad excipiendas adfectiones, easque per suam cum cerebro communicationem cum sensorio communi communicandas. In his vero hominibus factō tanto bonorum humorum dispendio sanguis ineptus redditus bonis spiritibus gignendis, nervi transmittendis iis inepti fiunt præ occalescentia. In omnibus sensibus id observatur, potissimum vero in visu. Præterquam enim quod nervus opticus, actertium par oculorum motorium, quartum par patheticum; parís quinti ophthalmici rami primus furculus & secundus, sextum par quod ad musculum rectum abducentem oculi pertinet; indignatoriumque vocatur; præterquam, inquam, quod omnes hi nervi oculorum cum cæteris occalescant, libidinosi oculi præ cæteris hanc meruere hebetudinem, quod ad Venerem lascivia scintillantes & excitantes, nervorum suorum jugem; mireque variantem actionem exercuerint. Itali pictores artifices summi sunt; lascivos hos oculos mira arte pingendi.

Tabem dorsalem, in qua fit, ut dorsales sive lumbales musculi non tantum cum reliquis musculis exarescant, sed plus quam reliqui, ut instar lignei asseris dorsum & lumbi fiant. Quæ hujus phænomeni causa? Responso non facilis. Latent nos quædam circa generationis officinam. VALSALVA in ea opinione fuit; quod renes succenturiati potissimum generationi interviarent. Scripta VALSALVÆ inedita adhuc latent in scriniis *clariss.* MORGAGNI: ubi illa edita erunt, forte plura circa renes succenturiatos videbimus. Agitatio musculorum dorsi in exercitanda Venere forte huc facit.

Fatuitatem, ob ineptitudinem siccatarum membrarum, & corticis cerebri, spirituumque defectum.

Varios hic adfines morbos, anchylofes, aliosque; ita ut hominēs olim pulcerrimi, vix retineant veteris formæ simulacrum.

Mirumne igitur; quod CELSUS dicat *Lib. I. cap. I.* „, Concubitus rarus corpus excitat, frequens solvit?“ Legatur SANCTORIUS in suis de Venere *Aphorismis*, ubi docet, quantopere perspiratio inminuatur, facultatesque concoctrices debilitentur a nimia cultura Veneris.

HIPPOCRATES *Epid. 3. Ægrot. 10. & 16.* memorat, binos Ægros ex Venere & potu ita laborasse, ut alter non nisi difficulter post gravissimum morbum 24ta die evaserit; alter eadem morbi die vitam cum morte conmutaverit.

Videatur *Inl. B. VAN SWIETEN in Comm. ad §. 586*, narrans quas viderit ipse calamitates in sua praxi Juvenum, qui nocturnis pollutionibus frequentioribus se totos profunderent. (Inprimis legenda *Inl. TISSOT & PÜRNER Opera de Onania* edita absolutissima.)

Quum ita Venus hominem totum fundat & perdat, rogabitis forsitan, cur non inpinguescant Eunuchi? Cur validissimi iidem non sint?

Sunt inter illos qui pinguescant, immo & membranam dartos in scroto adipe refertam habeant, id quod raro alii. Verum ponamns plurimos non esse validos & torosos; ratio esse potest: 1) mœror, quod voluptatibus his frui ipsis sit denegatum; 2) ignominiosus pudor, quod minus æstimentur a cæteris mortalibus; 3) defectus seminalis liquoris, qui, ut ex ARETÆO audivimus, homines Viros efficit calidos, articulatos, animosos. Unde sanguis ipsorum vappidus manet, non oleosus.

Sed audivistis antea ex textu *ARETÆI*, Fœminas dari, quas idem nimius ita dictus genitalis liquoris fluxus torqueat. Sunt etiam Auctores, qui fœminarum *Leucorrhœam* huc referant. *J. OOSTERDYK SCHACHT Professor Ultraj. Inst. med. Lib. 9. c. 2.* explicans eam, quam initio hujus §. tractabamus gonorrhœam simplicem, addit §. 18. „ Quum vero „ leucorrhœa, fluor albus, uteri rheumatismus, ca- „ tarrhus uterinus, in Fœminis idem sit, quod sim- „ plex gonorrhœa in Viris: mali hujus indoles & cu- „ ratio pulcre hinc intelliguntur.“

Videamus, an res sic se habeat! Novimus, uterum & vaginam scatere materia mucosa, quam innumeræ cryptulæ & folliculi partim subministrant, quam etiam partim ex ipsis arteriosis osculis uteri paullo ante, & brevi post menses suos oriri statuimus; tunc nempe, quando plethora incipit uteri vasa urgere. Etenim ros quidem perspirat in cavum uteri semper, sed menstrua accedente plethora non ille ros, sed materies paullo spissior rore, necdum tamen sanguis ruber, a sanguine in lateralia vasa secreta prodit: paullo post sanguis ruber: cessante sanguine rubro & se incipientibus vasis contrahere, iterum ille mucosior humor, dein magis adhuc contractis vasis ros ille consuetus usque ad sequentia menstrua.

Sin vero laxitas manserit in his arteriis, ita ut illa mucosior sanguinis pars pergat per roriferorum oscula penetrare; si insuper Mulier diæta molli aquosa utatur, si vitam otiosam degat, facile in talem leucorrhœam incidit; durantem Nonnullis, quoad menses fluere ætas concedit, Aliis ad senium usque perennantem.

His ita consideratis videmur ad problema respondere posse. Neque enim omnis fluor albus dicendus

simplex gonorrhœa, quum nihil commune habeat cum illa Virorum, & Vetulas quandoque occupet. Est a debilitate vasorum, a mucosiore sanguinis natura, a vita sedentaria, a diætâ mucosa, ortum malum, quod demum his Fœminis ita naturale fit, ut, si per frigus susceptum, aut sponte natura, aut suffimigiis siccantibus cessaverit, quandoque a mucositate hic deponi solito, jam impedito, collectiones pessimæ aliis in locis fiant. Unde curaturus hoc malum Medicus, sanguinem a mucositate liberare, vasa corroborare tantum intendat: his factis vel fluor albus siccatur, vel paucior saltem fit.

Fœminæ vero quæ frequentem ac profusam Venerem diu exercuerunt, seque exhausserunt, possunt per infinitas cryptas & lacunas oris uteri vaginæque laxas jam, tritasque, magnam copiam humoris mucosi dimittere, quem certos in usus naturam ibi destinasse, ex Physiologia nostis. Hinc posse etiam nimiam copiam secerni & depluere, negandum non est.

Cæterum citra Veneris tentiginem, non arbitror ex ovariis posse aliquem humorem subire fimbrias non rigentes tubarum Fallopiarum, aut flaccidas tubas, compressas, rugis valvulosis clausas.

Igitur fluor albus Fœminarum, quia non habet genitalem humorem, ad morbum hunc, qui nimio seminis profluvio, eique involuntario, debetur, referendus non est. Origo alia est, alia matres, alii denique effectus.

(Hæc HAENIUS in Commentariis ad hosce paragraphos: quum vero singularem *Tractatum de morbis veneris* conscripserit, hisce nil additamentorum junxit. —)

§. 777. *Urinæ excretio nimia facit siccitatem &c.*
Ex physiologicis nostis, renes esse illas machinas,
quæ

quæ a sanguine arterioso renali in ductus Bellinianos fecernant aquam sanguinis, & cum illa omne id, quod in sanguine mistum manens, sanguini & toti corpori noxium fuisset. Lotium ergo, sive urina, constat aqua sanguinis, sale ejus acerrimo, subtilissimo, non alcalino, sed ei proximo: deinde oleo acerrimo, tenuissimo, volatilissimo, putrefactioni proximo: terra denique maxime tenui, satis volatili, admodum adtrita.

In statu sano nunquam sanguis, nunquam nutriendus, subactumque serum, nunquam chylus, vel lac, visa in urina. Quippe & crassiora sint hæc dicta liquida, & exiliores nimiosque in gyros ductæ fistulæ uriniferæ. Porro ex varia copia diversæ aquæ, spiritus, olei, salis, ingrediente miscelam lotii, pro variato inprimis gradu adtritus diversi, varietas oritur urinarum.

Quum igitur urina maxima aquæ sanguinis copia confluet, evidenter cernitis, urina copiosiore continuo red-dita, nasci oportere *siccitatem, humorum inmeabilitatem, ardorem, sitim inexplibilem, cruditates*: nam toties Vobis explicui, hæc recensita mala oriri oportere a nimia cujuscunque liquidi evacuatione. Narrabat BOERHAAVE se cognovisse vidisseque Matronam, cui incredibilis urinæ vis, quam adfectionem solent vocare *Hydropem ad matulam*, continuo effluebat: Quæ demum exstincta esset subpuratione putrida in toto pannello adiposo per totum corpus dispersa. Ablata quippe liquidior parte sanguinis, reliquum inmeabile stagnaverat in vasis minimis, & hanc pinguedinis corruptionem produxerat.

Inferere hic lubet quæstionem practicam. Ab animi passionibus est Hypochondriacis & Hystericis admodum solemne, ut limpidæ urinæ ingens patiantur profluvium. Putant Matronæ optimæ tunc bene agi

muliere perterrita, si probe minxerit; sin minus, actutum se mox componat ad mingendum, jubent. Quo nunc majorem copiam demiserit illa, eo magis rem in vado sitam esse existimant. Sed sæpe miræ posthac exaudiuntur querelæ. Quidnam est? Motus ingens sæpe conciliatus fuit humoribus, & simul spasmus partes plures, maximeque fines arteriarum renalium, vel fistulas Bellinianas, præhendit; unde tenuis modo lymphæ impetuosius a sanguine per hanc constrictiorem viam dimittitur. Sanguis tunc crassus fit & impermeabilis: fiuntque tunc illa, quæ textus noster habet.

2. Est alia consuetudo inter homines, ut, quando magno terrore, ira, adfectus est homo, maxime Mulier, ipsi mox detur vinum meracum, vel destillatus spiritus; ut Aq. reg. hung., Sp. lavend., anis., levist. melissæ magistralis, Aq. admirabilis, Sp. cornu cervi, tinct. succini, castorei.

3. Sunt Alii, qui gelidam affatim bibendam jubent.

Quid ad hæc dicturi sumus?

Resp: Utique, si limpidissima parte orbetur sua, juvat id damni rescire.

Liquores autem spirituosii dicti crassiorem jam sanguinem nedum non diluunt, sed reddent crassiorem; ergo non conveniunt, sed nocent.

Frigida largius epota constringit corporis vasa, maxime viarum primarum. Ergo sanguis antea spissior factus, sive ab ipsa spasmodica constrictione tantum, & stagnans in vasis minimis, sive etiam ab effluvio copiosissimo lymphæ per urinæ vias; utroque enim modo: hoc est spissus & stagnat in vasis minimis: ergo, inquam, sanguis ille spissior factus & hærens jam in arteriis gutturis, oris, œsophagi, asperæ arteriæ, quæ immediate œsophago adjacet, ut & in arteriis uteri, diaphrag-

phragmatis, pessimas poterit facere obstructions & inflammationes. Quod malum in hisce, nisi adtentus sit Medicus, poterit facile negligere talem inflammationem, aut perversè tractare. *Negligere*, quia, dum est a commotione animi, modo ab ira temperes, & quietum te geras in lecto tuo, calidumque; hoc transibit cum cæteris; *perversè tractare*, quia credens Medicus dolorem adhuc spasmodicum obtinere, prohibet omnia aquosa debilitantia, & dat calida, nevrotica, carminantia, opiata. Videtisne, quomodo angina neglecta cito quandoque lethalis fieri possit? Ergo caute rem examiner Medicus. Sæpius jam dixi Vobis, enormes committi errores, dum Medici adtendunt tantum ad effectus consuetos temperamenti hominis, & non ad peculiariora symptomata. In hysterica Fœmina debilissima, quæ a debilitate tota vertiginosa est, virus variosum intra paucas horas ita humores rarefacit, inflammatur, condensatur, ut sanguis de vena educatus crustam lardaceam gerat. Ita animi motus vehementes possunt illam mutare, ut symptomata producta non tantum sint ex temperamento hysterico explicanda, sed ex nova illa mutatione, quam animi adfectus enormes quandoque producant. Si enim hominem reddere incanum possunt, si in mortem subitanam præcipitare eum possunt; quidni & inflammatorios morbos, periculosos, citoque lethales, si negligantur? Fateri cogor, initio praxeos consideratione nimia temperamenti me semel optimam Domicellam neglexisse, quæ post ingentem animi motum brevi occubuit. Pluribus vicibus auxiliatus eram illi quiete, nevroticis, & diacodio; ultima vice illa non juverunt, sed intra 12 horas moriebatur. Venæsectione forte servanda fuisset.

Quid ergo potissimum dandum tali Fœminæ, aut Viro hypochondriaco, cui tale urinæ profluvium post animi passiones obortum fuerit?

Aqua copiosa tepida calida.

Verum talis temperamenti homines ab aqua calente diluente patiuntur anxietates, debilitates; quia fibræ debiles magis adhuc laxantur; unde facile spasmī oriuntur, hic certe evitandi.

Aqua igitur calida vini modica copia, vel spirituum antea dictorum copia tantilla mista, largiter exponenda detur, ut diluat aqua, sed nervos non debilitet.

Sed si aqua, ut epota, sic iterum mox & limpida & copiosa mingitur?

Hoc magno hominis malo contingit; nam designat, adeo inspissatum esse sanguinem, ut aqua epota cum illo non misceatur, sed præterlabatur. Tunc cum aqua calida misceantur roob sambuci, mororum, ribesiorum, mel, nitrum: quæ tenacitatem nimiam dividant.

Quod si spasmī multi interim adhuc adsint, nec plane motus agitati enormē montos fileant; tantillum camphoræ & opii additum juvabit.

Tandem 4to confugitur hic, tanquam ad sacram anchoram, a pluribus tum Plebejis, tum Medicis, ad venæsectionem. Responsio jam in antedictis data est. Vidimus enim venæsectionem prodesse, quando corpus plenum sanguine; quando Fœmina est v. g. grāvīda, & copiam cruoris gerit in vasis notabilem; quando Fœmina mensibus caret intempestive, vel ipsi menses actu fluentes ab animi passionibus cito substiterint, aut saltem multum inminuti fuerint; quando ab aqua gelida copiose epota signa notabilis aut obstructionis aut inflammationis nascuntur; aut quando animi passio-

passiones ultra modum omnem agitaverunt tenellum corpus; ut sint pejora timenda a venæsectione neglecta, quam essent timenda a venæsectione instituta, ratione temperamenti.

At vero in corpore debili, hysterico, ubi augeri, quam minui præstaret sanguinis copiam; si ibidem venam inconsideranter secuimus, ita inminuimus molem liquorum, ut motum continuare liquor, qui superest, nequeat. Quo fit, ut, quæ nata obstructio incorperat, quamque motu sanguinis, jam diluti, solvere spes aderat; jam & hæreat in vasis, & augeatur: deficiente jam vi, quæ materiem pelleret per vasis angustiam. Tum etiam observatio practica est, naturam adflescere temporario illi levamini, venæsectioni; ita ut cogamur, quotiescunque vehementi animi passione illa agitata fuerit, hoc fallax auxilium repetere, sin minus, pessime habeat: interim infido hoc auxilio temperies mala indies fit pejor. Qua in re judicio opus, & secundum matura artis principia praxis dirigenda: quorum defectu quot negliguntur, pereuntque Mortales! Gravissima res, medicinam exercere!

Hac quæstione soluta pergamus ad textum. Est morbus, quem *diabeten* vocant, sed rarior; cujus materies urina misla chylo. At, quum omne nimium urinæ profluvium Auctores & Medici plures diabeten vocant, dicitur frequens morbus. Cur vero nomina confundemus? Diabetes igitur verum urinæ chylosæ profluvium est, raro observandum. GALENUS bis tantum se vidisse fatetur; BOERHAAVIUM fere septuagenarium dicentem audivi, quod in tota vita bis modo vidisset, ridentemque vidi, quod junior Auctor Anglicus de diabete, veluti de morbo indies obvio, scriboret.

De diabete egit egregius HARRIS in *Epistola ad BAGLIVUM*, contingente in Octuagenario, postquam pri-

mo ischuria laborasset. Hanc curavit HARRISIUS vino medicato, cui, præter lignum santalum album & citrinum, minusque cardamomum, ingens quantitas rhei infusa esset. In illo Sene videtur summa laxitas adfuisse, quæ & ischuriæ sæpe causa. Vis roborantium & adstringentis rhei videtur vasorum atoniam emendasse; vis rhei purgans adparet, adfluentes ad renes humores determinasse ad alvum, ita, ut eo melius sese fibræ viarum urinæ constringere potuerint. Octuagenario huic contigisse scribit HARRIS præcise id, quod textus noster dicit: *Spirituum subductionem, maciem, atrophiam, & mala his similia.*

Nimius autem sudor eadem ferme efficit. Ex *Malpighiana & Ruyschiana* doctrina novimus, sub cute, supra pinguedinem, in toto ambitu corporis glandulas esse, miliares dictas, arcte junctas, arteria, vena, nervo, instructas; vasculum emissarium dantes; illudque vasculum emissarium per foramen in corpore reticulari MALPIGHII, sive in interiori epidermidis, parte ALBINI, adsurgens, patenti orificio sudorem eructare sub epidermide; illudque etiam tegi valvula cava, elevatili, rotundula, sub cuticula posita, quæ possit vel transmittere, vel coërcere, humorem. Spissioris sudoris organon præcipuum est hoc. Accedunt præterea alia vascula, quæ RUYSCH *Adv. anat. I. p. 12.* describit, quæ sudorem fundant tenuiorem.

Sudoris materia est pars sanguinis tenuior, aquosior; sed mista secum habens salia, olea; quæ aliquando magno adritu soluta flavo colore indusia tingant, eaque, ut & lectum cubiculumque, expleant ingrato foetore. Acido in sanguine Laborantibus acidus prodit sudor.

Quum ergo sit sanguinis pars tenuior, si sceler nitor nimia, sponte videtis, omnia sequi oportere, quæ toties jam explicui, contingere debere, liquidioribus a sanguine ablatiis. — Legant hæc, Qui ab initio acutorum, vel remediis calidioribus, vel tegumentorum; aut conclavis calore, detentione in lecto toto morbi tempore, sudores excitent Ægris jam ab initio. Quam Illi coctionem, quæso, quam crisin expectant? Sed curamus Ægros, ajunt. Respondet SYDENHAMUS fateor; nam dixit jam HIPPOCRATES, esse qui non modo morbum a natura, sed & malum Medicum superent. Sed calculo subducto patebit, quam pauciores servetis, respectu eorum qui sequuntur HIPPOCRATEM.

Sed in glandulis oportet, ut aliquid sit peculiare. Sudor ex axillaribus est alius, quam inter digitos pedum. Odor hircinus intolerabilis Quorumdam sub axillis; alius odor sudoris post auriculam.

Urina autem subpressa vesicam, ureteres, pelvim &c. Hæc vera descriptio effectuum tristissimi morbi, dicti *Ischuria*; quæ vox urinandi designat impotentiam; & morbi dicti *Dysuria*, quæ est urinandi difficultas; cujus species est *Stranguria*, sive urinæ laboriosa cum ardore, ac stillatim facta, demissio. De causis horum morborum postea Pathologia aget particulari titulo.

In genere nunc dicam, urinam esse ejusmodi humorem, ut mox Vobis exposui, qui sit alkali proximus, adeoque, qui in corpore calido diu hærens, facile fiat alkalinus. Hinc colligitur, quomodo vesicam, ureteres, pelvim, renes extendat, rodat, putrefaciat? Quæ tamen res variant pro vario urinæ putrefactæ gradu. Immo & variant alia ratione,

Vidi enim Lithotomum frustra insudantem, ut calculum prehensum educeret : cathetere calculus adesse, & ab illo, & a pluribus Chirurgis, dicebatur, sed prehendi non poterat. Destitit igitur Lithotomus re infecta. Vixit Juvenis aliquot mensibus postea, ac tandem obiit. Præsens vidi in cadavere, quod calculus hæreret in fine ureteris ad ipsam vesicam. Ureter ab illa parte continuo a calculo frictus, callosus admodum & crassus erat, dilatatusque ita totus, ut pollicem caperet. Callositas tanta inpedivit forsân, ne ureter putresceret. Ut ureterem, ita & vesicam putrefacit, perrodit; ita, ut urina inveniatur effusa in cavo abdominis, & hydropem verè producat urinosum; quali mortis genere interiit, ut secto cadavere adparuit, eruditus Viris omnium nationum & religionum adeo charus *Franciscus PEIRESKIUS*, Senator Aquisextiensis, eruditissimus ipse, Mæcnasque omnium Eruditorum, artium quarumcunque Promotor instructione, adhortatione, honoribus, pecuniis; mortuus anno 1637. Videatur Vita ejus eleganti latinitate descripta a magno *Petro GASSENDI*.

Alia adhuc teterrima mala hic oriuntur. Si causa ischuriæ est inflammatio, vel spasmus, in renibus, vel ureteribus, vel in sphinctere vesicæ; secretio tandem cessat omnis urinæ a sanguine: si in rene, cessat illico, si in vesica, cessat tandem, ubi vesica & ureteres & pelvis, plena sunt.

Dicetis mihi, cur secretio subsistit & cessat, inflammato, vel constricto a spasmis, uno rene, vel uretere; quandoquidem alter ren & ureter secretioni & exceptioni urinæ apti sint. Immo, quum uno rene destructo, alter ren jam pro duobus laborare, sæpe visus sit?

Resp.

Resp: Casus aliquando tales fortunatos dari, sed simul tristi experientia constare, uno rene adfecto, brevi & alterum adfici.

Imo: Quia sanguis copiosissimus per magnam arteriam renalem advectus stans ante unum renem adfectum, jam copia dupla pulsus ad bonum renem alterum, eundem ita infarcit inpletque, ut arteriæ parvæ renales vel resistent nimio huic propulsui, vel ita dilatentur, ut factæ atonæ sanguinem per suos fines non propellant.

2do: Observamus, ratione vere inexplicabili, uno rene adfecto & adfici alterum, quemadmodum & alibi etiam fit. Raro Quis ophthalmia laborabit uno oculo, quin brevi adficiatur oculus alter. Podagra in uno pede sæviens sæpe alterum adficit pedem.

In tali ischuria catheter nullam urinam educit; secretio enim urinæ subsistit. Vidimus hoc æstate præterita, in prima Ægra, quæ hic mortua est. Ter immixtus catheter profunde in vesicam, urinam nullam produxit. Vocatur eam ob causam ab Auctoribus *ischuria spuria*; sane ob citam mortem adhuc deterior *ischuria vera*, quæ est impossibilitas mejendi a calculo obidente orificium vesicæ, aut urethram; vel a dicta sic caruncula venerea, frequentissima ischuriæ causa, in urethra prope vesicam; vel ab alia quacunque excretescentia, aut valido spasmo.

In *spuria* brevi cessat urinæ secretio, si uterque ren aut ureter, cito post alterum alter inflammantur, vel spasmo adficiantur; in *ischuria vera* tandem plena vesica ureteres evacuare se nequeunt, & simul cessat tunc secretio urinæ in renibus. Ergo manet in hoc morbo urina in sanguine.

Ergo toti lymphæ cruoris acrimoniam alcalescen-
tem conciliat; hinc cerebri tenella flamina lædendo,
anxie-

anxietates, sopores, insomnia, vertigines, apoplexiam, profert. Animadvertimus hic loci, quod *urina*, quam dixi esse universale lixivium sanguinis, eandem ab oleis rancescentibus, a salibus alkalescentibus, ab inutili inertique terra, abluens; quod, inquam, illa *urina* haudquaquam talis in renibus aut pelvi sit, qualem illam ex vesica prodeuntem deprehendimus. Et enim in renibus adhuc hærens, vix est acris, in pelvi parumper acris, in vesica paullo tantum acrior: si vix stagnans in vesica, acrimonia multa non pollet; si stagnaverit diutius, fit revera acrior, & si in matula adservetur aliquamdiu extra corpus, augetur acridine. Si enim, qualem adservatam in matula deprehendimus, talis in sanguine oberraret, Nemo viveret, præ citissima omnium destructione.

Tamen, utut parum habeat acrimoniæ, dum est recenter a sanguine in renibus secreta; si non secernitur vitio renum, quia tamen acrior pars humorum est, auget motum humorum, vasorum in eosdem renixum. Si homo eo in casu multum posset bibere, dilueret id acre: at *anxietas* magna adest illi, quia nil *urinæ* dimittit homo; unde vix potest adigi, ut bibat: & si est *ischuria vera*, non potest bibere, quia *anxietas* & *tensio vesicæ* augentur a nova secretionem.

Motus igitur in humoribus pergit, crescit; perspirando, sudando ablata liquidiora relinquunt spissiore massam: pergente motu spissior sanguis facit inflammationes in vasis tenerrimis; tandem calore trituque acrior redditus solvit tenella stamina cerebri, cerebellique, & mortem creat.

Textus omisit, ut de cæteris fecit, enarrare incommoda subpressi sudoris. Qui nimis cito subprimeret, noceret. Equitatio, salvia, cortex, Mars, solida & fluida emendando, juvant. A sudore hircino axillarum

larum Curati magnos in morbos inciderunt, glandulas tumidas, asthma &c.:juvat sacculos odoriferos aromaticos indusio adfigere eo loco, ut sudoris ille halitus corrigatur. A curatione per frigida &c. &c. semper abhorui.

(De morbis uropoëtici systematis in SYMPTOMATOLOGIA agendi recurret locus, unde & hic sola *Hæ-niana* dedi verba. —)

§. 778. *Sanctoriani perspirabilis excretio nimia facit debilitates summas.* Perspirabile illud, sive perspiratio, minus recte forsitan dicitur *Sanctoriana*: quum HIPPOCRATES jam suo tempore illam noverit, descripserit, & GALENUS, HIPPOCRATEM commentans, eandem confirmarit, explicaveritque. Unde æque Hippocratica perspiratio, quam Sanctoriana, vocanda esset, & majori forte jure. Causa videtur esse, quod sæculorum sequentium post GALENUM & HIPPOCRATEM Medici neglexerint hanc doctrinam, nec dogmata sua iisdem superstruxerint. Unde, dum SANCTORIUS SANCTORIUS Italus, Medicinæ theoreticæ olim in Gymnasio Patavino Professor, sæculo superiore, paullo ante detectum circulum Harvæanum, incœperit edere suas observationes masculas, triginta annorum usu comprobatas, lege vera Hippocratica adornatas; Sanctoriana hæc perspiratio audiit. Demonstravit SANCTORIUS, Hippocraticam doctrinam adeo certam esse, ut nulla certior; adeo cognitu necessariam, nulla ut esset Medico magis necessaria.

Dixerat HIPPOCRATES *Epid. 6. Scd. 6.* „ Vel „ ut expirans, & inspirans, est totum corpus“ GALENUS autem *de usu pulsuum Cap. 5.* „ Sicut per „ determinata in cute oscula excernunt quidem ex „ trorsum, omne, quodcunque vaporosum & fumosum

„ re-

„ redundat: accipiunt vero in eadem, ex ambiente
 „ nos aëre non modicam portionem. “

Igitur priscis Medicis exspiratio & inspiratio cutanea totius corporis, scilicet per omnia loca, quæ tegit epidermis, vel epithelion, nota fuit. Dixerat præterea HIPPOCRATES *Libr. citato*: „ Carnes adtractrices tam ex cavis, quam extrorsum. “ Et libro *de arte*: „ Manifesta perceptio est, quod exspirans & „ inspirans sit totum corpus. “ Unde videmur concludere posse, Viro magno perspirationem patuisse in cute, & in corporis cavis, & resorptionem similiter.

SANCTORIUS vero hanc ipsam perspirationem methodo vera *Hippocratica* experimentalis, examinavit, revocavitque ad stateram: ita, ut ex illis certos formaverit Aphorismos. Homines mediæ ætatis sumisit, perfecte sanos, in aëre Patavino. Dedit iis moderatum victum, ad mensuram pondusque; debitum deinde præscripsit motum. Si talis v. g. homo esset 150 libr. pondere exacto, libratus in machina peculiari ad id conflata; si modo ante dicto pransus cœnatusque esset, exacteque ponderarentur mensurarenturque, quæ sputo, muco, saliva, Fæcibus, urinis, 24 horarum spatio reddita essent, homo ille sequenti die ante prandium iterum æque gravis, æque levis ad stateram deprehensus est. Inito autem adsumtorum calculo, si v. gr. 8 libræ pependissent adsumpta, tunc, quæ sputo, muco, saliva, alvo, urina, exiissent, ponderabant libr. 3. Ergo per perspirationem transire libr. 5, i. e. $\frac{5}{8}$.

Alio porro in aere hæc utcumque mutata visa, saltem semper ingentem copiam perspirando avolasse patuit. DODARTUS in Galliis, KEILIUS in Anglia, BOERHAAVE & DE GORTER apud Belgas, omnia hæc exemplis confirmarunt.

Per

Per vasa perspirantia liquorem subtiliorem exire, quam per sudoris; aut muci, aut urinæ vias, comperitum est. Verum liquores peregrini, quos ingerimus; alimenta omnia, habent particulas inæquales, moleculas crassiores moleculis sanguinis: habent præterea adiposas & aquosas moleculas. Sanguis vero ruber, his omnibus subtilior, est omnium nostrorum humorum crassissimus. Ut ergo & sanguis, & chylus, in perspirabilem materiem vertantur, prius sunt admodum adtenuandi, a viribus vitæ integerrimis. Oportet has vires esse moderatas, quæ ita compingant humores, ut non nimis eosdem condensent. Quando nunc id subtilissimum perspirat, vapor est, vim probe passus tritus & caloris. Aqua transiens per vias sudoris & urinæ non est tot passa adtritus. Igitur, quo plus excrementorum in perspirabilem materiem abeat, eo integriores sunt vitæ vires, per quas subactæ sunt.

Excrementitiam esse materiem perspirabilem patet ex usu ejus: quum tantam copiam quotidie non perderemus, sine virium jactura; cumque eadem vel intercepta, vel justo minore existente, ægrotemus; ita quidem, ut ægritudo non solvatur, ni prius perspiratio restituatur.

Præterea, materies perspirabilis, sudor, urina, alvus, ita inter sese videntur esse connexa, ut, uno inminuto, sæpe alterum, magno cum hominis bono, alioqui fere suffocandi, in eadem ratione augeatur. Alvo fluente enormiter, cessat perspiratio; quare HIPPOCRATES sapienter monet, in alvi fluxu inmodico sæpe diaphoresin promovendam esse.

Ad superficiem papillarum cutis desinunt in intestinorum villis, arteriæ exhalantes. Videbinus hoc latius, ubi de tactus organo acturus debebo structuram cutis & epidermidis enarrare. Sunt vascula hæc

adeo numerosissima, ut credat se demonstrasse LEEUWENHOEKIUS 125000 eorum hiare in spatio vulgaris grani fabuli. Saltem sunt exilissima.

Ufus eorum, sanguinem liberare ab his, quæ, si intromanerent, noxia fierent; deinde etiam papillas nervosas tepore suo servare mollissimas.

Si porro augeatur illa excretio, facit

Imo: Omnia mala, quæ a reliquis excretionibus auctis nata observavimus in præcedentibus.

2do: Quia est omnium excretionum abundantissima, hinc illa auctior quoque perniciosissima: ita ut vires omnino hinc brevi deficient.

Animi deliquia, ut de aëre frigido sicco agens Vobis dixi fieri, si in eo homines validissime corpus moverent, maxime calepodiiis ferratis in glacie, ut apud septentrionales populos moris est. Multum quippe boni cum excrementitiis simul tunc avolat: ita, ut demum deficiat illud optimum in sanguine, quod in cerebro cerebelloque generasset liquidum, continuando cordis & vitalium viscerum motui aptum.

Hinc facit mortem inopinam. In summo gaudio, eoque inprovisto, augetur, demonstrante SANCTORIO, ita perspiratio, ut homo inde debilitetur. Nonne vidimus τὸ ἔνοημὲν se ipsum destruere in lætitia inenarrabili?

Si vero parcius, est vel sublata, facit extrema cutis vascula siccari, emori, hinc & majora excretoria (ut sudoris, ut muci in ore & faucibus, ut salivæ in ore, ut peculiaris humoris ex glandulis subaxillaribus, inguinalibus, pudendorum,) *obstrui arefacta.* rimum exhalantium vaforum usum esse, supra vidimus, cutim & papillas nerveas tepore suo humido aptas, humidisque servare. Deficiat ille humor! mox cutis ariditas, stupor papillarum. Oritur autem defectus ille

ille vel a canalium ultimorum obstructione ; ut sæpe fit a frigore corporibus calidis suscepto : vel a defectu liquidi eo non adpellentis ; ut fit in diarrhæis, in nimio urinæ profluvio, liquidis aliorum ablegatis : vel a nimia humorum undecunque nata crassitudine : vel a terrore ultima vascula spasmodice constringente.

Deficit in morbis acutis perspiratio illa sæpe a multis combinatis causis. In variolis & morbillis videntur extrema horum vasculorum desquamari. In acutis morbis ab illa retenta materia putrida solutio humorum fit, fœdaque vel pustula, vel macula sub epidermide : restituta perspiratione iterum salus.

Mutatur hinc circulatio ; monui enim jam antea, naturæ via per cutim occlusa, materiem eo abundantius derivari ad alia corporis excretoria.

Retinetur acre jam a sanguine separandum ; vidimus enim excrementitium esse.

Oritur putredo, quia est subtilissima facta materies, putredini proxima ; tunc in sanguine manens, frequentiori adritu magis adtenuata, magis exaltata, putridas generat febres.

Cruditates, quia illa materia acri intro hærente, sanguinem magis magisque comprimente, & postea dissolvente, non generatur amplius illud subtilissimum blandum, unde spiritus gignantur : ergo vitiantur coctiones ultimæ, unde demum spiritus nasci debent ; quæ cruditas certe pessima. Sed 2do ventriculus & intestina indigebant materie perspirante, qua defenderentur papillæ sive villi, quæ etiam admista crudis humoribus naturam ipsis inquilinorum humorum conciliare incipiret. Deficiente autem illa perspirabili materie, interna ventriculi & intestinorum superficies siccat, deest appetitus, coctio debita non fit, nec

bona digestio, nec bona secretio. Ergo intelligitis, cur hinc nascantur cruditates.

Febris, inflammatio, apostema, ut præcedentia docent. Ab acrimonia retentæ materiæ auctus sanguinis motus, a resistentia ad vasa capillaria interna externa, arctata area circulationis, causa proxima simul habetur febris. Quæ, si non resolvatur, in suppurationes, vel si spissus aucto motu sanguis ab acri solvitur, in gangrænas abeat, necesse est.

En vobis *tertiam classsem caussarum procatarcticarum* expositam: *Retentorum* scilicet & *Excretorum*. Pergamus ad *quartam* eamque *ultimam*; scilicet *externe adplicatorum*.

§. 779. *Adplicata externa frigida meatus &c.* Ex ultimis hisce textus verbis cernitis, Vos rem jam intelligere totam ex iis, quæ mox de inhibita perspiratione differui.

Frigida sunt Imo aër, de cujus, ut frigidi, effectu in corpus humanum, abunde egi titulo de aëre, in prima classe caussarum procatarcticarum.

Frigida 2do est aqua, infra 32 gr congelascens. Quæ aqua admistu salis ammoniaci, nitri, & maxime spiritus nitri Geoffroyani (adfusi ad nivem, aut minutam glaciem, quo tantum frigus excitatur, ut & mercurius congelascat, dum ex obposito aqua ad ebullitionem usque ab eo incalescit) tam frigidissima potest reddi, ut adplicata corpori fiat perniciosissima.

Aquæ frigus quoque, ut sæpius monui, est relative intelligendum. Qui enim corpore æstuantissimo se aëri 60 gr. exponit, tetrius adficietur, quam qui tranquille degens moderate calet: ut vidimus antea, hominem ab hypocausto ardentissimo mox gelido in platea aëri se exponentem, longe pejus se habiturum esse, quam eum, qui ex calidissimo cubiculo primo in
fri-

frigidius cubiculo aliquantum exspatiatus sit. Aqua ad grad. 60. calens in hyeme nobis videtur calida esse, dum glaciatur aqua alia: aqua ad grad. 60. calens in æstate nobis dicitur aqua frigida. Aër calidus in loco subterraneo ad 50 grad. hyeme nobis adparet admodum calidus; idem aëris in cavea per æstatem calor nobis adparet gelidus, ex aëre 70 grad. subito in illum intrantibus. Ergo definituri effectus aëris, aquæ, aliorumque externe adplicatorum corporum frigidorum in corpus humanum, semper memores sumus aëris relative sumendi.

Calida autem aperiunt, laxant, exhalant, versus cutim ducunt, sed exsiccant. Humida &c. omnia explicui, de aëre agens. Sicca contraria faciunt, ut ibidem dictum.

Ex quibus efficacia balneorum, fomentorum, epithematum intelligitur; si prius cognoscitur &c. Hic mox cernimus, quanti intersit Medicorum, ut adprime naturam cognoscant balneorum, rogati super eorum usu in morbis sententiam: si enim non bene noverint; vel fraudabunt hominem auxilio summo, vel trucidabunt, aut saltem in pejorem statum præcipitabunt.

Balneorum usus frequens in Medicina est, tum naturalium, tum artificialium. Agunt porro hæc vel laxando vasa, vel constringendo; vel refrigerando corpus, vel calefaciendo; vel diluendo aut incidendo crassiores humores, vel condensando. Hinc videtis illico, quanti intersit, bene novisse naturam cujusque, naturamque morbi, antequam suadeamus aut dehortemur eorum singulorum usum.

Primo enim probe noscenda est materies contenta balneo; an sit aqua pura, an nitrosa, an aluminosa, an vitriolica, an chalybeata, an sulphurea, an neu-

tris salibus, an alcalinis graviora, an terram calcaream habeat, an horum plurium combinatione constet? Cognita balneorum singulorum natura, constabit demum, an morbo conveniat talis vel talis balnei usus? Novit enim Medicus, an sicca sint roboranda, an rigida laxanda, an crassa diluenda, an tenuiora sint compingenda. Ergo non magis datur universale balneum, quam universale remedium.

Aqua pura, ut de aquis differentes vidimus, raro habetur; optima ea est, quæ ad puritatem accedat quam proxime. Balneum aquæ puræ ergo, nihil agens nisi ratione aquæ, si frigidum est, omnia solida constringit, ut vidimus aëra frigidum constringere eadem. Angli amant ejusmodi balnea, quamvis non semper innocue. Quid enim sit? Omnia vasa angustantur ad corporis peripheriam, retropellunturque humores. Totum ergo corpus fit minus, arctius. Interea caput solum liberum manet ab hac compressione. Nec juvaret, si sæpe caput submergerent undis, quum cranium cedere nequeat. Ergo, dum per universi corporis ambitum vasa omnia constringuntur, & retropelluntur humores, solum encephalon non constringitur. Ergo sanguis minorem circumeundi aream per totam corporis peripheriam expertus, fluit copiosior ad illa loca, quæ non comprimuntur, id est, ad cavam calvariam, onerabitque cerebrum & cerebellum.

Balneum aquæ puræ calidæ æquo, ac magis, efficit eadem, quæ dicta sunt fieri ab aëre calido humidoque. Laxat epidermidem, cutim, vasa in adiposo panniculo, musculos, tendines, nervos: ita, ut immersa pars fiat mole major, quam antea, extensior. Id capta exacta mensura ante balneum, postque idem denovo adplicata, manifesto demonstrat. Elongantur fibræ solidæ ab interpositis particulis aquosis: elongatæque

que plus locant in sese humorum. Humores quoque augeri copia videntur, ab aqua vasis inhalantibus intra corpus absorpta.

In tali balneo augetur spatium circulationis. Deinde, si ad ambitum corporis obstructions hæserint, eæ quam optime sæpe resolvuntur: vis enim cordis & arteriarum jam potest per laxatos fines obstruentem propellere materiem.

Unde morbis acutis, variolis, morbillis, Omnibusque, quibus cutis adest ariditas perniciofa, balnea talia infiniti usus.

Deinde prodesse queunt balnea partium quarumdam, ubi indicatio est, vim liquidorum ab una parte nimium adfecta avocare, & ad aliam convertere. Si in cephalalgia, ophthalmia, phrenitide, angina, a balneo calido aquoso tumeant inferiora; derivatur certe a capite humorum vis, & determinatur ad inferiora. Vidi hoc evidenter in homine vertiginoso, cui, ut specificum remedium, contra vertigines laudatum erat balneum calidum artuum inferiorum. Nostis idem nos commendasse in vertigine a plethora, sive universali, sive ad caput derivata. Sed, ut prosunt in hoc casu, nocent in vertigine a defectu spirituum, a defectu humorum. Unde & a balneo pedum Aeger vertiginosus, de quo loquor, in animi deliquium cecidit post vertigines multas, pallidus totus & frigidus; ut multum laborem inpendere oporteret, antequam ad se rediret. Sic intelligitur vocabulum artis *revulsio*.

(Omisi hic non exiguum locum circa curationem menostaseos per balnea, quum Auctor ipse in margine monuerit, hæc omnia correctiora se dedisse in scriptis *de morbis virginum*, quæ seorsim prodibunt.)

Balnea aquosa calida habent adhuc alium usum. Ut enim laxant partes, disponuntque ut augeatur vel

perspiratio, vel etiam sanguinis effluxus per laxata ora vasorum; ita etiam per vasa bibula laxiora subintrant humores nostros. An hæc una causa, cur homines in balneo pedum adeo non tantum perspirent, sed demum sudent?

Balnea vaporis aquosi vim magnam in corpora humana exercent, si valide adplicentur. Fontes artificiosos faciunt, in quibus vapor aquæ calidæ ita validus est, ut aqua ad 40 & 50 pedes in altum projiciatur. Igitur, si adeo validus est vapor aquæ calentis, poterit ille artificiose adplicatus dura, compacta, mollia reddere, intrareque. Aquisgranenses Medici hanc artem egregie callent.

Quæ quum ita se habeant, sponte videtis, quam pessime ad paralyfin curandam talia adhibeantur! Vidimus alio loco, Medicos omne impedimentum motus paralyfin vocare, pessimo cum eventu; quum rhéumatica arthritica membra plerumque nimia rigiditate peccent, adeoque plus juventur a laxantibus; e contrario paralyfis laxitatem nimiam habens, ab his laxantibus plane reddatur incurabilis: unde apud Aquisgranenses Multi redduntur pro tota vita incurabiles.

Balnea oleosa emolliunt quidem, sed simul obstant exhalantium ora. Hinc juvant, ubi Quis nimium sudat, perspiratve.

VERULAMIUS, differens super Veterum inunctionibus oleosis, balsamicisque, quales tum in sacra Scriptura, tum apud profanos Auctores sæpe describuntur, censet illas longævitati conduxisse, inhibendo nimiam perspirationem sudoremque.

Hinc in Palæstina videtur mos ille obtinuisse præcipue, ubi homines sudore & transpiratione disfluunt.

Cæterum noxia talia balnea, ubi nimii sudores haud ita observantur, & maxime, ubi potius morbi oriuntur a nimis parva perspiratione, quam a nimia.

Prodesse autem possunt oleosa balnea in nimia rigiditate. Durum & fragile corium in oleo fit molle & ductile. Carthagenenses Milites ad bellum ineptos quum rigida bruma reddidisset, novit HANNIBAL oleo inunctos bello aptissimos reddere: unde eleganter FLO-
RUS: „ Sic ille Afer nostra nos hyeme vicit. “ Nec tantum inunctione oleosa servabat flexiles Milites, sed simul magis calentes, inhibita magna perspiratione ac sudore inter labores bellicos, minusque famelicos. Nam vidimus antea, corpora hyeme gelida multum mota tantum perspirare, ut in animi deliquia caderent.

(Ad adplicata externa vis electrica etiam inprimis referenda, visque magnetica, adeo, & ad excessum ipsum, nunc celebrata.)

Balneum maris agit 1mo: motu fluctuum; 2do: ratione frigoris; 3tio: ratione salis marini & bituminosæ materiæ, a qua aquæ marinæ amaror oritur. Tali balneo uti sæpe consueverunt Batavi. Denudant se in remotiore loco littoris corpore inferiore, & dum mare non multum est agitaturn, dum venti tranquillissimi sunt, a littore eunt descendendo sic ad 10, 15 passus in mare; ambulant ibi, ita, ut aqua vel ad genua, vel femora perveniat. Vidi, Qui toto corpore nudo intrent, & manibus superiora corporis fricent & lavent.

Ergo motus fluctuum mutat solidorum situm, obstructa ergo potest depellere, movere: frigus stringit vasa, ut motam materiem propellant: motus corporis, ambulando in mare factus, efficit circuitum majorem, & simul facit, ut frigus externum aquæ non nimium comprimant vasa: motus, exercitus in lavando corpore superiore, efficit idem. Si vero intret per vasa bibula

aqua marina, sane præter dilutionem ratione aquæ simul confert ratione salis & materiæ bituminosæ: vidimus enim antea, dum de aqua agebam, aquam marinam gaudere vi fundente, dissolvente.

Balneum siccum ita dictum, sive adplicatio siccarum rerum (quo & referendi vapores thymiamatum) potest esse adiaphora; ut farinæ omnes, amydon, &c. Sed licet quoad vires proprias sint adiaphora, non erunt quoad effectus. Etenim inbibendo humiditates exhalantes, exsiccant cuticulam, & subjecta vasa.

Si misceatur hisce salinum, tunc tale siccum balneum maximam inbibit humorum copiam. Sic vidi in cruribus hydropicis sal marinum, prius supra ignem decrepitatum, cum furfuribus siccis adplicatum, tanti usus fuisse, ut exsiccaretur hydrops. Sal ammoniacum, adhuc inpatientius siccitatis, hoc plus facit. Efficiunt hæc salia id non tantum quia sicca sunt, nam siccissima arena inbibit quidem, sed non tam multum in tali crure, saltem longe minus; verum vi quasi adtrahunt salia humiditatem. Sal siccissimum alcalinum aëri expositum tantum humiditatis ex aëre adtrahit in loco subterraneo, ut fiat se ipso triplo gravius, ut ex uncia una salis habeamus uncias quatuor liq. tart. per deliquium.

Adplicata externa, emplastra, unguenta, oleosa, &c. sæpe miræ causæ morborum excitantes. Vidimus hoc in explicatione idiosyncrasie: narravi Vobis ibidem, quæ in praxi observaveram: Cutis mox ab his adplicatis inflammatur. Acria, alioqui exhalitura, nunc emplastro retenta oleosisque, stimulant, movent, inflammant vasa. Sunt Alii, qui ab adplicatis oleosis, mox erysipellate laborant, neque tantum ibi loci, ad quem facta adplicatio, sed per longe extensius spatium. Vidi in praxi Fæminam juvenulam, cui ob
debi-

debilitatem & frigus ventriculi emplastrum de Iadano & cumino adplicaveram cordis scrobiculo, intra 24 horas a capite ad pedes adeo refertam pustulis, ut variolosam fere Quis salutasset illam. Vidi, Qui suos Medicos aut Chirurgos monuissent de hac sua idiosyncrasia; tamen quum urgerentur, audirentque, emplastrum esse talis naturæ, ut etiam inflammationi obesset, adplicari denuo sibi permiserint, & in priores inciderint ærumnas.

Igitur est quid peculiare in tali idiosyncrasia; ut & Alii peculiare quid habent, comedentes fructum, cui aranea, aut eruca infederit, ut illico tumescant, ac si creparent.

Ad adplicata externa referuntur araneæ externe adplicatæ, vespæ, quæ multis mox faciunt erysipelas; (inprimis cantharides; erythema tumorque ab insidente cuti lacerta *gekko*.)

Sic absolvimus classem causarum procatarcticarum morborum, secundum Veteres dictam *sex res non naturales*, secundum *Jonstonianam* commodissimam divisionem divisas in quatuor classes.

§. 780. *Sed sunt & internæ quædam corporis diatheses &c.* Sed hæ recensitæ fuere inter causas præogumenas; & explicatæ. Ut et

§. 781. 782. 783.

§. 784. *Humorum autem nimia fluiditas &c.* Primo docet B., quid fiat a nimia fluiditate, deinde a nimia spissitudine ab eadem causa. Nam nimia fluiditas in causa est, ut qua data porta de corpore exeant omnia fere: reliqua crassiora manent, creant stagnationes, obstructions; tum & alimenta nova a debilitato, humoribusque depauperato corpore non mutantur in bonum nutritium succum, sed cruda manent crassaque: vnde tandem vasa tenuia rumpuntur aucto in illo corpore motu; vel subpurantur, si crassi humores

res illo aucto calore tenacitatem induant inflammatoriam. Eoque magis hæc noxia sunt, quo major acredo his crassis sit juncta humoribus. At vero hæc omnia exposui in *cap. de morbis humorum*.

§. 785. *Eorum vero tenacitas nimia parit obstructions &c.* estque hæc *citato cap.* exposita. Si tenax humor ad tenuissimam texturam vasorum in glandulas venit stagnatque, efficit obstructionem & scirrhus, id est, tumores duros; si simul habet adjunctam acrimoniam, vertit illos in cancros; qui, quamdiu clausus est, cancer audit; quando vero ab acrimonia eroditur, ichoremque fundit, cancer exulceratus vocatur. *Ulceræ cacoëthica*, ab eadem materia tenaci & acri, ubique hærente stagnanteque in panniculo adiposo; sæpe in cruribus; quibus curandis frustra insudat per annos Chirurgus: numquam enim obtinebit ibi bonum pus, sed ichorem acrem. Mercurius, antimonium, quandoque talia curant: *caries*, quæ idem in ossibus, quod erosio in mollibus; & *similia mala*. *Est autem quandoque acrimonia comes, aliquando pedissequa tenacitatis*. Nam, etsi principio non adfuit, stagnatione tamen nascitur.

§. 786. Ad tædium explicui in morbis humorum.

§. 787. *Pituita autem insipida, acida, salsa, vitrea, Veteribus adeo considerata, intelligitur quoad ortum & effectus ex §. 785. 786.* Quippe in prima vidistis tenacitatem humorum, in altera acrimoniam variam tenacitati junctam.

Pituita enim, sive humor tenax, potest comitem habere acrimoniam acidam, alkalinam, oleosam, &c.; prout una acrimonia præ altera in illo corpore obtineat. Verum de hac pituita aliquid ultra in usum praxeos dicendum est.

Pituita ergo est humor lentus, tenax, qui in aqua difficulter solvatur. Olim, & nunc, solam pituitam incusari audimus non tantum a Plebejis, sed quod pudeat, a multis Medicis, tanquam foecundissimam, simulque frequentissimam, morborum causam; secundo loco, bilem; tertio loco, acidum. His tribus fere absolvunt totam suam Aetiologicaliam. Oportet ergo limites nosse hujus pituitæ, ut probe sciamus, quando nam obtineat; utque refellamus Eos, qui nil unquam nisi pituitam, aut bilem, aut acidum peccantia incusent. Doctrina porro hæc ad longum data est ad §. 764. ubi alimentorum explicui tenacitatem.

Igitur intelligitis, quid sit *pituita imo insipida*: nempe si nondum sit juncta illi acrimonia prædominans; verum raro diu est, quin illa ipsi jungatur: quia vidistis cruditates mox nasci a non coctis, a non rite cum inquilino humore mixtis, a non bene subactis, alimentis; adeoque oportere pro natura assumptorum acrimoniam nasci. Quæ acrimonia si acida sit, ut propter acescentia alimenta sæpe fit, capitis, quid sibi velit hæc vox Veterum *pituita acida*, quæ est No 2. Idem de alia quacumque acrimonia dictum esto. At vero de *altera pituita* aliquid dicendum est.

Cel. BOERHAAVIUS morbum rarissimum esse testabatur, sibi que semel visum in Fœmina Leydensi, RUYSCHIIUS quoque semel in Amstæledamensi Fœmina. Aiebant BOERHAAVIUS & RUYSCHIIUS plerumque homines inde mori.

Decem anni sunt, ex quo contigerit mihi videre hunc casum, in Fœmina quadragenaria *ευσταχην*, sed hystericotata, menses habente admodum parcos, tumidum semper gerente abdomen, & multis ab annis kæphalææ obnoxia; dein per multas septimanas singulis vespertis a nulla nota causa vertigines, aphoniam,

anxietates, alternantibus frigore & calore, perpeſſa. Tandem ſpatio paucorum dierum duodecies excrevit materiem pellucidiffimam, tremulam, gravem, aliquando ſtigmata nigra habentem, aliquando ſtrias ſanguineas, aliquando nihil; non foetentem. Moles materiæ nunc major, nunc minor erat, ſemel vidi pugnum magnam.

Debilitates intenſusque dolor, qualem *GALENUS*, *BOERHAAVIUS*, *RUYSCHIVS* teſtantur aſſeſſe, non fueré adeo feroces. Dolores vagi fuerunt, ita ut externus etiam venter doleret: ſed non tam enormes, quin mox, ceſſantibus illis, poſſet exire & ambulare. Neque mors adhuc inſequuta erat, nono elapſo anno ab hac excretionem.

Variant igitur ſymptomata multum in morbo hoc in variis hominibus, prout acrimonia major minor aſeſt. Vidi in Infantibus, qui inde mortui: aliquoties hic viſa, ſed non ſemper inde mors.

Explicatur origo morbi plerumque orta a pituitofa diatheſi in inteſtinis: ita ut inteſtinorum cruſtæ gelatinofæ pars ſuperior, minus compacta, ſed pellucida abradatur & in magnis prodeat fruſtulis. Sed undenam illi dolores? Ab acrimonia junctæ illi pituitæ, qua exſtimulata inteſtina videntur vi quaſi ſe contorquere, & partem ſui depellere. Superius paſſim gerit ſanguineos radios minutiffimos, ita ut ſanguis a denu-
datis & eroſis partibus tranſſudet. Sed cur non miſtus intime? Cur tantum in ambitu materiæ gelatinofæ? Vix capio.

Interea, dum agebamus in acrimonia acida de virore excrementorum, narraui Vobis, me cum alio Medico an. 1744 aperuiſſe Infantem, qui quatruiduo ante mortem & triduo excreverat talem vitream pituitam copioſam: inteſtina interna negleximus exa-
minare

nare, sed ventriculus erat adeo omni glutine denudatus, tanquam esset à Lanione purgatus.

Est ergo pituita inter causas morborum proëgumenas & procatarcticas ponenda, prout varia corpora adficit. Est pituita minus frequens, quam multi Medici, qui eam perpetuo incusent, credant. Fui in consultationibus, ubi impossibile erat Medico persuadere, pituitam copiosam, quæ quotidie cernebatur alvo excreta, a continuis purgantibus oriri: tamen debuit credere, quum pituita non amplius poterat excerni, denudatis ita intestinis, ut dysenteria acerrima oriretur, solis oleosis & pituitosis remediis curanda.

Non dico id, quod negem sæpe obtinere, sed non tam crebro: & oportet signa hujus pituitæ prædominantis aliunde tunc observari.

Quod autem quandoque possit dari copiosissime, docet historia *Justi Lipsii*, scientiarum ornamenti suo tempore. Febriles insultus varios expertus erat, ventriculus & totum corpus flaccidum & marcidum. Egregius *Heurnius* amicus ejus, Professor Leydenfis in medicina primus a fundata Academia, (vt & *Lipsius* erat Professor Antiquitatum, vacillans adhuc in religione,) videns glutinosum pituitosum corpus, dedit ipsi remedium laxans. *Lipsius* emisit pituitam lentam continentem, figuram habentem intestinorum, vt territus vocet *Heurnium*, dicatque de sua vita actum. Detexit *Heurnius*, esse pituitam coacervatam in intestinis a vita *Lipsii* sedentaria & glutinoso temperamento, & intestinorum figuram referentem. Post quam curam *Heurnii* rediit *Lipsius* ad integram valetudinem.

§. 788. *Bilis flava, &c.*

§. 789. *Bilis autem atra &c.* (Horum paragraphorum expositionem in SYMPTOMATOLOGIA adferam.)

§. 790.

§. 790. Hæc exposita habetis in §. §. de acrimonia.

§. 791. *Serum sanguinis &c.* Horum expositio specialis reservata maneat parti *symptomatologicæ*.

§. 792. Exposui agens de *Ingestis*.

§. 793. *Vis externa aut interna* : (Hæc tum, per se manifesta , tum ex SYMPTOMATOLOGIA ac HYGIEINE patebunt.)

§. 794. *Materia morbi in parte ægra hærens, subito collecta, fluxio ; lente congesta, collectio appellatur.* Voluit Præceptor Auditoribus suis intellectum dare omnium vocum, quas alicubi Auctores adhibent, vt sciremus, quid sibi vellent. Veteres, ignari circulationis, putabant, loca esse in corpore frigidiora, quæ, quia frigidiora, humores aliqui tenues, condensarent.

Videntes jam, materiem spissam per membranam narium deponi, humorem spissum deponi ad oculum, ad uterum, ad pulmones &c. sic aiebant : humores hi prodeunt condensati, nec tamen eos ita in venis invenimus, aut arteriis. Tamen inspissatio hæc debet habere causam. Causa non potest esse, nisi vel frigus condensans fluidiora, vel calor tenuiora dissipans.

Perquirendo omnia, inveniebant locum in corpore sanguine rubro non abundare, nempe cerebrum. Videntes enim rubro sanguine omnia calere, & cerebrum vix vasa rubra habere, putabant, se invenisse quod quærebant : nempe locum, qui minus caleret, qui plus frigeret, vimque proinde haberet fluida condensandi.

Hinc putabant condensationem fieri talem, qua perennante fierent apoplexiæ, lethargi &c. idque semper fieri, dum condensatos humores non cito a suo territorio amandaret.

Aman-

Amandandi autem vias cerebrum habere plures, nempe per nares, fauces, pulmones, articulos.

At quia subito aliquando adfluxus humorum spissorum in variis corporis locis cernebant; non poterant melius hoc explicare, quam quod dicerent, condensatos a cerebro humores *καταρρεῖν*, *defluere*, subito, unde catarrhus, fluxio.

Putabant, certa rem sic exponendi habere argumenta. Ante catarrhos formatos in naribus, ante catarrhum formatum ad articulos in podagra, aut alia arthriditis specie, sæpenumero homo vertigines patiebantur, immo incipientes apoplexias: mox vero, ubi podagra formata erat, cessabant capitis morbi: ergo putabant se hisce veritatem systematis demonstrasse.

Immo, si catarrhi illi, v. g. mucosa ad uterum materies adstringentibus ultra fluere subito inpediebatur, caput laborabat; si forte revocaretur emollientibus & balneis ad uterum, caput iterum liberum erat.

Sed Ignari circulationis legum videbant illam difficultatem superesse, cur non indiscriminatim materies deflueret ad omnia loca; cur certa tantum quædam adflectaret? Hinc posuere adtractionem propriam inesse his partibus.

Videtur ex dictis, non oportere pro omnibus dictis HIPPOCRATIS arma arripere, ut defendamus. Nonnunquam 1) errare potuit; 2) errare debuit, ob ignoratas leges *Harvæanas*.

Sed ponite, Vos cum illo & Veteribus omnibus has leges ignorare; nonne egregie ratiocinabantur ex ipsis factis?

Nos secundum lumen *Harvæanum* dicimus, materiem morbosam, vel sanam sic partes obsidere. Materies morbose primo, ut sit in metastasis, ut sit v. gr. in odontalgia, quando serum, lymphæ a gingivis abit & genas inflat: est catarrhus materiæ morbosæ. In morbis acutis, ut scitis; sæpe talia observantur.

tur. Est etiam catarrhus a materia morbosa, dum herpes, achores, favi, siccantur in capite arte, vel natura, & subito ruunt ad oculos, vel pulmones, vel ad encephalon. Infantes in collo, ad parotides, submaxillares, vagasque glandulas colli, strumas sæpe plures habent, aliquando catarrhi more, subito; aliquando modo collectionis, lente, nascentes. Si mox, ubi adparent, pannis laneis fumo succini aut mastiches, inprægnatis ter quater de die fricentur, & intermedio tempore fomentis ex urina humana foveantur, brevi abeunt: si sibi crescere permittuntur, ita indurescunt, ut vel non curabiles ultra sint, vel saltem non sine magnis laboribus. Deinde materies morbosa forte dici potest perspiratio impedita; nam retenta sit acris. Sunt homines, qui hos catarrhos experiuntur sæpe, dum mox e lecto exeuntes auræ frigidaë, vel apertaë fenestræ; se exponunt, in facie præcipue, buccis, lingua, artubus inferioribus, superioribus.

Verum aliquando subiti catarrhi, vel collectiones lentæ oriuntur ex vitio partis suscipientis, non ex vitio humorum. Sunt homines qui, cætera sani, habent tunicas arteriarum membranæ adnatæ debiliores, itidem alii in aure arterias membranæ tympani. Sit aer bonus siccus. Nil vitii habent. Flante vento austrino humido habent illorum alii oculos suffusos sanguine, alii gravem auditum: mutato vento in Eurum, vel septentrionalem, sponte vasa illa constrictiora repellunt ex se alienum liquidum, & oculi auresque bene habebunt. Adtente legite *Aph. Hippocr. 3—17.* ubi, quotidianæ constitutiones &c. Legendus hic totus aphorismus. Tales porro dispositiones adsunt quandoque ad articulos, unde inflantur; ad pedes, ad manus.

Curatio prophylactica consistit in augenda virtute vasorum illorum, ne, ex humido aëre, iterum flaccescant. Collyria modice adstringentia, frictiones partium aliarum hic profunt: membrana interna aurium

aut

aut tympani minus videntur admittere adplicationem externam: remedium generale roborans potest prodesse.

Ut & §. 795. *Derivatio hæc* &c. nam si moveo partem, in qua hæret materies, disturbo illam inde. Si alia pars calet, motus major eo versus fit; si dolet, tumebit simul, quia ad locum dolentem adliciuntur humores aliunde: si foveatur pars, tumbunt vasa ita, ut plus admittant humorum. Unde Medici locum, ad quem derivari humores velint, laxant; locum, a quo, constringunt, si nihil sit, quod contraindicit.

Atque hinc oriuntur morbi, qui dicuntur cum materie. Necessaria distinctio est inter morbos cum materie, & sine materie. Hypochondriacus in mictu promovendo eosdem patitur dolores & anxietates, quas Calculosus; ultimus illas patitur a calculo præsentente in vesica; alter prior a mera spasmodica nervorum constrictione. Si in priore dolor cessat sponte, vel opio, aut oleo, manet calculus, sive materia; si in posteriore, sanato spafmo, redactis in quietem nervis, nihil superest materiale. In Hystericis nihil frequentius, v. g. clavus hyst. apud SYDENH.

§. 796. Ad tit. de ingestis exposui.

§. 797. *Sed* & sunt quædam — — 1) *Imaginatio matris*, Nostis, quod §. 771. de enormounte agens late id exposuerim; 2) *Imprudens actio obstetricis*.

(Quæ hic circa morbos infantiles monentur, nexus gratia tractatui de *morbis Infantum* reservavi.)

§. 798. Expofita suis locis. §. 707. 709.

§. 799. *Fortis pressio* &c. dicta sunt ad §. 712. in morbis organicis. Sed Auctor omnia hæc nomina repetere debuit in recensione causarum.

§. 800. *Secantia*. Hæc in *cap. de vulner. contusio-nibus*: hic tantum ut causæ recensentur.

Absolvimus cum bono Deo gravissimum caput de causis morborum proëgumenis & procatacticis.

Nescio quidquam me omi fuisse in hac gravi materie, ut in capite sequenti, quo veluti manu ad praxin ducemur, nempe in enarratione symptomatum morborum quorumcunque, ut, inquam, in illo capite non ultra hac de causis doctrina indigeremus. Tamen conabor ad symptomatum explicationem, Vobis quæ de causis dicta sint, continuo revocare in memoriam, ut sitis ad omnia firmi & parati.

Quicumque vero Vestrum consideretis dicta de causis, nonne convicti eslis, disciplinam medicam haud carere principiis posse, ut medicinæ Osiores, & semidocti Medici eam accusant? Vitium eorum, non artis est: nam præter quædam abscondita incognita, vidimus probabiles plures, plurimas certas, dari posse morborum causas; præclaram adeoque artem esse, abundantem tam bonis firmisque principiis, quam ulla alia. Siqua sint, quæ explicare huc usque nefas, neque aliæ disciplinæ hoc defectu vacant. Ipsa disciplina disciplinarum Theologia quotiesne cogitur ad incomprehensibilia arcana vela contrahere? Quotiesne adhuc in iis, quæ clara & perspecta videntur, opinionum diversitas! Jurisprudencia asyllum Obpressorum, Dei Vindicis quasi officio fungens, quam sæpe tantis laborat difficultatibus, ut, quam sententiam una Judicum cohors tulerit, altera invalidam faciat, dilaceret. Sane ars nostra, si bene colitur, videtur ex minime certis non esse.

Finis Tomi Secundi.

ANTONII DE HAEN, &c.
TRACTATUS
DE
VERMIBUS
INTESTINORUM,
ET
ICTERO;

EDIDIT

F. DE WASSERBERG.

STANLEY
1881

STANLEY
1881

1881


PRÆMONENDA.

Quæ huic Tomo præmittenda censui, unice dispositionem concernunt operis; nam ipsam ejus rationem dudum dixi. --- Quum AETIOLOGIA præcipuum Tomo secundo dicatarum filerarum expleret numerum, SYMPTOMATOLOGIÆ vero vix initium addere possem, ni voluminum abnormem nimis reddere vellem magnitudinem, aut res sibi plurimum adfines parum apte divellere; quum præterea nundinæ essent præ foribus, — AETIOLOGIAM unice Tomo huic secundo inserui. Ast, quum minor mole hac ratione prodiisset; DIATRIBEN DE VERMIBUS & ICTERÔ subjunxi, paginarum ordine sibi proprio circumscriptum, quum, speciali sub titulo, in lucem illam dare constitueram, & nunquam non succedaneorum sub idæa, ut spectetur, velim. ---

Adjeci hætenus animadversiones & frequentiores & ampliores; rariores brevioresque in sequentibus eas interferam: hoc ut facerem
ratio-

rationem continet consilium Domini EDITORIS: beati HAENII Prælectiones Pathologicas, paucis, quantum fieri queat, comprehendere voluminibus, ut eo faciliori negotio Asclepiadeæ Artis Tirones sibi illas possent procurare. Multum autem aliunde restat operis: ideo in Commentariis, quibus alias Prælectiones inlustrassem, brevior omnino esse debebo. Quum tamen non pauca sint, in quibus ab Inl. AUCTORE, ob minime otiosas rationes, dissentio; ubicunque talia occurrent, monebo. Plura huc facientia in ipso opere pag. 350. dixi; unde repetitione hic supersedendum erit.

Cæterum in opere majori COMMENTARIORUM PHYSICO-MEDICORUM, cujus ichnographian nunc delineo, infinita continebuntur, quæ inlustrando HAENIANO OPERI inservient, & quæ, quum inibi adlaturus sim, tuto hic intacta relinquere potero.



*S*eorſim excuſas hic exhibeo Celeberrimi
Antonii DE HAEN diſſertationes binas , DE
VERMIBUS , ac DE ICTERO , & ad hunc
pertinentibus adfectionibus felleis. Partem
conſtituebant majoris operis PRÆLECTIONUM
PATHOLOGICARUM in INSTITUTIONES ME-
DICAS H. BOERHAAVE. Lucratus inde fui
inprimis , ut varia adferre potuerim ſcitu uti-
lia , quæ alias reticere omnino debuiffem. ---
Fors plures hujuscemodi ſejunctas quorundam
morborum hiftorias emittam in lucem. Adtuli
in acceſſionibus meis , qualibuscunque , varia ,
quæ , a HAENIO prætermiſſa , utilia ſcitu cre-
didi.

didi. Scripsi eas, ut aliquantulum prodes-
sem TIRONIBUS; non, ut erudirem SO-
PHOS. Plurima adferri potuisse, ne obiciant
mihi ARISTARCHI, quum fatear ipse.

F. DE WASSERBERG.





DE VERMIBUS.

Ad *ingesta* quoque pertinent *ovula animalculorum* in aëre dispersa & a nobis deglutita; quæ forte causa, una cum ovulis inhærentibus fructibus horræis, (& tum ovulis, tum ipsis insectis, quæ inhærent piscibus, aquæ, cafeo &c.; nam hæc substantias vix non Omnes pro vermium generationi faventibus habent :) maxime communis est variorum in corpore humano occurrentium vermium.

Inseram ergo hic operis hujus *Boerhaaviani* §phum 792. *Ova insectorum cum aëre, potu, cibo, corpori ingesta* &c. HIPPOCRATES l. 4. *de morbis edit. Fœsian. p. 511. & 512.*, statuit, vermes in utero materno Infanti connasci, ex excrementis tamdiu ibi retentis; quum impossibile esset, ut in Infantis jam nati intestinis nascerentur, alvo quotidie exonerata, tempus enim tum non adesse. Notandum est, Veteres omnes in ea

fuisse opinione, qualis & ARISTOTELIS fuit, vermes produci a putredine; ut adeo ARISTOTELES, qui sæculo circiter post HIPPOCRATEM floruit, non Pater hujus opinionis, sed Transmissor traditionis veteris ad posteritatem censendus sit. Microscopia detecta incitaverunt Philosophos, insectorum rimari naturam, eorumque ope mirum generationis genus illorum detexere. (Circa refutationem theoriæ: animalcula ex putri nasci posse, præcipue bene meruit egregius *Franciscus REDI*; qui etiam tentamina pulcra instituit, & in opusculo descripsit nitido, *de animalculis vivis, quæ in corporibus animalium vivorum reperiuntur, observationes*, quod *Petrus COSTE* ex etrusca lingua in latinam transtulit &c.: experimenta hæc multi Medicorum ignorasse videntur, quum ne minimam quidem, de hac re agentes, eorum ciant mentionem. Multum autem abest, quin nobis totum jam generationis insectorum pateat negotium.)

Animalium exsanguium (*) aut insectorum, ab incisuris in cervice, vel pectore, (& reliquo corpore; unde & græcum nomen: *ἐντομον*,) historia jam est enucleatior quam olim; post indefessos labores hominum, quos ad id opus adaptatos ac veluti a natura fabrefactos jure merito dixeris: LEEUWENHOEKIOS ajo, SWAMMERDAMIOS, HARTSOEKEROS, BIANCHIOS, VALLISNERIOS, TREMBLEYOS, REAUMURIOS, BONNETOS. (Præter hosce plurimi adhuc, si locus excurrendi foret, jure meritissimo nominari possent & deberent; quos invitus reticeo.) Hi quippe Viri, vera
hi-

(*) Scio quidem, Batavis insecta communi termino vocari *bloedeloofse diertjens*, animalcula sanguine cassa; uti ea etiam vocavit BLANCARD in *Schouw-Bury der Rupsen, Wormen* &c. *Amst.* 1688. 8. & ALDROVANDUS in *Opere de Exsanguibus* &c. *Bonon.* 1642. hac etiam usus voce; interea tamen non adequatissima, exactissimo sensu, ea est denominatio: quin insecta dantur, vero instructa sanguine.)

historiæ naturalis oracula & ornamenta, nobis prælucebunt facem.

(In universum hic laudare debeo circa historiam vermium in corpore humano habitantium, tum & symptomatum quæ excitant, & diagnoseos & curæ, optimam *dissertationem Cl. Viri, nunc, Anatomicorum Principis magni ALBINI*, in cathedra anatomica Academiæ Lugduno - Batavæ Successoris, *Gualteri van DOEVEREN, de vermibus intestinalibus hominum Lugd. Bat. 1753. 4.*; quæ in gallicum traducta fuit sub titulo: *Observations physico-medicales sur le ver solitaire &c. Lyon 1764. 8.* anno autem 1776. in germanicum a D. *Theod. Thom. WEICHARDT* traducta, & accessionibus plurimis aucta prodiit *Lipsiæ*, sub titulo: *Walth. v. Doeveren 1c. Abhandl. von den Würmern in den Gedärmen des menschlichen Körpers 1c.* — In hac dissertatione, tum & in *Commentariis Inl. van SWIETEN ad Aphor. BOERHAAVII 1359—1374.*, ac in celeberrimi *Archiatři & Equitis Nils ROSEN von ROSENSTEIN &c.* præstantissimo opere: *Anweisung zur Kenntniß und Kur der Kinderkrankheiten, aus dem Schwedischen überf. u. m. Anmerkung. verm. v. J. U. Murray 1c. Gotha 1774.* non solum egregia circa hanc Pathologiæ partem præcepta traduntur; sed & Auctores enumerantur, qui de vermium historia naturali, pathologica & therapeutica optime fuerunt meriti: quorum itaque enumeratione tanto melius hic superfedere potero, quanto certius confido, fore, ut in cujusvis Medici supellectili litteraria, & enkephalo, Triumvirorum illorum scripta contineantur. De *ascaridum* historia optime meruit *Celeb. M. van PHELSUM* in *Historia ascaridum physiologica, Leovardiæ 1762* & in *Historia ascaridum pathologica, ibid. 1769*; quorum operum le-

tionem multum commendo. — Laudari etiam hic meretur *Cl. Dav. Cornel. RAUH. Diff. de ascaride lumbricoide LINNÆI, Gotting. 1779.* ex qua dein præcipua adferam. &c. &c.)

Igitur Virorum illorum indefatigata curatissimaque industria constitit, majora (& minora & minima) animalia omnia varii generis insectis infestari, tam in exterioribus, quam in interioribus partibus: quamlibet plantam, pusillam æque ac magnam, animalcula sibi propria alere: alia in radice, alia in ramis, alia in foliis, alia in flore, in fructu, (& nucleo) denique degere alia.

Sed, quod magis mirum, demonstratum etiam fuit, insecta hæc minima adhuc adfligi insectulis infinito exilioribus: neque adhuc finem dari; sed memoratis omnibus longe subtiliora in aëre volitare, oculis quam acutissime armatis tantum conspicienda, quæ seminia sua in aqua ponant: seminia hæc inibi excludi, adulescere (animalcula), tuncque relicta aqua ex forma pisciculorum in volitantium formam mutari; quorum foret tanta exilitas, ut multa millia ne granum quidem sabuli æquent.

Hæc tenella animalculorum ovula in aëre volitantia, in aqua ut plurimum hærentia, deglutimus, foveamus, pituita ventriculi & intestinorum includimus; excludimus, nutrimus, propagamus, (habitaculum subpeditando, fotum, & alimentum); torquemur sæpe iisdem & occidimur. Animadvertitis, quod dicam, nos cum aëre inspirare, salivæ inviscare deglutireque hæc ovula: cæterum una cum aqua bibimus, (comedimus cum caseo, fructibus horræis, carnibus ferinis aliisque; inprimis, observante *Cel. ROSEN*, cum piscibus, etsi coctis: quod notent, qui perditæ amant jura, piscium intestina, visceraque reliqua, vix, aut, in diversoriis inprimis maximam partem, prorsus non purgata,

gata, continentia: quæ jura verum decoctum sistunt excrementorum, fasciolarum, aliorumque insectorum, intestina piscium inhabitantium. Cur miramur nos, Romanorum palato adrisisse vermes illos *coffos*, farina saginatos? cur miramur, Americanos in deliciis habere frixos, aut assatos alios vermes, maximos, digitum volumine corporis æquantes; nos, inquam, qui decoctum tale optimo cum appetitu comedimus; qui, vel saltem Nonnulli nostrum, ficedularum sterces pro ambrosia mensis adponimus, ventriculosque turdorum, baccis juniperi, sed & scolopendris, aliisque copiosis insectis frequentissime turgidos, vel carnes ferinas, vermibus farctas, aut caseum totum quantum in animalcula mutatum, abs hæsitatione, avidique expetimus; absurdam illam adferentes rationem: insecta illa omnia utique ex cibis iisdem natos esse? —)

In summis turrium fastigiis semina plantarum aëre evecta de terra esse demonstrant genitæ ibidem plantæ; si hæc eo pervenire potuerunt, ergo & animalculorum ova in aëre volitare possunt, & a nobis una cum aëre in corpus duci. (v. hic potissimum LÆEWENHOEKIUM *T. I. Epist.* 71 & *T. II. Epist.* 96. ac LANCISIUM *de noxiis paludum effluviis c.* 16 &c.)

Etiam cum alimentis adsumimus hæc ovula; dum v. c. cum fructibus horræis sæpe ingentem vim seminum animalculorum in corpus ingerimus, &c. (Id jam antea dictum.)

Quamobrem multi sapientes Viri crediderunt, non nisi ab ingestis oriri vermes; ideoque Infantem, quamdiu lacte materno utitur solo, vermibus nullis obnoxium esse; tunc autem obnoxium illis fieri, quando incipit aliis uti alimentis, & maxime fragis, ribesiis, cerasis, (præcipue rubi idæi fructibus, qui frequentissime in suis cavitatibus recondunt vermiculos.)

Sed sunt exempla plura vermibus laborantium Infantum, lacte materno solo victitantium; qualia v. c. refert DOLÆUS in *Encyclopædia med.* l. 6. c. 1.; VALISNIERI in *Epistola ad LANCISIUM*; CLERICUS (*de lumbrico lato*) p. 345., ex WOLFIO; RAULIN *des maladies par les variations de l'air* 1752. (v. circa hanc sententiam c. 5. *dissert. Cl. VAN DOEVEREN.*)

Anno 1744. mense Novembri mihi contigit sequens casus: Infans vix 12 septimanarum nunquam vel minimum quid alimenti sumserat, præter lac maternum, & nonnunquam pultem ex pane albo cum aqua pluviali, quam habebant optimam, cocto; cui puli denique addebant tantillum lactis dulcis, & iterum, adfuso lacte, parumper coquebant.

Notate, omnia fuisse cocta, quæ aliquoties Infans præter lac maternum sumserat; exactissime etiam hæc omnia esse iteratis vicibus a me, a Patre, a Matre, a Domesticis examinata, ob sequentem historiam.

Infans ille incipit ejulare, calcitrare pedibus, terroribus in somno, etiam extra somnum, corripit. Suasu Muliercularum Mater dat Infanti cochleare parvum olei raparum, cui anisi semina infusa erant. Sequenti die mane inter deligandum Infantem Mater miratur fornicationem insolitam in mappis Infantis, denudatoque Infante integre, horret ac præ pavore exclamat ad conspectum innumerabilis copię ascaridum, variæ magnitudinis, $\frac{1}{4}$. $\frac{1}{3}$. $\frac{1}{2}$. pollicis geometrici; ut plurimum cum nigro punctulo in una extremitate. Olei continuabat per tres dies usum, & iterum ascarides prodierunt, sed sensim copia pauciores. Vocabar tunc Ego, quia Infans adhuc laborabat multo acido, postquam vermes prodire cessaverant. Insectorum autem ovula non deerant in illis ædibus, quum Pater, Pistor, mul-

multum frumenti & fecalis domi haberet. Videntur in hoc & aliis similibus casibus ovula insectorum una cum aëre deglutita.

(Nec hac quidem opus habemus expositione volitantium in atmosphæra ovulorum. Constat utique, Infantes sæpissime ore hiant dormire; constat, haud raro lac, pultemve largiori nimis dosi ingestum regurgitare in os, & extra labia: non minus notum est, talibus ferculis muscas vulgares, aliasve volitantium insectorum species varias adlici, simulque feminia sua vix non semper relinquere. Infans hæc facillimo sane negotio deglutire denuo poterit. — Vel & per intestinum ipsum rectum possibilis est communicatio, si adsumere nolumus, ovula puliculæ fuisse inposita, & cum illa simul ingesta. Nam, etsi & HAENIUS, & Pater, & Mater &c. puliculam examinaverint, ovula tamen nihilosecius eidem potuerunt inhærere, quum color eorum æque albus sit, & examen certe non singulis diebus aliquoties institutum fuerit. Præterea, dum in theoria inhalationis volitantium in aëre ovulorum, hæc minima & sensuum aciem effugientia adsumuntur; uti quidem revera adsumi debent; quæ fit, ut non, una cum aëre per respirationem adducta, in pulmones etiam sæpenumero deveniant, ibique excludantur; sed certissimo semper tramite in ventriculum & in intestina demum pertingant: quum enim, quædam saltem eorum, atomorum adinstar exigua sint, rationes hic nil valerent, ob quas ingesta alia impediuntur, ne trachæam ingrediantur.)

Exclusis ovis vermes varii generis obsident corpus humanum, atque communiter intestina & ventriculum. Verum Observatis constat, nullam fere corporis regionem esse, in qua non aliquando hospitentur,

I) In

1) In encephalo, in sinu longitudinali pueri vermem 4 pollicum inventum esse, refertur in *Hist. Acad. Reg. Scient. Paris*. 1700. a Cl. du VERNEY: qui vermīs corpore exentus per novem horas vixit.

(*Cel. VAN DOEVEREN*, ejusque dissertationis in germanicam linguam Traductor D. WEICHARDT plures longe, quam hic a *Cel. DE HAEN* adferuntur, instantias retulerunt ex copiosis Auctoribus, vermium in diversis corporis partibus deprehensorum: ad quem fontem, ac ad indicatos ibidem alios, sciendi Cupidos ablego.)

2) Vermes inventi in auribus. *A. N. C. Dec. 2. ann. 2. Obs. 57.*

In auribus & naribus. *A. N. C. vol. 4. p. 109. seq.*

3) In palpebris. *Ibid. Dec. I. ann. 2. Obs. 24.*

4) In sinibus frontalibus & maxillaribus. BOERHAAVE judicavit vermes causam esse dirissimæ cephalæ in Virgine Roterodamensi: 1) quod perditæ & stulte adamaret florum odores, eosque in cubiculo, mensæ, pectori perpetuo admotos haberet (*); 2) quod dormiret prope ingens horreum, in quo vis maxima frumenti sæpius, ne situm contraheret, agitabatur. Notum enim est, tunc millena animalcula in aëre volitare. Curavit Puellam hanc, expellendo vermes incensa cinnabari, ejusque in nares directo fumo, & tabaci decocto per nares adtracto.

(*) Flores non solum propter odorem gravissimum, nervos plurimum adficiētem, sed & propter magnam copiam insectorum minimorum, inter petala illorum habitantium, & quum levissima sint, in nares facillime adtrahendorum; inprimis dum valide adeo, uti Fœminæ nonnullæ facere solent, odor florum inspiratur. Sternutationis periculosæ, cum insequente hæmorrhagia enormi, quin &

& lethali, tum kephalææ sæpe incurabilis, convulsionum, lethaliūque demum aliorum symptomatum causæ esse poterunt, & fuerunt. Excutias rosam super chartæ albæ folium; miraberis, quot nonnunquam decidant vermiculi, & insectula. Suasi has ob rationes multis Domicellis, ne odorem florum adeo fortiter adtraherent; ne flores naribus nimium admoveant, aut fere intrudant; melius demum esse, si securæ esse velint ab ingressu animalculorum, ut, odoraturæ flores, hos peplo exiguo sericeo (*Seibendünntuch*, oder *Zendeltaffent*) obducant; quod, quum rarioris nonnihil texturæ sit, halitus odorati nihilofecius penetrare queunt.)

Act. Phys. med. N. C. vol. 3. n. 90. referunt historiam Fœminæ a kephalæa pertinaci mox liberatæ, excretis duobus vermibus alatis ex naribus.

De vermibus sinuum frontaliū habent exempla *Hist. acad. reg. Sc. Paris. 1708 p. 42.*, & *1733 p. 34.* Dom. MALOET ibi loci refert historiam Viri militaris, cui a triennio dolor ad radicem nasi cum dolore etiam vehementi sæpe oculi ac susurro auris. Pro remedio postremi saltem symptomatis, cubanti sibi in dextrum latus infundi curavit sinistræ auri olei amygdalini guttas aliquot. Biduo elapso adfligitur pruritunarium in sinistro latere, & sensatione molesta, ac si sternutare semper deberet; sensit simul, aliquid se interius movere, quod demum digitis extraxit. Vidit esse vermem centipedem longum 16 lin., speciem scolopendræ terrestris. Erat muco & tabaco, quo Vir ille plurimo utebatur, oblitus; tamen vegetus cucurrit, & in pulvere tabaci ad 6 dies vixit. Excreto hoc verme mox liber ab omnibus incommodis homo fuit.

In *Act. N. C. 1708* refertur instantia similis vermis, 6 poll. longi, centum duodecim pedibus instructi,

cti, ex nasi orificio dextro prodeuntis; qui tabaco expulsus credebatur.

(Homines qui in hortis, pratis, aut sylvis humi procumbentes dormire amant, qui hyemali tempore ligna, pro instruendo foco, in cubiculo collocant, aut in cellis subterraneis, ac repositoriis dormiunt; periculo ingressus vermium variorum, imprimis forficularum, in nares aut aures expositi sunt: sed & cum stramine nonnunquam plura insecta lectis inferuntur.)

5) In canibus & cervis sub lingua inventi vermes. *Hist. de l'Acad. Sc. 1743. REAUMUR Mem. pour servir à l'hist. des Insectes T. V. p. 67. Sc.*

6) In corde; *Eph. N. C. cent. 8. obs. 1. Art. Phys. med. Vol. 7. Obs. 14.*

(Retulit *Cel. DE LA PEYERONIE* Archiatro *Cel. SENAC*, sese in cavis cordis canum reperisse glomeres vermium; *SENAC, Traité de la structure du cœur, T. 2. p. 437.* Analogiam formavit inde ad corda humana. *Cl. PALLAS* autem vermes cardiacos non nisi concrectiones esse credidit polipolas, vermium figuram referentes; *Diss. de Ingestis viventibus intra viventia, in Thesouro Sandifortiano T. 1. p. 249.* Interim tamen durius videtur, si velimus admittere, *DE LA PEYERONIE* oscitanter adeo illos vermes conspexisse, ut polypos pro vermibus habuerit; vel adeo rudem in diagnosi vermium oculari fuisse, ut hos pro illis venditarit.)

7) In pericardio; *BAGLIV. in Epist. ad ANDRY, quæ habetur sub juncta operibus BAGLIVII; BIANCHI tract. 3. de vitiosa generatione; LOWER de corde.*

8) In pulmonibus; *RUYSCH, Thes. 8. n. 95. (Plurimi alii Auctores apud Cl. VAN DOEVEREN, in Edit. german. Weichardiana. Retulit Int. PERCI-*

VAL, *philosophical, medical, and experimental Essays*, London 1776 T. I. p. 272. historiam vermium ex pulmonibus excretorum; quam excretionem diu præcesserat tussis, & rejectio sanguinis coagulati, nigri.)

9) In hepate creberrime; ita, ut integram *dissertationem* BIDLOUS scripserit *de verme hepatis*. In ovibus est frequentissima observatio. (Egregium hujus rei exemplum referam in *Tomo I. Actorum meorum physico-medicorum*, quæ proxime prælo committentur, communicatum mihi a *Celeb. D. Paulo ADAMI*. De vermibus hisce v. pulcram dissertationem *Cl. SCHÆFFER*: *die Egelschnecken in den Lebern der Schaaf, und die von diesen Würmern entstehende Schaaffkrankheit*. 2. Aufl. Regensb. 1762 4. K.) Ipse extraxi vivos, adstans ovium mactationi, planos, semipollicem longos, rhomboideos.

RUYSCHIVS *Obs. anat. p. 17. & 23.* illos in bobus, vitulis, ovibus sæpe invenit, vocatque cucurbitinos. In *Nov. Act. Phys. med. tom. V. obs. 112. p. 392.* NEBELIUS narrat, se invenisse in cadavere Militis tam in ductu cystico, quam in hepatico lumbricum & copiosos simul in intestinis. Suspiciatur NEBELIUS, vermes illos ex duodeno per ductum communem in ambos illos ductus inrepisse.

10) RUYSCHIVS in *Obs. anat. 6. p. 16.* refert, se invenisse in mesenterio equino partem arteriæ mesentericæ admodum dilatatam, eaque aperta detexisse innumeros vermiculos, quæ tenuissimam aciculam magnitudine referrent. Unde *Inl. VAN SWIETEN* in *Comment. ad Aph. 916.* ait: „Non videtur absurdum, credere talia insecta, dum in prima sua origine longe adhuc minorem molem habent, posse ex arteriis mesentericis in venas & hinc in hepar venire.“ (Per venas etiam meseraicas vermium iter adsignavit SPIGE-

LIUS de lumbrico lato c. 5., in venam portæ, ubi a se inventos eos retulit. Dixit tamen denuo *Cel. MORGAGNI, Opusc. miscellan. P. I. p. 25.* sibi videri, concretiones polyposas, non vermes, adfuisse. — *Suspicitur MORGAGNI; vidit SPIGELIUS.* —)

BOERHAAVE *Inst. §. 106.* problema hoc posuit: „An non tenuis, biliosa & lymphatica magis pars illius chyli recipitur fistulis absorbentibus, hiantibus, in intestinorum crusta, & se exonerantibus in venas meseraicas; unde in vena portarum dilutio, bilique discernendæ materies?“ — An etiam hanc viam exilissima in origine animalcula non possent subire, atque ita intrare hepar? Vide *BIANCHI loc. ante cit.*

11) Ait etiam RUYSCHIUS, ter, quater vidisse se vermes complures in sacco anevrysmatico arteriæ equinæ cujusdam; figura exhibet eos *l. c. p. 61.*

In vesicula pendula ab hepate muris vermem gracilem invenit longitudine spithamæ, *l. c. obs. 9.*

(In muribus & gliribus haud adeo rarum est, invenire vermes, visceribus inhærentes; uti in glirium inprimis renibus calculos.)

12) In splene & renibus frequentissime inveniuntur, tam in hominibus, quam in canibus; ita *Cl. REDD,* ita RUYSCHIUS, ita *Ephem. N. C. Dec. 1. ann. 3. obs. 261.*

13) In vesica urinaria, *SCHENCKIUS obs. p. 559. Sc.*

14) In vesica fellea, *Ephem. N. C. Dec. 2. ann. 7. obs. 16.*

15) In utero, *BIANCHI l. c. Eph. N. C. Dec. 3. ann. 5. 6. obs. 227.*

16) (In vagina uteri; Auctores plurimi apud *VAN DOEVEREN l. c.* & ipse *HIPPOCRATES* dixit, *l. 2. Muliebrium sect. 3. p. 309. Tom. III. Princ. Art. Med., Edit. Hallerianæ:* „Si in pudendo

mu-

mulieris, aut intestino recto ascarides nascantur, viticis semen, aut folia cum fellis bubuli obolo permiscantur &c.)

17) In intima ossium medulla; RUYSCH *Advers. Dec. 3. Tab. I.* — In ipsis imis ossibus, ubi nulla poterat esse suspicio cariei, aut vermium aliunde illuc intrantium: v. *Advers. anat. Dec. 3. n. 6.* (Dixit quidem D. WEICHARDT, RUYSCHIIUM vermes hos non in vivi hominis, sed cadaveris reperiisse ossibus, ubi muscæ aut alia insecta per vasa exigua facilius intrare potuerint: attamen vix quidquid probat hæc objectio; inprimis, quum muscæ non soleant per carnes penetrare in ipsa usque ossa, ut in medullam demum ponant ovula, nec per vasorum anfractuosos arctosque labyrinthos reditum repetituræ videntur muscæ; in ossium autem cavo non muscas, sed vermes vidit RUYSCH. Plausibilior est expositio, quam Cels. DE HAEN in margine Codicis sui paucis ante obitum suum annis adscripsit. „Attamen, ait, Clariss. ALBINUS, *Acad. adnot. l. 2. c. 4.* idem detexerat in suis ossibus, & causam deduxit inde, quod muscæ in recentibus ossibus vermes deposuissent, carnibus adhuc adhærentibus; qui exiles at numerosi carnes consumerent, intrarentque per canales, per quos arteriola ossium substantiam intrat, & in diploën vel substantiam osseam fungosam (spongiosam) prope articulos pervenit: vermes hos arteriam comedendo viam fecisse, ut in cavum osseum, vel ossium substantiam prope juncturas (intimam) pervenirent. Putat ALBINUS, id eo esse verosimilius, quod nosset bene, RUYSCHIIUM quoque, ut ipsi ALBINO moris erat, ope vermium uti, ut ossa bene a carnibus emundarentur.)

18) In sanguine; *Eph. N. C. Cent. 5. obs. 72.* ETMÜLLER in *Pharmac. phytol. T. i. p. 916.*

19) In saliva; *Eph. N. C. Dec. 1. ann. 9. & 10. obs. 130.*

20) Vermes excretos cum urina habet *RUYSCH Adv. anat. Dec. 3. p. 36.; Act. phys. med. vol. 4. obs. 4.*

21) Vermes excreti cum sudore, *Eph. N. C. Dec. 1. ann. 67. obs. 1.*

22) Cum materie gonorrhææ; *BIANCHI tract. ante citato.*

23) In ulceribus; *STEENEVELD, tract. de ulcere verminoso; SCHENCKIUS l. 3. obs. med. p. 373. & seq.; Eph. N. C. Dec. 1. ann. 1. obs. 45., Dec. 2. ann. 1. obs. 104. & 191., Act. phys. med. N. C. vol. 6. obs. 93.*

In nosocomio practico (Vindobonensi, cui *Cel. DE HAEN* præerat) hominem habuimus, cum ulcere noma ad maxillam, in quo vermes plures geniti ascarides. (Vermes tales *ἐλκοφάγοι* dicti.)

24) Sub cute apud *Jamaicenses*, ut *OLDENBURGIUS* habet in *Compendio Transactionum Anglicanarum* (1668 mens. Nov.: vermes hi incolis *Chegar* dicti.) *DAMPPIER, V. itin. ann. 1676. part. 2. p. 167. &c.* in regno *Jucatan* Americæ in portu *Campeche* ipse laboravit vermibus longis, pilosis in crure; a quibus *Nigrita* ipsum curavit. (Videri poterunt de vena sic dicta *Medinensi*, seu *dracunculo*, Auctores adducti in opere *Cel. VAN DOEVEREN*; — *Cel. PLENCK, Lehre von den Hautkrankheiten* 1c. ubi p. 204—211. enumerantur huc pertinentes morbi ab insectis sequentes: helminthiasis cutanea, intestini recti, vulvæ, urethræ, narium, aurium, gingivarum (in gingivis Infantis *Cl. Vir* plurimos vidit habitantes vermiculos, quos solutione salis amari intra paucos dies necavit), ulcerum; tum malis pedicularis, a pulice americano, ab acaro sylvestri, a gordio medinensi, seu *dracunculo persico*, a siro-

a fironibus, & a lumbrico effractore. Legi etiam meretur *Lettre sur le Dragoneau &c. & sur l'usage du sublimé corrosif dans cette maladie, par M. GALLANDAT &c. Journal de Medecine T. XII. p. 24. &c. V. & Nov. Act. Acad. Nat. Cur. T. V. p. 103. &c.* ubi *Cl. GALLANDAT* dissertatiunculam inseri curavit de hocce verme, propriis experimentis innixam. Dracunculus & *Flussingæ* non raro occurrit. Bina in verme hoc *GALLANDAT* statuit capita, in utraque extremitate unum, quorum tamen alterum vitæ sit expers. Singularis sane observatio! An Alii videbunt idem, nam hætenus vidit nullus? Ingressum in corpus ex haustis cum aqua ovulis deducit — Præcipue utilem in hoc morbi genere deprehendit solutionem *Sivietenianam* mercurii corrosivi sublimati &c. — Vena *Medinensis* Europæis *Guineæ* degentibus infesta, observante *Cl. LIND* *An Essay on diseases incidental to Europeans in hot climates &c.*)

25) Sub epidermide; *BIANCHI, l. c.*

Tamen aliquando & alius speciei, præter dictas tres (latos, rotundos, ascarides) observantur in corpore humano adeiù vermes, ut videre est in *Act. Edinb. Vol. 2. Obs. 26.; Act. Soc. Reg. Scient. Paris. ann. 1740 &c.*

Immo apud fide dignos Auctores, ut *BIANCHI* in sæpius laudata dissertatione, *SCHENCKIUM l. 3. obs. med.*, Aliosque, videmus, homines, sive vomitu, sive alvo, excrevisse ranas, lacertas, bufones, anguillulas, scarabæos, araneas, muscas. (Subin tamen in talibus historiis nimium dictum fuisse videtur; præcipue dum de editis ore, alvo, vel & utero, animalibus narrant, monstrosis plane, & eorum ortum aut ab *inprecationibus*, aut *sagarum veneficio*, aut *incubo succubove dæmonio* repetunt. Fudet narratiunculas hic excitare, quorum memoriam melius est oblivioni committere.

tere. *V. Cel. BALDINGER: Neues Magazin für Aerzte*, I. B. 5. St. S. 385. 1c. ubi catalogus amplius habetur Observationum de variis animalibus, quæ ex corpore humano expulsa dicuntur.)

Veteranus Practicus narravit mihi, se coram vidisse, Domicellam vomitu ejicientem binos longos vivosque vermes, innumeris pedibus instructos, agilissimos.

Rev. LABAT in Itin. in inf. american. P. 3. c. 10. narrat, se 1698 laborasse tertiana duplici per mensem: ea cessante incidisse in diarrhæam, incipientemque hydropem: proprio consilio adsumsisse scamoneum; inde quadrihorio elapso non tantum alvo aquas copiose evacuatas, sed & binos expulsos fuisse vermes, crassitie pollicaris; longitudine unum æquasse 16 pollices, alterum paullo minorem: ambos habuisse caput planum, forma trifolii, serpentinum; corpora integra rubris pilis hirsuta; per 6 horas vivos repisse per cubiculum. (Sit fides horum penes Auctorem; quem exaggerantem nimis & credulum subin fuisse, Qui ejus Itineraria legerit, vix inficias ibit.)

Vermes generari in corpore humano per putrefactionem, explosa dudum VV. est sententia: novimus enim ex historia naturali, nil generari nisi ex femine, ac ovulo. Quæritur ergo, unde vermes in corpore humano? Dixere RR. ab ovulis, quæ adsumunt Infantes, dum incipiunt, præter vel post, lac matris, aliis vesci alimentis, & maxime fructibus horæis. Ovula hæc adsumta in ventriculi aut intestinorum muco hæreere, excludi, in vermes mutari.

Verum adsunt indubitatae historiæ Infantum verminosorum, qui præter lac, aut coctas pultes adsumere nihil. Ergo dixere Eruditi, vermes nasci in omni animali posse mox a nativitate. Compertum quippe esse, ovula animalculorum esse adeo exigua, per aërem volitantia, ut visum fugiant; omnem hominem natum

tum inspirare; ergo ab Infante recens nato resorptum aërem his refertum in ore esse, ac ubere ducentem eum simul cum aëre ovula deglutire.

(Quæ sententia, utut non plane neganda sit, in multis casibus variis difficultatibus premi videtur: nam, secundum eam theoriam, vix non *omnes* Infantes vermibus laborare deberent; quod experientiæ plane adversum. Dein, ob eandem partim rationem, *ovula* illa minima, per totam atmosphæram *volitantia*, etiam nondum demonstrata adeo sunt; quum insecta seminia sua maximam partem aut folliculis, ex filis textis, includant, eosque arboribus, parietibus &c. firmiter adfigant; aut glutinis quadam specie huic vel illi loco nectant; aut vegetabilibus substantiis, cadaveribus, animantibus, terræ, aquæ &c. indant: quum & pro evicto adsumi queat, ex *volitantibus* illis *atomisticis ovulis* alia longe insecta proditura esse, quam ingentes illas tot orgyarum tænias, vel & ascarides, aut rotundos intestinorum vermes: quum adsignandum hac ex ratione maneret *volitantium ovulorum Patronis*, qua itaque forma gaudeant ovulorum horum parentes; quodsi enim ex illis respiratione adductis prodeant vermes rotundi, lati, ascarides; manifestum utique est, exclusa ovula etiam fuisse a vermibus rotundis, latis, ascaridibus; multum autem dubito, an id probare possint, etsi adsumere velint, & parentum, & ovulorum, & sobolis perfectam *Ovidianam metamorphosin*; quæ vero vix non æque mira hic foret, ac si ex ovulo sepsimuralis crocodilus, aut ex ovulo carduelis aut acanthidis anser aut struthio prodire deberent, *micromacrometamorphotice*. Si ovula illa volitent in communi omnibus aëre; quæ excubiæ illa arcent ab ore adultorum hominum? — Jam quidem audire me credo, sed denuo hypotheti-

cam, rationem: in Adultis ovulorum evolutionem suffocari, solum fieri in Infantibus. — Quæ causæ eorum adeo regunt iter, ut præcise in os & œsophagum; non in nares & pulmones, quum vix non puncto mathematico similia concipiantur, pertingant, & in hisce locis etiam excludantur? Nam etsi, ut ante patuit, ibi visa fuerant insecta varia; quis unquam vidit tænias, aut lumbricos? — Quæ ratio, cur insecta, intestinis familiaria, metamorphosin non subeant consuetam; cur a propria sibi nunquam non indole exceptionem faciant, dum in tale habitaculum deveniunt; novam vivunt vitam, nec tamen inde adficiantur; si quidem adsumere deberemus, Matres illorum, ex invisibilibus ovulis natorum, alius fuisse profapiæ & habitus; quod adsumserunt Varii? Plura insuper adferri possent dubia; alibi melius exponenda —)

Accedit autem tertio loco HIPPOCRATIS experientia *libr. 4. de morb. c. 15.*: Infanti vermes in utero nasci a Matris humoribus, & multos Pueros, adsumto primo medicamento, quod illis datur ad meconium expellendum, seu latos, seu rotundos vermes dejicere. Videtur HIPPOCRATES frequentius nobis meconia examinasse. Verissimum etiam videtur; quod ille tam diserte id enunciet. Certe rem non video esse impossibilem. Si vermes in tot corporis partibus, ubi non nisi per sanguinem adferri possunt, reperiantur; si videamus INL. COMMENTATOREM ad §. 916. pronum esse, ut credat vermes in hepate nasci ex ovulis cum sanguine illuc delatis; cur miraremur, a sanguine materno ovula adlata excerni in liquore amnii, & deglutiri cum liquore hoc ab Infante, & excludi in hujus intestinis? Aut, si statuas, Infantem propria ubera sugere, ovula, a liquore amnii ad papillas suas adplicata, simul deglutiet. Cur etiam cum lacte Nutricis Infans

ovu-

ovula suscipere non posset? Certe eruditissimi VALISNERII hæc sententia est, a qua non multum BIANCHI differt. Advenire etiam possunt cum sanguine Matris per placentam. (Valent hæc omnia maxime ad hoc, ne muti transmittamus dictum *Hippocraticum*: interim tamen, ne obliviscamur, mera esse hypothetica.) — Fuere Philosophi, qui morbos vix non omnes a vermibus deduxerunt. Hi propemodum egerunt, ut Alii, qui copiosum acidum non tantum in primis viis, sed per omne corpus detegentes in aliquibus Ægris, omnes omnino morbos ex acido ortos adseruerunt. (Morbos multos internos, inprimis autem externos, cutaneos, *Cel. von LINNÉ, PLENCITZ, DESSAULT, LEEUWENHOECK, HARTSOEKER, KIRCHER, ANDRY, LANGE, DEIDIER, HAUPTMANN &c. &c.* a vermibus, seu *causa animata* deduxerunt; quod *Système Cl. KUNDMANN, KURELLA, AMMAN, Aliique, v. diff. meam, von dem Nutzen ic. die Luft rein zu halten ic.* refutarunt. Legendus circa causam animatam morborum cutaneorum *Cel. LORRY* in eleganti opere *de morbis cutaneis*.

Juvabit jam, *communes tres vermium species* sequentibus intueri.

I. ASCARIDES; sunt vermiculi teretes, parvi admodum, utrinque mucronati; qua forma ad lumbricum teretem, de quo mox, videntur accedere; nisi quod mole longe minores sint. Caput in plerisque non bene potest discerni. Coloris sunt albidī, nisi colore excrementorum quandoque mutantur.

(Vermes rubri, JUNCKERO monente, per suctionem sanguine repleti, febres lentas facile inducunt. Lumbricos etiam variegatos pejoris esse notæ SCHULZE adnotavit.)

Occupant ascarides colon, sed præcipue intestinum rectum; (&, uti antea monui, vulvam quoque mu-

liebrem; licet in aliis quoque locis, v. c. ulceribus, gingiva &c. fuerint observati.)

Creduntur passim iidem cum casei vermibus, & a caseo nasci: sed *Cel. LINNÆUS Amoenit. Acad. vol. 2. p. 2.* deprehendit, caseorum vermes metamorphosin subire, humanos nullam. Oriuntur ascarides etiam in hominibus, qui caseo utuntur nunquam.

(Quo tamen non obstante, cum caseo intrare corpus vermes & in hoc incommoda excitare queunt: certum etiam est, caseum corrodi a vermibus, quæ metamorphosin nullam subeunt, etsi quidem forma ab ascaridibus humanis multum differant.)

Ad ascarides etiam plures referunt *vermes* dictos *cucurbitinos*: verum videbimus mox, ex historia naturali concludendum potius esse, cucurbitinos vermes constitui abruptis teniæ articulis. (Promisit hic *HÆNIUS* denuo quid, quod in Codice nullibi inveni. Circa vermium cucurbitinorum historiam sufficiat hic citasse denuo *Diatriben van Doeverenianam*.)

2. *LUMERICUS TERES*, sive longus & rotundus, *ἑλμῖς σφόγγυλα*, Gallis *le strongle*; Infantibus longe frequentissimus. Est vermis reptilis, ab utroque extremo mucronatus, per totum corpus externum suum linearibus incisionibus per ambitum instructus; forma proxime ad lumbricos terrestres accedens; nisi, quod annulo densiori, crassiori, elevato, teres humanus desituatur; quo terrestris lumbricus, ceu ephippio, circa alterum extremum gaudet,

(Notavit hoc jam *Cel. VAN DOEVEREN*, & ex eo *DE HAEN*. *Cel. LINNÆUS* voluit, ait *VAN SWIETEN*, *Comment. T. IV. ad §. 1363. p. 622.* &c. lumbricum intestinorum esse eandem speciem cum lumbrico terrestri vulgatissimo. Idem voluit *SCOPOLI*, inquiens: „Docet hoc communis utriusque fabrica, habitatio, vita, fœcunditas & com-

munia

munia utrisque venena. “ Monet quidem *Inl. Commentator*, fœcunditatem satis convenire, differre tamen & habitationem, & vitæ genus. — Vidi vero Ipse in multiplicibus, quæ cum magno insectorum numero institui, tentaminibus, insecta adsuescere posse diverso plane vitæ generi & pabulo, quam quo, sibi relicta, uti alias solent: plura etiam aliunde panphaga sunt, nec certo ciborum genere constanti lege victitantia. — Subdit VAN SWIETEN: „Non tamen impossibile est, insecta in ipsis animalium intestinis metamorphosin subire posse. Musca (*hippobosca*) per anum equi ingreditur, ova ponit, quæ vermem excludunt, suo tempore in chrysalidem mutandum, ex qua musca prodit postea. “ — Metamorphosi illa admissa, facilius sane foret præsentia vermium in corpore, tum hominum, tum brutorum, expositio: interim tamen, quæcunque instituerim tentamina, eo nunquam pervenire potui, ut vermem, ex quo determinata chrysalidis & ex hac determinata muscæ species prodire semper solet; ut, inquam, vermem hunc, ope mutati pabuli, & habitaculi eo adigerem, ne vel illæ prodirent; vel vermis formam corporis retineret, magnitudine solum *multum* augendam; aut mutaret in aliam, sibi alias insolitam; ubique aut fieri demum vidi chrysalides, aut vermes mori. *Swieteniana* autem observatio hic parum probat: quum a musca *hippobosca* edito ex ovulo nunquam non idem prodeat insectum; a *matrice*, ut sic dicam, in quam illud deponitur, nunquam in aliud insectum mutandum. Hinc metamorphosin ovula experiuntur naturalem solitam, vermis in muscam; nullatenus autem adsumtam illam, unius animalis in longe aliud, forma, magnitudine, habitu. — Quum autem vermes rotundi humani iidem Pluribus visi sint, ut paullo ante di-

xi, cum lumbricis terrestribus; Visurus, an metamorphosis quædam ex mutato habitaculo in utrisque foret possibilis, sumat teretes humanos, teretesque animales, in canibus, felibus, tum & in gallinis pane diu nutritis, magna sæpe copia inveniundos; committat eos fineto, quod antea inhabitarent lumbrici terrestres. Tum sumat lumbricos terrestres, eosque vivos canibus, felibus, gallinis in œsophagum intrudat: quæ animantia caveæ, unde nullus detur exitus, includi debent, elapso circiter octiduo cultro anatomico subjicienda; docebit sic eventus, an reciproca insectorum possibilis metamorphosis. — Institui Ipse tentamina cum teretibus gallinaceis, eos autem mox ubi corpore exempti fuerant, perire vidi. Nec congruo, uti credebam, alimento teretes, ascaridesque canini poterant in vivis servari; & fotui, & humoribus inquilinis corporis, quod antea inhabitarent, adeo, ut videbatur, adfueti, ut neutro, quin plurimum læderetur sanitas & vita, carere possent. — Vero autem maxime consentaneum videtur, quin potius, ex nuperrime captis Observatis, jam *certum* habeo, lumbricos terrestres a teretibus humanis & animalibus esse diversos: quod quidem Anatomicæ eorum, a *Cl. TYSON* & *VALISNERIO* instituta, jam confirmatum fuit; quorum Virorum posterior addidit: „teretes vitulinos ab humanis ea ratione distingui, uti vulpem a cane: “ quod quidem nec concinne, nec rei congrue, dictum fuit. — Ortum itaque vermium rotundorum, quin & reliquorum, in corpore humano & animali, nondum satis dilucidatum esse patet; quum hætenus adlata multis adhuc præmi videantur difficultatibus, & precaria sæpenumero potius esse, quam vere demonstrata.)

Lumbricus teres plerumque cubitalis magnitudinis est, vel paullo minoris; licet *Daniel Ludovici* testetur, quinque ulnarum communium, alium $1\frac{1}{4}$ ulnam longum se vidisse. In *Commerc. Litter. Norimb.* a. 1734. p. 66. describitur 3 pedes longus. *BAGLIVIVS* ad *ANDRY* scribit, talem a Juvene excretum, qui 30 pedes longus esset.

(Dixit tamen *Inl. VAN SWIETEN*, de his vermibus agens, longitudo eorum varia est; rarius pedis mensuram superant. Memini, me vidisse, qui sesquipedem æquabat. — Crassitiem calami scriptorii solent habere plerumque, raro illam excedunt; quandoque & tenuiores inveniuntur.)

Observationes docent, aliquoties hominem unum alterumve talem vermem excernere, immunesque deinceps tota vita manere; sed etiam sæpius homines per intervalla plures excernunt per multos annos. Vidi Judæam in mea praxi, quæ simul excerneret ultra duodecim, pedis circiter longitudinem habentes: libera tamen postea vixisse ab illis visa est. *CLERICUS* testatur, se ultra 100 longiores invenisse in Puero, tum & in Puella, quos arsenicum e vivis sustulerat. *MOUFETUS* in *Theatro insectorum* p. 297. exemplum habet Puellæ, quæ una vice excrevit teretes lumbricos 177.

(*MOUFETUM* quidem, qui *GABUCINUM* testem adducit, nunc ad manum non habeo; in mea tamen editione differt. *Cel. VAN DOEVEREN*, unde *HAENIVS* hæc omnia excerpfit, non 177, sed 117 excretos vermes lego. — *Magnus ROSENSTEIN* ex Puella, quæ per horas subin sibi non conscia jacuit, intra novem dies ultra 90 vermes tales fugavit.)

3tia species *TÆNIA* est. (*HAENIVS* *Tenia* scripsit; Auctores reliqui *Tænia*; Græcis etiam *Taiwa* scribitur.)

tur.) Hæc, saltem ubi jam in intestinis deguit, est vermis simplex, reptilis, albus, sive ex albo flavus, membranaceus, latus, planus, articulatus, in inmensam sæpe longitudinem excrescens. Tænia plerumque ludit artis opem, adeo difficilis exstirpatu est. Vidi sæpius, utriusque sexus homines, hac tænia misere adfectos. Plures sublevantur ad tempus, quam vere curantur. Aliquoties præsens vidi vivos cucurbitinos, qui erant tæniæ articuli abrupti, invitis (inisciis) Ægris elapsos in caligas, vel pavementum. Ex fœmina quadam macilenta, quæ allio & asa fœtida, & vitriolo martis copiose utebatur, partitim collegi vermem, longitudine ultra 50 ulnas excurrentem. Contingebat illi sæpius, ut, summo adjuncto tenesmo, ex ano prodiret vermis portio, quam illa prudenter trahens, ad ulnas 5. 6. circa manum suam volvebat, donec demum abrumperetur.

(Vidi ipse tæniam una cum capite suo expulsam, 25 circiter pedes æquantem. In dissertatione *Cel. van DœVEREN edit. german. auct.*, exempla referuntur tæniarum 80. 165 pedum, quin ulnarum 100. 300. 800. &c.; notatur ibi simul, rationem, cur tænia osculis lateralibus geminis, seu vulgaris, LINN. *Amæn. acad. vol. II. p. 7. &c.*, citius crescat quam tænia osculis marginalibus solitariis, seu cucurbitina, LINN. *Amæn. acad. vol. II. p. 74. &c.*; *Syst. Nat. X. 311. 1.*, quærendam esse in ejus fabrica interna, fortiorique aut debiliori nexu articulorum.)

Novi hominem 70 annorum, robustum, a quo, ut & ab uxore, ac tota familia sequentem historiam sæpius narrari audiui. Plures per annos languens ille ad 40. ætatis annum usque, Medico utebatur *Cl. REVENHORST*, Professore Anatomies Hagano, inter Anatomicos noto, qui illum quidem vermibus laborare dicebat,

bat, sed eo usque in cura infelix fuerat. Agyrta demum, hominem videns, spem fecit curationis, si velit quotidie jejunos fuliginis e camino portionem quamdam sumere. Sumsit ille; tandem vero anxietate correptus fuit, ut ferendo non esset; titillationem dein percepit in gutture; digitis, quid titillaret, exploravit,prehendit vermem, eumque prudenter extrahit ad longitudinem 20 ulnarum: ex quo tempore jam per 30 annos sanus, incolumis, torosus vixit.

HALLERO referente narravit BOERHAAVIUS, se expulisse vermem 300 ulnarum ex homine Russo per vitriolum martis: ego vero nunquam audiui BOERHAAVIUM desinientem longitudinem vermis.

In *Actis Holmieniſibus* 1746. T. 9. Medicus SPÖRING narrat, fuisse in pago Kätanas Fœminam 60 annorum, nunc majori, nunc minori ventriculi dolore a teneris laborantem; quæ Junio 1744., postquam dolor vehementius inferbuerat, diuque ac noctu perennaverat, abscessum animadvertit in dextro hypogastrio; qui apertus quidem fuit, sed nulla neque ventriculi, neque hypogastrii doloris remissione inſequentem. Auxilium pro malo petitura i'er quinque milliarium confecit, eoque itinere absoluto bibit cerevisiam frigidam. Quum in loco, quem petierat, per aliquot dies maneret, tænia in abscessu viſa eſt, akephala; extraxerunt eam ad longitudinem trium ulnarum ope bacilli, sed abrumpebatur tum vermis. Humor flavo-niger exſtillavit ad mediam hyemem usque ex abscessu, qui tandem claudebatur.

Fuere homines, qui huic Mulieri dabant id consilii, ut lagenam spiritu frumenti plenam, eamque apertam, poneret supra nidum formicarum, dein autem, dum ingens numerus formicarum lagenam intrasset, quod brevi fiebat, sequenti die liquorem per colum trajiceret, eumque biberet. Dictum factum. Alvus

mediocriter soluta dedit glomerem integrum hujus tæniæ, quæ se explicabat, sed a sole exsiccabatur; de-
nuo akephala. Sequenti vere iterum bis reddidit fru-
stulum ulnæ longitudinis: loco tamen abscessus, quo
olim laboraverat, observavit motum quemdam, & pun-
cturas, perpetuo simul ventriculi ardore adfecta. —
Anno sequenti pejus habuit; ita, ut brachium motura
sentiret veluti dilacerari eum, ubi abscessus fuerat, lo-
cum. Hinc pallida debilisque Fœmina prima vice ac-
cessit D. SPÖRING.

Omnibus bene pensitatis conclusit ille, vermem hunc
ab ipsa infantia in ventriculo fuisse, atque una cum
aqua epota corpus intrasse; sive ovi, sive animalculi
specie. Confirmare hanc sententiam conatur exemplis
multorum piscium, his tæniis abundantium; multorum
etiam hominum, tæniis laborantium; qui inhabitarent
loca piscibus talibus tæniosis fertilissima. Susplicatur,
tæniam in hac Fœmina ventriculum aut duodenum pe-
netrasse, inde in cavum ventris venisse, ac erosisse pe-
ritonæum, musculos, integumenta in dextro hypo-
gastrio. Censet quoque, tæniam vivere instar bom-
bycum vel polyporum, (quæ tamen inter animalia
multum obtinet discrimen) divisam in varia animalcu-
la; quod tamen ita esse non videtur.

Voluit remedio illo ex formicis parato plura ex-
perimenta facere; sed incassum. Meliorem effectum
vidit ab *elixire* DE BIELKE, sive a remedio, quod
vocat *testamentum* HIAERNE. Non explicat, quibus
rebus hæc composita sint.

D. ROSEN in iisdem *Actis Holmiensibus* miratur
Medicos in tæniæ, HIPPOCRATI jam notæ, historia
tam parum profecisse. Confirmat sententiam SPÖRINGII
de origine horum vermium in corpore humano ex
tæniarum seminio una cum aqua in corpus delato. Ver-
satos Piscatores noscere tales pisces (tænias continen-
tes),

tes), hinc eos etiam occidere, ac projicere. *Braassen*, quos nonnulli cyprinum vocant, (cyprinus latus) aliosque planos pisces (inprimis tincas, cyprinos vulgares, salmones, gobios, truttas, caraces, & erythrophthalmos, & anguillas &c.; unde *Cel. VAN DOEVEREN* dixit, fore ut canis, ubera matris adhuc ducens, certo certius tæniis laboraret, si aqua non nisi ea illi ad potandum exhiberetur, in qua aut tincæ aut anguillæ deguerint), laborare sæpe his tæniis. Nosci id ex piscis colore obscuriori, latitudine minori, ac tenuiori dorso: tandem deplorat sortem humanam, quod sæpe tæniæ præsentia minus in hominibus, quam in piscibus cognoscatur. (Addendum his, quod & homines multi ipsi sibi animalia hæc in corpus adducant, ope viscerum ac intestinorum talium piscium; quæ non purgata abs hæsitazione in jure &c. leviter decocta comedunt. Quin notavit *ANDRY*, a Multis, in historia naturali sane non versatis, ipsam tæniam pro lactibus piscium haberi & comedi.)

Felix PLATERUS videtur primus *tænias* in duas distinxisse *species*; unde adhucdum illud nomen in scholis *tæniæ primæ*, vel *secundæ PLATERI*.

Nic. ANDRY distinguit in binas species, quarum prima careat, altera gaudeat, spina.

(Tertiam his binis adjecit, quam *tæniam cum involucre* dixit (*tænia à enveloppe*), *DIONIS, Dissertation sur le tænia* &c. p. 5. 6. — *Cel. HERRENSCHWAND* distinxit vermes hos in eos, quorum articuli, dum animal corpori adhuc inhæret, ab invicem secedunt, ac in eos, qui nunquam dividuntur, continuo crescentes. — *Cel. PALLAS* vermes, quibus homines infestantur, omnes divisit 1) in furias; 2) gordios, seu dracunculos, aut venas *Medinenses*; 3) ascarides; 4) teretes; 5) tænias; 6) fasciolas. — *Cl. MURRAY* distinxit I. in asca.

ascarides; 2. *teretes*; 3. *tænias*; 4. *ascarides lumbricoides*; 5. *fasciolas intestinales*; 6. *gordios aquaticos*; 7. *trichurides* RÖDERERI. — *Tæniæ* binas ipse observavi species, *articulis nitidis & punctatis*. *Articulos præterea longiores aut breviores* notam characteristicam essentialem binarum *tæniæ* specierum constituere, hætenus observavi.)

Cl. BONNETUS distinguit in *species binas: articulis brevioribus, & longioribus*.

Cl. LINNÆUS in *diff. de tænia* recenset

1. *tæniam* *osculis marginalibus solitariis*;
2. — — — *lateralibus geminis*;
3. — — — — — *solitariis*;
4. — — — *marginalibus obpositis*.

Dici solet, *tæniam* esse in homine vel animali quocunque semper solitariam, eamque vel cum homine commori, vel nunquam expulsam bene comitem habere, aut ab alia excipi. Verum observata contrarium docent. SCHULZIUS & HOFFMANNUS, MORGAGNI, LINNÆUS, WERLHOFFIUS, DIONIS, BONNET tum in hominibus, tum in brutis plures simul invenerunt. (Plures Auctores citatos v. in *diff. van Doevereniana*.)

Lis coorta inter historię animalis Examinatores, sintne vermes humani speciei homini vel animali proprię; an iidem cum vermibus, quos in terra, aqua, caseo, fructibus, varios quotidie contemplantur? Multa sane possunt argumenta utramque in partem proferri. (Latius disquisitam hanc quæstionem v. in *cit. sæpe dissert.*, quam & *Cel. de HÆN* ubique sequutus est, & in compendium solum hinc inde redegit.)

Id saltem constitit, vermes humanos, & maxime *tæniam*, de cujus extra humanum corpus existentia olim lis fuit præcipua; constitit, inquam, *tæniam* constanter observari in canibus, felibus, & etiam avibus (pisci-

scibus potissimum plurimis; & extra omne corpus animale in aqua liberam.) *Acta Berolinensia (Miscel. Berol. 1727 p. 42.)* habent, tæniam in anseribus inventam. *Exp.* ONYMUS jussu serenissimi Principis Auriaci avem maximam struthio-camelum dissecuit, ejusque tum in cæco, tum in colo tantam copiam latorum lumbricorum in se convolutam invenit, ut libr. $1\frac{1}{2}$ pondere superaret. (*Editor germanicus dissertationis van Doeverenianæ nomen animalis, in quo hæc vermium reperta copia, non addidit; quod hic notandum dixi.*) In columbis tænia inventa fuit.

Est quoque magna deprehensa similitudo inter vermes animalium, & vermes alios.

Cel. LINNÆUS testatur in *Syst. Nat. p. 213.*, (*Diff. de tænia p. 93.*) se, cum septem Sociis, in Sueciæ quodam loco, tæniam invenisse. (Manca hæc relatio! Invenit LINNÆUS tæniam liberam in palude, aliam vero sub ochra flavente acidulari Jaernensi.)

Commentarius Lipsiensis (de rebus in Medicina &c. gestis) 1752 Vol. 2. part. 1. p. 66. sic habet: „Fœmina, aliis pluribus symptomatibus vexata, latos etiam vermes per anum excrevit; quorum etiam numerus nunquam minuebatur, verum potius semper nova eorundam rejiciebatur copia. *Cl. UNZERUS*, conjectura quadam conmotus, existimavit, aquam forte, quotidie ex puteo quodam hausitam atque ab Ægra deglutitam, proximam hujus verminosi morbi esse causam. Neque opinio eum fefellit: hujus enim usu intermisso, vermes reliquaque symptomata disparuere. Aquam ipsam postea disquisivit Auctor (*Cl. UNZERUS*); atque singularem vermium catenam, longitudine duas spithamas æquantem, in ea deprehendit. Cur vero rarissime extra corpus, in aqua, detecti fuerint vermes, diversum eorum habitum forte causam esse adfirmat.

In puteali enim aqua obscuriorem gryseum, parum modo in rubicundum vergentem, colorem ostendunt: ex corpore vero animali eliminati vermes albidiores sunt: uti omnes vermes a chylo hausto eundem colorem adsumunt. (Tæniæ, quas Ego vidi, lacte dilutiori repletæ videbantur; ex disruptis etiam liquor sublacteus, nonnihil viscidior; prodire solet.) Præterea multo minores erant cucurbitini in aqua puteali habitantes; quod etiam a deficiente nutritio chyloso succo deducit *Cl. Auctor.*

LINNÆUS citat etiam MENANDRUM, qui tænias detexit in palude.

(TISSOTUS in palude Helvetiæ tænias vidit.) Quoad *lumbricos teretes* est sane maxima eorum similitudo cum terrestribus, licet ephippio careant humani; modo in terrestribus ephippium illud constanter observetur. Piscatores, qui lumbricos servare volunt pro piscatura, solent eos arena (humo pinguiori) involvere, & lac adfundere, quo nutriantur. Rufus illorum color tum a lacte sensim in albidum mutatur. Hac ratione moti plures Auctores dicunt, lumbricos terrestres cum teretibus eosdem esse.

Differt quidem longitudo teretium & latorum vermium, qui in animalibus habitant, a longitudine terrestrium & aquosorum. Sed respondent, id observari etiam extra corpus, dum vario nutrimento aluntur; quo in casu & color variet, & longitudo. Ergo hic fieri, quod alibi fit; nempe, pro varia matrice, & domicilio, & nutrimento, animalia omnia & vegetabilia, multum differre.

(v. VAN DOEVEREN, c. 5. *object.* 5. — Inlustrari quidem videtur, primo intuitu, his momentis, aliisque, controversa quæstio: interim tamen, si non solum longitudinem augeri, sed & fabricam teretium v. c. humanorum, & lumbricorum terrestrium essentialem diversam esse,

esse, Anatome demonstrari queat; uti saltem *van DOEVEREN*, & *REDI*, & *TYSON*, & *VALISNIERI* adfirmarunt, obpositum denuo tenente *LINNÆO*, *SCOPOLIO*, &c.; omnes tumillæ instantiæ non dirimunt dubium. v. autem paullo ante, p. 26., adlata, certiora.)

In edita, hoc anno 1779, *Gottingæ Dissert. Cl. Dav. Corn. RAUH*, de *ascaride lumbricoide LINNÆI*, monetur jure optimo, plurima nos adhucdum latere de structura vermium interna, generationis modo, genio, vitæ genere. Adducuntur nonnullæ, huc facientes, instantiæ; esse v. c. vermes, qui loco saniei albidæ verum sanguinem rubrum vehant; *Nais digitatæ MÜLLERI* arteriam rubrum, venam album sanguinem continere; &c. — — — Quod ad *cingulum* dictum lumbricorum terrestrium, extremo antico propius, adtinet, *LINNÆUS* illud mavult dici *annulum carnosum*, rectissime autem *ephippium* dicitur, quoniam deorsum corpus eo non tegitur. Hoc etsi plerumque hi instruantur, non tamen perpetuo in hisce adest. Narravit AUCTORI *Inl. MURRAY*, sibi aliquoties lumbricos terrestres obvenisse, quavis ephippii nota destitutos; in ambiguo autem se relinquere, an ab ætate hic defectus dependeat, quod quodammodo eo probabile fit, quod minoris magnitudinis hi vermes essent, & ephippium hocce tanto manifestius sit, quo major vermis existat; an Auctor quærit, ab anni vel coitus tempore? (Ast vidi omni anni tempore, sed non in omnibus; quum subin & minimi eo caruerint, subin & maximi. An non præsentia ephippii vel morbi vel sanitatis vermis indicium quoddam est; ut præsens, vel absens unum alterumve nunquam non designet; restaret inquirendum, quemnam? An non læsionem prægressam notat; nam vulneratis consulto nonnunquam in læso loco vix non simile quid enascitur?)

Sed nec ephippio omnem lumbricum intestinalem carere, patet ex observationibus *Cl. van PHELsum & van den Bosch*. — — — Quum facillime intestinalis ac terrestris lumbricus confundantur, sciendum, *Auctor* prosequitur, *lumbricum verum* uno extremo esse manifeste obtusum, altero acuminatum: si extenditur, omnino quidem esse teretem; si autem contrahitur, subtus esse planiorem; quin versus obtusius extremum, seu posticum, angulatum; segmentis constare, secundum *Linnæum* centum, secundum *Aliorum* computum autem pluribus; ephippio plerumque cingi, eum locum occupante, quem, si deficeret illud, annuli 26tus & sequentes ad 30um occupaturi essent; fetis demum numerosis (*v. Int. MURRAY, observ. de verm. in lepra, & lumbricorum fetis*) constare. — — — Optimam iconem exhibuit *Cel. MURRAY l. c. T. 2.*; *Auctoribus* vero, qui de verme hoc egerunt, colligendis peculiarem operam impendit *Cel. MÜLLER; Verm. terrestr. & fluviatil. histor. Vol. I. P. 2. p. 24.* — — — Sed, præter dicta discrimina externa, quoad sexum & internam structuram multa in lumbrico terrestri alia sunt: hermaphroditici generis esse, dubio vacat. Internam anatomen descripserunt *WILLIS & REDI*, qui etiam testatur, a vermibus figura similibus, in hominum vel animalium intestinis obviis, viscera terrestrium discrepare insigniter; quod ex propria autopsia confirmavit *van DOEVEREN*.

Descriptionis ac diversitatis lumbrici terrestris summa eo redeunt, ut *lumbricus terrestris* vermis teres sit, altero extremo adenuatus, annulatus, octifariam aculeatus (setosus) *Ascaris lumbricoides* autem vermis teres, utrinque adtenuatus, rugose annulatus, nudus, ore trinodi: (*Tyson* dixerat: *their mouth is compos'd of*

of three lipps: *Phil. Transact. Vol. 13. p. 155. fig. I. 2. aa.*)

Præter hanc speciem REDI memorat aliam, illi valde similem, ejusdem longitudinis, sed cauda compressa; quam & *Cel. MÜLLER* vidit.

Prætereo hic, exactam quidem, internarum vermis hujus partium expositionem; quam AUCTOR ex REDI præcipue, TYSON, VALLISNERI, & KLEINIO collegit — — Viviparos esse vermes dictos, contra AMATUM LUSITANUM, BORELLUM, PLATERUM, PANAROLUM adseritur, moneturque, pro vermium foetibus habuisse AUCTORES illos vascula vermium spermatica.

Hunc vermem, AUCTOR his subnectit omnibus, seu ascaridem lumbricoidem, omnium intestinalium vermium esse maxime vulgarem, sustineo, & vulgo pro vera lumbrici specie, quam *Inl. à LINNÉ* varietatem terrestris vocat, haberi: unde tot contra LINNÆUM insultus; qui, si dicendum quod res est, ad Quemlibet alium æque, ac ad Eum, spectant, quum Ille de verme plane diverso loqueretur. Hic igitur præcise intelligendus, dum Practici Medici *lumbrici teretis* mentionem injiciunt. Tanquam rariorem licet lumbrico vero proposuerit LINNÆUS, hanc ascaridem tamen unice TYSON, VALLISNERI, REDI, PALLAS significant, qui sagacitate industriaque singulari vermium teretium longorum humanorum naturam prosequuti sunt. Declaravit & *Cel. MURRAY* publice in *not. ad ROSENSTEINII Unweiss. v. d. Kinderkrankh. Ed. 3. p. 466.*, ad rariore eventus esse referendam verorum lumbricorum ex primis viis rejectionem; & in Prælectionibus sæpius, hucusque nunquam alios teretes longi generis sibi oblatos fuisse, quam ascarides hæcæ.

An igitur narrata lumbricorum verorum in intestinis humanis conmoratio erroribus vel commentis accensenda? Vetat id jam LINNÆI, ait RAUH, auctoritas. Et nisi existimandum, in universum in Suecia copiosius, quam alibi, lumbricos veros in intestinis hominum nidulari; saltem agnoscendum, summo Viro aliquoties tamen ex hominibus excretos obvenisse; an casu deglutitos? Copiose in Suecia plebem ascaridibus lumbricoideis corripitur, tradit *Cl. HIORTH, fortsätn. af Provinc. Med. berättelser p. 131.* Dubium vero vix est, vermes istos humanos, quos ephippio cinctos conspexerunt *Cl. PHELSUM & van den Bosch*, lumbricos fuisse. Tanto majorem fidem merentur, Quibus utrumque genus teretium vermium longorum una ab hominibus secedens observare datum fuit; sub qua oportunitate comparisonis suspicio evanescit omnis, ne in denominandis iis error commissus fuerit. Sic narrat *Inl. ROSENSTEIN*, Infanti quadrienni, emaciato valde & debilitato, post tantillum spiritus frumenti potum quatuor ulnas teniæ & decem vermes ex lumbricorum & ascaridum, illis similibus, genere secessisse. Aliud exemplum retulit *Cl. MONTIN K. Wet. Acad. Handling. 1763 p. 113.* &c. de Virgine nobili, quæ præter fasciolas, vermes cucurbitinos, ténias disruptas; aliquot lumbricos, uti & aliquot ascarides lumbricoideos per alvum diversis temporibus post medicinam adhibitam exclusit: unde simul adparet, ascarides dictas non semper solas comparere, sed subinde in aliarum specierum comitatu.

— — — Puerilem præcipue ætatem vexant, et si nec in aliis omnibus desiderentur; inprimis Qui viscosis putrescentibusque cibis utuntur; ut plerumque sunt infimæ fortis homines, & in bellis haud raro Milites;

pu-

putridis febribus in hisce vulgo adjunguntur; sed & quibusvis morbis aliis.

Quo frequentiores, eo minores, & ex obposito; ob majorem utique minoremque nutrimenti copiam. Plurimi plerumque simul adsunt. Excretos refert ROSENSTEIN ex Puella intra novem dies vermes tales 90, BENIVENIUS ex Infante septenni 152; ex Puella MOUFETUS 170; ex Sene octuaginta duorum annorum MUSA 500; ex Infante nobili PEREDIA intra aliquot dies millia ferme vermium, & intra quatuor horas quadraginta dejectos narrat.

Intestinum jejunum præcipue obsident — — — intestina sæpius perforant; vel in cavum abdominis, vel in aliud viscus, vel extra abdomen, ulcera in integumentis enato, sese subducentes.

In vitulis, suis domesticis, lupis, tygridibus; piscibus variis fluviatilibus &c. inventos ait PALLAS (in felibus REDI vidit, in gallinis, canibus EGO detexi; ut & in piscibus variis visi); in hepate gadi callariæ, HIORTH; in perca fluviatili FAXE: quæ observata partim jam antea adducta fuerunt. — Piscium tamen esui, subjungit AUCTOR, non eodem jure hic vermis inputari potest, ac tænia; quum iste & vulgatissimus sit iis in locis, in quibus pisces rariorem escam constituunt. Quantum igitur constat, extra corpus animale hicce vermis non occurrit. (Minime tamen id pro evicto adserere vellem; quum, si nulla alia adesset ratio, exemplum tæniæ locum dubitandi excitare queat.)

Mortuos vermes contemplatus *Inl.* MURRAY retulit AUCTORI, extremum trinode rectum, alterum obpositum vero incurvatum, sese plerumque reperisse; ut itaque hoc ipsum consuetum videatur.

Refert nunc tentamina, quæ a *Cl. MURRAY* accepit, sequentia, notatu sane digna. Puellæ quinquenni, cui *Cel. VIR* variolas inferere constituerat, ideoque per intervalla aliquot dierum mixturam salinam cum tinctura rhei propinaverat; secessit versus plenilunium ascaris lumbricoides absque aliis signis vermium, quam frictione narium subinde contingente; quæ, utrum ex petulantia, an coacte fieret, tum incertum erat. Post tres dies exhibito pulvere anthelmintico, (cur non addita formula?) duos minores vermes ejusdem generis mane excrevit. Unus horum major fuit, alter minor; ambo rigidi; ut videbatur, mortui. Minor circularem intorsionem per binos fere gyros posico sine fecerat. — (quam corporis totius contractionem spiralem rigentem, in vermibus intestinalibus avium gallinacei generis, aëri libero, etsi calenti, expositis, semper & *EGO* observavi) — : quoniam novissime redditæ erant, spes adhuc superfuit, vitæ restituendæ. Quod ut fieret, aquæ tepidæ *Cel. MURRAY* eos inmisit; paullo post movere se inceperunt, incurvari vario modo, intorqueri, gyros formare, expandi, e. f. p. Retentus uterque in patina figulina; quæ licet non liberum satis spatium motui progressivo concederet, cognosci tamen satis potuit, extremum ore trinodi instructum, esse antè; quum motus edens vermis semper ab hoc ordiretur, idque crebrius extra superficiem aquæ porrigeret. Refrigescente aqua, eadem ratione in majori verme torpuit motus, conquiescens demum omnino. Rediit vero pristina alacritas, iisdem denuo tepidæ immerfis. Ab aqua tepida eos mollescere, a frigida rigere, ut in aëre libero, deprehendit. Crassities corporis semper mansit eadem & longitudo, nec undulatoria ulla corrugatio superficie locum habuit; quæ omnia contrario modo in lumbricis veris
se

se habent. Sensus subtilissimi eorum testimonium dedit compressio; qua ipsa alicubi adplicata, mox sese inflexerunt, manifestius autem irritatio apice cultri peracta.

Pro peculiaribus, aut pathognomicis vermium horum signis recensentur: tormina, præcipue circa umbilicum, ac subinde subsultus intra abdomen: quorum rationes, aliunde facile obvias, hic prætereo.

Dum similitudine, AUCTOR observat, ducti Medici vermibus teretibus longis hominum fetas lumbricorum tribuerent, multas gravesque molestias, vel sola setarum vi nasci arbitrati sunt: quæ tamen omnia mala, utut verissima, aliam causam agnoscere jam persuasi sumus; utpote quum fetis destituantur vulgatissimi isti teretes. In os eorum trinode, sugendo, adnectendo sibi, terebrando aptissimum, culpam optimo jure rejiciendam ait. — — — Spiris, prosequitur, illis perpenfis, quas in aqua tepida vermis formatur, & nodis artificiosis, quos inter se invicem nexuerunt; mente facile concipitur, quomodo cavum intestini obturare possint. (*) Probabile adeo, ita necti posse mutuo, ut

C 5

no-

(*) Probabilitas opinionis sententiæ, ab AUCTORE hic adlatæ, vix non ad plenam certitudinem deducitur instantiis aliis. Visi fuerunt glires plures, caudarum intortu mutuo adeo invicem nexi, ut impossibilis demum plane evaderet separatio; quod inperitum vulgus nescio pro quo singulari animali habuit, ac novum nomen, *Regis glirium*, Rattenfönig excogitavit: v. opus Cl. HALLEN, *Naturgeschichte der vierfüßigen Thiere* 1c. S. 429. — Feles juvenes sex, funiculorum umbilicalium

nodos explicare nequeant, sed adjumento copiosi muci, quem tam vermes ipsi emittunt, quam intestina, compingi arctissime; ita, ut nec flatibus, nec excrementis transitus ullus pateat, unde pertinacissimæ alvi obstructions, vomitiones intensæ, ipse ileus, inflammationes cum suis sequelis.

Fertilitatis vermium horum stupendæ argumentum ex observatione *Cl. TYSON* adfertur, qui in utroque vermibus hujuscemodi ovario 10000 ova numeravit; quorum quidem plurima perire ac excerni, sed & plurima remanere, &, causis inprimis accedentibus ad exclusionem obportunis, animari queunt; quod non adeo raro contingere, antea adductæ circa tantam copiam ex uno homine expulsorum, docent observationes.

Sensibilitas magna vermium horum beneficium adferre valet *Ægris*, dum aquæ frigidæ aut remediorum antihelmenticorum actio eo magis & promptius illos adficit.

Si-

lium intricatione arctissime connexas, ut coalitæ viderentur, autopta retulit *CARPZOVIVS*, *Poliater Grimmeris in Saxonia*, v. *Versuch einer Kaugengeschichte* S. 48., monstrosus hicce coalitus in adjecta tabula exhibetur; ubi simul ex *Redi*-*no* opere sistuntur icones vermium, in felium interterraneis habitantium. Idem phænomenon & altera vice cum quinque felibus juvenibus, ab eadem, quo priores, Matre editis, qui in *horto Bosiano Lipsiæ* inter alia rariora adhuc adservantur, contigit. — Mucum etiam intestinale firmissimum evadere posse, docent illæ instantiæ, ubi sub forma tuborum longiorum cohærentium, intestinorum figuram exacte referentium, aut sponte, aut remediorum adhibitorum actione, eliminatus fuit.

Similis eventus in *tænia* fuit, aquæ gelidæ inposita; unde *Cel. ROSENSTEIN* consilium cepit, ope medicinæ purgantis, & huic aquæ frigidæ copiosius superpotata, tæniam ex corpore eliminandi; quod curationis genus & sæpius bono cum successu fuit in usum vocatum. *Ascaride lumbricoide* in corpore præsentē, post fortiora purgantia copiam insignem aquæ frigidæ potatæ valuisse, *van den BOSCH* expertus fuit. Frigidæ actione rigefactus & adhæSIONIS incapax redditus vermis purgantis effectu expellitur. Sensilitate, sub finem libelli hujus *AVCTOR* ait, adeo hos vermes intestinis ipsis potiores esse, ex remedio haud ita pridem detecto, scilicet setis *Dolichi prurientis LINNÆI* concludo, quam stirpem *Int. MURRAY Appar. medicam. Vol. 2. p. 358. &c.* omnium primus in supellestilis medicæ censum adoptavit. Legumen hujus Indiæ utriusque plantæ setis densis a ferrugineo subfuscis & nitidis obducitur, quæ vento separatæ pruritum molestissimum & urentem cuilibet animalium creant, cujus cutim vel pellem tangunt. Hæ ipsæ & vermes hosce rigiditate & acumine suo moleste adficiunt, & cogunt per alvum copiose secedere. Ne vero simul labem ventriculo & intestinis inducant, miscela earundem sit cum syrupo quodam ad spissitudinem electuarii liquidi, cujus cochleare pro Thea Infanti bienni vel trienni, & dupla quantitas Adulto, mane, jejuno ventriculo, per aliquot dies exhibetur, subjuncta dosi rhabarbari. (*) Haftenus excerpta ex *Dissertatione Cl. RAUH*: quæ *Haenianis* circa vermes cogitatis jungenda duxi; — Vitio *Ty. pothetæ* brevioribus lineis non distinctum totum hoc additamentum fuit.

Circa

(*) An rigidulis quoque moleculis, quibus fructus *cynosbatos* gaudent, adtribuere debeo phænomenon

Circa sententiam : vermes, qui in hominum habitant intestinis, non ab intrinseco in illa suscipi, sed produci ex materie quadam, ut ita dicam helmintopoëtica, circumstantiarum aptarum huic fini ope in actum vitamque deducta, legi poterunt adnotata in *Cel. UNZER* opere egregio : *Der Urzt*, B. 2. S. 680. & B. 5. S. 226. &c. Libere fateor, me nunquam non edicturum potius fore, ignotam mihi esse vermium genesin, quam quidem per illam theoriam eam expositurum; nisi convincentibus in maxime argumentis ad hoc adactus fuero; quod vero vix futurum spero.

Redeamus tandem ad textum *Hænianum* !)

En Vobis parvam *Helminthologiam* (synopsin maximam partem amplioris præstantisque *van Doeveria-næ*; in qua plurima continentur scitu sane necessaria, quæ *HÆNIUS* intacta relinquere debuit, quæ nec Ego, ob dudum dictas rationes adferre potui). Quid porro in nobis agant onerosi hi hospites videamus.

Illi autem sugendo, movendo, vellicando &c. Non adsumemus partes *Cl. BIANCHII*, qui vermes distinguit in *naturales & morbosos*: certe, vermes homini naturales esse, adeo absonum est, ut Omnium offendat animos. Causa erroris *BIANCHII* est, quod multi homines vermibus obsessi per omnem vitam nil mali sentiant. Revera in praxi toties vidi homines sanissimos, qui nunquam quid mali multis retro ab annis passi erant, in morbo acuto dein prope crisin vermes

menon expulsoꝝ ab adsumto illorum *Roob* lumbricis intestinalibus? An idem effectus semper sequitur; nam defuit mihi nunc occasio, plura instituendi tentamina? *DE W.*

mes teretes excernere : inde tamen non sequitur, hos vermes esse homini naturales. Diathesis ad magnos morbos sæpe in corpore humano latet perpetuo ; nec tamen adesse, negari potest. Videmus Infantes, qui acido laborant sine morbo (aut manifestiori inde exurgente incommodo), fœtor acidus in illis sudoris & excrementorum demonstrant præsentiam acidi. An autem, quum bene tamen habeant, acidum illis naturale dici potest ?

Venerandus PRÆCEPTOR paucis illis verbis exposuit totam Pathologiam vermium. Pleraque symptomata clare adeo ex ipsa historia vermium fluunt, ut Vos me exponente vix indigeatis. Pro more tamen breviter exponam.

Illi autem fugendo, &c. Qua ratione vermes hæc omnia patrent ; liquet ex natura tum partium quas obsident, tum animalium ipsorum.

Acta phys. med. N. C. tom. 7. Obs. 129. p. 473. exhibent nobis verum ileum a vermibus ortum, tumorem dein inguinis, pro abscessu habitum, ruptum, teretesque tres vermes notabilis magnitudinis una cum fœcibus exin prodeuntes. Gangræna tum nata artis ope sistebatur, sed finis historiæ ibidem non habetur ; ut adeo nesciamus, quis finis demum malorum fuerit. (Nullum, recte monuit PECHLINUS, tam peregrinum est symptoma, tamque *δαμονιακον*, quod vermes excitare non possint. Aphonian cum fœcum excretionis involuntaria ex hac causa natam, & vomitu rejecto verme terete curatam refert VAN SWIETEN. Singularis autem inprimis est, dummodo vera, historia, quæ refertur in *Breslau : Sammlung der Natur und Kunst ; 24. Vers. S. 198.* ac in *Edit. germ. Diss. van Doever. p. 243.* quam, quod proluxior sit, hic adferre nequeo. — Monitos autem velim juniores Medicos, ut in morbis, qui subin miri maxime, ametri,

&

& vix non supernaturales videntur, ad hancce causam respiciant.)

24. Maji 1752. Lugduni Batavorum Medicus VAN DOEVEREN multis Amicis, Medicinæ Studiosis adstantibus, examinavit biennis Infantis cadaver, in quo tumor insolitus abdominis adparuit. In cavo abdominis insueta reperta copia liquoris, cum materia fusca, spissiori, chyloso-fœculenta admista; uncias aliquot æquante. Supra pubim in hoc cavo mox adparuit teretium lumbricorum fasciculus, ex perforato intestino ileo propendens, varie inflexus & contortus: qui fasciculus, examine factò, compositus cernebatur duobus teretibus lumbricis, quorum alter integre in abdominis cavitate extra intestina hærebat; tenuis, & præter propter 5 pollices longus: alter tertia sui parte in ilei latebat cavo, duabus autem tertiis extra ileum in cavo abdominis; octo pollices longus, penam anserinam crassitie æquans. Foramen in ileo autem digitum minimum facile admittebat. Inde, in eodem intestino, ad duos circiter pedes inferiora versus, alius cernebatur vermis; qui, quod notabile, uno sui extremo per secundum foramen in cavum abdominis penetrabat: altero vero ad duorum pollicum inde distantiam per tertium foramen in cavum prodibat abdominis. Tandem in fine jejuni quartum, æque fere magnum, foramen visum, quartum continens vermem teretem, sat magnum, tam mire contortum, ut laqueum referret: in jejuni præterea principio erat verus volvulus, insignis, susceptum exhibens intestinum, inflammatum a superioribus inferiora versus. Ventriculus in sinistra inferiori parte a medio fundi ad cardiam admodum inflammatus, ut & variæ hinc inde in tubo intestinali inflammationes.

Etiam

Etiam in suecica illa muliere, (cujus historia paulo ante data) vidistis, tæniam tumore abdominis aperto egressam ab erosione & perforatione intestini.

(Inter intestinorum tunicas hærentes vermes *Inl. L. B. de STÖRCK* vidit; & Americanis a vermibus intestina subin perforari *Cel. de JACQUIN*, *Inlystri van SWIETEN* retulit; & ipse *HIPPOCRATES* id jam observavit, & *HEISTERUS*, & ingens copia *AUCTORUM*, qui citati habentur in *dissert. van DOEVEREN*: ut adeo incassum negarit rem ex theoria *BROUZET*, quam praxistoties, & possibilem, & vere factam esse, demonstravit. — Dubitavit tamen *Celeb. MORGAGNI Epist. 16.*; *ad fin.*, num omnes historiæ, quæ adferuntur ad demonstrandum, vermes perforare in vivis hominibus intestina, id revera demonstrent. Conjicit saltem, vel id inter mortem & sectionem cadaveris contigisse; intestina enim tunc sæpe gangrænosa; vel ulcera præcessisse, aut vulnera: ut *HIPPOCR. Epidem. 7. sub fin.*, „*DI-NII* puero lumbricus magnus ex umbilico, olim vulnerato, exivit.“ Non est, cur limitationem hanc *Cl. MORGAGNI* non admittam; errare autem *Eos* multum censeo, qui omnem omnino intestinorum perforationem impossibilem in vivis hominibus, aut animantibus existimant — Perforatio illa sæpius a teretibus, quam aliis vermibus fit; fieri tamen & a tænia, quin & ab ascaridibus & fasciolis posse, docuerunt exempla.)

An effectus vermium clarioribus exemplis demonstratos habere potestis? Nonne simul hinc intelligitis, cur chylum consumant? Multitudine plerumque sua vermes potioem chyli portionem rapiunt; unde corpus emaciatur: sæpe etiam oritur, tum a chyli defectu, tum ab irritatione acri ventriculi, *βελίμνος*, fames dicta

dicta *canina*. Videtur in Multis, non in Omnibus, illa fames frequentiori alimento sedari (hinc & pejora symptomata adsumtis cibis nonnunquam melius fere, quam medicamentis, curantur, aut palliantur.)

Nervos irritant; unde tanta sæpe mala (inprimis spastica). Nam quid non mali sæpe a læsis ventriculi nervis; ab adfectis nervis intestinorum? Hac irritatione spasmi oriuntur, qui, ut semper, impediunt perspirationem, pallidamque urinam reddunt; quum contracti nervuli per reliquas corporis partes ita constringant vasa minora, ut crassioribus inpeditis mera tantum limpida urina transeat.

Epilepsia nasci potest deuteropathica a vermibus rodentibus intestina, & maxime cardiacam; locum illum antea jam vario sub respectu a nobis consideratum.

Verum, ut ab omnibus viarum primarum sordibus, ita maxime a vermibus, oriri possunt, consensu nervorum, tussis; qualis erat tussisferina Infantum, de qua *Commerc. litterar. Norimb. an. 1732* agit; quæ per emetica & anthelmintica curata est.

Vidi dolores acutissimos in latere ad costas infirmas, quæ mentirentur pleuritidem, lumbricis ejectis, integre sanatos.

Nausea & vomitus sæpe hinc nascitur, 1. ab irritatione; ubi enim peregrinum quid vellicat intestina, maximeque ventriculum; vomitus, ut naturæ conatus, oriuntur, quibus hostis ingratus debelletur. 2. Ab ipsis vermium fæcibus, quas illi, tantopere chylum consumentes, necessario intra intestina, vel ventriculum deponunt: quibus putrescentibus, nausea ingens excitari debet. 3. Ab ipsis vermibus nonnullis mortuis, qui putrescentes denuo abominabilem fœtorem generare & vomitus enormes excitare debebunt.

Sæpenumero evenit, ut Ægri non vomant, sed ut os ipsis madescat, & aquoso humore repleatur, cum anxietate ad præcordia; quod & HIPPOCRATES jam adnotavit.

Eadem de causa oritur *stridor dentium*, maxime in Infantibus; ingratum illud symptoma & horrendum omnibus hominibus. — Causam stridoris dentium a vermibus non aliam capimus, quam nervorum commercium.

Vidimus, à saburra, a bile acriori; a re ingrata oriri sternutationes, ex communicatione intercostalis cum pari quinto. Sic, si Infantes dentant laboriose; alvo diffluunt; ob idem nervorum, præter alias rationes, commercium. Dentibus erumpentibus cessat omnis diarrhæa.

Singultus ab eadem irritatione, horripilationes, rigores, pulsus exiles intermittentes; febres, convulsiones (præcipue trachelotetani), tremores, palpitaciones cordis. Est talibus album oculorum non instar perlarum; verum aut album nimis, ingrato adspectu, sine pelluciditate aut nitore; vel cæruleum: est etiam membrana cellularis laxa sub oculis tumida. Lingua plerumque albescit, (pastacea sorde obducta; fœtor simul oris specialis, uti a putrescente muco.) Si hæc omnia signa cum tumore abdominis; sæpe variæ extensionis, cum pruritu narium, (cum colore fæcum molliorum subgryseo, lurido; plura adhuc signa *Cæli Tissot* collegit;) jungatis, facile habebitis hominis verminosi diagnosin.

Laudata paullo ante *Commentaria Norimbergensia* memorant, autumnali tempore Militem robustum vegetum, febris intermittente corripì cœpisse; cujus in paroxysmo prehensus fuit tremoribus involuntariis variarum partium, maxime brachiorum: accessit risus sardonius.

nicus; pulsus sæpe intermittens, tremulus, parvus, tamen velox. Emeticum una cum biliosa mucosaque saburra simul expulit vermem teretem ingentem. Expulso eo filebant brevi symptomata, ipsaque febris.

Immo morbos fere omnes sensorii communis & capitis produci posse a vermibus, docent Observata. Deliria, paralyfes, pavores in somno, vertigines, maniam, uterinos furores &c. *v. Eph. N. C. Dec. 2. ann. 5. Adp. obs. 66.*; tinnitum aurium, cœcitatem, aphoniam &c. adnotarunt Observatores. *V. HOFFMANN. Op. Tom. 3. p. 250.* (Plures adhuc ab hac eadem causa natos morbos refert VAN DOEVEREN; ex quo HÆNIUS hic enumeratos, & sequentia, ordine excerpt.)

Hinc intelligitis, cur epilepsia sæpe curetur antihelmenticis. Nobilis Neapolitanus FABIVS COLUMNA, Epilepticus, frustra opem medicam expertus, Botanicen demum excolens incidit in radicem phu, sive valerianæ sylvestris; de qua notatum legit, quod epilepsiam curaret: adhibuit eam, curatus est. Nil probabilius, quam latentes intime vermes, aliis remediis inexpugnabiles, cessisse tandem huic medicamini, sicque FABIVM ab epilepsia demum curatum fuisse.

Infans 12 annorum, sanissimus visus, subito corripitur leipothymia, spasmis, convulsione, immo insultu epileptico leviori: insequuta febris quotidiana. Vermes forte causam esse, suspicatus medendi Artifex, aquam, cum qua mercurius decoctus fuerat, propinat. Duo teretes, majores, vermes ejiciuntur; brevi tum exsularunt symptomata. *v. Hist. Acad. reg. sc. Paris. 1706 p. 430.*

Choræa S. Viû, mirabilis nervosorum morborum species, qua homines ad miras gesticulationes, agitatio-

tiones, saltationes, prorsum inviti, immo quandoque inficii, compelluntur, etiam hoc ex fonte nata, remedium anthelmintico curata fuit. *V. Eph. N. G. Dec. 2. ann. 5. Adp. n. 19.*

Choræa S. Viti laborat Puer per septennium; oleum demum illi propinatur animale Dippelii; quod equidem adversus epilepsiam laudari solet ut summum remedium. Vi tamen anthelmintica profuisse hic videtur; nam septem lumbrici majores expulsi, tum vero epilepsia curata fuit. *V. Commenc. litt. Norimb. 1734 p. 29.*

(Non possum non monere hac occasione, inanī consilio remedia plurima contra hunc illumve morbum laudari, & circumferri, si non determinetur simul, qua ex causa ortus morbus esse debeat, indicato remedio curandus. Id si non observetur, morbus sæpenumero non curatur, sed sensim incrementum accipit, & pejor longe, vel & lethalis redditur; aut novo augetur. Patet hinc, quam egregio & societati utilissimo consilio deleti fuerint in novissimis *Dispensatoriis* catalogi illi morborum, cuivis remediorum formulæ antea subnexi: Medicastris quidem mirum quantum inservientes. Vix non omnes autem *Materiæ medicæ Scriptores*, excepto imprimis *Cel. MURRAY*, illam triverunt semitam, ut generatim edicerent: valet hoc in ictero, illud in cardialgia, e. s. p.: at, in quam icteri &c specie, a quam causa excitato? Hic nil responsi. —)

Perforationem intestinorum antea jam vidimus: præter adlata exempla recensetur aliud in *Act. phys. med. Vol. I. Obs. 172.*; *HALLERUS* etiam in *Col. lect. Disp. med. n. 3.* unum retulit. (v. etiam *der Arzt. 6. B. S. 132. &c.* & *VAN SWIETEN Comment. in Aph. 1366* & *J. H. SCHULZ Diss. de lumbricis effraactori-*

bus Halæ 1740 & C. COITH, Diff. de lumbricis, intestino perforato per abdomen egressis. Basil. 1734.

— Est res sane periculosa, non tamen semper lethalis. Referuntur etiam exempla resitutorum hominum, quæ perforata fuerunt intestina. Scitis in historia vulnerum nos considerasse magna vulnera intestinorum tenuium ut plurimum lethalia per se esse; haud ita crassorum.

(Pace autem *Cel. de HAËN* dixerim, aliam sane rationem esse intestinorum vulneratorum, aliam a vermibus erosorum: Intestina sane a vermibus perforata esse queunt, quin adhuc id factum sciamus. Interea temporis liquidum chylosum &c. sensim effluens in cavum abdominis, sensim in corruptionem abiens; continua intestinorum irritatio; vermium perforamina egredientium in abdomen, &, quum pabulum ibi non adeo reperiant, uti prius, dum eo undique cincti erant, morsus; foraminum subpurationes, manui auxilium laturæ denegatus accessus; nam quis abdomen discindat, visurus, an non, sævioribus præsentibus symptomatibus, terebrata fors a vermibus, de quorum sæpe ne quidem certo constet existentia, fuerint intestina? — e. s. p. Pessimæ sane symptomatum syndromes, pessimi, incurabiles, lethales effectus generari sic poterunt. Interim nequaquam negarim, quædam horum & vulneratis intestinis obtinere: sed constat utique, evasisse homines, & vulneratis & a vermibus perfossis intestinis; constat & mortuos esse; tum primo tum secundo casu præsentente.)

Tumorem abdominis &c. Tumores hos efficiunt 1) moles, glomeres vermium, sæpe stupendi; 2) copia glutinosæ materiæ; quam abundantem, & veluti nidos vermibus ministrantem testantur Verminosorum vel

vel curationes, vel secta cadavera: & sane, si tota consideretur digestio, propulsio, inmutatio alimentorum vitiosa; si, parte potiori a vermibus absumpta, reliqua crassior, glutinosiorque conspiciatur; si bilis in his hominibus inertior, adeoque viscositati dividendæ ineptior, consideretur; si denique a debilitata hac tota chylopoëtica machina cruditas alimentorum & lentor natus ponderetur; non opus est, ut hic anxie inquiremus in originem abundantis glutinis: immo a pravo chylo cachexia, obstructions glandularum mesenterii, retardato ibidem chylo crudo: hinc iterum ratio tumoris.

3) Si his jungatis, aërem continuo inter spasmos (spaslice constricta loca) interceptum, rarefactum, posse mire augere hos tumores; capitis facile, & abdomen tumescere debere, & tumorem ipsum ire redireque subito solere; prout major minorve aëris copia inter bina constricta loca intercepta fuerit, iique spasmi diutius aut brevius durarint.

Quin & subiti tumores oriri queunt, mox ubi ad novum alimentum ingestum convolant vermes per agmina, ut objectam hanc prædam devorent. Visi sunt castrenses morbi, in quibus jejuni linquebantur animo; passi veluti a veneno intumescebant: vermes horum symptomatum causam fuisse, demum deprehensum est.

Ad vermium curationem infinita decantata sunt remedia. Videte collectionem optimorum in *Mat. med.* BOERHAAVII, unde poteritis formulas seligere.

(Tenendum autem est circa remedia anthelmintica, non indiscriminatim omnia exhibenda, quod sub communi classe anthelminticorum collocentur. Adtendendum hic inprimis ad *Ægrorum* sexum; ætatem; vires; habitum corporis; irritabilitatem; idiosyncrasiam; morbos forte complicatos; statum sanitatis a vermibus magis minusve læsæ; ad clima

quoque; locum naturalem aut habitationis, vermium generationi fors multum faventem; victum, apud Monachos v. c. piscibus frequenter aut unice victitantes; remediorum adhibendorum vires validiores, aut drásticas, &c. Sic, ratione Ægrorum systemate nervoso mobiliori præditorum, in Puella, quæ vermibus laborare credebatur, ab incocto lacti & frequentius adhibito allio, cum mensium anomalia convulsiones productas novi. Adtendendum denique, non omnibus vermibus idem remedium æque noxium aut lethiferum esse: hanc ob rationem diu sæpe incassum adhibentur anthelmintica; quum inter omnia illa nondum verum pro hac specie vermium adhibitum sit antidoton. Sæpius etiam vix non impossibile est, ut homo a vermibus ex integro liberetur, quum tali diætâ, tali aqua uti debeat, quæ nunquam non vermibus denuo generandis adprimè inservit.

Vidit *Cel.* UNZER, in suis nonnunquam vermes inter intestinorum tunicas tuto adeo hærentes, ut; eos Expulsurus, ipsa expellere debuisset intestina: iidem vero & in ipsis hominibus eveniunt casus. Ait *Cel.* VIR in Opere utilissimo: *der Arzt*, 6 B. S. 132. scire nos quidem plurima remedia anthelmintica, non æque autem talia, quæ & seminium destruant vermium, genescinque novorum simul ac muci tenacissimi, in quo hospitantur tuto, & quo ab injuriis multis ingestorum defenduntur; qui præterea mucus, licet vermes nunc non contineat, ipse aptus natus est excitandis iisdem symptomatibus, quin leipothymiis, epilepsiæ, e. f. p. Practicorum hinc erit, indagare, an hoc illudve medicamentum solummodo vermes fuget præsentis, an & ortum inpediat novorum; nidumque destruat. Optime, ait, tentamina talia instituuntur in Epilepti-

pticis, Catalepticis, Syncopticis, quorum ex corpore vermes prodiisse antea observatum fuerat: quod si enim maxima ex illorum intestinis copia vermium mucique educta jam remedio quodam fuerit, symptomata autem nihilofecius perdurent pristina; indicio erit, medicinam illam non egisse in vitium digestionis, quo vermium genesis totaque adeo helminthopoësis fovetur, promovetur. (*)

D 4

Id

(*) Ich habe einige Fälle von der Art gehabt, prosequitur CL. UNZER, cujus propria consulto hic adfero verba, da ich Epileptischen, ein, andert, halb und zwey Jahre hintereinander, wöchentlich ein oder zweymal so heftige Brechmittel und Purgangen verordnete, womit man andre starke Leute tödtlich hätte vergiften können, und wovon ihnen jedesmal eine unglaubliche Menge zäher Schleim und von Zeit zu Zeit Wurmnester und unnatürliche Dinge abgetrieben worden, ohne daß es sie länger als ein Paar Stunden ein wenig angegriffen hätte: und diese Leute haben gleichwohl, nach einer so langen Zeit, immer denselben Unrath von sich gegeben, und ihre Zufälle behalten. Man begreift, wie dieses möglich sey, wenn die Ursache, wovon sich stets neue Würmer erzeugen, nicht hinweg genommen werden kann: denn so hilft es nichts, daß man sie heut alle abführet, weil in ein Paar Wochen neue Kolonien davon vorhanden sind; ja es ist auch nicht immer möglich, sie alle abzuführen. Ich habe zuweilen bey den Schlächtern Schweine gesehen, bey denen sich eine unzählige Menge Würmer zwischen die

Id etiam in cura anthelmintica notandum, nunquam non ipsi remedio helmintogogo sociari debere, aut subungi, purgans; id vero fortius esse, & posse & debere purgante, quod adhibendum foret, vermibus non præsentibus. Quum tamen regula nulla sine exceptione sit; quum homines dentur, ab umbra vix non purgantium jam pessime habentes; uti, ex obposito, dantur alii, pro quibus vix drasticum satis parari queat; hinc, ne malarum sequelarum ulla committatur causa, sub initium curæ, nisi aliunde jam de natura *Ægri* nobis constet, lenius aliquantulum purgans, quam quod vermes illisque essentialis comes, mucus tenax exigent, in usum vocandum, tumque, si quidem liceat, validiora promenda esse, iudicium dicat practicum.)

In Infantibus sæpe felicissimum ac brevissimum remedium est *limatura ferri*, data v. c., pro ratione ætatis ad gr. v—xx omni mane Jejuniis; acido plerumque laborant primarum viarum; unde juvat eo pulcrius. Cæterum *amaricantia* omnia sunt anthelmintica, uti decoctum absinthii apud BONNETUM. (Unde & solo felle lucii ac anguillæ ejecti fuerunt vermes.) Rustici nostri sæpe vermes reddunt ab allio infuso cum spiritu vini. In Infantibus glutinosi & verminosi centies cum effectû dedi sequens;

Rad.

die Häute der Gedärme eingeschoben hatten, worinn sie so sicher lagen, daß man sie nicht hätte austreiben können, ohne selbst die Gedärme mit weg zu purgiren. Dieser Fall ereignet sich auch bey Menschen; u. s. w. Adducit tum instantias plures perforatorum a vermibus intestinorum; quales jam antea vidimus.

Rad. phu,
 filicis maris,
 polyp. querc.
 fol. Alexandrin. aa. $\frac{3}{4}$ sem.
 sem. fanton. $\frac{3}{4}$ vj.

Infunde cum cerevisiæ pinta. Sumat, pro ratione ætatis, jejunus omni die per dies 14, dein autem omni alterno die, $\frac{3}{4}$ j. ij. iij. iv.

Laudatur etiam aqua decoctionis mercurii (*), vitriolum martis, æthiops mineralis, corallina, purgantia aloëtica, mercurialia.

(*) Vires hujus nonnulli Auctores negare voluerunt, uti v. c. *Cl. BURSERIUS*; Aliis autem bonos inde observantibus effectus. Nuper *Cl. WESTON* infusum aquosum mercurii currentis, ceu remedium prophylacticum adversus rabiem in canibus laudavit. *V. Institutiones meas chemicas* §. 820 — 827, — Circæ vires mercurii anthelminticas, atque hic enumeratorum remediorum omnium, v. & *VAN SWIETEN* *Comment. in Aphorism.* 1371. *T. IV.* pag. 649. *Edit. Paris.*)

Verum aliquando remedia invenimus inopinato. Contigit mihi, ut Gravida corriperetur diarrhæa per triduum, tuncque fœtum feliciter eniteretur, manente diarrhæa. Quum inde non debilitaretur, & lochia bene fluerent, pauco rheo & syrupo diacodii ad moderamen illam duxi. Sed rediit sævissima post decimum diem: nec rheum, nec emulsa, nec opiata, nec enemata quidquam juvabant, latebatque fere causa vera mali. Hinc, quum indicatio vitalis urgeret, inducias inpetrare conatus sum cortice *simarubæ cum opio*. Alvus levabatur illico; sed, quod nec illa nec ego cogitaveram, simul tres alvo prodierunt lumbrici teretes. Prosequuta usum remedii iterum vermes excrevit: deum nulli amplius prodibant, & moderata fiebat al-

vus. Quum id animo notarem, expertus idem fui in alia foemina, cui dudum multa frustra dederam contra vermes. Communicavi rem cum amicis Medicis, qui eundem observarunt effectum.

Lac ano inmissum, adlicit vermes deorsum ; (*)
oleum epotum illis adversum, quum obstipet bronchia.

(*) Relatum mihi fuit a fide digno homine, Foeminam, quæ diu rosionibus in ventriculo, nauseais aliisque variis symptomatibus torquebatur, curatam demum fuisse, dum lactis calidi vaporem per infundibulum ore hiantem, dentibus interjecto bacillo exciperet jejuna; sensisse siquidem titillationem per œsophagum ascendentem, demum vermem magnum teretem in ipsum usque os prodissse, qui digitis extractus fuit. Cessarunt factò hoc symptomata: an vero redierint, aut an plures vermes in ventriculo latuerint, rescire non potui.)

Ad ascarides enemata & subpositoria cum vitriolo martis valent.

(*Laudatur & muria salis*, HIPPOCRATI jam commendata. Enemata præferenda sunt, quum subpositoria nonnunquam sursum potius pellant, quam fugent, ascarides; qui etiam non constanti lege, vel non omnes in recto intestino, quod subpositoriorum actioni præcipue patet, habitant. Exempla autem docuerunt, ascarides ope subpositoriorum ex lardo non salito, in medio excavatorum ad unum omnes; illis adhærentes, eductos fuisse. In *Medical Transactions published by the College of Physicians in London*, Vol. I. p. 54. sq. refertur casus maxime singularis, adsumtarum intra horæ unius intervallum binarum librarum *salis communis*, in binis mensuris aquæ fontanæ solutarum, scopo anthelmintico: sequebatur oppressio pectoris magna, cum succedente vomitu multæ pituitæ, ac levamine; alvus simul, alias obstipata mul-

tum,

tum, soluta, excreta maxima glutinis copia & vermes. Sitis ingens cum dysuria torquebat Ægrum; quæ tamen symptomata ope aquæ copiosæ lactisque ebutyrati eatenus mitigata fuerunt, ut remedium continuari potuerit. Morbo demum plane sublato scopo prophylactico homo ille ante novi-ac plenilunium semper adhibuit libram dimidiam salis muriatici, aqua soluti. — Methodum hanc medendi nemini sane repetendam suadeo. — Ægre satis ascarides sæpius e corpore fugari, jam GALENUS monuit.)

Cornu cervi ustum ter quater de die ad scrupulum unum potest purgantibus addi. Commendatur etiam *mercurius niger cum jalapa*; *vitriolum martis cum resina jalapæ*; *enemata ex decocto tanaceti cum melle*; ad tæniam *stannum* laudatur; vidi tamen, magna illud copia, sed incassum, fuisse datum: est præterea non tutum adeo remedium, ob arsenicum stanno sæpe adeo admistum. *Fuliginem* contra tæniam datam fuisse, antea dixi. Sæpe juvat, vermibus cunctis præsentibus corpus replere *asa fetida*, unde vermes anguntur & fugantur, subjuncto dein *purgante validiori*, ut prorsum expellantur.

(Hactenus *Haeniana* expositio remediorum anthelminticorum. Multum autem abest, uti Cuivis patet, quin ea comprehendantur omnia, aut potissima, quæ contra vermes fuerunt laudata. Consulendi itaque circa hanc rem omnino *Inl. VAN SWIETEN*, *Cel. ROSENSTEIN*, & *VAN DOEVEREN*, quæis jungi, si quis plura scire voluerit, Alii in nunc dictis fontibus citati. Proposuit varia huc spectantia egregius *REDI*, quem jam antea laudavi. — Describuntur remediorum quorundam anthelminticorum, inprimis *Helleboræstri maximi* GER. vires in *adpendice* præstantis operis *Cl. BISSET* *Essay on the medical Constitution of great Britain*: ait *Cel. AUCTOR*, remedium hoc ceu maxime actuo-

sum

sum inter reliqua omnia sibi nota contra lumbricos intestinorum seseprehendisse. Optandum sane, ut Multorum, qui Anglicum non callent, in gratiam versio bona, latina, aut germanica, operis hujus prodeat.

Remedium contra tæniam *Herrenschwandtianum* adeo decantatum, tamdiu pro arcano habitum, quod nec *Cl. VAN DOEVEREN* notum fuit, constat, referente *Cel. VOGEL*, cui *Auctor HERRENSCHWANDT* compositionem revelavit, &, ut publici juris faceret, permisit; constat, inquam, sale absinthii, carbonibus ligni fraxini, & gummi guttæ. An carbonēs, ab humoribus nostris non adficiundi, multum ad vim anthelminticam conferant, vix dixerim: quæ sub dosi miscela singulorum componentium fieri debeat, & an sal absinthii vere alkalinum, an, uti in nostris officinis prostat, ope florum sulphuris in naturam mediam partim mutatum, recipiendum sit; *Cel. VOGEL* non addidit. Cardo rei maxime in gummi guttæ, drastico satis medicamine, versari videtur; nam, nec sal absinthii vere alkalinum, nec partim in sal polychrestum mutatum; nec etiam carbonēs fraxineos, seorsim sumpta, vermes fugasse, hætenus scio.

Nufferiani remedii tum compositio, tum eo utendi ratio in variis scriptis periodicis, tum & in Editione germanica *Diff. van Doeverenianæ*, ubi vix non omnia remedia anthelmintica exhibentur, habetur exposita. — Prima descriptio hujus remedii, cujus arcanum a REGE CHRISTIANISSIMO pro 18000 livres a *Dna. NUFFER* entum, publicæ juris redditum fuit, continetur in *Traitement du Tenia, ou Solitaire, pratiqué à Morat en Suisse, examiné & éprouvé à Paris 1775. 40.*

Inl.

Int. L. B. de STÖRCK, Ann. med. I. p. 103.
 &c. sequens descripsit remedium :

℞. Sal. polychr.

pulv. rad. jalap.

— — valerian. five phu, aa. dr. j.

oxymell. scillit. unc. iv.

M. S. exhibeatur Adultis quater per diem unc. sem.; Junioribus vero dr. j. aut dr. ij.

„ Unicum, ait *vir INL.*, remedium hoc omnibus Ægris exhibui, nullo habito vermium discrimine, & omnes, qui alio, præter vermes, morbo non laborarunt, inde curati sunt. Vidi sæpius infinitos minimos vermiculos hoc remedio prodiisse. Fœmina 30 annor. hoc remedio adsumto vermem latum, album, 31 uln. longum; & alios plures breviores multo cum glutine alvo rejecit. Ex Puero 10 annor. similis vermis, 12 uln. longus secessit. Quidam hoc remedio utentes vomitu & alvo lumbricos reddiderunt.“

Ego demum Ipse in ascaridibus & teretibus remedium sequens ut efficax, laudare ex propria experientia possum; quo & epilepsia curata fuit, vermibus non debens ortum, sed a læsione capitis per frequentiores lapsus producta; quæ sola causa sufficiens detegi potuit; etsi morbus multos post annos primum eruperit.

℞. Afæ foetidæ

castor. aa ʒiij.

camph. ʒij.

⚥ rad. filic. mar.

phu. aa ʒj.

Terebinth. pur. q. s.

M. F. Pil. gr. iij. conspergend. ⚥ phu.

Pilularum harum alternis diebus mane jejuno ventriculo, & quarta circiter aut quinta pomeridia-

na sumat Verminosus No. v., superpotando phialas duas infusi folior. aurant. amaror. Rad. filic. mar. aa p. æ.; sumat. pug. j. pro sextario aquæ.

Intercalaribus autem diebus utatur sequenti tinctura :

℞. Tinct. Succin. ℥ij. sem.

castor. ℥j. sem.

℞. stillat. absinth. gutt. x.

M. Sumat gutt. xx, bihorio ante prandium; gutt. x. bihorio ante cœnam, ex infusi præcedentis cochleari; superpotando infusum hoc, lege prius dicta. — Purgari corpus poterit quinquiduo elapso ∇. laxat. Disp. Vindob.; tum vero remedium mane non adsumitur.

In Samuelis ERNST dissertatione de *Tænia secunda* PLATERI, *Basileæ* 1743 edita, remedium sequens ceu optimum in tænia laudatur.

℞. Asæ foetidæ rec. ℥sem.

mercur. dulc. ℥j.

extract. rhabarb. ℥ij.

myrrhæ gr. xv.

elix. propriet. q. s. f. l. a. pil. gr. j. — Sumat mane ac vesperi decem, & aliquot cochlearia mellis de die: pergat sic per octiduum; dein sumat

℞. Mass. pil. panchymag. Croll.

———— de succino Craton.

aa ℥sem.

F. pil. gr. j.; pro unica dosi.

Remedio hoc vermium cucurbitinorum multæ ulnæ excretæ dicuntur, fere absque torminibus, cum incredibili copia glutinis. Sequuntæ sequentibus diebus reliquæ tæniæ cum multa semper pituita. Stomachicorum usum dein Auctor adhibuit, &c.

Notandum autem circa remedium hoc; non nisi cautiſſime illud adhibendum: nam Multi in ſalivationem inciderent, ſumendo per octiduum ſingulis diebus gr. iv. mercurii dulcis, ſine intermedia purgatione: nam, ſi putes, extractum rhei id præcavere; falleris: docuit ſiquidem experientia, in multis hominibus ab eo ſtringi potius alvum, quam ſolvi; quum ſub præparatione extracti vis purgans deſtrui, ſæpius ſaltem, videatur. Hinc, ſi Nonnullos bene purget, bonum; ſi minus, refina jalappæ poſſet addi, vel loco rhei, vel cum eo.

Pro ſpecifico olim venditatum remedium, deſcriptum in AMATI LUSITANI *Curat. Med. Cent. 3. Nro. 97.* — Præſtans etiam deprehenſum *Boerhaavianum; V. Elem. Chem. T. 2. Proc. 81. V.* circa remedia anthelmintica etiam *der Arzt. 10. B. 5. S. 536.*

In opere *Cel. Andr. DUNCAN Medical caſes &c. Edinb. 1778* refertur *p. 319. caſe XXV.* hiſtoria, ubi lumbrici inteſtinorum expulſi fuerunt ope calomelani & tincturæ jalapæ. Formulæ erant ſequentes:

℞. Calomelanos gr. j.

conſerv. roſar. q. ſ. ; fiat bolus, ſumendus omni hora ſomni; nec non

℞. Tinctur. jalap. ſemunc. j.

ſyrupi ſimplicis unc. ij. M. capiat ſemunc. j. cras mane, & repetatur omni hora, donec ſuperveniat cathariſis.

P. 326. caſe XXV. refertur alia hiſtoria expulſæ tæniæ quinquaginta ulnas longæ, ope pulveris radicis filicis maris, accedente ſimul uſu cathartici. — Formula, ejusque uſus ſequens, quam refero verbis AUCTORIS:

Capiat cras, hora ſeptima matutina, pulveris radicis filicis non ramoſæ drachm. j. ex aquæ puræ cyathis 3; nec non

℞. Calomelanos, gambogiæ, utriusque granâ triâ. Pulveris cremoris tartari fescunciam, syrupi simplicis quantum sufficiat. M. diligenter subigens, ut fiat electuarium; capiat circiter partem dimidiam cras hora undecima ante meridiem, & postea capiat drachm. j. omni hora, donec supervenerit catharsis. Inungebatur simul oleo campharoto femur dextrum omni nocte hora somni, incipiendo decimo septimo die a remedio primum exhibito, ob adfectionem femoris, cujus magnam debilitatem querebatur Ægra: eandem ob rationem præscripsit etiam *Cel. DUNCAN*, ut acciperet quotidie ictus electricos quatuor ad gradum tertium, eliciendo scintillulas electricas ex femore adfecto. — Prodierunt ex eadem hac Ægra antea jam, ac opem *Cel. VIRI* inploraverat, tæniæ tres, partim integræ, partim magnis portionibus: prima longitudine æquabat ulnas 148., altera 74., tertia 18. Tæniæ hæ fugatæ fuerant inprimis usu pulveris, seu rasuræ, stanni, & tincturæ rhei. — Monet *Cel. DUNCAN*, Gambogiam, quæ vires purgantes in humano corpore exserit, veneni andinstar agere in tæniam: confirmantur hinc, quæ dixi, p. 60. — Instituto examine ex-pulsæ antea descripto remedio tæniæ deprehendit *Cl. DARWIN*, fuisse tæniam latam *Linnæi*. (*)

Usum

(*) Circa vermium in corpore præsentiam bene monuit *Cel. DUNCAN* p. 34. sequentia: „Worms, ait, indeed, in the intestines, are by no means a rare occurrence; yet, as far as my inquiries go, I think I may venture to assert, that, in this country, they are less frequent here than they were formerly, which I am inclined to ascribe to changes which have taken place with respect to diet. Cases are often to be met which they are unquestionably productive of the most threatening and most anomalous

Usum remedii antivenerei *Swieteniani* lumbricis adversum esse, hac occasione adnotandum duxi; ut, incassum adhibitis aliis. helmintogogis, illud adhibere queant Practici.

Celeberrimus LEAKE, Medical instructions &c. p. 210. recte observat, æthiopem mineralem non efficacem adeo esse, scopo anthelmintico, quam mercurium ipsum tenuissime adtenuatum ope admistæ conservæ rosarum, aut gummi arabici. Solutionem mercurialem *Plenckianam* lumbricos rotundos expellere observatum fuit.

Ipse

malous symptoms; yet there can be no doubt, that they are frequently present in the alimentary canal when they are productive of no inconvenience. This sufficiently appears from their being observed to be discharged where there has been no preceeding uneasiness. — — — It is to be observed, that, during febrile affections, worms frequently appear; and, when this is case, there are many who are disposed to consider them as the cause of the fever. This conclusion, however, is, I imagine, often drawn without good reason; and I cannot help thinking, that they are frequently discharged merely in consequence of the fever. It would seem, that, from the morbid affection which exists, probably from the increased heat of the body, their situation becomes disagreeable to them. — — — Our patient (*cujus casus hic fuit relatus a Cl. Viro*) has, even of late, indeed, discharged one, which gives a presumption that there may be still others present. And the action of these on the alimentary canal may either be the cause of some symptoms, or may aggravate them; yet, admitting that, I must own, I do not consider them as forming any dangerous part of the affection; and I do not think that our attempts to cure are to be directed with a view thro these.

Ait etiam *Cel. John LEAKE, Medical instructions towards the prevention, and cure of chronic or slow diseases peculiar to Women, the fourth Edit. p. 210.* „Dead worms, in abundance have been evacuated after malignant fevers; a proof that the corruption of the juices, which then prevailed in the body was uncommonly great.“

Ipse vidi scopo anthelmintico diutissime exhibitum fuisse æthiopem mineralem cum admixto cinnamomo, præscripto simul, nescio in quem finem, decocto radic. doronici, quin ullus prodiret vermis, quin lenirentur symptomata. Hinc sententiam admittendam cenſeo *Leakianam*: quodſi poſt uſum æthiopis mineralis tamen prodeant vermes, adſcribendum id potius fore ſulphuri, quam mercurio, per ſulphur fixato quaſi & inertı reddito: — — „*in the firſt preparation, the mercury by being united to the ſulphur becomes fixed and inactive.*“ — An idem iudicium ferendum, prodeuntibus poſt uſum cinnabaris, ubi mercurius arctius adhuc adhæret ſulphuri, vermibus?

Practicum monitum eſt *Cel. ARMSTRONG, an Account of the diſeaſes moſt incident to Children &c. Lond. 1777. p. 134.*, anthelmintica nonnulla, v. c. ſagapenum, opopanax, aloën &c. adeo amara eſſe, ut Infantibus ingeri nequeant: præterea, multa ex illis calida nimium eſſe, quam ut tenellis ejusmodi ſubjectis tuto exhibeantur. Laudat tamen, ceu remedium efficaciffimum adverſus aſcarides, aloën in lacte ſolutam.

Teſtamentum ſic dictum *Hiærnicum*, ab HAENIO ante adductum, efficax nonnunquam contra *tæniam*, abſolvitur ſequentibus: mane ſumat *Æger* pulv. rad. Jalap. cum ſaccharo, ad ſcrup. ij., ſuperbibat multam aquam frigidiffimam, & poſt meridiem ſumat tincturam cathol. purg. *ROTHENII*; doſi, pro ætatis ratione viriumque determinanda.

Adtulit *D. BICKER* nescio unde excerptam formulam ſequentem præſcriptionis *Spigeliæ anthelmiæ*, pro anthelmintico eximie virtutis laudatæ.

℞. Herb. Spigel. anthelm. manip. ij.

Aq. font. ℥ ij.

Coq. ad reman. ℥ j. Colat. add.

Mell.

Mell. depur. unc. ij.

M. cap. cochleat. per trihor.

Ast finem faciamus enumerationi remediorum anthelminticorum; quorum exactior nonnihil historia speciale requirit volumen: fontes plurimorum jam antea fatis indicavi. —

Notandum demum ad caput hoc de vermibus adhuc est, nonnunquam signa nulla vermium adesse, illis licet praesentibus, & vice versa. — Refert magnus MORGAGNI *Ep.* 16. §. 38. historiam foeminae junioris, in qua, elapso quarto graviditatis mense mortua, semihora post mortem sectio caesarea instituebatur, cujus ope Infans vivus quidem obtentus, post semihoram tamen, dum baptizatus fuerat, mortuus. In Foemina hac nulla unquam vermium observabantur symptomata, & tamen „vermes, MORGAGNI ait, plurimi teretes in tenuibus intestinis; quae, ubi illi erant, & quodam praesertim in loco, subrubebant, ibidemque quasi per vim dilatata protuberabant.“ Mortua Muliere mutatio haec facta videtur. In cane etiam 60 teniae inventae, qui sanissimus semper fuerat.

Puellus, cujus historia refertur *Epist.* 31. ex VALSALVA, signa obtulit interdum lumbricorum; mortuo tamen eo, vermis inventus nullus — Casus ejusmodi saepius occurrunt, & quorundam testis Ipse fui.


Dum Diatribes hujus altera jam inpressa erat filera, adquireo recentissimam sectionem operis *Cl. WIELAND: der teutsche Merkur* No. 10. October. Adducitur in ea p. 96. quaestio sequens, ab *Inl. Regia Academia Scientiarum Havniensi*, pro praemio 100 Thalerorum Danicorum, proposita; cujus resolutio ante finem Augusti 1780 *Excell. Domino Consil. intim. ac Equiti*
Or-

Ordinis Danebrogensis, ab HIELMSTIERNE transmittenda est :

„ An feminium vermium intestinalium, *Tæniæ*, „ *Gordii*, *Ascaridis*, *Fasciolæ*, &c. animalibus con- „ natum, an ab extus intromissum; observationibus & „ argumentis probare, remediaque in illo casu notare.“

Eo gratius quæsitum hocce mihi nunc occurrit, quum antea jam, sub initium libelli, monuerim: multum abesse, quin generationis vermium omne nobis perspectum & extra controversiam positum sit negotium. Exopto plurimum, ut rem hanc in proditura forsan altera opusculi hujus editione inlustratam magis ac certiozem queam exponere. —)





D E

ICTERO,

&

AD HUNC PERTINENTIBUS
ADFECTIONIBUS FELLEIS.



(In sequenti diatribæ *Haenianæ* expositioni *Boerhaaviani* textus imprimis addidi varia, atque inter hæc recentissima, circa bilem instituta tentamina chemica; ut hic junctim haberentur, quæ, in variis operibus ac libellis dispersa, Plures fors latuissent, etsi scitu sane sint non solum utilia, sed & plane requisita. Nam, utut minime ignorem, Nonnullos chemicas partium corporis animalis analyses minus curare, quod ignis menstruorumque vi plurima mutentur,

F

tur,

tur, præsentia antea fugentur, destruantur; alia, novo principiorum connubio, & electiva adtractione, producantur, prius non existentia, aut sane non eadem, qua nunc, dotata indole; his tamen omnibus, utut verissimis, non obstantibus, tenendum erit, chemiam ad inlustranda tum status naturalis, sani, tum præternaturalis, morborum, abstrusa plurima, nec alia ratione evolvenda, mire facere, & hujus ope, dummodo ad leges, quæ analysis tota debet regi, nunquam non attendatur, doctrinam pathologicam magis longe promoveri, quam quidem autumare videntur, non solum circumforanei Agyrtæ, sed & Medicorum; artem systematice edoctorum, plures.

Adtuli præterea, ut minora varia taceam, recensionem ampliorem theoriæ novæ *Cel. MARCARD* de ictero; in qua, *magnam partem*, quod in multis aliis theoriis desideramus, expositio morbo, non morbus expositioni, adcommodatur. (*)

Continetur, quod *HAENIUS* de Ictero adtulit, maximam quidem partem in commentario ad *paragraphum 773. Boerhaavianarum Institutionum*, ubi *MAGNUS VIR* sequentia summa brevitate proposuit. „ Bilis excretio nimia per superiora, vel „ inferiora, orbat chylopoiesin primario instrumen-
„ to;

(*) Junxi simul, quæ *Cel. TONÉ*, tractatum *Marcardianum* recensens, circa varia theoriæ illius novæ capita monuit, ut tanto perfectior redderetur accessio hæc. ad *Haenianum* codicem. —

„ to; hinc impedit ciborum coctionem, secretio-
 „ nem, fœcum excretionem; producit temperiem
 „ acidam, frigus, debilitatem, pallorem, leuco-
 „ phlegmatiam, deliquia. Si vero confecta inpe-
 „ ditur fluere in cavum intestini, icterum creat,
 „ & simul præcedentia vitia.“

Egit autem BOERHAAVIUS in Συμπτωματο-
 λογία Παθολογίας, §. 817., denuo de vitiis,
 bilis genesis, aut excretionem in intestina læsam
 excipientium: antea quoque §. 788. 789. bilem
 flavam, vitellinam, porraceam &c. bilem etiam sic
 dictam atram, examinavit. Commentario hinc in
 nunc dictos binos paragraphos ipsi Operi *Præle-*
ctionum pathologicarum reservato, adferam in hoc
 libello, ob analogiam objecti, & ea, quæ beatus
 HAENIUS pro expositione paragraphi prius dicti
 817. in codice reliquit, tum ipsum icterum, tum
 alias adfectiones præternaturales biliosas concernen-
 tia: consilium hocce ideo potissimum cepi, ne ejus-
 dem rei in binis locis occurreret mentio, in neu-
 tro perfecta; quod quidem in Haenianis Prælectio-
 nibus factum, diffiteri non licet. — Conjunctam
 itaque, quatenus commode fieri poterit, para-
 graphorum adductorum 773. & 717., quatenus eam-
 dem rem concernunt; explicationem exhibeo; seor-
 sim additis, quæ suam quæque peculiarem postulant
 interpretationem.

§. 773. *Bilis excretio nimia per superiora, vel*
inferiora orbat chylopoiesin primario instrumento. Ut
 nec saliva excrementitius humor est, ita nec bilis;
 sed primum digestio instrumentum. Quam bilis
 præstantiam abunde demonstrant tot tantaque viscera,
 quæ ejus confectioni adlaborant. Namque totum il-
 lud ingens hepar, ut hucusque videtur, splen, to-
 tum quantum omentum, rami exiles pancreatis, me-

fenterium, ventriculus, pro bile conficiunda conlata agunt opera: ipsa intestina vasa habent bibula, præter lacteas venas, quibus ab intestinis & a potiori tenuiorique chyli parte portio absorpta ad hepar ducitur. Uniuntur venæ a splene, pancreate, mesenterio, mesocolo, omento, ventriculo, intestinis reduces omnes in communi vena dicta portarum, &c. (Omisi hic nonnulla anatomica, alibi perfectius exposita.)

Bilis hepatica minus amara, bilis autem vesicaria amarior (acrior) est; crescit amarities tam a stagnatione, quam a peculiari fabrica glandularum vesicæ. Vesicula enim glandulas gerit in membrana sua, arteriis cysticis irrigatas, ut in membrana meatus auditorii. Cervix vesicæ cum poro biliario unita ductum communem constituit, oblique descendente; qui ad angulos acutos adpositus duodeno penetrat ejus exteriorem tunicam, dein hanc inter & alteram descendens, mox perforata & hac, inter secundam & tertiam tunicam longo itinere progressus, foramine rotundo in cavum intestinum liberrime exit. Quo docemur, non omni tempore, non in omni occasione, sed tantum laxis intestinis, bilem hic ab hepate infundi posse: iisdem vero intestinis fortiter contractis neutiquam. (Varia hic adferri possent, & vix non deberent; quæ tamen interim relinquo; præsertim quum Physiologiæ magis intrent pomœria.)

Tantus adparatus insinuat nobis illico, maximam bilis necessitatem & utilitatem. Cujus veritatis nos a posteriori convincunt bilis vel confectio, vel iter in-peditum.

Est quippe cystica bilis, arte chemica talis deprehensa, ut resistat acescentibus, sui que admissione & alia omnia facultate acescentibus resistendi inbuat. Saponacea est, abstergens, olea aquæ miscibilia reddit,

resinas, gummata, tenacia quæque resolvit, adtenuat, homogenea facit, si cum his conteratur: quod Pictores optime norunt, qui tenacia sua (pigmenta) bovillâ felle frangunt. Nulla autem nota alkalina est; nulla nota acida: verum deprehenditur potissimum concreta ex oleo, sale, spiritibus & terra, aqua dilutis. Igne non comburitur, nisi prius exsiccata. Est humorum acerrimus, facile putrescens, adeoque penetrabilis, ut, si ad intestina fluere impedita fuerit, insinuet se per sua propria vesiculæ vasa & per hepaticas fistulas in venam cavam; unde sanguinem totum inficit, & colore flavo totum corpus tingit.

Effectus bilis hujus, quando admista fuerit & contrita cum chylo primum, deinde cum fæcibus, sunt sequentes: adtenuare, resolvere, abstergere; fibras motrices stimulare; diversissima quæque permiscere; acria salina obtundere; coagulata dividere; vias expedire chylo; appetitum excitare; fermenti vicem gerere; cruda adsimilare coctis; crassa intestina ad expulsionem sollicitare. Quæ omnia bilis cystica plus, hepatica minus, idem tamen unumque unitæ efficiunt; BOERHAAVE, *Instit. med.* §. 99.

(Veniam a Lectoribus obtenturum me spero, si nunc hic inseruero, *recentiora* inprimis, circa bilem capta tentamina & observata, quæ HÆNIUS non novit: gratam rem digressionem hac me facturum eo magis confido, quum usus partim sim scriptis, quæ in nostris terris vix Centesimus videt aut nescit; hinc omnino rarissimis. Adferam autem observata illa, sub forma excerptorum promissua: initium faciant recentissima.

Quamquam nequæ *Inl.* PRINGLE, nec MACBRIDE, nec ROEDERER, unquam viderint corru-

ptam bilem cum acidis effervesce, vidit tamen *Cl. WILLINCK*, *specim. med. aditiale, exhibens considerat. bilis physiologic. & pathologic., Lugd. Bat. 1778. 4.*, cum Pluribus aliis, in laboratorio chemico Lugduno-Batavo, bilem bubulam, quæ triennium in lagena clausa steterat, cum omnibus acidis manifeste, sed tamen leniter, effervescentem. Observavit tum simul *Cel. HAHN*, Auctores, qui evolutionem salis alkalini volatilis in bile sensim fieri negarunt, verosimiliter alterutro deceptos fuisse; vel, quod bilem non satis diu servarint; vel, quod in vasis apertis habuerint, e quibus nascens tandem alkali, ni retineatur, facile exhalat denuo & avolat.

Dum bilis paullatim & tranquille corrumpitur, tria inprimis notanda veniunt: *primum* est coloris mutatio: quum enim recentissima ex viridi flavescat, sensim incipit rufescere, luci tamen manens pervia: rubedo hæc sensim etiam intenditur.

Alterum est mutatio odoris; acquirit siquidem nidorem quemdam, & aliquid moscho simile spirat. — Quem odorem in meis experimentis cum humana æque ac piscium & quadrupedum bile, diu adservata, nonnunquam observavi tantum, ut deliciores Fœminæ inde fuerint adfectæ; sed & in aliis tentaminibus plane non enatus fuit, aut levis adeo, ut vix mereatur adtentionem; etsi circumstantiæ omnes, præter aliam experimentis adhibitam bilem, plane fuerint æquales: quæ diversitas hinc ab alimentis ingestis, crassi substantiarum bilem constituentium, viscerum bilis elaborationi famulantium varia constitutione, &c. oriri poterit. — Verum mephiticum & septicum fœtorem tardissime bilis nanciscitur.

Tertium denique est sedimentum quoddam albidum, quod satis cito ad fundum vasis descendit. Atque hæc quidem diu ante evolutionem alkalini salis volatilis accidunt.

Sexdecim uncix recentis bilis bovillæ, calori centum, aut centum viginti, graduum expositæ, exhibent ut plurimum uncias xij. limpidi phlegmatis, non salini, nec nisi nativum bilis odorem spirantis. Tum, calore aucto, adquiruntur duæ insuper uncix cum dimidia phlegmatis, ad oculum priori similis, sed manifesto moschi odore gravidæ, syrupum violarum colore viridi inficientis; quanquam cæterum nullam alkalinx naturæ dotem exferat: siquidem cum acidis haud effervescebat, nec solutionem mercurii sublimati corrosivi dejecit.

Expulsis sic de una libra bilis unciis circiter xiv. cum dimidia phlegmatis, remanet spissa atque materies, crassi balsami formam referens: hæc ex furnulo ligneo, in quo prior operatio fieri potuit, transferri debet in balneum arenæ, ut majorem ignem experiatur. Exhibet liquorem turbidum, flavescens, olei aliquot guttulas vehementem, odore forti, fœtido, & omnibus indiciis alkalinam volatilem naturam declarantem. Adpellari quasi spiritus prior poterit, quem exigua olei pars comitari solet. — His abstractis siccum tandem remanet residuum bilis, porosum, fragile, splendens, nigrum, non amplius retortæ fundo adhærens. Hinc, aucto iterum igne, pellitur spiritus posterior, & oleum brunum: quibus prodeuntibus vapores albidæ, undarum instar, cum inpetu erumpunt, & ex his, in excipulo refrigeratis condensatisque, sal siccum oleoso-alkalinum per strias concrevit.

Utriusque spiritus & salis ficci pondera simul sumpta non excedunt ℥. iv.; neque olei sinceri, quod ex integra bilis libra sic acquiritur, quodque omne aqua levius existit, pondus iv. ℥. majus est. Residuum, e quo nulla ignis vis in arenæ balneo quidquam amplius potest expellere, pondus habet ℥. ij. $\frac{1}{2}$. Hoc, aperto igne resolutum & diligenter exploratum, præbuit ℥ij. salis fixi; cujus pars fuit de sale communi, pars altera de alkali fixo minerali. Idem, post repetitas ustulationes & elixationes reliquit decem tantum grana terræ, particulas martiales continentis.

Si pondera productorum in summam colligantur, hanc parum vel nihil a pondere bilis adhibitæ dislare deprehendimus; unde pronum est colligere, WILLINK observat, in bile parum esse æris fixi; nam, quo hujus plus est in aliqua parte corporis fluida vel firma, eo major solet esse jactura, quam inter destillandum facere solemus.

Vera hæc sunt; at, præter aërem, halitus humidus sub operatione per vasorum juncturas transire, atque sic decremenrum, levius quidem, ponderis adferre posse, AUCTOR noster vix negaverit.

Bilis præterea in tentaminibus *Willinkianis*, cum aqua frigida, æque ac calida, intime & æqualissime coivit; nec, præter dilutionem, aliam passa fuit metamorphosin.

Et si aqua soluta tenuerit salia media, aut alkalia, sive fixa, sive volatilia, bili tamen amica mansit, eamque plenissime solvit. — Quin immo, aqua nonnihil spiritus vinosi in se habens, bilem sine turbis adsumsit.

Alkohol autem sincerum bili incubuit levius, facto concussu eam prorsus turbavit, & ita destruxit,

xit, ut sub longiori repositione aliquid albi unguinis præceps datum sit, evanescente quasi sensim bilis pigmento

Alia erat alkalium sincerorum ratio. Nam liquor spontaneo deliquio ex cineribus clavellatis natus, tum & oleum tartari per deliquium, & liquor nitri fixi, cum bile recenti nequaquam coiverunt, sed statim petierunt ima, utcunque commota fuerint: aliquantum lactescebant; præcipue ubi bilem adtingebant; atque in hoc liquorum confinio videbatur quasi stratum saponaceum esse. Quod si vero aqua pura tunc sufficienti copia admisceretur, hæc, utrique liquori amica, plenam reduxit unionem; nisi quod paullatim nubeculæ quædam in rufescente fluido conspicerentur.

Alkali volatile purum ac necessaria solum aquæ copia dilutum, minus quidem, quam fixum, a bile abhorrebat; quippe quam protinus, sine notabili mutatione, subire videbatur; attamen progressu temporis flocculos quosdam excutiebat.

Recens & sana bilis ab acidis statim turbabatur omnibus; magis a fortioribus, minus a debilioribus.

Duplicem materiem acida e bile expulserunt; una erat grumosa, albus pulvis, cui vel *albuminosæ* vel *caseosæ* materiæ nomen dare licet, Auctor ait: altera erat balsamum quasi, vel axungia, brevi in aëre solidescens, & relinam quamdam formans.

Axungia hæc in leni calore, dum recens est, mollescit; digitis fortiter adhæret, in tenuissima & longissima fila duci potest; sapore amaro donatur; aquam respuit, etiam ferventem; in spiritu vini autem penitus resolvitur; plerumque colorem habet

atrò - viridem, præsertim, dum solida facta jam est : interdum tamen in resinam ex flavo - rubellam, pel-
lucentem instar succini, convertitur; denique aqua
semper gravior est.

Altera substantia, quæ ab acidis expellitur, prio-
ri levior est, adeo, ut etiam sæpius summum te-
nens, speciem pelliculæ exhibeat; tandem vero
cadit ad fundum & axungiam illam tegit; sed le-
vissimo motu per liquidum rursus diffunditur. Hæc
ab axungia illa non tantum colore differt, sed etiam
eo, quod spiritum vini; perinde ac aquam, re-
spuat; omninoque similem se monstrat coagulato
sanguinis sero.

In phlegmate bilis duæ semper salium species
deprehensæ, 1) *sal culinare*, quod non tantum
ex cinere bilis elicitur, sed etiam in integra bile
cum acidis tractata, quæcunque hæc fuerint, præ-
sens deprehenditur. 2) *Alkali fixum minerale*,
quod maxime eo elucet, quum, cum acidis variis
concrescens, diversa salia media, pro diversa aci-
dorum natura exhibeat.

Bilis bubulæ unc. xxxvij. & semis, æquali
aquæ puræ copia dilutis *Cl. HAHNIUS, Prof. Lugd.*
Bat. guttatim instillavit aquam fortem. Orta phæ-
nomena solita. Quum autem jam xix. drachm.
aquæ fortis essent adhibitæ, & liquor per aliquot
dies stetisset, necdum tamen omne pigmentum vi-
ride deposuisset, sed adhuc turbidus & amœne vi-
ridis esset; exploratus nullam acidi notam exhi-
buit. Cum alkalicis nequaquam effervuit; & lin-
guæ saporem acidum non inpressit, sed lenem acri-
moniam cum quadam dulcedine. Igitur paulatim
major aquæ fortis adfusa dosis, intervallis sat ma-
gnis, ut adcurate æstimari posset proportio acidi ad
per-

perfectam bilis dissolutionem necessaria. Et sane opus fuit tribus integris acidi hujus unciiis, ut tandem omnis materies balsamica & albuminosa depelleretur. Balsami unc. ij. & circiter v. drachm. obtentæ. Liquor supernatans decantatus, colatus, inspissatus exhibuit elegantes nitri cubici crystallos, sed non nisi pondere 100 granorum: acidi prædominantis vix manifesta indicia præbuit. — Similia tentamini cum acido vitriolico contigerunt.

Sequitur inde manifeste, bilem non tantum destrui ab acidis, sed vicissim acida sano sensu destruire. Patet enim inde, singulas bilis bubulæ uncias involvere prorsus & perdomare duos aquæ fortis scrupulos, atque ita invertere, ut suo genio prorsum exuantur. — — — Credibile est, bilem duplici nomine in acida agere; primo quoniam verum alkali minerale, licet non magna proportionem, semper in se habet; dein & præcipue, quia multum oleosæ materiæ complectitur, quæ majorem cum acidis, quam cum parte salivali bilis adfinitatem habet; ideoque illis nubit, simulque spissitudinem majorem, & quasi balsami consistentiam conciliat.

In vulgus notum est, res vegetabiles & animales tantum non omnes, si motu vitali carent, cito mucorem, ac situm concipere. — — — Una bilis, AUCTOR ait, huic corruptionis mucidæ legi non est obnoxia; nec tantum sincere non murescit, sed etiam aliis rebus, quæ cito solent situm contrahere, admixta, mucoris generationem prohibet. Hujus adserti veritas, quum aliis multis testimoniis adstrui potest, tum maxime demonstratur sequenti experimento.

Sumatur saccharum commune & duplo aquæ pondere diluatur. Aqua hæc saccharata in duas
æqua-

æquales partes dividatur, & singulæ seorsim vasis vitreis similibus committantur. Alteri parti admisceatur tunc nonnihil bilis, altera sincera relinquatur vel etiam saliva inbuatur. Hæc posterior brevi repositione mucorem in summitate exhibebit; prior nunquam aliquid ejus oculis exhibebit.

Si aqua saccharo multo gravida & notabiliter viscida cum bile aliquamdiu digeritur, dein per chartam emporeticam trajicitur; longe minori spatio temporis poros chartæ permeat; quam similis aqua saccharo æqualiter inprægnata, ac pari tempore, vel sine additamento, vel cum saliva digesta. — Aloës viscor optime admista bile destruitur. — In *Actis Moguntinis vol. 2. p. 293.* legimus: gummiresinas, ipsam myrrham & bdellium, a bile solvi; ceram ab eadem, haud secus atque a vitello ovi, liquefieri. — Sinenses bilem in paranda sua eleganti vernice adhibent.

Ad quæstionem: an bilis fermentum adpellari possit? *Cl. Auctor* sequentia adnotavit: *Inl. PRINGLIUS*, ait, ex tentaminibus, quæ circa putredinem instituit, præter alia etiam hoc deduxit dogma: partes animalium in putredinem proclives habere facultatem excitandi motus fermentationis in vegetabilibus huic idoneis, eundemque motum, si forte repressus fuerit, revocandi; atque hanc facultatem in bile omnium esse maximam.

Sententiam, pergit, *Inl. Viri* confirmarunt *MACBRIDE*, & *ROEDERER*. Et certum est, phænomena obiter considerata huic doctrinæ favere. Si enim varix miscelæ ex aqua, mica panis & carne bubula, aliæ cum felle, aliæ sine eo, parentur, & diligenter observentur, manifestum est, illas, quæ bilem continent, citius fermentare (si modo omnem

omnem motum intestinum cum extricatione bullularum fermentationem adpellare liceat) atque etiam diutius odorem acidulum, utique a septico diversum, conservare, quam reliquas, quæ bile carent; quæ quum lentius bullulas emittere incipiunt, tum vero citius veram mephitim spirant.

Hæc experimenta, a multis Viris fide dignissimis capta & sæpe repetita atque confirmata, sibi semper constant, nec dubitationem, quoad phænomena, relinquunt. Sed utrum conclusio ex visis hisce recte sit deducta, res est altioris indaginis.

Ut igitur ad veritatem propius accedamus, *Cl. WILLINK*, quem loquentem in sequentibus inducō, oportet, ait, simplicissimis experimentis inquire, utrum bilis, in una aliqua re ad fermentationem vinosam & acidam maxime idonea plenum fermenti veri effectum producat, nec ne. Atquæ inter omnes hodie constat, materiem saccharinam esse fermentationi aptissimam. Hæc ergo videtur maxime ad dirimendam litem idonea. Ex variis tentaminibus, quæ instituit *Cel. HAHNIUS*, unum, cui interfui, liceat mihi hoc loco commemorare.

Unc. xvj. sacchari communis in duabus aquæ puræ libris solutæ sunt; liquor deinde percolatus in duas partes ad stateram æquales divisus, singulæ lagenæ vitreæ, vitreo epistomio instructæ, commissæ: uni quidem duas fellis bubuli recentis uncias addendo; alteri nihil. Vasa erant similia & juxta se collocata sine calore artificiali. Cœptum est medio Maji anni 1776. experimentum. Liceat lagenam, in qua saccharum cum bile & aqua hærebat, adpellare *B.*, alteram *A.* —

In *B.* nulla vel odoris vel coloris facta mutatio est usque ad finem Maji. Spumula exigua, quæ

quæ in summo steterat immobilis, Junio demum in-
eunte augeri cœpit. Mox etiam motus intestinus
cum innumeris bullulis adscendentibus adparuit;
odor in vinosum versus: turbari etiam liquor cœ-
pit, & sedimentum aliquod dimittere. Ut igitur
constaret, an sub illo motu vera esset aëris, quem
fixum vocant, seu potius *gas sylvestris Helmon-*
tiani, explicatio, syphunculus bicrurus in locum
epistomii positus, firmatusque est, & hujus extre-
mo adpensa laguncula, in qua quum primo aquam
calcis exeunti halitui obtulissimus, hanc citissime
laetescens vidimus; quum dein spiritus salis
ammoniæ causticus in eadem expositus esset, hic
intra aliquot horas non modo facultatem cum aci-
dis effervescenti acquisivit, sed etiam cum exeun-
te halitu intra syphunculum veras crystallos forma-
vit. Quæ quidem ejusmodi sunt, ut primum fer-
mentationis effectum, nempe *gas sylvestris* evolu-
tionem, evidenter demonstrent. Atque motus in-
testinus, quem descripsi, continuatus est per duos
ferme menses, nec decrescere cœpit nisi sub exitum
Julii; sic tamen, ut meridie semper manifestior,
quam mane & sera vespera, esset.

In vase *A.* nulla spuma, sed merus mucor fra-
cido odore insignis primo mense observari potuit,
motus intestinus adparuit demum xxviii. Julii, quo
etiam die odor mucidus evanuit, & in acriusculum
atque leniter vinosum mutatus est. Ab eo tempo-
re explicari etiam cœpit *gas sylvestre*, quod simi-
libus experimentis comprobatur est.

In utroque liquore motus intestinus duravit per
bimestre fere spatium vasis clausis, lenior tamen
semper in *A.* quam in *B.* Inter initia Septembris,
quum omnia tranquilla essent, videbatur finita fer-
men-

mentatio. Pellucebant fere liquores, color in *B.* intensior, sedimentum notabile erat; in *A.* color dilutior succineus, sedimenti vix aliquid.

Liquores in retortulis mundis calori intra furnulos ligneos expositi, stillarunt quidem singuli *x.* circiter drachm. spiritus ardentis, sed postea non nisi merum phlegma. Ideoque a destillatione remoti sunt, & servati. Quum integrum per annum vasis clausis steterissent, Julio 1777. sequentia exhibuerunt phænomena.

Liquor *A.* tenacem crassi mucoris crustam conceperat, ut etiam situm oleret. Medio Julii superioris anni destillatus nihil omnino spirituosum dedit, sed fatuum & mucorem olens phlegma.

Liquor *B.* nullum omnino situm duxerat, odorem aromaticum assidue spirans; saporem amarum simul & vinosum exhibens. Ex retorta stillavit non quidem ardentem spiritum, sed tamen phlegma leviter amarum & acriusculum.

Residua steterunt in quiete vasis clausis ad mensem Majum hujus (1778.) anni. In *A.* interea iterum crassissimus mucor natus est, & odor fracidus; in *B.* nullus mucor, odor non ingratus. Dum uterque liquor colabatur, vidimus *B.* cito chartam tranantem, *A.* lentissime. Color in *A.* succineus, in *B.* ex bruno ruber.

Hoc experimentum diligentius Consideranti non potest dubium remanere, quin bilis primum fermentationis effectum, scilicet explicationem gas sylvestris, promoveat, & acceleret. Atque hoc in aliis similibus experimentis aptiori tempore inchoatis manifestius etiam erat. Aptius enim eo magis tempus est, quo calor atmosphæræ major: velut anno proximo, quum simile experimentum

quar-

quarto Junii cœptum esset, vidimus jam tertio die saccharum, aqua dilutum & bile infectum, evidenter bullulas dare & odorem vinosum spirare; dum æqualis sacchari & aquæ copia octiduo post nullam mutationem exhibebat, præterquam quod situm & mucorem in superficie duxerit.

Certum igitur est, in bile esse vim plasticam, qua motum intestinum in rebus ad fermentandum aptis accelerat.

An autem bilis plenam fermentationis absolutionem juvat, AUCTOR interrogat, & veri fermenti instar perficit? An, præter evolutionem gas sylvestris, generationi spiritus ardentis, aut acidi, favet? Nequaquam hoc videtur: quamvis enim in experimento descripto nonnihil ardentis spiritus genitum fuerit, hoc tamen nil probat: primo, quia perexiguum spiritus vere vinosi natum est, & certe longè minus, quam ex adhibito sacchari pondere parari potest; dein, quoniam in aliis experimentis, etsi odor gratus, aromaticus & sapor leniter vinosus a bile fuerint inducti, tamen nihil prorsus ardentis liquidi per destillationem accepimus. Quæ quum ita sint, adfirmare nobis liceat, bilem cum rebus fermentescibilibus, & maxime dulcibus, confermentare quidem hætenus, ut explicatio subtilis & elasticæ materiæ, cui *gas sylvestris* nomen est, cito contingat; sed tamen plenum fermentationis perfectæ eventum non præstare, quin potius vehementiam fermentatorii motus temperare & impedire, quo minus acidum penitus evolvatur; adeoque condimenti alicujus & veluti balsami vice fungi, quo liquores inbuti diutius, quam naturaliter solent, a mucore & corruptione præserventur.

— Hæc ex diatribe C. WILLINK.

In

In *tentamine de succis corporis humani accuratius definiendis & ordinandis*, quod Cl. PANNAJOTA *Fridericus HOUTH* in *Univerf. Lugd. Bat.* 1778. defendit, observata circa bilis indolem continentur sequentia.

Bilem (humanam; nam nil quidem additur, sed in universum de succis humanis agitur) per duos annos servatam, nondum tamen corrumpi ex integro, AUCTOR vidit. Unde, ait, a veritate aliena esse videntur, quæ passim Medici de citissima bilis corruptione jactitant. Si tandem putrescit, vis ejus septica & foetor insignis est, & odor putrido ovo similis. Si in clauso vase corrumpitur, revera periodum alkalinam monstrat, & alkali volatile se adponit. (*)

Bilis recens, calori exposita, multam aquam evaporat, sensimque spissescit; quod remanet, siccum & fragile est; coloris ex nigro flavi, saporis intense amari. Calore illud ductile fit, & liquescit; in igne promte inflammatur; in aqua perfecte solubile manet, & cum ea satis dilutum pristinam fere bilem repræsentat.

Bilis recentissimæ unc. xx. in furno ligneo leni igne expositæ, primo die dederunt ℥ij. cum ℥iiij. limpidi, inodori phlegmatis; secundo die stillarunt ℥iiij. & ℥j.; tertio die ℥iv. & ℥vi., priori similis. Quod quarto die prodiit phlegma ℥v. & ℥vij.

(*) Omisi hic varia, miscelam bilis cum aliis substantiis concernentia, alibi jam adlata. — Vinum sibi admisceri etiam non patitur, quum statim turbulenta evadat. — Olea bilis ex integro respuit.

℥vij. odorem moschi exhalabat. Quinto die ejusdem liquoris ℥viiiβ. stillarunt, magis adhuc eundem odorem spargentis. Nil fere amplius moderato hoc igne furnuli lignei expelli poterat. Majori dein calori expositum inter arenas residuum stillavit spiritum & oleum, quibus salis quædam copia hærebat admista. Horum pondus erat ℥j. Remansit carbo & oleum ultimum piceum, quod ob lentorem nequirit transpelli, pondere ℥iij.

Phlegma propemodum mera aqua est; sal non continet; cum acidis effervescebat; at singularem odorem ab oleo adtenuato adquirere videtur; quod alias longe majori copia sub destillatione deberet prodire, quum certum sit, oleum bili sat magna copia inesse. — Carbo in aëre sensim albescebat; efflorescebat instar sodæ, & pondus ejus aliquantulum augetur: intra aliquot septimanas $\frac{1}{2}$ drachm. adtraxit; ustus & elixatus præbet sal duplex & terram; sal nempe commune & alkali fixum. In terra quædam particulæ martiales reperiuntur.

Ab unc. xxxβ. bilis bubulæ ℥iij. aquæ fortis penitus absorptæ, involutæ; ab ℥x. autem ejusdem bilis absorptæ ℥xxij. olei vitrioli rectif., quadruplo aquæ destillatæ diluti: ut adeo in primo tentamine ℥ij. aquæ fortis, in altero ℥β. olei vitrioli fuerint involutæ.

Substantiæ axungiosæ albæ per acida ex singulis uncis paullo plus ℥j. excussum fuit. Pondus ejus idem fuit, sive acidum vitriolicum, sive aqua fortis adhiberetur; uti ex subducto patet calculo; vi cujus quælibet uncia bilis in priori tentamine dedit grana $33\frac{3}{4}$, in posteriori gr. $33\frac{1}{2}$.

Liquor post hanc præcipitationem a bile residuus, si saturatio accurate facta sit, nullas prædo-

minan-

minantis acoris notas obfert, sed lege artis ad lenem calorem evaporatus salia quædam media præbet; ac primo quidem semper aliquid salis communis, quocunque etiam acido ad separationem utamur; deinde verum nitrum cubicum, si aqua forti, sal vero mirabile, si acido vitriolico usi fuerimus. — Unde patet, in bile contineri & sal culinare, & basin hujus, alkali fixum minerale. — Selenitici aut aluminosi quid in bile etiam sese deprehensisse, AUCTOR ait, & Alii, v. c. *Cel. CADET*, sal saccharo lactis analogum inde obtineri dixerunt. — Hactenus *observata Houthiana*.

Prodiit *Edinburgi* 1777., & nunc in *The-
sauro medico &c. Disputationum Edinensium*, a *Cl. GULIELMO SMELLIO* edito, *Edinburgi* 1779. *T. II. p. 453.* denuo typis expressa fuit, *Dissertat. med. inaug. de Bile*, Auctore *Roberto RAMSAY*. Continentur in ea experimenta cum bile instituta xxx. Ex quibus deductæ subiunguntur conclusiones; quas, hinc inde paucioribus verbis descriptas, hic exhibeo. Bilis non alkalina est, uti putabat *SYLVIVS*, non subalkalina, uti rentur recentiores Physiologi: nam cum acidis non effervesceat, non sal constituit neutrum, nec quidem cum fossilibus ullo modo coit. — Liquor animalis est non valde putrescens, & minus saltem, quam caro, sanguis, vel ejus serum. Ex parte tantum putredini obnoxia est, ea scilicet, quæ ab acidis vegetabilibus adfusa, vel a salibus neutris additis, e recenti bile dejicitur; quæ neque ab aqua, neque a spiritu vini solubilis est. Hæc autem pars bilis, cuæ sola putrescens, magna copia bili non inest. (Partem *resinosam* in bile adsumsit *RAMSAY*; resinam vero,

si genuine loqui velis, in animali liquido non adsumendam, demonstravit *Cel. SPIELMANNUS.*) — Bilis, ut vulgo, vix sapo adpellari potest. Qui proprie saponem dicuntur, ex sale & oleo constant; & saponem præcipui ab acido adfuso resolvuntur in oleum & in alkali, cum acido adfuso coeuntis invenimus: id etiam, quod ab acido e bile recenti præcipitatur, in aqua solubile est, & licet ex bile putrefacta quiddam resinofum, in spiritu vini, non in aqua, solubile ab acidis fossilibus dejiciatur; tamen, ob absentiam alkali, ne quidem in putrefacta bile adparentis, saponem in bile esse, minime concedimus. Viscidum porro quodcunque, olea inretiens, & cum aqua quodammodo confundens, sæpe sapo bilis adpellatur; quam recte, judicent Chemici. Sed in hunc etiam usum neque satis apta videtur bilis, & siquidem foret, inde saltem non magis recte sapo, quam viscida quævis vegetabilia, & animalia saponem adpellari possunt. (Quum, quæ circa thesin hanc *Ramsayanam* adferenda forent, nimis excederent terminos, abs commentario eam dimittere malui; in aliam tamen illa omnia reservans occasionem: illud unicum nunc addens, ampliorem nunc nos habere saponum cognitionem, quam *RAMSAY* habuerat.) — Bilis materie trina constare videtur; aquosa; resinosa, spiritu vini, non aqua solubili; viscida, putrescente, neque aqua, neque spiritu vini solvenda. — Primam illarum meram aquam esse, ex experimentis fluere videtur. — Altera, dum aquæ bilis naturali adhuc inmiscetur, aqua insuper adfusa facile diluitur vel solvitur. In extracto etiam & præcipitato bilis recentis, dum pars
resi-

resinosa cum viscida adhuc miscetur, utraque aqua facile solvitur. Quum vero per putredinem diuturnam resinosa pars a viscida penitus separatur, tum magis pure resinosa videtur, & aqua non solubilis evadit. Dotes peculiare ejus restant examinandæ. — Tertia bilis pars, dum cæteris partibus adhuc miscetur, aqua facile solvitur: ubi vero ab acidis vegetabilibus, vel salibus neutris, a recenti bile deijcitur; vel ubi ex extracto, aut præcipitato, per spiritum vini separatur; in aqua neutiquam solubilis est, facile putrescit, & pars bilis sola putrescens videtur: putrescens ab aqua suslineri quodammodo videtur; sed ab ea facile iterum secedit. — Usus bilis in œconomia animali triplex videtur AUCTORI: 1) ut alimentorum partium aquearum cum oleosis miscellam adjuvet; 2) ut alimentorum vegetabilium indolem acescentem, ab animalium natura alienam, corrigat & in alkalescentem vertat; 3) ut stimulo suo motum intestinorum peristalticum cieat, & ad fæces alvinas promovendas, & demum expellendas, valeat. — Quod ad primum usum adtinet, ait, bilis certe liquor viscidus, uti cætera animalium fluida viscida olei & aquæ miscellam quodammodo adjuvare potest. Sed ad hunc scopum multum conducere bilem, neque experimento nobis constat; neque illud, in quantum fit, ex natura ejus propria saponacea (ex quam itaque?) pendere nobis videtur. — Quod ad bilis usum secundum, prosequitur, satis certa videtur observatio HELMONTII; quod, licet in ventriculis animalium vegetabilibus pastorum acidi quiddam semper inveniatur, post bilis tamen adfusionem, nihil omnino acidi vel in intestinis, vel in fæcibus alvinis rejectis, reperi-

riri potest. Constat, prosequitur, porro per experimenta antea adlata, acidum quodvis vegetabile, a bile adfusa adeo inmutari, ut neque gustui, neque lac coagulando, acidum jam esse, pateat. Alimentorum igitur indolem acescentem utcunque mutabilis; sed, ut nobis videtur, hoc non fit per miscellam partis cujusdam alkalinæ, vel subalkalinæ, quæ in bile nequaquam deprehenditur; nec quidem per admissionem partis cujusdam alkalescentis, vel putrescentis ex bile: nam, licet ejusmodi aliquid in bile esse deprehendatur, ex ea tamen per adfusionem acidi vegetabilis continuo semper præcipitatur. Porro, licet acida vegetabilia a bile utcunque inmutentur, eadem tamen in totum destrui, vel in materiam protinus alkalescentem statim mutari, non videtur: nam chylus, sive lac animalium vegetabilibus pastorum, per horas etiam plures, post adfusionem bilis, adhuc acescens est. — Quod ad bilis usum tertium, plures quidem observationes virtutem bilis laxantem sive catharticam, satis certo evincunt; adeo, ut restet tantum indagandum, unde hæcce virtus. Quum acrimonia quædam amara bili manifesto insit, licet forte vim ejus catharticam ad acrimoniam illam referre. Simul vero notandum est, bilis amarorem in animalibus phytophagis in dulcedinem blandam perpetuo inmutari, & partem illam cum acidis vegetabilibus chylo inmisceri, vel forte chylum ipsum fieri; unde illam partem bilis amaram cum fæcibus misceri & excerni, minus probabile videtur. Potius igitur censendum est, illam bilis partem, quæ per acida vegetabilia præcipitatur, eam vere esse, quæ, in putredinem vergens, intestina præsertim stimulat, & tum sui ipsius, tum

fæ-

faciam alimenti dejectionem, promovet. — Hactenus confectaria ex tentaminibus cum bile institutis a Cl. RAMSAY deducta.

Edita fuit *Argentorati* 1767. pulcherrima Dissertatio, sistens *experimenta circa naturam bilis* descripta a D. J. M. RÖDERER, quam debemus imprimis labori Int. SPIELMANNI. Totam vix non oporteret hic inferere, quum omnia notata sint dignissima, & catena contineantur experimentorum nitidissimorum, quæ compendium non adeo admittunt. Optimum fuerit attulisse ab ipso AUCTORE concentratam, ut ita dicam, recensionem libelli egregii; quod tamen ipsum, coactus operis *Hænniani* limitibus, invitus in arctiores cancellos redigere debui. —

Experimenta chemica in bile demonstrarunt præsentiam *aquæ*, quam quidem & communis evincit liquidorum natura; — *Serum*, cui pars aquæ debetur; *mucosi* quid, quod & HOFFMANNUS & RAMSAY detexerunt; *gelatinosæ* etiam *seri partes* magnam coagulorum bilis partem faciunt; — *Salia varia*: *sal commune* & *mirabile* adsunt; sed hæc non tam bili propria esse, quam potius, eo quod in communi humorum massa obtineant, per accedens videntur accedere. — *Sal acidum*; quod quidem demonstratur ex genio sanguinis, unde secernitur, per analysin confirmato; & productione salis volatilis sub bilis destillatione, nec non ejus in putredinem nisi; qui nonnisi in substantiis acido gaudentibus locum habet. Acidum hoc, quod ex immutato, vi organismi, vegetabili acido oriri videtur, animalis acidi nomine notum, quum vix ullos

in alkalia falia bilis effectus edat, quod in ipsa differtatione latius examinatum fuit, oleo ita obvolutum esse adparet, ut in integra bile nullæ plane acidæ vires existere queant. — An *volatile alkali* in bile adsit, adserere AUCTOR nil ausus fuit, quum experimenta id non exhibuerint. Fossilis alkali, ait, si quid a resoluta vi vitæ salis marini parte forte inest, perinde oleo ita obductum esse oportet, ut suæ naturæ leges sequi non possit, recteque adeo bilis neque acida, neque alkalina esse dicatur. — *Oleum* bilis intrare compositionem, uberime experimenta loquuntur: illud, quum bilis inodora sit, & viscida, unguinosi adscribendum erit. Id ipsum autem, verba sunt AUCTORIS, quum tar- do per vasa, quibus ad hepar advehitur, motu & prævia in cellulis stagnatione moram egerit, & quidem evidenter calido loco; hinc corruptionis quidam gradus in eodem obtinuit: inde bilis acrimonia, amarities, color, & solubilitas in spiritu vini quoad maximam partem pendere videntur. Hoc oleum arctius salino principio unitum esse, evidens est, quum ab aqua bilis solutum teneatur, immo in bile hærens aquam promptissime subeat. Quum autem alkali volatile in bile nullum obtineat, hinc oleum cum acido in eam formam concrevisse adparet. — *Terra* in bile quoque præsto est; quoad maximam partem sero deberi & *calcareis* adscribenda videtur. — *Ferrum* bili nullum inesse videtur, etsi negare non ausim, AUCTOR ait, ejusmodi forsan adesse terram, quæ ignis tortura in ferrum abi- re apta sit. Videtur itaque *bilis* esse substantia ex *acido animali* & *oleo unguinoso* ad certum gradum *rancido* efformata, multa aqua diluta, cui & se-
rum

rum (*) & varium *salium* genus, *marinum*, *mira-bilis* quid, forte & *alkali mineralis* nonnihil & *terra* per animalis œconomix rationes inhærent.

Usum bilis AUCTOR sequentibus, quæ denuo breviora dare debeo, absolvit. Digestionis negotium adjuvat, promovendo motum intestinum; fermenti vices obit; saponis liquidem habeat naturam, hujus etiam, oleosas adsumtorum partes uniendo cum aquosis chylumque inde efformando, edet effectus, & efficacius forte, propter sui acrimoniam. Cibariæ pultis acorem ab adfusa bile corrigi, post HELMONTIUM plurimi, maxime ex *Schola Batava*, Doctores, SYLVII principiis occupati, præeunte BOERHAAVE contendunt, idque variis in morbis observatis inlustrare, & pabulo præcipue in animalium graminivororum ventriculo acido, in intestinis dulci, probare nituntur: sed quum id ipsum facilius ex ulteriori fermentationis progressu & copiosius adfusis liquidis animalibus liqueat; hinc bilis iste usus minus confirmatus esse videtur: morbi, quos adlegant, minime, acorem massæ cibariæ a bile corrigi, sed ab ejus defectu justum fermentationis modum suspendi, potius probant. — Acrimonia bilis stimulans intestina, insignes ad tuendam sanitatem præstat usus. — Fel cavere, ne mucus intestinalis viscedine sua noceat, hiantiumque in tubum intestini vasorum oscula claudat, facile largior, AUCTOR ait; id modo notatum ve-

G 5

lim,

(*) Dixit jam *Cel. COE*: „the bile seems to be made of the oily and saline parts of the blood, intimately united together and mixed with a due proportion of serum.“ *COE*, on biliary concretions, &c. p. 49.

lim, reliqua in intestinum magna copia confluentia liquida suam & hic symbolam conferre: nec plane nulla esse videtur GLISSONII conjectura, quando lubricari a bile fæcum vias, ipfasque emolliri, ut excerni facilius queant, contendit. — Præterea bilis, quum evitari vix possit, quin cum cibis numerosa insectorum ovula deglutiantur, amarore suo efficit, ut exclusa primarum viarum calore animalcula mox enecentur, atque ita metuendæ a nidulantibus in intestino vermibus noxæ præcaveantur. — Bilis siquidem in ventriculum etiam secundum naturam recipiatur, v. HALLER., *El. Phys. T. VII. p. 307.*, ad excitandam ciborum adpetentiam eam facere, non est inprobabile. — Veræ bilis quum in sano sanguine vestigia nulla occurrant; hinc, quidquid de ejus in sanguine usu docetur, invita Natura proferri, nulli dubitamus adserere. Denique omni ex parte officio suo defuncta bilis cum excrementis una, quæ suo colore tingit, & corpore eliminatur. —

Dixerant *Cel. BOERHAAVE*, *BAGLIVIVS*, *HOFFMANNUS*, *GAUBIUS*, Aliique plures, bili competere dotem saponaceam, miscellam oleosorum cum aquosis perficientem. Recentiorum Nonnulli, v. c. *Cl. KUCHELBECKER*, & *SCHRÖDER*, & *RAMSAY* contrariam tenuere partem; & ipse *Inl. GAUBIUS* in recentiori *Pathologiæ* editione *Lugd. Bat. 1763. §. 372.* dubius thesīm antea propositam nunc repetit. — Plura, ut rem hanc dilucidaret, tentamina *Cel. SPIELMANNUS* instituit, repetens partim *Schröderiana* pericula; miscendo bilem bubulam recentem cum lacte vaccino integerrimo, recentissimo; cum eodem decocto, una cum addita bile; cum eodem coacto; cum emulso amygdalarum; cum

cum oleis, unguinosis & destillatis; cumque resinis: enarratis hisce omnibus subjungit AUCTOR: „quid igitur statuendum? Anne *sapo* est bilis? An ex saponum numero est excludenda? In hanc equidem sententiam primum inclinaveram; nunc vero, dum omnia rite perpendo, dubius iterum hæreo: video enim, multa in utramque partem posse disputari, & esse in his ipsis nostris experimentis nonnulla, quæ pro saponacea bilis indole possis interpretari. Præterea, pro varia, quam adsumseris, saponis definitione, vario modo erit pronuntiandum; possis etiam varias admittere saponum species, quæ non omne oleum omnes & eodem modo solvant; neque contemnenda antiqua fama, quam apud Lotrices & varios Artifices a longo tempore bilis adquisivit. Denique, Quis satis certo novit, an non in vita liquidis animalibus peculiaris quædam sit virtus, undecunque profecta, quæ post mortem exole scat? Eapropter consultum mihi videtur, in re magni momenti meum suspendere iudicium, & sagacioribus Naturæ Investigatoribus hanc litem dirimendam relinquere. — Hactenus *excerpta* ex adducta antea *Spielmanniana diatribæ*, *Experimenta circa naturam bilis exhibente*. —

Ipse SCHRÜDERUS in *Programmaticis experimentorum ad veriorem cysticæ bilis indolem captorum sectione I.* (altera non prodit) *Gottingæ 1764.* edita, experimenta recenset XXIII. quæ cum bile admistisque huic substantiis diversis aliis instituerat. Confectariorum inde deductorum ultimum, huc inprimis pertinens, nam proluxa nimium evaderet ipsorum tentaminum relatio, sequens est.

„An-

„ Annon ergo, SCHRÖDERUS ait, cum experimentis minus convenire censendum, illud bili adtributum in chylopoësi officium, quo adinstar saponis illam se habere, tenaciora quæque emollire & adtenuare, pingua aquosis humoribus, potulentis atque ciborum solidorum succis, miscibilia reddere, hisque omnibus in massam homogeneam subigendis inservire, toties adsertum fuit? Quum enim nec ista violentia, qua opus est ad commixtionem aliqualem oleorum & pinguedinum cum bile, vel pura, vel diluta, efficiendam, in officina chyli adhibeatur, neque ea in chylo sit indoles, quæ oleum ex æquali sua mixtione facile dimittat; vix ausim a dissolvente bilis potestate, qua instar saponis in alia lente penetraret, multum efficaciam in conficiendo chylo expectare. Et Quique, arbitror, nisi qui meis forte experimentis omnem fidem denegaverit, facilius mecum sentiet, quum perpenderit, quotuplicia & quam tenacia complura sint alimentorum genera, quæ bene tamen a nobis digeri posse, ex quotidiana observatione quam certissime constat. Non dubito quidem, fore Multos, qui per alia experimenta, etiam sæpe ad confirmandam bilis indolem saponaceam adlegata, quorum vero inter mea hætenus nulla fit mentio, receptam de bilis efficacia doctrinam satis jam esse stabilitam, existiment. Verum, præterquam, quod nec Eorum experimentorum successus, quoad ego comperi, ipseque hætenus pericula feci, meis modo propositis contraria videantur; hoc etiam consuetarium per enarrata mea experimenta satis jam suffulciri crediderim. Sed liceat mihi, ab hisce dubiis hac vice abstinere, quæ alia in scriptione propriis experimentis diluere constitui,“

Hæc

Hæc SCHRÖDERUS : promissum scriptum non prodiit; sententiam suam, uti ex ipsius verbis manifesto adparet, dubius proposuit. Quæ vero SPIELMANNUS ad illius experimenta responderit, paullo ante vidimus. —

Exacte bilem humanam, dein bovillam, examinavit Cel. CADET, cum Cl. PIA : en laborum illorum compendium, quod Cel. VIR operi maximo ENCYCLOPÉDIE inferi curavit, T. V. p. 513. Edit. Ebrodunensis 1771. 4. Referuntur tentamina hæc ipsa & in *Mem. de l'Acad. des Sc. &c.* 1767. p. 333. sqq.

Bilis experimentis adhibitâ, quin vere fœteret, odorem exhalavit fatuum maximeque ingratum. Destillationi ex retorta, calore admoto lenissimo, subjecta magnam primo vim bullularum aërearum dimisit. Obtentum phlegma multum, parum alkali salis volatilis, multum autem olei animalis.

Adfuso humanæ bili acido salis, materies enata salina; calce vivâ superaddita, alkali sal volatile dimittens. Rati fuerunt primum Docimastæ cel., alkali hoc volatile esse posse unum ex principiis constitutivis bilis; obpositum autem dein patuit, constititque, deberi, ut productum, fermentationi putridæ, nascenti in bile tentaminibus dicata, in corpore humano autem non præsentî. Amplius hoc ipsum deduxit Cel. CADET in *binis Dissert. de Bile, insuslri Academiæ Scientiarum Parisinæ exhibitis.*

Quum ægerrime haberi posset *bilis humana* & recens, & quantitate requisita, quum etiam metus foret mutatæ necessario per prægressum morbum mortemque indolis bilis; *fel bovinum* dein fuit examinatum.

Ad-

Adfusæ libris hujus octo uncia quatuor acidi muriatici fumantis : sub ipsa miscella adscendit odor hepatis sulphuris, bilis etiam illico coagulata. Coagulum hoc ipsum post aliquot horas fluidum adeo redditum, ut miscella facillime penetrarit per chartam emporeticam; quod bilis pura, ob visciditatem suam magnam, præstare nequit. Remanserunt in filtro drachmæ binæ materie albæ, gelatinosæ: elota hæc & siccata unice animalis indolis deprehensa fuit; carbonibus ardentibus injecta odorem cornu ambusti dimisit.

Liquor, qui filtrum transierat, evaporationi per aliquod temporis intervallum commissus, materiem præbuit resinosa, calore lenissimo fundendam, inter digitos, ceræ mollis adinstar, cedentem, sigilli inpressi ductus probe recipientem.

Color substantiæ huic saturate niger, lignum album chartamque similem viridi pigmento tingens: (hinc color ille potius adeo saturate virens dicendus est, ut adpareat plane niger.)

Liquidum residuum in vase vitreo calore balnei arenæ evaporatum reliquit sal album, quod, microscopio bono examinatum, congeriem exhibuit crystallulorum exiguarum, acicularium, quarum quælibet tres quatuorve lineas longitudine æquare videbatur.

Obtentum præterea sal brunum lamellosum, verum sal muriaticum; carbonibus injectum, salis nunc dicti in morem decrepitans: colorem indeptum fuit a parte quadam pingui, a qua in encheiresi hac difficulter liberatur.

Inter pelliculas nunc recensitas sal cernebatur aliud, crystallis præditum trapezia æmulantibus. Saporem debiliorem sacchari lactis in lingua excitavit.

vit. Sali huic forsan, Auctor *Cel.* ait, tribuendus erit sapor ille saccharinus, quem VERHEYBENS in bile seseprehendisse dixit, dum, in extractum prius redacta, aqua denuo diluitur.

Acidum nitri, uti acidum muriaticum, dedit cum bile substantiam albam, antea dictæ similem; separata inde etiam materies subresinosa, colore flavo solum a priori diversa. Miratus fuit *Cel. CADET*, non retinuisse materiem hanc colorem illum læte herbaceum, quo acidum muriaticum bilem bubulam primum tinxerat. Repetit phænomeni rationem a phlogisto quodam adtenuatissimo, bilis, una cum aliis, principium constituyente, quod ab acido nitroso sub initium evaporationis eripitur; quum in experimento ope acidi muriatici instituto permanferat.

Obtinuit, experimenta urgens, nitrum cubicum, aliudque sal, quod, microscopio examinatum, aciculas numerosas exiguas exhibuit. Præcipitans lixivium matrem, ab operationibus residuum, oleo tartari per deliquium, nasci vidit crystallos trapezoides; sapor saccharinus earum demonstravit, ejusdem esse indolis cum prioribus, acidi salis interventu genitis.

Nitrum cubicum suspensionem excitavit, magnam partem salis alkalini mineralis inter principia bilis recipi, salque hoc, parti pingui unitum, constituere in corpore animali saponem verum; uti producitur unione salis sodæ, seu basi alkalina salis communis, cum oleo quocunque unguinoso.

Ut suspensionis hanc veritatem exploraret, decem libras bilis bovinæ, quas duodecim cystides felleæ subpeditarunt, igne lenissimo inspissavit ad siccitatem usque; tum in crucibulo calcinationi subjecit.

jecit. Remansit materies carbonacea, odore hepatis sulphuris (une odeur d'hépar) donata, quem producta calcinatione perdidit, abiens tum in cinerem gryseum, sodæ, qualis in commercio prostat, simillimum. Elixiviatus cinis hicce præbuit uncias tres salis alkalini, crystallis, quæ ex sodæ sale obtinentur, omnino analogi: obtentum præterea sal, indolem sacchari lactis referens, verumque demum sal muriaticum. Cinis residuus niger erat, a phlogisto arctius adhærente, ægreque calcinatione avellendo. Moleculas inde quasdam adtraxit magnes.

Sequitur, *Cel. CADET* ait, ex hisce tentaminibus:

1) Bilem humanam, fermentationem putridam, spontaneam expertam, alkali largiri volatile, & cum acido muriatico salis ammoniaci constituere speciem. Alkali tamen hoc ipsum volatile naturaliter in corpore humano existere non videtur.

2) Acida mineralia bilem primum coagulant, mox tamen eam reddunt fluidam, adeo quidem, ut facile chartam transeat emporeticam; quod bilis, qualis in corpore deprehenditur, facere nequit.

3) Salia ante dicta acicularia, acidorum operata, producta sunt terræ calcareæ, majori mino-
rive quantitate cum diversis acidis junctæ; quo ex connubio salia exsurgunt diversa selenitica; insipida enim sunt, ac partim solummodo ægreque ab aqua bullienti resolvuntur. Terra hæc eadem calcarea ortum dedit sententiæ, quam Physici plures circa genesin calculorum biliariorum & stercoralium foverunt. Habetur in *T. III. des Mémoires de l'Académie Royale de Chirurgie de Paris* descriptio analyseos, cui calculum hujus generis subjeci.

HEN-

HENCKELIUS non abs ratione dixerat, absorbentibus terreis Utentes sæpius obnoxios fieri concretionibus calculosis. Primi ordinis Domina, magnesia alba diutissime usa, ante paucos annos violentissimis doloribus adfecta fuit colicis. *Cl. de VERNAGE & LORRY*, ut opem ferrent accersiti, remedia malo congrua præscripserunt: liberata tandem Ægra fuit dolore, calculo, ovum columbinum magnitudine æquante, per alvum reddito. Analysin calculi hujus institui, vidique, componi terra calcarea, cujus moleculæ invicem nexæ erant principio oleoso, ejusdem, quale in bile deprehenditur, indolis.

4) Crystalli figuræ trapezoidis, ex fero bilis natæ, sapore saccharum lactis referentes, multum etiam facere queunt ad genesin calculorum biliariorum; inprimis singulares illæ, quas *Cel. MORAND* prius observavit, superficierum suarum splendore, tum diaphaneitate facile cognoscendæ. Legi poterit in *Mémoires de l'Académie des Sciences de Paris*, 1741. examen rei hujus adtentione dignissimum. Autumat *Cel. MORAND*, principia constitutiva bilis nonnunquam decompositionem in corpore experiri, tum vero, ait, partium decompositarum connubia varia producere sane debent varias concretiones, quin &, de qua agitur, calculi speciem.

Ex omnibus cum bile institutis, antea enarratis, tentaminibus elucescit, eam esse saponem verum, principio aqueo valde divitem; compositum vero præterea pinguedine animali; substantia gelatinosa; basi alkalina salis muriatici; portione quadam salis hujus ipsius; sale essentiali, indole ad

faccharum lactis accedente, terra demum calcarea; cui admistum quid est ferri.

Bilis in extractum reducta successu temporis indipiseitur, in vasis clausis, odorem gratum (douce) moschi. Advertit HOMBERGIUS, bilem fermentationi in loco, solis radiis exposito, commissam per bimestre aut trimestre; egregium largiri remedium tollendis maculis (*tannes*) cutim inficientibus. — Haecenus recensio tentaminum a CL. CADET cum bile institutorum.

Monetur & in ENCYCLOPÉDIE, amarorem bilis non proficisci a sale, sed ab oleo bilis, quod mediante adritu & incalescentia in vasis, quibus conficitur; in filtro (tamis) quod transit, ac in receptaculo, in quo adservatur, rancidum fiat, ac amarum: confirmatur hoc; *Redactor* ait, sequentibus binis observatis. Bilis leonis aliorumque animalium ferorum amarissima est, quum in eorum vasis actionem experiatur fortissimorum agentium (*ressorts*); bilis autem, ex obposito, hominum vitæ sedentariæ deditorum (vasis, visceribus laxis, atonis instructorum) plerumque aquosa deprehenditur ac insipida.

Sufficere hæc poterunt circa præcipua RECENTIORUM tentamina & observata de bilis tum principiis constitutivis, tum crasi eorum; analysi chemica & effectibus succi huius, in œconomia animali insignis sane usus; si legitime constitutus fuerit; plurimorum autem, pessimorumque morborum fonte, si a naturali ac laudabili indole quacunque demum ratione recesserit. Plura cum bile instituta experimenta, quæ, ne in infinitum excurrat sermo, consulto hic prætereo, nosse Qui voluerit, adeat Magni HALLERI *Elem. Physiologiæ*, c. de
bile

bile, ubi catalogum inveniet Auctorum de hac re optime meritorum. Redeamus tandem, facta hac longa satis, sed ni fallor, non inutili forsân Pathologis, Chemicis, Physiologis, digressione, ad textum *Haenianum*.)

Si hanc bilis idæam Vobis præsentem habeatis, mox sensum textûs intelligitis: *bilis excretio nimia per superiora vel inferiora*, nempe vomitu frequentissimo, diarrhæis, dysentëriis, *orbat chylopoëjin primario instrûmento*.

Si bilis per communem ductum infunditur in duodenum, potest superiora petere; potest & inferiora. Sed communi via & lege petet inferiora; nisi vel plicæ intestini duodeni valvulosæ in cavitate, vel ipsum intestinum vario contortu suo, viam ad inferiora præcludant: tum enim sursum per pylorum bilis ventriculûm subibit. Fit sæpe in homine jejunante, ut duodeni via ad jejunum sit inpeditiôr a flacciditate intestini & valvulârûm ad se invicem compositione: unde tunc frequens in Jejunantibus bilis in ventriculûm adscensus. Idem contingit in jejunantibus Ægris, de qua re post.

(In jejûno homine constanter bilis in ventriculûm funditur; MORGAGNI *Adversar. Anat. III. p. 55.* Ob hanc instantiam monuit HALLERUS, *Not. in Prælect. Acad. BOERH. T. I. p. 370.*, non pro singularibus habendas esse fabricas in pilcibus, & quadrupedibus, & avibus quibusdam, quin & in nonnullis hominibus, ubi ductus biliaris in pylorum insertus deprehendebatur. Insignem instantiam exhibuit extispiciûm CAROLI VI. IMPERATORIS, quod refertur in *Cel. BALDINGER*, opère periodico: *Neues Magazin für Herzte.*)

Si bilis illa copiose sæcernitur & evacuatur, incipit sanguis viscerum abdominalium destitui illa ma-

terie, quam hepatis pro bilis confectione subministrabant viscera illa: unde fit bilis debilior, parcius, ac minus colorata.

Sane tunc orbat chylopoësin primario instrumento; quia mox vidimus, bilem solvere, dividere tenacia; oleosa reddere miscibilia aquosis stimuloque suo intestina ad chyli perfectionem excitare.

Hinc impedit coctionem; tam utili instrumento jam carentem; secretionem, quia bilis stimulus agit intestina ad bonam secretionem utilioris, subtilioris partis chyli, utque eam secretam agant per lactea.

Faecum excretionem; quia etiam portio bilis, admixta faecibus, stimulat in homine sano crassa intestina, quo, illo stimulo excitata, alvi promoveant excretionem. Hinc tumidum gerunt abdomen Tales, ut patet in Infantibus, in Frigidis, in Cachecticis, quibus bilis deficit. Hi, ut putant, indigent perpetuo purgantibus, nam flagitant ea continuo a Medico, alioqui solamen non habentes: ast mox a finita purgantibus actione eadem adest alvi pertinacia. Si homines tales nil habent, quod contraindicet, unicum remedium est, per saponacea, amara (salia subsaponacea, solventia, tum & ipsam exhibitam bilem, quam *Cel. BOERHAAVE*, *TRONCHIN*, *SPIELMANN* &c. tanto cum successu in viscerum infarctibus, obstructionibus, adfectionibus a *GALLIS* sic dictis vaporosis, melancholicis &c. exhibuerunt;) bilis subplere defectum.

Producit temperiem acidam. Vidimus, bilem nec acidam esse, nec alkaliam, sed tamen facile putrescentem; inprimis, dum, uti in intestinis, aer accedere liber queat, ubi facile ad alkaliam naturam accedit. (Revocanda circa hoc in memoriam antea adducta cum bile instituta tentamina), quæ mutatio in morbis acutis tam sæpe fit. Hinc acido generando

tunc

tunc esset omnino obposita. Verum, si diæta ace-
scens, acida, copiosa sit, si ea acida moram trahant
in intestinis, nec multum cum humoribus alkalescen-
tibus misceantur; tunc acescentia & acida facile suam
servant naturam.

Ubi nunc deficit bilis, jam ostendi, stimulum de-
ficere, quo excitata intestina agant in contenta; tum,
ut illa partim bene subacta digestaque lacteorum oscu-
la subire cogant; tum, ut residuas fæces corpore eli-
minent: ergo temperies acida sensim nascitur; qualem
Vobis antea, de varia acrimonia agens, descripsi.

Bilis deficit, etiamsi hepar & vesicula fellea se-
cernant materiem eamque copiosam, sed non eam,
quam biliosam vocamus. Sic DIEMERBROEK Alii-
que testantur, se vidisse bilis vesicam plenam materie
excolari, instar aquæ limpidæ. Ipse vidi in Infante
vesicam plenam, sed tantum materie aquosa, vix tan-
tillum amarescente. BRANCHI talem bilem tribuit Hy-
dropicis atque Cachecticis: crediderim, id sæpe ve-
rum esse; sed vidimus in nosocomio in Hydropicis
atque Cachecticis bilem copiosam inpenso flavam; ita,
ut generalis lex non sit. (In Fœmina, enormi hy-
drope ascite laborante, vesica fellea contentam bilem
tum quantitate tum qualitate statui naturali conformem
exhibuit; etsi Fœmina diu fuisset cachectica, & in
abdomine contenta aqua, illa mortua emissa, nam pa-
racenthesin vehementer recusaverat, magna duo vasa
terrea inpleret.) Tamen hoc anno (1759.) bilem ex
vero Hydropico in vesica vidimus excolorem, insi-
pidam.

*Frigus, debilitatem, pallorem, leukophlegmatiam,
deliquia;* qualia omnia in acida temperie descripsi.
Acida enim temperies plerumque habet circulationem
tardiozem; habet & sanguinem, si acidum tantum in

viis primis adsit; vel saltem, si non sit acidum austerrum; solutiorem: hinc explicui Vobis, necessario sequi debere calorem naturali minorem, frigus, vires debiles, pallorem & aquæ in incumbente cellulosa adiposaque membrana collectionem.

Quum igitur totum systema (vasorum) debilissimum sit, & sensim acida dispositio in sanguine nata; etiam cor pati incipit a coagulo sanguinis polyposo; quo tandem pessima fiunt animi deliquia.

Immo, etiamsi sanguis nondum sit acore infectus, tamen temperies est debilissima; ergo & debilissimi nervi; pauci ac debiles in his nervis spiritus non sufficiunt ad connotam sanguinis circulationem restitutamque conservandam: unde in illo statu facilia frequentiaque animi deliquia.

Hæc animi deliquia potissimum observantur Iis contingere, quibus vulnere inflicto, vesica fellea perfossa bilem omnem in cavum effuderit abdomen. Mira tales homines symptomata habent, misereque & brevi intereunt.

(Referre juvat in compendio, ad confirmationem *Haenianæ* hujus sententiæ singularem sane observationem, cujus Testis autopta fuit egregius ac operationes chirurgicas gravissimas insigni dexteritate perficiens *D. MOHRENHBEIM*. — Fœmina malæ frugis in quartum mensem gravida, abortum procuratura sumsit decoctum meracum valde sabinae. Hyperemesis inde magna, per aliquot dies protracta, non sistenda; procuratus abortus; dolor intestinorum summus; vera enteritis; mors. Apertum abdomen exhibuit intestina inflammata; vesicam felleis ruptam, violentia utique emeseos, bilis in abdomen effusa: placenta adcreta ipsi vix non orificio uteri.)

Si vero confecta — — — præcedentia vitia.

(Antequam HAENII hunc in locum adferam commentarios, inferere juvat observationem, a summis in arte Viris frequenter confirmatam, circa pessimos a bile quibusdã in morbis effusæ ultra modum, nascentes in sanguinea massa effectus. Unus instar omnium esse poterit *Cel. HILLARY, Observat. on the changes of the air &c. in the Island of Barbados. Lond. 1759. p. 151. &c.* „*In the latter stage, ait, of this fever (de febris putrida illa biliosa agit, quæ ANGLIS the yellow fever, seu febris flava, dicitur) the blood is so attenuated and dissolved, that we frequently see it flowing not only out of the nose and mouth but from the eyes, and even through the very pores of the skin: also great quantities of black half-baked, or half-mortified blood is frequently voided, both by vomiting and by stool, with great quantities of yellow an blackish putrid bile by the same ways; and the urine, which was before of a high icteritious colour, is now almost black, and is frequently mixed with a considerable quantity of half-dissolved blood.* „*Videri circa hanc rem poterunt & observata Cel. HUXHAM, PRINGLE, BISSET, &c. ac imprimis Dissert. de febris maligna bilios. American. Cel. MOULTRIE.*

Et si vero in *yellow-fever* color corporis flavus sit, unde & nomen primum accepit, eam tamen vero *ictero*, uti Nonnulli voluerunt, non accenseo: rationes in alium locum differre debeo. — Nunc ad Textum *Haenianum*.)

Videtis, inquit, in quot quantorumque morborum intellectum nos ducat hæc de bile consideratio; quod hinc creari vitia mox exposita Textus dicat,

ponte patet; nam vitia illa oriebantur a defectu bilis, nimium per superiora, aut inferiora, evacuata. Perinde autem, quoad hæc vitia, num bilis non conficiatur, an intercipiatur confecta. Ergo ICTERUS modo restat explicandus.

(ICTERUS *Græcis* dictus fuit ab *ικτίς*, mustela sylvestri, oculis flavis, seu colore Ictericorum tinctis. „At supervacuum mihi videtur, *ARETÆUS CAPADOX* ait, *l. I. c. 15. diurn.*, unde id nomen icterus tractum fuerit, explicare, præterquam a terrestribus quadrupedibus; quas *Græci* *Iktidas*, *Latini* *Viverras*, Aliqui *Martes* vocant, & sylvestris mustelæ species est: his enim bestiis oculi hujusmodi colore tincti sunt.“

SUIDAS etymologiam vocis ἀπὸ τῶν ἰκτίκων, seu a *Milvis* deduxit, quod illi quoque ictericiis præditi forent oculis; etsi quidem plures omnino aves, v. c. gallinacei generis &c. talibus gaudeant. Ait *PLINIUS Hist. Nat. l. 30. c. 3.* „Avis icterus vocatur a colore, quæ si spectetur, sanari id malum tradunt & avem mori: hanc puto latine vocari galgulum.“

Latinis dicitur *arquatus*, aut *arcuatus morbus*, a similitudine *iridis*, seu *cælestis arcus*, ob varium colorem. — *Regius morbus* nominari pariter consuevit: *HORAT. Art. poët. v. 453. p. 706.*, *Edit. Bentlei.*

„ Ut mala quem scabies aut morbus regius urget.“
 „ *Leſto etiam utendum est*, curam hujus morbi exponens *CELSUS* ait, *l. III. c. XXIV. p. 185. Edit. HALLERIAN. Medic. Princip. T. VIII.*, & *conclavi cultiori, usu, loco, ludis, lascivia, aliis, per quæ mens exhilaratur: ob quæ REGIUS MORBUS dictus videtur.*“ — Aliam rationem linguæ latinæ

tinæ Parens, & doctissimus Romanorum, MARCUS VARRO adfert; ait siquidem PLINIUS *l. 22. c. 24.*, VARRO *regium* cognominatum morbum arquatam tradit, quoniam curetur mulso. “Potulento, Regum mensis inferri solito. — *Aurigo* a flavo & *subaureo* colore Aliis vocatur, atque voce hac CELSUS & APULEJUS usi fuerunt. Pulchre, etsi quidem non ad leges mineralogicas, aut historico-naturales, dixit ARETÆUS *l. I. c. 15. diuturnor.* „Plane acerbum id malum est, color vero specie horribilis: etenim colore aurum repræsentat: sed non hominem decet, quod in lapide pulchrum fuerit.)

Icterus a GALENO definitur *T. II p. 264.*, bilis refusio in cutim, qua fit, ut superficies tingatur, & lutea fiat, & vitietur cutis, & albæ Illis fiant ventris dejectiones. “Est descriptio potius morbi, quam definitio; addere debuisset: *Et urinæ croceo colore tingentes*; id quod cum albis fæcibus semper observatur.

(Notavit hoc BOERHAAVIUS & in ea specie, quam ob nigricantem, præ saturata flavedine, colorem *melasicterum* vocare consueverunt. „Faciei color ait, *Consult. Medic. Epist. XVI.* ad nigrum vergebat, caput vero & reliquum corpus colore intenso flavo perfundebatur: *in sedibus nullum flavedinis signum; urina autem bile saturata videbatur.*“

Aliam definitionem icteri adtulit ARETÆUS, *l. I. c. XV. diuturn.* „Si bile flava, vitellina, aut crocina, aut nigra cum viridi mista omne corpus a viscere suffusum sit, adfectus hic a Græcis *Icterus*, a Latinis *Regius morbus*, sive *Arquatus*, sive *Aurigo* dicitur.)

Color in his hominibus varie flavet, pro majori vel minori copia bilis, vel pro bilis colore in Alio quam in Alio intensius flavæ, natura, vel morbo (hujusque stadio, gradu, intensitate) vel prout hepatica, vel cystica, vel utraque commista, causam morbi præbent. Color adeo diversus sæpe, ut Auctores distinxerint inter *icterum flavum & nigrum*.

(ARETÆUS l. c. „Dux sunt hujusce labis species: aut enim in flavum croceumque vergit simulque albicat, & virescit; aut in lividum nigrumque declinat.“ Quam divisionem summam passim sequutos Auctores constat; rerum naturam vero æstimanti facile patet, infinitos deprehendi recessus, adjectis intercurrentium varietatum vicissitudinibus. In *Ephemerid. Nat. Curios. Cent. V. Obs. XLI. pag. 61.* habetur historia icteri notabilis Cl. LANZONI descripta. Homo quadragenarius, mediocris habitus, cibis copiosis & potibus generosioribus libere indulgens, pondus cum gravi dolore in dextro latere sensit; hoc declinante tota facies viridi colore usque ad guttur tincta; dextra pars corporis atro colore notabatur, sinistra vero flavescebat; ut notabile fuerit, tres diversos colores in uno Ictérico comparuisse. Urina modo viridis, modo atra; inprimis quæ noctu excernebatur, proxime dicto colore tincta; quæ per diem, viridis. Purgato corpore, ex usu salis absinthii, ad 3i. per plures dies adhibito, colorum facta metamorphosis: facies enim, quæ prius viridis erat, flava facta est, & pars dextra, antea atra, pariter nunc flavuit; læva autem atrum paullatim induit colorem, atque sic post vigesimum diem color unus, flavus nempe, factus est, qui usu syrupi cichorei cum rheo per plures dies una cum usu corticis peruviani, sensim eva-

evanuit. — In *eodem opere*, *Cent. III. Obs. LXIV. p. 145.*, Cl. BEHRENS retulit historiam icteri corporis dimidii in Viro nobili, septuagenario majori; qui ab ira, cui graviori, naturæ vitio, obnoxius erat, factus apoplecticus, tum in dextro latere hemiplecticus, ictero simul idem corporis latus obfidente, atque exacte adeo quasi dividente, ut etiam nasi dextra pars icterica foret, sinistra vero colorem naturalem retineret; haud secus ac in Sene quodam podagrico altera quoque nasi medietas adfecta ab ETTMÜLLERO observata fuit; v. ETTMÜLLER *Colleg. pract. Oper. T. II. p. 844.*: fugatus remediis cephalicis, bezoardicis, tinctura Michaelis, venæsectione, intra quatuordecim dies icterus hicce dimidiatus.

Monendum vero duco hac occasione, metamorphoses quasvis coloris sani in subflaventem, flavum, virentem, prasium, porraceum, isatodem, chloroticum, amurcosum &c. non aptissime semper ictero vero & genuino accenferi: colore siquidem solo morbi genius non semper ac inrefragabiliter determinatur. — A morfu boiciningæ, aut crotalophori (*the rattlesnake*) subin totum corpus flavet, a morfu aliorum quorundam serpentum, imprimis viperarum, idem observatum. — Vidit LANZONIUS hominem, in dextra a fele domestica morsum, dolore tumoreque manus magno adfectum, quæ symptomata excepit color corporis ictericus, quadraginta diebus perseverans. — Imperialium Servorum quidam, GALENUS ait, *de loc. adfect. l. 5. c. 8.*, qui viperarum venationi deputatus erat, quum a vipera morsus esset, aliquanto tempore medicamenta, quibus uti consueverat, potabat, quumque universi corporis color mutaretur adeo, ut porri colorem

re-

referret, accedens singula nobis enarravit: cui epota theriaca quam celerrime color secundum naturam restitutus est. — A venenis variis, ab remediis drasticis purgantibus icterum, seu colorem potius ictericum, sæpius ortum HOFFMANNUS monet, monentque plures Alii &c. Puellæ menostasia adfectæ chloroticæ, toto corpore colore tinguntur ex albente virente ac flavicante misto; idem in Puerperis, vel subflaminata, vel ametra, lochiorum purgatione, nonnunquam observatur; tum in Cachecticis, tum in Scorbuticis nonnunquam, v. NITZSCH de Scorbuto &c. LIND on the scurvy: tum in ecchymosis post lapsum, contusionem, phlebotomen ineptius peractam, sanguine cellulossæ alveolos subeunte; qualem adfectionem in me ipso, errore Chirurgi, lingua quam manu promptioris, diu experiri debui; vel & post nifus majores, e laxatis ruptisque demum vasculis humore prodeunte: in variis speciebus diabroseos, aut scorbuticæ, aut ab humore acri alio enatæ; post nimia dosi, protractiusque adsumtum opium, e. s. p. — In his omnibus casibus corpus plus minusve icterico tinctum est colore, quin tamen in corpore verus adsit morbus regius. Errarunt itaque, qui instantias hæce communi Icteri classi, abs limitatione, exactiorique discrimine accensuerunt, Auctores.

Distinguendum hinc in posterum etiam erit Systematum, Nosographiarumque conditoribus inter *icterum idiopathicum & symptomaticum; cito evanescentem & chronicum; superficiale*, ut ita dicam, & *interaneum; lotio naturali*, aut *flavo intensus*, (nisi hoc a manifestis causis, v. c. rheo adsumto, sit) tum *fecibus naturalibus*, aut *alventibus*, stipatum; nam in his omnibus & typus diversus morbi,

bi, & curatio diversa hinc instituenda erit ratione; (*) atque, his differentiis neglectis, morbus non solum inepte tractabitur, sed & sedes illius & indoles saepenumero prorsum cum alio confundetur.“ Ob splenis quoque vitia, GALENUS ait, *de loc. adf. l. 5. c. 7.* hujusmodi colores eveniunt, sed multo nigriores quam ab hepate: quos, ut clara interpretatione enarrare difficillimum, ita cognoscere facillimum, iis praesertim, qui eos saepenumero conspexerint. Etenim STESIANUS quum

Me-

(*) Bene hinc monuit *Celeb. TONE*, tractatum recensens *Marcardianum*: „Der Unterschied zwischen einer itioopathischen und symptomatischen, einer flüchtigen und anhaltenden, einer mit ungefärbtem Abgange verknüpften oder nicht verknüpften Gelbsucht, ist so auffallend und doch in der Erkenntniß, Beurtheilung, und Behandlung der Krankheit so ausnehmend wichtig, vornehmlich aber in der kritischen Betrachtung der nächsten Ursache derselben so unumgänglich, daß wir nicht ohne Befremden in dem gegenwärtigen Versuche die unterscheidende Bestimmung der Subjecte vermissen. So lange der Verf. nicht näher zeigt, was Gelbsucht heißen könne oder nicht, muß er auch die Farbe der Racheflächen, woran keine eingesogene Galle Theil hat, für eine Gelbsucht gelten lassen. — In einer solchen Bestimmung aber müssen nicht Ursachen und Entstehungsarten, sondern charakteristische Erscheinung; keine trüaliche Nuancen, sondern wirkliche deutlich in die Sinne fallende Symptomen, zum Grunde gelegt werden.

Medicorum iudiciū subiisset, nescio quō pacto eorum non pauci abscessum in ipsius hepate consistere crediderunt. Sed postea, quū longo temporis spatio nihil se in melius proficere sentiret, me quoque vocavit. Igitur, simul atque domū, ubi jacebat; fuisse ingressus, adspiciens Eum, hoc, inquam, scias velim, nullum tibi esse in viscere vitium; sed, quid aliud te molestat, nudatis prae cordiis declarare conabor. Inveni ergo in profundis musculis abscessum, contracto jam purē, in medio spatio eorum musculorum, qui per transversum incedunt &c. Sic etiam Alios complures scitis me notasse, per colorem declarando, modo jecur, modo splenem esse adfectum; nulla audita prae teritorum accidentium narratione, neque etiam per tactum investigato viscerum adfectu. „Hæc GALENUS.

Oculorum albugineæ tunicæ flavedo inter icteri characteres recensetur, atque nuper *Inl. CULLEN* id *abs exceptione* denuo proposuit: verumtamen neque hoc infallibile præbet morbi præsentis indicium. Novi Virutū quendam celeberrimum; Medicinæ Doctorem, qui sanissimus & functionibus corporis omnibus gaudens integerrimis; album tamen oculorum vix non semper flavum habet; oleo olivarum recenti quasi subfustum. Novi quoque Dominam, cui & oculi & facies maximam partem flavent, dum gravida est; utut nec sæcum nec lotii color, nec indicium ullum aliud, icteri vel umbram in corpore prodat præsentem. Monuit quidem *Cel. SIMSON*, tum unice *bili*, ut *causæ*, deberi colorem corporis flavum, si & oculi & lotium hoc colore inficiantur. Tutissimum esse censeo; si pro *icteri veri* præsentia determinanda; præter anamnesin morbum

bum inlustrantem, oculorum flavedo ac lotii, hujusque dos, lintea inficiendi eodem colore; tum sæcum color subgryseus aut albescens, una cum colore cutis, unguum, icteritio; in unum collecta recipiantur. — Accedunt his indiciis nonnulla in quibusdam Ægris alia, quæ, tum prout morbus magis minusve proventus est, tum & pro majori minorive succorum corporis inquilinorum acrimonia cernuntur varia, magisque vel minus manifesta; (*) v. c. pruritus corporis, amaror saporis, vel & chloropia.

(*) Quorum vero nonnulla morbo præfenti cum multis aliis communia; alia illi magis propria, non tamen eo usque, ut morbus absque illis sit αδυνατος; alia illi plane non peculiaris, sed ab aliis fontibus deducenda. Patet vel ex his, quanta requiratur ἀντίθεσις in dignoscendis discernendisque ab invicem morbis; quum non sufficiat, ut obvium quodvis primo intuitu phænomenon adsumatur pro cynosura diagnoseos curationisque morborum, atque tum adfectioni mæle cognitæ pejor fiat medicina. Obviam fors videbitur Quibusdam monitum hocce, quum artis utique comprehendatur fundamentis: ast & obvium adversus illud ipsum hinc inde committi peccatum, docent historiæ Ægrorum, non magis morbo; quam perversa medendi methodo Mortalium numero ereptorum; aut supervenientis demum alterius Medici, rerum interiora penitus rimantis, ope, ægre, si non sero nimis, ab interitu revulsi. —

pia. Dixerunt liquidem Auctores, Ictericis obiecta flava videri: ast, non in omni ictero id obtinere, frequens observatio, imprimis in ictero mox adducendo *leucocholico*, docuit. Hinc in confirmato magis, laxiori potissimum nonnihil tunicarum ophtalmicarum compage, infiltrationem facilius admittente, bileque ipsa adtenuatiori, illud ipsum obtinebit; atque tum, ut *Pliniana* phrasi utar, morbum regium in oculis præcipue mirari est, tenuitatem illam densitatemque tunicularum felle subeunte. — Retulit mihi, dum hæc scribo, cathedræ Vindobonensis medico-practicæ decus, Vir acerrimi ingenii, *Cel. Stoll*, Ictericorum quos vidit, vidit autem plurimos, nullum adhuc de chloropia fuisse questum. In provecta etiam solummodo aurigine ipsa colore flavo tincta deprehenduntur ossa & cartilagine; qualia phænomena *Inl. van Swieten*, in *Comment. ad §. 950.* retulit.

Sed, quod omnino mirum sat est, vidit Vir candidissimus, *Celeb. Stoll* Ictericos, vero & Omnium oculos feriente ictero adfectos, fæces tamen deposuisse a naturalibus colore non abludentes. Ut ergo exin denuo pateat, non unum alterumve solum characterem morbo determinando sufficere, quum vel in certissimis cætera tot occurrant aberrationes. —)

Immo aliquando potest adesse icterus, qui non adpareat. Antea enim patuit, bilem copiosam (nonnunquam) dari in vesica pellucidam, insipidam. Si jam ejus iter impediatur versus duodenum, ingreditur sanguinem, nec conspicitur. Patet hinc saltem, intensiorem vel debiliorem icteri colorem posse differre a bile ipsa; tum secundo, a copia qua reluit in

san-

sanguinem. (*) — Icterus oritur ab inflammato hepate; eoque obstructo; quibus fit, ut viscus illud quadam sui parte turgens poros biliarios comprimât, vel ductum biliarium, vel cysticum, vel communem. Adeo, ut bilis inpediatur versus duodenum fluere cogaturque sese insinuare in sanguinem; id quod semper fit, quando majorem resistentiam bilis invenit versus duodenum, quam ad vasa hepatis. Oportet ergo illam bilem retroagi per poros biliarios & vincere motum bilis hepaticæ ex acinis versus ductum communem determinatæ, intrare venam cavam & sic cum sanguine communicare. In acinis quidem adsunt extremitates venæ portarum; sed est in illis motus à vasis omnibus systematis venæ portarum ad acinos: ergo bilis refluxa; retropressa versus acinos facilius cum venoso sanguine
he-

(*) Hanc vero speciem, distinctionis gratia tum ab *ictero vero flavo*, cujus characteres paullo ante adtuli, tum ab *ictervis diversis nothis* v. c. *Chloroticarum*, *Cachecticorum* &c. &c. de quibus pariter prius jam injeci mentionem, *icterum* voco *arythmum leucocholicum*, quum bili quidem ortum debeat abnormi; characteribus tamen destituatur plerisque, vel, sub initium inprimis, omnibus, quibus icterus chlorocholicus, prasiocholicus, aut melancholicus ab aliis morbis discriminetur. Monendum vero, icterum hunc verum leucocholicum rarius multo reliquis occurrere, tumque insignibus chylopoëseos ac hæmatopoëseos aberrationibus, hasque concomitantibus vitis stipari: ratio ex ipsa ejus indole perspicua:

hepatico communem torrentem venæ cavæ intrabit. Sed præterea *Acta Lips.* 1682. p. 20. & 1683. p. 126., referunt, esse a BOHNIO demonstratum, ex cavo vesicæ felleæ in hepar, in porum biliarium, in intestina; item ex poro hepatico per hepar in vesicam felleam, in ductum cysticum, in intestina, viam esse patulam & facilem: denique & ex poro hepatico in cysticum, ex cystico iterum in hepaticum, patere vias. VERHEYENUS & GLISSONIUS hæc confirmarunt; ut & PERALTUS; qui Tractatus dici potest esse PERALTI & DUVERNEYI: DUVERNEYUS enim secabat corpora dexterrime, & PERALTUS, egregius Pictor, delineabat adcurate demonstrata. — RUYSCHIIUS *Advers. anat.* p. II. negat, in homine reperiri cysternam lumbarem; interim tot Alii invenere: ita potest esse etiam de his viis inter hepar & vesiculam. — Ergo omni ex parte vias invenimus, per quas, via ad duodenum intercepta, bilis cystica & hepatica reflueret in sanguinem possit.

(Omissa controversia anatomico-physiologica de viis illis ab HAENIO nunc enumeratis, quas, ut per transennam solum id addam, nec omnino negare, quum nonnunquam vere adsint; nec in universum statuere, quum sæpe incassum quærantur; hinc potius cum Viro magno admittere velim, eas jam adesse, jam desiderari; &, si adsint, lusu fors naturæ adesse, quum hominès, in quorum cadaveribus omni adhibita cura non detegi possunt, ideo tamen non pejorem vixerint vitam, nec morbo laborarint, qui viarum illarum defectui adscribi posset: ommissa, inquam, latiori disquisitione controversiæ illius, adducam potius nunc ampliorem recensionem egregii operis *Cel. MARCARD, Medicinische Versuche I. Thl. Leipz.* 1778. 8.; qui monstravit, multum abesse, quin

quin diu recepta illa & ab HAENIO, plurimum *Palæophilo*, Aliisque, lubenter adsumta icteri theoria in universum sit admittenda. Facile vero patet, me præcipua hic delibare solum posse capita & seligere ex reliquis *Cel. AUCTORI* observata propria; quum alias diffusa nimium evaderet recensio dissertationis, cujus lectionem multum suadeo Tironibus.

Omnium primo hætenus adsumtæ originis icteri theoriæ, GALENI, PECHLINI, BIANCHI, MORGAGNI, MEADII, SWIETENII, MARQUETTI, BERGERI, BRUNINGII, SYLVII, una cum nostro ævo passim & a Plerisque recepta, enumerantur, recensentur; argumenta earum causam spectantia examinantur; adplicatio fit *posterioris* theoriæ ad genesin icteri a calculis systematis cholopoëctici, ab hepatitide, variisque aliis causis ad expositionem morbi hujus adsumtis. Hæc superficialia solum *sectionis primæ* sciagraphia.

Monuit tractatum hanc recensens, ut videtur merito, *Cel. TODE*, determinandum AUCTORI sub initium fuisse icterum, de quo libellus totus inprimis agit, quum icteri toto cœlo ab invicem diversi occurrant; nec flavus quiscunque plus minusve color *essentiam*, ut ita dicam, unice constituat icteri: sed hoc paullo antea jam tetigi. Communem quidem maxime icteri speciem innuere videtur MARCARD; ast regerit TODE, minime sese reticere velle, vix fore, ut illi theoria nova adplicari maxime queat.

Verrissimum etiam est observatum *Todianum*, differentiam icteri genuini a spurio non sola coloris flaventis crasi absolvi, quum subin verus adsit icterus, non tamen saturatius flavo colore corpus tin-

gens, quam in cachecticis cernitur adfectionibus; infantiam maxime insignem pro hac thesi præbet *icterus leucocholicus*.

— — — Bilem hepaticam resorptam vel ex eo capite ut causam icteri assignari non posse AUCTOR credit, quod nec amaritiem in lingua, nec saturatum colorem, quo cutis, & oculorum albuginea, & lotium tingitur, hepatica bilis, utpote nimis debilis, dilutaque excitare posset: (*) ipsum etiam magnum HALLERUM monuisse, ductu bilifero communi arcte obturato, bilem cysticam diffundi videri per ductus hepaticos, inde in venam cavam, tumque per corpus late reliquum: pro bile enim cystica liquorem eum habendum esse, quum in sanguine, lotio, saliva, muco trachæali, sudore, lymphæ abdominali, pinguedine, tunica cellulosa, tunica albuginea oculi & amaritiem majorem, & colorem saturatiorem deprehendere liceat, quam ab hepatica bile possimus expectare.

Subjungere hic omnino convenit, quæ circa sententiam hanc *Marcardianam* adnotavit *Cel. TONDE*, *Medicinischeschirurg. Biblioth. VII. B. I. St. S. 89. 1c.*, ut nonnihil perfectior reddatur accessio hæc

(*) Ut argumentum debilioris bilis hepaticæ adduxit *Cel. AUCTOR* testimonium *Cl. TACCONI*, qui, ductu cystico obturato, meatu autem hepatico in intestinum tendente aperto, observavit, alvi subsequi obstructionem, ob bilem, quæ tunc solâ adfluere potest, fatua dulcedine instructam, wegen der läppisch süßlichen Galle: concinnius autem hic utique pro läppisch positum fuisset abgeschmackt.

hæc ad *Haenianum codicem*; Eorum præsertim in gratiam, qui vel ob linguæ germanicæ inperitiam utrumque opus legere nequeunt, aut curta instructi sunt suppellectili libraria. — Omnium *primo* notandum est, *Cel. Tode* ait, nil magis arbitrarium esse, quam ut veri character icteri quærat in gradu quodam phænomenorum præternaturalium. Sententia illa: plus vel minus non mutat speciem, omnino etiam circa morbos obtinet, atque in hoc imprimis casu. Ex thesi *Marcardiana*, Ictერი omnes, quibus non prorsum flavent oculi, nec amaro sapore donata est saliva, veri non forent Ictერი! — *Tum*, nosse debet *Auctor*, icterum in multis casibus adscendere intendique per gradus, symptomata etiam ante dicta non sub initium adeoprehendi urgentia, uti quidem per decursum morbi productiorem evadunt. — *Tertio* minime constat, cur non & a bile hepatica, magis magisque resorpta ac deposita, demum flavo colore tingerentur oculi, tinctorium fieret lotium, amaraque redderetur saliva! Ipsa utique cystica bilis genealogiam suam a bile repetit hepatica. — *Quarto* certissimum prorsus est, colorem, consistentiam, & acedinem cysticæ bilis non uno eodemque semper gradu donari. Succus nostri vix non omnes metamorphosisibus maximis obnoxii sunt, ne ipso quidem excepto statu sano. Circumstantiæ saltem, quibus vigentibus nascitur icterus, magnam habebunt actionem in confectionem bilis hepaticæ. Quam non v. c. speciem obfert bilis, dum homini validiori frequentiorique, intra brevius temporis intervallum, emesi subvertitur ventriculus? An non itaque maximo jure suspicari licet, bilem secretam ab hepate, spasmis, calculis, hepatitide, sympathica affectione &c.

laborante, alterius fore indolis, hinc forsan & profundioris coloris, quam dum naturali constituta est ratione? — *Quinto*, viæ, quas emetiri debet fel hepaticum, undiquæ oblitæ sunt vasis resorbentibus, quæ naturali sane ratione, eodem modo, uti vasa resorbentia cystica, bilem recipiunt cysticam, bilem recipere posse debebunt hepaticam. — *Sexto*, deprehensum fuit, tumores hepaticos, quibus obstructæ fuerunt semitæ bilis hepaticæ, ortum præbuisse subsequenti ictero; qualem instantiam *Cl. COLIN DRUMOND* in *Dissert. inaugurali Edinb. 1750.* defensa; adduxit. Susplicari præterea plurimum licet, hepatitidem etiam ex eo capite, quod ductus bilis hepaticos comprimat, genesin fovere icteri. — *Septimo*, datur quædam species icteri, manifesto enascens a bile, magna nimium copia intestina inundante: hujus generis icterus excipit nonnunquam hyperemeses, tum & febres biliosas, atque sic dictam choleram. (An non huic accensendus est icterus verus, pertinax, excandescens nimium ira mentis æstus nonnunquam sequens?) In omnibus hisce morbis eo certius sequi solet icterus, quo minus per alvum subducitur bilis. Hæc vero icteri species, nascentes a bile in ipsis intestinis resorpta, quarumque existentia demonstrari valet, etsi ipse *HALLERUS* eam revocet in dubium; hæc, inquam, omnes icteri species *Cl. MARCARD* hic loci prorsum intactas dimisit, dein autem extimis solummodo labris adgressus fuit. Bilis nimia copia effusa nullatenus ex sola advenire potest vesica; sed maximam partem bilis est hepatica. — — — *Octavo*, subpetunt exempla verorum icterorum, ubi cystis fellea aut plane cernebatur vacua, aut hydatidibus (*Bläschen*), vel & latice solummodo aquoso (uti antea jam ex

NIO dixi) referta erat. In Ictérico quodam prorsum desiderabatur vesica fellea. Quæritur jam, an bilis cystica pallida, excolor, fatua, aut plane deficiens, generare queat icterum? Anne operose potius inquiramus subterfugium; an potius viam sequamur ante oculos positam? — *Nono*, occurrunt subin congestiones majores bilis in cystide, abs omni sensibili simul præsentē ictero. — *Decimo*, si quidem Scriptorum quid hic valeat auctoritas, pro ictero a bile hepatica quoque oriente stat, Auctoritas *Cl. MONRO junioris*, qui bilem hepaticam pro communi maxime fonte habet icteri.

Argumentis hisce propositis vela contrahit *Cel. TODE*, sufficientia illa sibi videri innuens, quibus moveatur *aletophylus Auctor*, ne in dubium revoceat possibilitatem icteri a bile hepatica oriundi. (*) Et Hercle quidem, utut sententia *Marcardiana* naturæ superstructa videatur, nec precario solum hypotheseos cuiusdam fundamento innixa; minus tamen, quæ præter illam in medium adferri queant, omnia, quorumque partem præcipuam *TODE* tetigit, *AUCTOREM* ob oculos habuisse liquet, quum alias omnino

I 4

&

(*) In textu vero germanico vitium cernitur typographicum, sensum plane reddens obpositum; doch ich breche ab, und glaube unserm wahrheitsliebenden B. Gründe genug an die Hand gegeben zu haben, die Unfähigkeit der Lebergalle zur Hervorbringung der Gelsucht in Zweifel zu ziehen. Ponendum omnino erat: — — — nicht in Zweifel zu ziehen. —

& objectiones ipsas & earum solutiones adtulisset. Multa, quæ subito, aut intra breve temporis intervallum, fieri minus queunt; vel certe fieri, minus manifesto cernuntur; dubio omnem præcludunt locum, dummodo sufficiens accesserit mora: is vero, si unquam, sane dum de ictero a bile hepatica oriundo agitur, casus est. Extra controversiam positum habeo, nasci icterum, modo a *Cl. MARCARD* eleganter proposito, nasci a bile cystica, nasci hoc modo, hoc ex fonte frequentissime: verum enim vero, nasci illum non ex hoc fonte unico, nec eo unice modo, ex æquo pro certo habeo. Rationes vix esse opus, ut adducam reor; quum præter eas, quas *Cel. TODE* adtulit, phænomena icterorum plurimum, indolemque bilis hepaticæ & cysticæ æque, ac morborum jecinoris decursum & exitum, penitus rimando, plures insuper, nec minus graves, queant detegi: unde simul patere poterit, icterum frequentius omnino ex ortu a *Cl. MARCARD* assignato, quam quidem ex theoria *Monroana*, paullo antea a *Cel. TODE*, No. 10 adducta, prognasci: æque enim excessu peccat sententia, quæ nullum, quam quæ omnem, aut vix non omnem, icterum, a bile repetit hepatica. — Sententiam autem *Marcardianam* circa ineptitudinem hepaticæ bilis ad producendum icterum, pro varia relatione, tum refellit, tum plurimum restringit instantia icteri, quem distinctionis gratia *leucocholicum* vocavi, cujus *HÆNIUS* fecit mentionem, quemque parum adeo, ac *prasiocholicum* aut *chlorocholicum* aut *melancholicum* licet negare, ni contra autopsiam pugnandi sit animus.

Minus demum subscribere possum abs exceptione ulla aut restrictione, ex dictis, conclusioni, quam
Cl.

Cl. VIR capiti septimo sectionis primæ adjunxit: sequela, ait, omnium in hocce capite sub examenrevocatorum foret, subponendam esse, ut causam, bilem veram cysticam, sanguini admistam, in omni ictero magis notabili, ubi nempe saturatior adest color cutis ac oculorum.

Audaci & analogiæ omni obposito consilio *To-DE* ait, negasse *AUCTOREM* theoriæ novæ, resorptionem bilis cysticæ fieri in alio ullo loco posse, quam in sola cystide fellea: demonstrandum id Negaturo fuisse impossibilitatem, aut summum a verosimilitudine recessum, sententiæ statuentis obpositum; demonstrandum fuisse, in aliis locis non subpetere analogicos resorptionis adparatus, in ductibus biliferis nulla adesse vasa resorbentia e. s. p.: hæc omnia neglexit *MARCARD*, admittens tamen, nasci posse icterum, a resorpta in cavo abdominali bile, quæ per tunicas cystidis antea sese subduxerat.

Adfert *Cl. MARCARD sect. I. c. 9. & rel.* cogitata sua circa adplicationem theoriæ hætenus receptæ ad genesin icteri a calculis systematis chylopoëctici, ab hepatitide, e. s. p. Mitto nunc considerationem calculorum; quum dein horum recurat in codice *Haeniano* mentio.

Hepatitidem partem hepatis concavam obsidentem, tumore excitato ductus biliferos angustiores, ac, si malum fuerit magis provectum, demum impervios reddere, hinc constantem icteri causam præbere, monetur. Dum, ait, adsumitur, bilem & in hocce casu per hepar penetrare in sanguinem, uti quidem, qui circa hoc negotium sententiam suam fassi sunt, adsumserunt Omnes; tumor ductum communem vel unice, vel maximam sane partem, comprimet, aperto interim manente ductu hepatico.

Naturæ vero congruum magis est, sub inflammatione partis concavæ jecoris in ductum potissimum agere tumorem, qui hepatis, ut sedi inflammationis, est proximus; ut adeo arctissime obturatus foret ductus hepaticus loco supremo; minus, ubi jungitur cum ductu cystico; minime demum angustus redderetur ductus cysticus atque communis, inprimis loco intestino proximo. Hinc jure plane merito suspicari liceret, in ictero, qualis passim evenire solet, bilem cysticam via multo faciliori petituram esse intestinum, quam quidem hepar; quod viscus accedentes ductus aliunde sunt angustiores.

Dixit VALCARENGHI, de hepatitidis speciebus agens, tumorem hepatis veram esse causam icterici, dum morbo huic jungitur; tumidum enim hepar, quale inflammatum est, utique compressurum esse ductus biliferos, atque hinc retenturum ipsam bilem. — Regessit ad hæc cogitata MARCARD, in morbis chronicis hepar nonnunquam intumuisse enormiter, atque magis multo, quam a sola inflammatione intumescere unquam queat, quin tamen vel umbra ullius adfuerit icterici, hinc credibile non esse, præsentem modo hepatitide tumorem hepatis causam præbere ictero.

Observat denuo circa hunc locum *Cel. TOMB*, nimium dixisse *Cl. MARCARD*, dum in illico adductis casibus *ne umbram quidem* (nicht der geringste Hauch) coloris ullius icterici adesse unquam, adferit. Diversitas omnino intercedit inter colorem ictericum perfectissimum, saturatum, & superficiale solum, dilutum, pallidum, qui tamen prorsum abesse, ideo dici nequit. — Ast notandum hic, hepatitide præsentem, ac tumore hepatitidem concomitante, diversam subin rerum esse faciem, quam tumen-

te ob morbum chronicum hepate; quod inflammatio hepatica propagetur in ipsos usque ductus biliferos, hinc ductibus ipsis hisce inhæreat morbus, a sola compressione mechanica, quæ hepate in chronicis tumente fit, utique diversus, auxesin abs dubio symptomatum, moli soli tumidi jecoris ascribendorum, adferens. (*) Adfunt & in ductu communi cystico steatomata nonnunquam, tumore simul præsentente, obstructione, induratione, aut scirrhositate hepatis majori minorive; quæ sane, vivente Ægro, detegat mihi magnus Apollo; quæ tamen Medenti in memoriam revocanda sunt, ut in dubiis ac obscuris aliqualem adfundant lucem, uti v. c. in memoriam revocandæ sunt angustationes viarum omnes, quæ per mucum glutinosissimum, spalinum, sarcomata, calculos, &c. queunt excitari. —

Adfert tum *Cel. MARCARD* amplius descriptam historiam morbi ac extispicii IctERICI, quæ inprimis causam

(*) Adtulit *Cel. TONE* ex Diatribæ *Cl. DRUMMOND* locum sequentem, icterum natum ab inflammatione tali symptomatice in Hepaticis influentem. „ Licet hepatitis, seu acuta hepatis inflammatio, sæpe contingat, & quidem facile subsistere possit sine ictero; Nemo tamen, ut opinor, inficias ibit, quin, si inflammatio ad membranas ductus cystici aut communis propagetur, aurigo etiam inter reliqua morbi hujus symptomata evenire possit. Tunicæ enim ductuum inflammatione tumescentes, meatum intercludent; adeoque bilis egressum in duodenum intercipient.“

causam Illi subpeditaverat, ortum morbi hujusce exactius aliquantum disquirendi. Homo sanus, sexaginta septem circiter annos natus, a Lictore verberibus & contusionibus male mulctatus, pessime, eadem die, inde habuit: uti Adstantes Auctori retulerunt, febris correptus fuit acuta, frequentiori emesi, delirio non interrupto: cutis colore dein tincta obscure flavo; die morbi quinta mors malis imposuit finem. Cadaver aliquot post mortem diebus primum lustratum; præcipua extispicii fuerunt sequentia.

Superficies corporis totius saturate flava; minus tamen nonnihil flavebant extremitates inferiores. Princeps læsio in occipite, in angulo superiori futuræ lambdoidis, ubi cutis multum tumebat, dissecta copiosum laticem sanguinolentum, nonnihil coagulatum, dimittens, cranium ipsum tamen non fractum. — — — Omentum plurimum flavum, cætera non læsum. Lien prægrandis, attamen sanus. Jecur subdurum: facies convexa maximam partem colorem naturalem retinuit; concava vero obscure virens, vix non nigricans. Color hic ad duas fere lineas subiit substantiam jecinoris, propagatus etiam nonnihil ultra marginem ejusdem, quadrantem circiter pollicis faciei concavæ hepatis occupans. Cystis fellea magna; turgida; partes eam ambientes ab eaque tactæ, manifesto satis tinctæ. Canalis cysticus crassissimus, & fungosus; ostium ejus angustissimum, ut pressione validiori nonnisi tantillum quid, guttam unicam nondum constituens, exprimi potuerit. Crassum hoc ipsum erat, tenax; coloris naturalis quidem, ast obscuri multum, odoris non insoliti. — — Liquor pericardii omni nota flavus.

Diebus tribus elapsis scatulam, cui cystidem felleam interea temporis commiserat, quum aliquot milliaribus transferri debuerit, aperiens, vidit linteum, cystidem ambiens, humidissimum, coloratum; utut canalis adhucdum firmissime foret constrictus, tunicæ etiam nullam plane expertæ fuissent læsionem. — Per easdem bilis transudare perexit. — Elapsis demum aliquot diebus cystide dissecta in conspectum prodiit bilis spissa, colore laudabili, odore minime putrido, prædita; ductus membranæ non ténues adeo erant, uti alias esse adsolent, sed fungosæ, subcarneæ; crificium angustissimum; cætera nec calculus, nec præternaturale aliud quid præfens.

Dubio carere omni, subnectit AUCTOR, morbum hunc lethalem fuisse hepatitidem, cujus sedes in parte concava hærebat jecinoris; causa vero, uti sat videtur probabile, maximam partem debebatur læsioni capitis, quod analogicis instantiis ex C/ HÜCHSTETTERO, SCHMUCKERO, BIANCHIO confirmat; addit tamen, nequaquam pervicaciter sese negare velle, animi pathemata ob inlatam vim, ad genesin mali facere quoque potuisse. Monet demum, in hoc casu sane nil bilis retrogredi potuisse in hepar, quum pressio antea dicta, vix tamen quid expellens, major multo fuerit, quam quæ a partibus ambientibus excitari ulla ratione potuisset. Theoriæ, ait Addicti, quæ in ictero bilem per hepar in sanguinem venire statuit, adsumere in hocce casu unice poterunt, icterum hunc natum solummodo fuisse a bile hepatica non excreta. Dubitare me tamen circa hæc multum & non abs gravi ratione, facit color saturate flavus icteri: in cadavere hoc eodem saturate adeo omnia tincta erant, ut causam

nun-

nunquam a bile hepatica repetam. — Attamen hoc jam antea disquisitum fuit.

MEAD casum refert icteri majoris, orti post contusionem dextræ corporis parti inlatam: hepar post mortem cernebatur sanum; cystis autem fellea ne valide quidem compressa guttulam dimittebat bilis; ductus adeo coarctatus, ut nec exilissimus inmitti potuerit stylus.

Adplicat jam AUCTOR theoriam expositam causis diversis aliis, ex quibus deduci solet icterus: optime sub initium animadvertit, spissitudinem nimiam bilis cysticæ ac tenacitatem abs ratione, utut frequenter, pro causa icteri haberi; quum, si spissum nimis fel sit, quam ut vias suas naturales queat subire, reverti etiam per hepar plane non possit; nam, si pro vasis amplioribus fluida satis non sit, quo pacto pertranlibit canaliculos multo angustiores, in quos dirimitur in hepate ductus hepaticus? Notat vero hic *Cel. TODE*; nondum satis perspectam esse rationem, qua suscipiatur liquidum stagnans: observasse *Cl. LIND*, sanguinem, omnino non ex integro fluidum, egressum in scorbuticis, nonnunquam simul & semel denuo resorberi. — Monete circa convenit, nunquam negligendum esse in horum examine discrimen, inter crasin naturalem, discrasiamque præternaturalem diversorum humorum corporis intercedens: quum v. c. nonnulli, ad gradum quemdam spissitudinis deducti, adeo nunc sint visciidi, ut vix, aut plane non, *in corpore* resolvi, pristinæ fluiditati restitui, hinc resorptioni apti evadere, queant. Sed de his alibi latius.

Observat *TODE*, AUCTOREM icteri ab hydatidibus oriundi, cuius in III. *Tomo Bibliothecæ medicochirurgicæ* adfertur instantia, non meminisse. —

Fre-

Frequentiorem omnino adesse occasionem causam hancce in cadaveribus detegendi, quam ut prorsum sicco transire eam liceat pede, ipse censeo.

Glandulas tuentes, aliasque excrescentias ductum communem obserantes etiam ut causam regressus bilis cysticæ in hepar spectari posse, *Cl. MARCARD* fatetur.

— — — Vidit *TARGIONI TOZZETTI*, hydrophobiam, absque morfu ullo canino natam, insequutum icterum, quo durante *Æger* demum mortuus. Hepar naturali majus: ductui vero cystico inhæsit vermis, ductum ex integro replens, hinc exitum bilis cysticæ ac in hepar adscensum, utique inpediens. Nescit *TODÉ*, observationem hanc nil tamen pro nova theoria facere — Verum id quidem, ast cautos nos reddit, ac in eruendis causis morborum circumspectos & adtentos; quum ea denuo demonstretur, quam abstrusi sæpe in corpore lateant morborum fontes, qui haud raro sufficientes satis ob rationes incurabiles sunt, sed & eam nonnunquam ob rationem, quod medendi Artifex vix ultra extimam in causæ typique morbi examine penetrarit superficiem, aut *symptomatum* potius, quam *causæ* morbi, instituerit curationem. —

Cel. HEBERDEN spasmi icterum ortum debere posse, revocavit in dubium, etsi *SYDENHAMUS* thesin hanc jam ut demonstratam adsumserit; illorum vero in locum calculos substituere conatus fuit, ut causam arquati morbi genericam; quorum *SYDENHAMUS*, hic, ut *AUCTOR* monet, pariter excessu peccans, plane nunquam in suis operibus hoc sub respectu meminit. — Attamen nec demonstravit ulli, *SYDENHAMUS*, calculos malo huic ortum dare posse, nonne!

COE eandem vix non, uti HEEBERDEN, fovet sententiam; calculos pro causa morbi principe habet, spasmos vero pariter causis illius non accenset. Prætereo hic latius nonnihil examen argumentorum, quibus COE thesin suam defendit, quibusque MARCARD eam inpugnat; propriamque statuminat; quum aliunde in subsequentiis denuo recurrat expositio rationis, qua spasmos icterum producere posse, AUCTOR noster statuit. Observat hic, nil obesse, quin spasmi, quibus tot in omnibus aliis motibus corporis ac humorum producuntur aberrationes, arhythmum etiam in cursu fellis excitare queant; experientiam ipsam nobis exhibere plurimos casus icterorum, ubi vix evitare possimus, quin spasms tribuamus ortum. Icteros hic imprimis excitat Hystericarum, SYDENHAMO descriptos, ubi calculi nulla adest suspicio: tum & icteros, animi pathemata subitanea, validiora excipientes. Vidit sic in Domina, quæ una cum curru Albi jamjam mergenda erat, ob terrorem violentum post aliquot dies oriri icterum; denuo evanescentem, quin excretus fuisset calculus, nec amplius redeuntem; nulla etiam remanente præternaturali circa hepar adfectione. Jungit observationi huic *Cel. TODE*, in recensione, aliam Juvenis cætera sanissimi, qui ob perditam magnam vim pecuniæ in olla fortunæ (*Lotterie*) confestim factus fuit ictericus. *Cel.* etiam CULLEN, MONRO ac DRUMOND icteros ejusmodi subitaneos esse possibiles, ex observatis practicis testantur.

Icterum sequentem morsum animantium venenatorum, imprimis viperarum, a spasms pariter MARCARD repetit. Dixi vero jam antea, distinguendum esse inter verum icterum, & colorem quemvis corporis vel totius, vel partium quarundam, flavicantem, virentem, prasinum, &c., utut ex integro

gro non negari, morsus tales ob adfectos nervos sequi posse spasmos, exque his & nasci icterum.

In colicis spasmodicis frequentius jungitur color corporis ictericus. Adfert Auctor observationem icteri, dolores colicos, frequentius redeuntes, nunquam non stipantis, & sanatis illis non amplius percipiundi; tum aliam, ubi icterus cum febris certis intervallis alternabat: in neutro autem casu indicium ullum calculi, cui symptoma hoc ipsum potuisset adtribui.

Circa epidemicos icteros monetur, subpeditare eos ipsos argumenta sat gravia pro genesi icteri ex causis spasticis, vel saltem demonstrari illis, calculos non pro causa morbi hujus catholica posse assignari. Confirmare nititur Auctor thesin suam observatis ac adsertis *Cl. BRÜNINGII, WAGLERI, HERLITZII* de icteris epidemicis, qui maximo jure dictis causis adtribui posse videbantur. Adfert etiam icterum illum celebrem epidemicum, quo adficiebatur exercitus hispanicus Genuæ, in quo tam proficiuus deprehensus fuit usus saponis, ut omnis omnino, qui in urbe haberi poterat, fuerit consumptus, ne eo quidem excepto, quo indigebant Barbitonfores. Animadvertit hic denuo *TODÉ*, respiciendum potius esse ad vitiosam cholopoësin, nimiamque bilis effusionem in morbis hujuscemodi, qui fors nonnisi febres biliosæ fuerint. — Animadversio hæc eo majori fundamento inniti mihi videtur, quum frequentiora observata practica docuerint mihi ipsi exhibuerint colorem corporis ictericum, ubi nullam aliam, adhibita licet omni exacto scrutinio, detegere poteram causam, præter vitæ genus miserum, male sanum, cacochymicum. Vidi & nasci icterum, ac nonnunquam abire in hydropem, vel alia vice in febrim veram castrensem;

aut classariam, in hominibus, nunc in locum paludosum, humidum translatis, quum alias aëri sereniori, puroque forent adfueti: pro veritate posterioris huius observationis eo magis respondere possum, quum, ut *Inl. ZIMMERMANNI* phrasi utar, in proprio corpore eam experiri debui, ubi ex Aliorum relatis eam lubentius didicissem. — Vidit *BISSET* in febris flava (*the yellow-fever*) Mortuis in insulis Indiæ occidentalis, cutim colore eodem saturate flavo, in viridem tendente, tinctam, quo ipsa bilis, cystide contenta, cernebatur instructa. Facili negotio fel ex cystide per ductus suos in intestinum exprimi poterat, ut adeo nulla adforet obstructio; magna etiam ejus copia reperiebatur in jejunio ac dodecadactylo, quo latice intestinorum horum non solum tinctum erat cavum internum, sed & ipsarum membranarum illarum penetrata substantia. Colorem flavum repetiit hic *Cel. WARREN* a diacrisi putrida globulorum sanguinis rubrorum. Regessit autem *BISSET*, natum colorem hunc eundem a bile, sanguini admista; quod scilicet bilis, in intestinis præsentis, quid subierit vasa resorbentia, atque horum ope penetrarit in ipsum sanguinem; cæterum emesin, morbum hunc stipantem, maximam partem fecisse ad genesin icteri, quum ea multum bilis ex cystide in hepar, atque tum in massam sanguinis, pulsum fuerit. — Monet circa hæc *MARCARD*, expositionem hancce *Bissetianam* sibi pariter non ex integro satisfacere; causarum tamen illico adlatarum priorem facile omnino obtinere potuisse largitur. Objecit illi *Cel. TODE*, non revocasse hæc monentem in memoriam, talis icteri originis sese nullibi antea in Tractatu hoc injecisse mentionem. — Sed adserere utique nunquam poterit

terit AUCTOR, icterum a nulla alia, nisi spastica, nasci posse causa.

Argumentum demum catholicum adhuc adfert MARCARD adversus theoriam, qua statuitur retrogressus fellis per hepar in sanguinem. Regressus hic, ait, non ex facili adeo fieri videtur, uti quidem adsumtum fuerat, dum ductus communis est obstructus; deprehendimus quippe sæpissime, & plerumque in hoc eodem casu, cystidem ob magnam, qua turget, fellis copiam, ad insignem magnitudinem expansam: instantias adducit ex VAN SWIETEN & VALCARENGHI. Manifestum, his addit, est, in hisce calibus bilis regressum per hepar non fuisse magni momenti, nec facilem: agere saltem tum debuisset impedimentum tanta vi, quanta requiritur, receptaculo, quale cystis fellea est, eo usque expandendo.

Sed undenam, quærit ad hunc locum *Cel. TODE*, nascitur vis hæc ipsa expandens? Certe non a vi retropellente ductus communis, sed a secretionē, ac collectionē continuata bilis, uti analogica instantia expansionis vesicæ urinariæ pariter docet. Refluxum bilis in poros non adeo difficilem esse, demonstravit etiam SAUVAGES in *Nosologia methodica* ex rationibus physicis. — Quum jam *Cel. MARCARD* rejicere velit, prosequitur *TODE*, theoriam a Viris magnis receptam, enervare debuisset argumenta anatomica adeo gravia HALLERI, HUNTERI, MONROI, MECKELII. Demonstrare oportuisset, transitum, quem Anatomici nunc dicti facilem adeo deprehenderunt, ex ductibus biliferis hepatis in venam cavam, locum quidem obtinere posse in cadaveribus, non vero ex æquo in homine vivo sano. Demonstrandum fuisset, vasa lymphatica

tica viarum tum subtiliorum, tum grandiorum biliarium nonnisi bili pallidiori (blasse) recipiundæ apta nata esse. Evincere pariter debuisset, careie ductum hepaticum & communem vasis resorbentibus, ac impossibilem esse icterum verum, sæpiusque occurrentem, oriundum a bile in ipsis intestinis resorpta. Quodsi argumenta hæc omnia theoriarum, a se vel in pugnatarum vel non satis dilucidatarum, antea refutasset, tum rerum Periti theoriam novam avidè essent lecturi, aut saltem disquisitione exactiori dignam judicaturi. Hæc *Cel. Tode*.

Nunc ad alteram tractatus Marcardiani sectionem, quæ complectitur tentamen theoriæ novæ geneleos icteri.

Constat Omnibus, qui cadaverum interfuerunt sectionibus, a vesicula fellea tingi posse partes, adjacentes colore bilis, quam illa continet, quæ etiam tunicas cystidis prorsum penetrat: vidit tamen Auctor in Infante, externe quoque maculam rotundam flaventem, quæ demum, aperto abdomine, cystidi felleæ deberi cernebatur, longiori solito, hiuc sub margine hepatis prominenti, ac in abdominis integumenta vim tingentem exferenti. Similem instantiam legimus in *Actis N. C. 1672.*; aliam adnotavit REVENHORST. (Tertiam Ipse adjungere possum, visam in cadavere Fœminæ atrophicæ; ubi macula phialam, quali pro potu Coffeæ utimur, maiorem ambitu æquabat, & saturate satis viridem obferebat colorem.)

Patet hinc, bilem in statu naturali jam penetrantissima gaudere indole, quum per tot incumbentia cystidi strata externam superficiem tingere valeat. *Cl. Auctor, DE HAEN, FRIBERG, STAL-*

STALPART VAN DER WIEL, TULPIUS, MEDICUS, in hominibus, WEIKHARD in phasiano, grassante inter has aves epidemica lue, (ego in lucii & carpionibus sæpius, tum & in gallinis,) bilem per tunicas cystidis, plerumque tumidissimæ, transfudasse observarunt. Cystis poros habet a fabrica ejus organica diversos, & corporibus omnibus solidis proprios: per hos omnino, adnotante etiam *Int.* HALLERO, bilis transfudans cavum abdominale: subire videtur. — Dum jam bilis præternaturali conditione penetrans magis fit, dum tunicæ cystidis varias ob rationes transitum facilius admittunt, dum vis mechanica in cystidem agit; bilis ex vesicula stillat in cavum abdominis, ibi a vasis resorbentibus excipitur, sanguinem subit, creat icterum. Via hac mihi videtur, AUCTOR ait, icterus omnino in natura produci. (Verum & mihi illud videtur; attamen, non hac sola via icterum produci, & thesin illam non pro catholica adsumendam, ex æquo pro certo habeo. —)

Cl. BRETTING AUCTORI scripsit, suspicari sese, bilem transfudantem ex cystide in cavum abdominis diffundi posse per solam telam cellulofam, &, antequam adhuc in circulationem sanguinis deducatur, creare icteros topicos; quorum exempla in monumentis Medicorum varia occurrunt. Inprimis observantur tales in Subjectis, quæ spasmi magis obnoxia sunt: sed & color flavescens partis hujus illiusve in nonnullis hominibus habitualis cernitur, quin tamen læsio ulla in illis percipiatur sanitatis: (quale exemplum paullo ante de tunica sclerotica oculorum retuli.)

Idæam *Brettingianam*, nimum diductam *circulationem cellularem Bordeuvianam* vocat *Cel. To-*

DE; nec ex ipsa adeo naturæ penetralibus petitam autumat. Etsi daremus, ait, icteros tales topicos nasci; a bile transudante an non id ipsum fieri posset per circulationem communem? — Adtulisse id, abs ulteriori epicrisi sufficiat. —

Celeberrimus STUART in *Philosoph. Transact. No. CCCCXIV*, casum exposuit vulneratæ cystidis fellæ; lotium tinctum erat colore croceo, ejusdem coloris cernebantur per abdomen nonnullæ maculæ; bilis vix non omnis in abdomen effusa; contenta, ab ea tacta, flavidissima: unde penetrabilitas liquoris hujus denuo confirmatur.

Ægerrime determinari posse, uti monet *TODE*, an in homine vivo transudet bilis, an vero tota illa cutis variegatio non opus sit unice mortis, an; uti *Criticus* gravis jam dixerat, in *Vivis* abs periculo fieri queat; rationi sane est maxime consentaneum, & nonnisi practica in *Vivis* capta observata hic determinare queunt. —

Instantiæ plures, inter quas eminet urinæ in sanguine manifesta præsentia, dum lotii effluxus obstaculo quodam in urethra præpeditur; quam tamen nemo a regressu lotii per longos ureteres ex vesica in renes, ibique facta admisione ejus ad sanguinis massam deduxerit; (ast, ait *TODE*, etsi visum fuerit *MARCARDIO*, regressum hunc *Nemini* fore probabilem, esse tamen sibi met saltem; ob idæam vero maxime consentaneam, quam *Inl. PETIT* in *Tract. de morb. chirurgicis* hujus rei proposuerat;) argumentum præbent, adsumi non abs ratione posse, vasa plurima resorbentia cystidis fellæ, in statu naturali superfluos unice humores excipientia, conditione morbosa obtinente terminos officii transire bilemque omnem ac integram posse

posse admittere. Renes urinæ secretioni dicati, ipsum tamen subintransmittunt sanguinem. (Observatum sic fuit lac, ab admista exigua sanguinis quantitate, aliam enim non invenio rationem, roseum, quin & sanguinolentum; occurrit talis saliva, talis humor lacrymarum, talisque sudor.)

Resorbentibus autem vasis excepta bilis in systema venosum, inde in massam universam deportatur humorum circulantium. Via hæc ab analogia adeo indicata in sequentibus confirmabitur adhuc variis momentis.

Non probatur **AUCTORI** sententia bilis in hepar, ac per id ipsum in sanguinem, redeuntis — — — FUSE observat hic **TODE**, **AUCTOREM**, etsi lubens adeo in cystide fellea adsumat vasa lymphatica, oblivisci tamen quasi ea in semitis incunabulisque bilis, hinc & oblivisci, resorptionem in hisce ex æquo, uti in cystide, fore possibilem. Hanc solam viam adsumsit **MONRO**, cui regressus violentus ex poris in surculos venæ cavæ pariter vero parum similis videtur: ipsique **TODE** videtur resorptio fieri, ubicunque vasa adsunt resorbentia, cum bile stagnante; utut non in omni casu exin sequatur icterus.

Viæ hinc binæ, quarum ope bilis ex vesica in sanguinem deduci queat, quin transeat per hepar, vasa sunt lymphatica resorbentia porique inorganici tunicarum ipsius cystidis biliferæ. (Tertiam, vasorum lacteorum in intestinis, **AUCTOR** attentione dignam non censuit.) Posterior autem via imprimis obtinebit, cystide maxime dispansa, aut bile plurimum turgida; aut, minus quidem repleta, sed vi externa adveniente compressa; tunicis etiam cystidis ultra modum relaxatis. Qui-

bus in casibus mirum non est, si & post mortem pergat transfusio: pori siquidem, jam adeo ampliati, ut bilem transmittant, post mortem etiam præternaturalem retinebunt diametrum.

Plures longe esse videntur causæ, quibus vasa resorbentia, ut bilem excipiant, coguntur; maximam tamen partem eo redibunt, ut stimulo sollicitata id efficiant. Ambæ illæ rationes una præsentibus esse queunt, tumque effectus eo erit major: eadem expansio cystidis, qua pori ampliantur, aget in fines quoque vasorum resorbentium, eosque, ut adtrahant bilem, coget.

Abs dubio vero actio vasorum resorbentium arhythma frequentior multo icterum excitat, quam bilis ipsius per cystidis tunicas διαπύδουσι: illa siquidem obtinere potest, etsi nimia bilis copia in cystide non adsit, quin & via ex vesicula in intestinum ne minimum quidem impedita. Hinc theoria hæc optime exponit casum, (qui Multis difficilissimus videbatur; quem & HAENIUS in nosocomio sæpe mirabatur,) ubi icterus nascitur ac perseverat, etsi fæces alvinæ colore naturali prorsum tinctæ cernantur; quæ quidem species unice fere remedia exigit roborantia.

Theoriæ sanæ nil magis obpositum monet TONDE, quam resorptionem, per expansionem tunicarum receptaculi productam, majorem vasorum lymphaticorum: ipse AUCTOR fatetur, in Hydropicis, tumidissimo licet abdomine, vix guttulam a resorbentibus vasis adsumi. An non idem in vasis cholophoris obtinere, liceret adsumere? — — — Color flavus fæcum in ictero nonnunquam occurrens, nunc citatus Criticus ait, ex aliis causis valet exponi. Icterus nasci poterit a bile nimia
copia

copia effusa &c. Tum vero nunquam non antea constare deberet, an non rheata in usum fuerint vocata. — Cæterum, prosequitur, omnino vero maxime videtur simile, stimulo quodam, quin ipsa humoris stagnantis acrimonia vasa, resorbentia ad officium suum potius excitari, quam in eo inpediri, quidquid BOERHAAVE, Aliique, adferant in contrarium. Ichor acrior factus vix non facilius resorbetur, quam quidem ipsum pus blandum. (Rationes horum adeo manifestas crediderim, ut expositione non indigeant. Cæterum multiplici experientia adversus solius auctoritatis argumenta statuminantur.)

Adplicat jam Cæl. AUCTOR theoriam nunc propositam geneseos icteri omnium primo illis casibus, ubi spasmi causam præbent mali; præmittens, laxiori nonnihil vocis sensu spasmos hic loci sese sumere pro omni motu, irritationem, seu stimulum præternaturalem, sequente.

Proprie quidem spasmi voce denotatur constrictio præternaturalis musculorum: locum tamen in omnibus corporis partibus, ubi motus fieri queunt, præternaturalis obtinet agendi vis, quæ sub iisdem circumstantiis cum veris spasmis fit, & eandem cum illis originem habet causamque. Etsi motibus hisce non adficiantur partes musculosæ, ob similem tamen ortum spasmi quoque dicuntur: atque hoc sensu & in cerebro spasmos nonnunquam adesse, valet admitti; sic & lotium magna copia limpidumque prodiens, spasmodice expulsum dicitur, utut spasmi nulli in corpore reliquo compareant.

Icterus verum a spasmis nasci posse, ideo ægre admisisse videntur Auctores, quod, secundum receptam hæctenus theoriam, vero non vi-

deretur simile; ictero, ex obstructione, uti rebantur, ductus communis nato, spasmus constringere partem solum debere quamdam ductus huius, quum tamen ductus totus iisdem gauderet fibris, iisdem nervis. Mirum utique videbatur valde, constringi partem eam inprimis debere, quæ foret amplissima, & constringi quidem exactissime, apertos vero remanere ductus multo angustiores cysticos & hepaticos, qui tamen Totum continuum cum ductu communi constituunt. Maxime demum singulare videbatur, casum hunc sæpe satis contingere debere; toties nempe, quoties icterus adesset spasmodicus. Multa adeo hic subponenda esse simul concurrentia AUCTOR ait, ut casus tales, etsi quidem non omnino impossibiles eos esse concedat, pro rarissimis & rarioribus multo, habendi sint icteris prodeuntibus ab animi pathematibus, colicis spasticis, aliisque spasms, ut & icteris ipsius epidemicis. Potius, cum *Cl. HEEERDEN*, se plane negaturum fuisse ait, icteros natos a spasms, quam recepturum illam theoriam. Miratur hic *Inl. TODE*, AUCTOREM non usum fuisse sententia *Halleriana*, qua irritabilitas dictis ductibus biliferis denegatur: probari sibi pariter addit thesin Critici insignis, qui edixerat, sub spastica constrictione intestini ostium fors unice ductus communis una obserari spasmodorum vi.

Manifestum ex plurimis instantiis, quarum variæ hic enumerantur, imperium nervorum est in systema totum cholopoëticum, ipsamque adeo in cystide contentam bilem. A variis causis bilis in cystide jam colore tingitur viridi, nec in intestinis primum colorem hunc ab admistis aliis liquidis indispiscitur; (quod adplicandum partim erit expositioni

tioni antea adlatæ *Haenianæ*, coloris viridis fæcum virentis in Infantibus;) in aliis casibus bilis non virescit, nec majori copia in vias primas effunditur; ast aliud nascitur phænomenon: bilis intrat sanguinem, cutis colore tingitur icterico.

In utrisque nervi organorum ope cystidis agunt in bilem ea contentam. Qua id fiat ratione in primo casu, non adeo facile expositu: admisceri quid interim videtur, colorem mutans. Minus intricatus alter est. Nervi, quorum tantum in machinam totam imperium, deducti in arhythmum, cogere possunt vasa resorbentia, ut & ipsa aliud agant, quam sui, in statu naturali, sit officii; ut hinc pro partibus bilis aquosis, ipsam meram hauriant bilem: instantiam dilucidantem præbet phænomenon analogum in profluvio lotii aquoso, (seu, quam vocem huic adfectioni determinandæ probe congruam censeo, *hydruria*,) a nervorum perturbatione excitato.

Bene hic denuo monuit TODE, AUCTOREM minus recte actionem nervorum in solam & unicam cystidem considerasse, prætermissa bilis fabrica principe, jecinore. An quippe læsiones cephalicæ in cystidem magis agunt, an in hepar? An non in hepate maxime deprehenduntur effectus pessimi *febris illius flavæ Americanorum*? Hypothetica valde sententia est AUCTORIS, CRITICUS HAFNIENSIS prosequitur, stimulum immediatum, quem in hepar agere posse, manifesto largitus fuerat, resorptionem in viscere hoc eodem producere nullam, mediate tamen producere in cystide fellea, —

Non unicam autem nunc dictam causam esse icteri, nascentis a resorptione per vasa resorbentia bilis, expressæ spasmo paullo post patebit. Examinat nunc AUCTOR causas omnes, quæ spasmī, aut potius stimuli (Reiz) ope, icteros creare queunt.

Sunt icteri, ubi libera bili in intestinum via, quum fæces naturali colore tinctæ: ægre sane his adplicanda theoria regredientis per hepar bilis in sanguinem; via enim exitui libera, theoria retrogredientis bilis, & circulationis legibus & ipsis hydraulicis est adversa. Phænomenon autem hoc ipsum ex AUCTORIS theoria facile exponitur, & vix non unice, sive vasorum relaxatio, sive spastica intensio malo præbeat ortum bilis in sanguinem regressui; quod posterius denuo a variis nasci valet fontibus.

Si in ictero nec ductuum biliferorum obstructio, nec calculi, nec læsiones externæ, aliæve in oculos incurrentes, seu materiales, occurrant causæ, quæ stimulo excitato spasmosque generando, agere potuissent; si nec animi præcesserint pathemata; invisibilis in mentem veniet causa spasmorum; dummodò momenta adfint, statuendi præsentis in corpore spasmos: vel vero relaxata ostia vasorum resorbentium fontes icteri constituent; qui tamen rarissimus erit casus; raro saltem occasio aderit, ut nos convincere præsentix illius queamus; plerumque icteri causis debentur satis manifestis.

Calculi, icteri frequentissima origo, sæpenu-
mero stimulo excitato turbas illas in systemate produ-
cunt bilifero. Huc nequidem refert AUCTOR casus
eos, ubi calculus cystidem turgentem occludit; ubi,

ad-

applicata huic pressione quacunq̃ue, bilis copia vasorum resorbentium minuitur: sed tales innuit circumstantias, ubi ratione minus patula sit actio.

— Calculum in cystide adhucdum hærentem liberum, præsentē ictero, stimulo agere, dici valet. Irritabilem autem ad hoc, ut effectus tales producat, cystidem satis esse, extra controversiam videtur positum. TACCONI, WEPFERUS & VALCARENGHI adnotarunt, dolorem in cartilagine xyphoide signum esse peculiare characteristicum calculi cystici: *in parte secunda operis hujus, No. VIII.* retulit AUCTOR extispiciū cadaveris Viri autochiriz enecti, unde verosimile videtur, calculos quosdam parvos, asperos, bilemque præternaturaliter constitutam, irritatione tunicarum cysticarum, sensationes melancholicos in illo vivente effecisse, quibus motus sibi demum violentas manus intulit. Huc omnino facientia exempla adducuntur ex BARTHO-LINO, observatione CL. WALTHERI, qui magnam in ductibus biliferis Puellæ, epilepsia defunctæ, invenit copiam lumbricorum; & VALCARENGHIO.

In plerisque icteris una adeste spastici quid, nec morbum hunc unice adeo, uti adsumtum passim fuit, ab obpilatione mechanica ductuum biliarium, indeque sequente bilis redundantia, procreari, symptoma innuere videtur, vix non omnem, undecunque demum ortum, icterum comitans. Observationes siquidem omnes docent, adeste in Ictericis tensionem validam, dispanسیونem ac obpressionis sensum in latere dextro; quæ quidem symptomata adeo frequentia & morbo huic propria cernuntur, ut adnumerata fuerint icteri symptomatibus solitis. Auctor icterum maiorem paullo his malis carentem nunquam vidit. Sensatio hæc autem, ait,
minime

minime a causa pendet mechanica, dispendente, & comprimente, sed tensioni tribuenda est spastica. Stimulus, creandis icteris aptus natus, hac sensatione, aut motibus, ea arte stipatis, icteros videtur producere, aut bilem ad ingressum in sanguinem disponere: causæ præterea quævis occasionales icteri, sive calculi sint, sive vermes, e. s. p., creare videntur, si in nervos alia ratione agant, symptomata alia, non vero icterum. Symptoma hoc ictero vix non essentiale, quum spastica sit indolis, indicare videtur nobis, in ipso illo morbo spastici quid in considerationem venire debere.

Ex dictis, AUCTOR ait, icterorum pleræque causæ considerandæ erunt ut meri stimuli, seu ut meræ irritationes, quarum effectus erit motus spasticus vasorum resorbentium, quorum ope bilis intrat massam humorum circulantium. (Non abs ratione TODE observat, AUCTOREM *spastici* voce nonnunquam minus proprie uti, quum vasis spastice adfectis utique adsit coarctatio luminum illorum; hac vero præsentē, resorptio major, auctior quæ obtinebit?) — Latius hoc deducit expositione effectuum productorum a calculis inhærentibus cystidi ipsi felleæ, aut in tactis ejus collo, ductibus biliariis; tum & expositione icteri, excipientis morsum animalium venenatorum. (Cujus tamen jam antea mentionem injeci.)

In *prima sectione* tractatus hujus demonstraverat AUCTOR, obstructions hepatis, per se singulatim consideratas, non necessarias icterorum causas esse, uti Nonnulli ex theoria adsumta deducere conati fuerunt; utut minime adserere velit, icterum nunquam oriri posse ab obstructione hepatis. Evincere nunc conatur, obstructions tales, inter alia plurima pessimaque, quibus corpus adficiunt,
mala,

mala, causam etiam subpeditare posse inordinati bilis cursus; obstructions insuper illas ipsas, inter spasmos numerosos alios, quorum præbent scaturigines, efficere quoque posse, ut vasa resorbentia cystidis felleæ spastica ratione agant. Unde itaque & icterus nasci poterit hac ex ratione, & Medenti ad hancce causam etiam erit respiciendum. (Ast in memoriam hic denuo revocanda, quæ paullo antea ex *Cel. TONDE* circa usum vocis *Spastici* monui.)

Deducit tum, a causa spastica & irritante repetendos esse icteros, qui nonnunquam comitantur sæviores colicas, emeses, vermes in systemate biliariorum vasorum præsentis; bilis ipsius singularem quamdam acriorem indolem; calculos, ipsi adhuc cystidis cavo inhærentes, aut infixos hepatis; qui, si unquam icterum saturatius flaventem excitarunt, ad cuius genesin quoque concurrit bilis vesicaria, sympathiæ id factum ope hic adferitur, simulque monetur, indubium sane esse, calculos hepaticos, quin contribuat quid simul vesicula fellea, producere posse arquatam morbum: tum latius diducitur actio hepaticarum quarundam adfectionum in cursum bilis cysticæ, indeque orturum icterum; quæ omnia ab irritatione, consensu nervorum, sympathiaque partium commode **AUCTORI** exponuntur. Instantia hominum spasmis, tum aliis, tum hysteris, laborantium, subitoque colore flavo corpus tinctorum, denuoque, spasmis recedentibus, auriginoso pigmento liberatorum, magnum theoriæ geneseos icteri ex causis spasticis robur adferre, **AUCTOR** denuo observat.

Transit tum ad adplicationem theoriæ novæ ad casus illos, ubi icterus non adeo a spasmis or-

tum repetere videtur. Primo loco hic occurrunt obturationes ductuum biliferorum, cujuscunque demum sint speciei; sic v. c. inflammationes partis concavæ hepatis producunt icterum; uti antea jam, in *prima sectione*, dictum fuit.

Obstructiones ductuum biliarium omnes, ipsis ductibus inhærentes, rariores, AUCTOR ait, sed plerumque certæ, icterorum causæ sunt. Refert hic ampliorem historiam ex *Transactionibus Anglicanis*, Cl. AMYAND observatam; ubi, ut omnia alia relinquam hic intacta, ductus cysticus ex integro erat concretus; hepaticus tamen & communis liberi hiabant in dodecadactylon, fæcibus ad ipsum vix non vitæ finem colore legitimo tinctis. Remittere debeo Lectores ad ipsam diatriben, ut rationes, quas, pro expositione casus hujus, tum Cl. STUART, tum AUCTOR, vero magis similes, adtulit, discant & examinent. (*)

Cal-

(*) Retulit etiam Cl. DRUMOND casum, a Cel. TODE pariter excitatum, Fæminæ, ictero trimestri enecatæ, in qua ductus cysticus concretus plane erat; cystis autem fellea turgebat bile spissa, atra. Quæri hic tamen omnino posse monet, cur bilis resorpta non fuerit? Quî persistere tamdiu icterus potuerit? — Exempla hujuscemodi vero occurrunt plura, ubi bilis tamdiu stagnat, ut vix non picea denum evadat, & solus aquosus latex, chenica plane separatione, a reliquis, crasin hujus succi ingredientibus principiis sejungi videatur: quin species calculorum *spurias* observatas constat, mera bile, in

ex-

Calculi, ductibus inhærentes, omnino irritatione, indeque orto motu spastico, icteros generare queunt: admittit & Auctor, causam hanc fors obvenire frequentissimam: sed morbus hic ipse produci etiam valet ab eadem causa, eo, quod ductuum lumina obpilentur.

Recte dixit Auctor, calculos felleos adesse posse, quin tamen Æger illis laborans, adfectus fuerit ictero, etsi Cor, pluresque Alii, crediderint, effectum hunc causam illam vix non indubie sequi debere: ipse calculum nucem myristicam majorem magnitudine æquantem in cystide hominisprehendit, qui nunquam regio morbo laboraverat.

Int. Tode quoque addidit, in extispicio Reginae cujusdam copiam magnam calculorum biliarium fuisse inventam, quin tamen icteri ullius umbra in Illa vivente unquam foret detecta.

Vasa resorbentia cystidis relaxata ictero generando apta quoque nata esse; vero valde simile videri Auctori videtur. Nasci & poterit arquata adfectio, bile nimium spissa, quam ut per ductus solitos ex vesicula prodeat; ubi nulla alia via supererit, si nascatur icterus, quam ut resorbeatur per vasa cystidis resorbentia,

Ortum

extractum verum inspissata compositas; ignis flammam probe alentes: icterus tum in Nonnullis etiam longius multo duraverat, quam quidem rem theoretice Consideranti fieri posse videtur. —

Ortum demum icteri omnino repetere licet ab obpilationibus cunctis ductus communis in dodecadactylon, v. c. facibus induratis &c.

Quodsi magna bilis in cystide adsit copia, ea-que conprimatur, præter resorptionem transfusio per membranas, receptaculum hoc ipsum constituentes, causam præbere poterit malorum, cujus rei in *primo sectionis hujus capite* injecta fuit mentio.

Transcolatio hæc ipsa fellis per tunicas cystidis locum pariter obtinere poterit, bile varia ratione præternaturaliter adfecta. (Præcipue dum diacrisi putrescente adtenuatur; unde repetendæ erunt, ut plurimum, maculæ, quæ in cadaveribus vicina cystidi, tum & extimam nonnunquam corporis superficiem, cystidi incumbentem, tingere deprehenduntur, quarum antea adlata fuerunt instantiæ. Id saltem ex cadaverum, bilisque varie adfectæ disquisitionibus, didicisse me credo. Bilem vero varia valde ratione in ipsis Ictericis, eodem colore tinctis, esse constitutam, res est extra dubitationis aleam posita, & instantia simul confirmatur, quam tum alias, tum hæc scribens observavi; Ictericis nonnullis salivam esse amaram, felleam, dum Alii, si ex colore solo feratur judicium, multo magis icterici, salivam vel a statu naturali non recessisse, vel insipidiorem adhuc sibi videri, ajunt & adfirmant. —

In septimo sectionis hujus capite enumerat *Cl. MARCARD* Auctores, qui theoriæ novæ idæam quamdam subpeditasse videri possent.

In octavo & ultimo capite enumerantur, quæ theoriæ novæ geneleos icteri stipare videntur, difficultates, una cum quæstionibus variis, easque

re-

resolvendi tentamine. Hæc omnia, invitus licet relinquere *nunc* intacta debeo.)

Videamus jam pauca, quæ ex *Haenianis* circa icterum ex codice adhuc sunt adferenda, abs additamentis.

Sed fiunt, ait *beatus Auctor*, præter dicta, sæpe lapideæ concrectiones in hac vesicula fellea, tam in hominibus, quam in animalibus (Historiam harum, uti alio loco monui, in *Symptomatologiam* differre malui, eas una cum reliquis lithiaseos animalis productis relaturus.

§. 817. *Si autem generatio & excretio bilis in intestina læditur.*

Paucis potero hanc §. exponere, quum pleraque ad §§. 773 & 788 dicta fuerint, aut in parte *symptomatologica* adferentur.

— — I. *Icterus*. Quæsitum fuit, num a bile hepatica an a cystica oriatur icterus?

ANONYMUS Auctor *Tom, I. Art. Edimb. No. 33.* multus est in disquirendis rationibus, quæ causam veram icteri patefaciant; putatque rarius hepaticam, plerumque cysticam, in causa esse. Quia nimirum hepatis gustu blandum, tum etiam colore parum admodum flavet. Prætereaque, si inflammatione, si obstructione, si scirrho tumeat alicubi hepatis portio, illa, premendo ductus biliarios, simul premit ramos venæ portarum. Qua compressione efficitur id, ut bilis secretio a sanguine venæ portarum ibi loci impediatur. Ergo neque hac ratione potest icterum producere.

Verum animadvertit idem ANONYMUS Auctor, posse tamen casus dari, ubi hepatica bilis levem facere icterum potest; nimirum in hominibus, qui acri bile abundant, qui dicuntur biliosi temperamenti: in his acrior natura bilis, si, vitio quopiam notabili porum

biliarium obstruente, bilis hepatica, quæ supra locum obstructionis est, refluat in sanguinem.

Cæterum icteros oriri, vel quod hepar cava inferiore parte tumens comprimat ductum cysticum, vel communem, unde itinere bilis flavæ ad duodenum intercepto, bilis per varios canales, quibuscum communicat cum hepate, tum & per venam cysticam in venam portarum, sanguini adfundi & icterum creare potest. Vel secundo icterum oriri, quia calculus obstruit ductum sive cysticum vel communem, ut toties cadavera hanc causam manifestarunt; quamque, ut icterorum causam frequentem, BONNETUS, MORGAGNI in *Adversariis*, aperte demonstravere. Addi pro tertia causa potest impedimentum natum in duodeno, quod bilis intra duodenum effusionem impediat; ut meconium v. g., vel alia caseosa in infantibus recens natis; ut in Hystericis aut Hypochondriacis ira, terrore, agitatibus, spasmus ad hæc loca natus quandoque facit. Hac theoria natus icterus intelligitur.

(Hæc HAENIUS, de theoria Marcardiana nil adhucdum habens cognitum.)

2. *Cachexia biliosa*, quæ stricto sensu icterus quidem non est, sed tamen latiore sensu eo pertinere videtur. Hæc species obtinere videtur in multis hominibus autumnali tempore febre epidemica intermittente correptis. Vid. *Int. L. B. in Comment. ad §. 918. cap. de hepatitide.*

3. *Calculus*. (Hujus expositio in SYMPTOMATOLOGIA una cum reliquis tradetur.)

5. *Obstructiones*, in ductu choledochi, vel communi, vel ipsa cystide, dum hæret talis calculus, vel gypsum: qua facta oriuntur icteri sæpe. Dico sæpe. Matronam per quinque integros annos in perpetua cura habui, variis, iisque pessimis, symptomatibus labo-

ran-

rantem, sed numquam ictero. Mortuæ aperui cada-
ver. Ex vesicula fellea inmaniter aucta educo plus
quam mille calculos parvos, plerosque quadrangulos.
Plus quam mille facile adsevero; nam magis quam di-
midiam partem Aliis dedi, & ultra 500 adhuc possi-
deo. Ergo obstructio maxima in tota vesicula admo-
dum magna, ita ut pauca copia spissæ bilis, quæ ad-
huc aderat cum lapidibus, in intestina fluere nequive-
rit; nec tamen icterus unquam. Videtur secretio bi-
lis cysticæ in ea tandem cessasse.

Cl. MORGAGNI *Adv. anat.* 3. n. 28. pag. 61.
idem est expertus: „ Et mihi quidem forte contigit,
„ ut ex *neutris* ullam peculiarem noxam, sed ne icte-
„ ricum quidem colorem iis, in quibus comperi, in-
„ ductum esse, observaverim.“ Quod ait ex *neutris*,
est, quod ex una Fæminæ vesica fellea extraxerat 120
calculos; ex alia cystide fellea eduxerat 72 calculos.

6. *Excrementa alvi alba, dura sicca*; in multis
Ictericis, sed non in omnibus: immo excrementa ali-
quando talia sine ullo ictero. In bilis generatione de-
ficiente, vel impedita excretionem, excrementa fiunt
alba, quia bilis eadem colorans deest, vel non ad-
fluit.

(De his jam antea, dum de ictero sermo erat,
pluribus actum: addam tamen hic ex *Haenianis* se-
quentia:)

HIPPOCRATES *Coac. lib. I. cap. I. n. 38.*: Icte-
rici multum fœdati pereunt; sed in *Epidemicis* lethale
casum APOLLONII describens, ait: „ Dejectio-
„ nes erant variæ. Aut enim nigræ fuerunt, paucae,
„ æruginosæ; aut pingues, crudæ, mordaces; non-
„ nunquam & lacteas visus est emisisse.“ Unde in-
telligimus, quandoque adesse icterum lethalem, cum
sæcibus aliquando albis, sæpe variorum colorum.

Tandem albæ fæces non semper præsentem icterum denotant. Lanioni, Viro magno, facie plane venerabili & formosa, adfui verno tempore anni 1746., hepatitide inflammatoria laboranti. Is mox ictericus factus: curatur a febre, ab ictero, manente circa hepatis dolore. Icterus nunquam rediit, sed ab illo tempore ad mortem usque, quæ contigit quindecim mensibus postea, semper albas, argillaceas fæces reddidit liquidas, torminosas plerumque, nisi forte aliquando, non semper, flavedinis tantillum haberent a medicamentis.

Ergo curato ictero, formositas Viri rediit læte rubens cum intersperso candore, & tamen quindecim mensibus continuis posthac albas, argillaceas fæces reddidit, ad mortem usque: causam forte intellexissem, nisi pertinaciter mihi negata fuisset inspectio cadaveris:

An secretio bilis cessavit post icterum? Non videtur: a bilis secretionem impedita cachexia oritur, nam bile nemo inipune caret. Tamen anno posthac pulcherrimus in vultu Viri color erat.

Aliquoties albam argillaceam alvum mihi licuit videre in Puerperis, quas mox a partu alvus nimia, diuturnaue corripuisset. Unam Puerperam subpurato utero mortuam aperui; quæ talem albam alvum per plures septimanas habuerat, antequam uteri subpuratio se prodebat, quæ tamen in systemate bilioso vitia nulla haberet: Aliam vidi post talem alvum diuturnam pulcherrime restitutam, neque antea, neque postea ulla icteri signa habentem.

Sunt igitur phænomena in hoc systemate bilioso vix explicanda: in ictero nonnunquam manere excrementa colorata: excrementa alba, nulla bile tincta, diu multumque prodeuntia, citra ullum icterum: certe indicant, haud satis a nobis capi mirabile hoc systema.

ma. Quæ causa, quod homo sumens drachmam v.g. rhei, urinam Ictericorum more ita tinctam habeat, ut flavedine permanente tingat linteum, & maxime matulam terream vitrea crusta obductam: & tamen homo eo tempore non habet ullam flavedinem in toto corpore. Tamen ex communibus principiis concludimus, serum sanguinis, seu aquam ejus, tingi a rheo hac flavedine, inde talem prodire flavam urinam, idque, si non multum bibat per totam diem, aliquando & sequenti die. Immo fit, ut urina IctERICI non tam tenaciter flavedine inhæreat linteo, & tamen homo flavescat; hic vero in tanta urinæ flavedine nullus in oculis aut alibi color flavus? Quantum est quod nescimus!

Quid quod præfagiant fæces albæ phrenitidem? eamque lethalem? Quo in casu plerumque & urinæ pallidæ, decolores, tenues, adsunt. Mirum phænomenon! indicans forte, quod bilis ultra non secernatur, at in sanguine maneat. Sed cur tunc urinæ inde non colorantur? An ergo potius constrictio spasmodica fit in toto hepate, ut bilis exitus in duodenum, & retrogressus in sanguinem, impediatur?

7. *Adpetitus deletus*: bile enim carens sanguis fit blandior, quam oportet, nec ita succus gastricus stimulat ventriculum ad adpetitum. Hæc una ratio, cur amara vocentur stomachica: certe in tali casu quid juvant.

8. *Ciborum digestio impedita*, quia carens ventriculus hoc stimulo mox expositus, minus se contrahit ad ingesta; minus ea adterit, conminuit, miscet, dividit, adtenuat.

9. *Miscela impedita partium adsumtarum*. Bilis adsumtis alimentis admista in intestinis dividit oleosa, tenacia, eaque reddit miscibilia aquosis, ut ex virtute bilis sæpius demonstratum.

10. *Tym-*

10. *Tympanitis.* (De hac in sequentibus, ubi de hydropo sermo erit, simul agetur.)

Sunt denique venena icterum facientia : qualia numerantur plura apud Auctores, ut araneæ, viperæ. (De his pariter jam antea dictum. — De curatione autem icteri in SYMPTOMATOLOGIA agetur.)

Pag. 116. Lin. 20., L., cum aliis magnis Practicis.



